

Шарқ ўлдузи

Адабий-бадиий, илмий, ижтимоий-сиёсий журнал

1931 йилдан чиқа бошлаган

ЖАМОАТЧИЛИК КЕНГАШИ

Мухаммад Али	Абдулла Орипов
Эркин Воҳидов	Умарали Норматов
Кенгесбой Каримов	Хайриддин Султонов
Наим Каримов	Сирожиддин Сайид
Иқбол Мирзо	Мехри Абдураҳмонова
Абдуваҳоб Нурматов	Йўлдош Солижонов
Баҳамдулло Нурабуллаев	Шуҳрат Маткаримов
Нурбой Жабборов	Адҳамбек Алимбеков
Ислом Ёкубов	Жамолиддин Муслим

Бош мухаррир в.б. — Сирожиддин Рауф
Назм бўлими мудири — Икром Отамурод
Наср бўлими мудири — Рисолат Ҳайдарова
Масъул котиб — Шавкат Валиев



УШБУ СОНДА:

ҲАЗМ

Ҳалима ХУДОЙБЕРДИЕВА

*АЙЛАНАР ТАҚДИРНИНГ
ТӨГИРМОН ТОЧИ*

Шеърлар

*Яшаб бораяпман паришонхотир,
Гоҳ узун, гоҳ қисқа дастга ўхшайман.
Гоҳ ўзни сезаман ҳар нега қодир,
Гоҳ ердаги чўпга, хасга ўхшайман.*



Даврон РАЖАБ

ҲАЗМ

ҲАЁЛИМНИНГ РАНДАРИ

Шеърлар

*Дунё борки, бор экан қайгу,
Энди дардлар руҳим огритмас.
Демак, энди қаҳқаҳа отсам,
Даврон сурсам кулгили бўлмас.*



Лиляна СТЕФАНОВА

ҲАҲОН АДАСИЁТИ

ЮРАДИМДА ЅИҒАН МУҲАББАТ

Шеърлар

*Мен борман, сен қолмайсан музлаб,
Бахши этаман меҳр, ҳарорат.
Доим сени топади излаб,
Юрагимда ёнган муҳаббат.*



ҲАСР




Жасур КЕНГБОЕВ

ҚҰХНА ТӘЛІОҒ

Пенсияга чиққан одам тез қариди. Етмишев ўйлаб қолдикі, шундай пайтда одам ишдан чиққан матақдай гап экан: ўтган ҳам, кетған ҳам бир тепиб ўтади-ю, ҳеч ким мундай бир азизроқ жойга олиб қўймайди...

САНДАМ

Абдумажид МАДРАИМОВ



*НАВОИЙНИНГ ҲИНДИСТОННИК
МУХЛИСЛАРИ*

Навоий асарларига Ҳиндистоннинг машхур расомлари Фаррухбек, Лаъл, Ҷхарамдас, Мукунд, Говардхан, Маноҳарларнинг ажойиб расмлар ишлагани қувончли ҳолдир. Бу мумтоз миниатюраларни Ўзбекистон ва Ҳиндистон дўстлигининг ноёб обидалари деб баҳолаш мумкин.

ҲАСР

Абдунаби ҲАМРО



*ЕРПЛЛАДАЛИ ҲМР
Қисса*

Одам боласининг қонида айланиб юрадиган унсурлар орасида ношуқрлик биринчи ўринда турса ажаб эмас. Бу баттол унсур миянинг аллақайси бурчакларида кўздан пана бўлиб яшайверади. Бир куни келиб кутилмаганда бош кўтариб қолади.

Шарқ ўлдузи

2015

4-сон

Муассис:

ЎЗБЕКИСТОН ЁЗУВЧИЛАР ЮШМАСИ

* Муаллифлар фикри
тахририят ижодий жамоаси нуқтаи
назаридан фарқланши мумкин.
Тахририяга юборилган
материаллар муаллифларга
кайтарилимайди.

Журнал ОАҚ эътироф этган
нашрларнинг 10.00.02 "Ўзбек
адабиёті" ихтиосолиги бўйича
рўйхатига киритилган.

* Журналга обуна даврий
нашрларни етказиб бериш
билин шугууланувчи барча
ташкилотлар оркали амалга
oshiрилади.

Обуна индекси – 911

Манзилимиз:

100127, Тошкент шаҳри,
"Ўзбекистон" кўчаси, 16-а уй.
Телефонлар:
227-00-81, 245-22-99, 245-27-87
www.sharyulduzi.uz
e-mail: sharyulduzi1931@mail.ru

Босишига руҳсат этилди
10.09.2015 йил.

Қоғоз бичими 70x108 $\frac{1}{16}$.
Офсет босма усулида тип.
№ 1-қоғозга босилди.

Босма тобоги 11.

Шартли босма тобоги 15,4.

Нашриёт хисоб тобоги 17,2.

Адади 1650 нусха.

Буюргта №

Журнал Ўзбекистон Матбуот ва
ахборот агентлигига 03.04.2009 й.
0562-ракам
билин рўйхатга олинган.
Ўқитувчи НМИУ босмахонасида
чоп этилди.

Корхона манзили:

Тошкент шаҳри, Юнусобод тумани,
Янги шаҳар кўчаси, 1-уй.
Журнал иккى ойда бир марта
чоп этилади.

Мусаххих:

Дилфуз Махмудова

Саҳифаловчи-дизайнер:

Мадина Абдуллаева

Copyright © "Шарқ ўлдузи"

МУНДАРИЖА

Ўзбекистон Президентининг янги китоби.....5

Ватан сехри

Миртемир. Ёруглик. Шеър.....7

Наср

Кенгесбой Каримов. Улуғ дашт бўрилари. Роман. Охири.....8

Жасур Кенгбоев. Икки хикоя.....48

Абдунаби Ҳамро. Ертўладаги умр. Кисса.....66

Дилфузга Үрол қизи. Икки хикоя.....90

Назм

Халима Худойбердиева. Айланар тақдирнинг тегирмон тоши.

Шеърлар.....43

Тошпўлат Аҳмад. Шафақ ёлқини. Шеърлар.....58

Мунаввара. Мен ўзимни топмоғим керак. Шеърлар.....62

Музаффар Аҳмад. Юрак ҳамон титроқда. Шеърлар.....82

Гулжамол Аскарова. Ишқ ювсин кўнглимнинг кирғокларини.

Шеърлар.....86

Даврон Ражаб. Ҳар бир кун парвозга менгзалган лаҳза.

Шеърлар.....105

Носиржон Тошматов. Қайга боксан сени кўраман.

Шеърлар.....109

Адабиётшунослик

Қўлдош Пардаев. Муқимий "Саёҳатнома"си матни

тариҳидан.....113

Шавкат Каримов. Абдулла Қаҳхор ижоди хорижий

таржимонлар талқинида.....143

Таҳлил

Муҳаммаджон Холбеков. Сюрреализм шеърияти: Гийом

Аполлинер.....121

Қизлар дафтаридан

Тонгларни ёритган мунаvvар қуёш. Шеърлар.....127

Санъат

Абдумажид Мадраимов. Навоийнинг ҳиндистонлик
мухлислари.....133

XX аср мутафаккирлари

Эрих Фромм. Инсон қалби. Охири.....149

Бу бўстон сахнида

Юсуфжон Мирзамахмудов. Боқишиларинг дил қулфин очар.
Ғазаллар.....161

Фанимиз фидойилари

Ҳамидjon Ҳомидий. Саркор.....165

Унутмас мени боғим

Жуманиёз Жабборов. Сен – мен учун абадий ёғду.

Шеърлар.....170

Берди Раҳмат. Юракдаги Хоразм. Эссе.....174

Жаҳон адабиёти

Лиляна Стефанова. Юрагимда ёнган мухаббат. Шеърлар.....185

Ранко Маринкович. Тимсол. Ҳикоя.....189

Адабий ҳаёт.....206



Ўзбекистон Президентининг яши китоби



Ўзбекистон Республикаси Президенти Ислом Каримовнинг “Она юртимиз бахту иқболи ва буюк келаҗаги йўлида хизмат қилиши – энг олий саодатдир” номли китоби “Ўзбекистон” нашириёти томонидан кўпминг нусхада чоп этилди.

Маълумки, 2015 йил 29 март куни юртимизда улкан сиёсий воеқа – Ўзбекистон Республикаси Президентлигига сайлов бўлиб ўтди. Ҳар томонлама юқори савияда, муқобиллик асосида ўтган бу сайлов мамлакатимизни демократик ривожлантириш йўлида муҳим, ҳал қилувчи босқич бўлиб, ҳалқимизнинг ўз кучи ва салоҳиятига бўлган ишончи нақадар мустаҳкам экани, унинг сиёсий-хуқуқий онги, ижтимоий фаоллиги, Ватанимиз тақдиди учун дахлдорлик ҳисси тобора ортиб бораётганини яна бир бор намоён этди.

Конституциямиз, миллий ва ҳалқаро хуқуқ нормалари, демократик таомиллар асосида ўтказилган ушбу сайловда сайловчиларнинг 90,39 фоизи Тадбиркорлар ва ишбилармонлар ҳаракати – Ўзбекистон либерал-демократик партиясидан Президентликка номзод Ислом Абдуғаниевич Каримовга овоз берди. Бундай ёрқин ғалаба, ҳеч шубҳасиз, Ислом Каримовнинг давлат раҳбари сифатида Ўзбекистон мустақиллигини таъминлаш, уни ижтимоий-иктисодий ривожлантириш борасидаги стратегик мақсад ва вазифаларни ҳал этиш йўлидаги бекиёс хизматлари, юртимизда амалга оширилаётган кенг кўламли ислоҳотларнинг ҳалқимиз томонидан юксак эътироф этилгани ва яқдиллик билан қўллаб-қувватланганидан далолат беради.

Ушбу китобдан давлатимиз раҳбарининг сайловолди жараёнларидағи 20 дан зиёд учрашув ва анжуманларда, жумладан, Олий Мажлис Қонунчилик палатаси депутатлари ва Сенати аъзолари билан учрашувларда, иккала палатанинг қўшма мажлисида, Вазирлар Маҳкамасининг мамлакатимизни 2014 йилда ижтимоий-иктисодий ривожлантириш якунлари ва 2015 йилга мўлжалланган иктисодий дастурнинг энг муҳим устувор йўналишларига бағишлиланган мажлисида, Болалар спортини ривожлантириш жамгармаси Ҳомийлик кенгашининг йиғилишида, Тадбиркорлар ва ишбилармонлар



ҳаракати – Ўзбекистон либерал-демократик партиясининг VII съездидаги, Қорақалпоғистон Республикаси, вилоятлар ва Тошкент шаҳар сайловчила-ри вакиллари билан учрашувларда, Ўзбекистон Республикаси Президен-ти лавозимига киришиш тантанали маросимидағи нутқ ва маърузаларида, шунингдек, 9 май – Хотира ва қадрлаш куни муносабати билан оммавий ахборот воситаларига берган интервьюсида билдирган энг муҳим, концеп-туал аҳамиятга эга фойя ва фикр-мулоҳазалари ўрин олган.

Давлатимиз ва жамиятимизнинг яқин ва узоқ истиқболга мўлжалланган тараққиёт стратегияси аниқ-равшан белгилаб берилган ана шу чиқишлиларда мамлакатимизни демократик янгилаш ва модернизация қилиш жараёнлари-ни янги босқичга кўтариш, унинг иқтисодий қудратини ошириш, ижтимоий соҳалар – таълим-тарбия, илму фан, соғлиқни сақлаш, маданият ва санъат, спорт тизимини изчил ривожлантириш, аёллар, кексалар ва ёшларимиз учун янада қулай шароит ва имкониятлар яратиш, ҳар бир худуд ва минтақани равнақ топтиришга доир янги режа ва устувор лойиҳалар, бугунги кунда дунё-да юз бераётган кескинлик ва қарама-қаршиликларнинг моҳияти, турли таҳдидларнинг олдини олиш, Ўзбекистоннинг ташқи сиёсат концепцияси тўғрисидаги қарашлар ҳар томонлама пухта асосланган ҳолда баён қилинган.

Мазкур тўпламнинг бош гоясини қўйидаги сўзларда мужассам бўлган энг муҳим ўзак фикр ташкил этади: “Биз ўтган даврда амалга оширган ишларимизга баҳо берар эканмиз, “Кеча ким эдигу бугун ким бўлдик?” деган савол асосида уларнинг моҳияти ва аҳамиятини ўзимизга чуқур тасаввур этамиз. Айни вақтда “Эртага ким бўлишимиз, қандай янги мэрраларни эгаллашимиз керак?” деган савол устида ўйлашимиз, нафақат ўйлашимиз, балки амалий ишларимиз билан бунга жавоб беришимиш лозим”.

Ана шундай ёндашув асосида мамлакатимизнинг мустақиллик йилларида босиб ўтган тарихий йўли теран таҳлил қилиниб, бу ҳаётй саволларга чуқур ва ҳаққоний жавоблар берилгани нашрнинг қимматини янада оширади.

Ушбу китобни мутолаа қиласа эканмиз, ҳар бир масалага халқимизнинг миллий манфаати ва яна бир бор миллий манфаати нуктаи назаридан ёндашиш, теран қиёсий-таҳлилий мушоҳада, тарих, замон ва келажакни бир бутун диалектик ҳодиса сифатида кўриш, ҳар қандай мавзуда жўшқин баҳс ва мулоқотга тайёрлик – буларнинг барчаси мустақил ўзбек давлатининг асосчиси, дунё миқёсида тан олинган йирик давлат ва сиёсат арбоби Ислом Каримовнинг сиёсий услубига хос бўлган ёрқин хусусиятлар эканига ишонч ҳосил қиласиз.

Ижтимоий-сиёсий, маънавий-маърифий ҳаётимизда бекиёс аҳамият касб эта-диган мазкур китоб ҳозирги ва эртанги кунимизнинг энг устувор йўналишларини ўзида мужассам этиб, янги ва яқин тарихимизнинг ҳали биз тўла англаб етмаган кўплаб қирраларини кашф этишда, жамиятимизнинг тараққиёт фалсафаси-ни, мамлакатимиз ва халқимиз келажаги, унинг равнақини белгилаб беришда, айникса, ёшларимизни Ватанга муҳаббат ва садоқат руҳида тарбиялашда муҳим дастуриламал бўлиб хизмат қилиши шубҳасиз.

**МИРТЕМИР****ЁРУГЛИК**

*...Ёрглик юрти бу, тонг ўлкаси бу,
Күёши боласиман, десам ҳаққим бор.
Порлок ўй, жаранг шеър, онг ўлкаси бу,
Йўлим ҳам, уфқум ҳам ёрқин, шуъладор.*

*Ёрглик лиммо-лим эрк маконимда,
Ховучлаб ичаман шаршарасидан.
Күёши учқунлари қайнок қонимда,
Мен қудрат оламан ҳар заррасидан.*

*Ўроқ-машоқ пайти олтин хирмоним,
Саратон қўкида ширмойи ноним,
Ёз бўйи ярқироқ, эзгу осмоним,
Коинот онаси – алп онажоним.*

*Кўклам яшиллиги – юздан бир ранги,
Анор шарбатида акси жилвагар.
Куилар қўшиги ҳам күёши оҳанги,
Булоқ мавжсларида рақси жилвагар.*

*Ғўза тўлқинида мудраг ёргуи,
Кўклар ёргу олар оқ чаногидан.
Тупроқда яширин олам яллиги,
Чаноқлар оқлиги нур қайногидан.*

*Ёргу кун ярашиқ ёргу диёрман,
Менинг шу қўешлик давлатим-да бу.
Тенгдошлилар сафида мен ҳам девкорман,
Күёшилик давлатим – меҳнатим-да бу.*

*Ёрглик ва нурнинг оқ сийнасида –
Ўша суюк жаҳон, деганлари рост.
Ёргу чўққиларнинг шоҳ зинасида
Ёргу Ўзбекистон деганлари рост!*



**Кенгесбой
КАРИМОВ**

1948 йилда тугилган. “Оралықтар”, “Вақт мино-раси”, “Унумилган ой”, “Оролдан келдім”, “Күнгіл мұлқи” шеърий түпнамалари, “Устюрт” достони, “Оғабай” тарихий романы чоп этилған.

УЛУФ ДАШТ БҮРИЛАРИ*

Тарихий романдан боблар

ИНТИЛИШ

ТҮНИКҮК

Cийрак соқолли, ёқимсиз юзида чечак касали ўчмас доғлар қолдиған қиррабурун, дүңг пешонасига чукур жойлашған құзларининг ранги ноаниқ, ѿртабауыдан пастроқ, аммо гавдаси миқти, бошига құзи тери-сидан тикилған бўрк кийған, эгнидаги қора чакмонининг сиртидан тақилған камарида осилиб турған ханжар ғилофи бир қараганды хитой амалдорларидан бирмунча ажратиб, аскарга яқинроқ эканлигини англатиб турадиган, эллик ёшлар чамасидаги Тўникўк ақлли, лекин ҳийлагар одам эди.

Насл-насаби ашиналардан бўлғани билан унинг аждодлари орасида хон аталгани йўқ. Шунга қарамасдан, у ўз томирида бўз бўри авлодларининг қони оқиб турганини ҳеч қачон унутган эмас.

Унинг бобокалони Кат Элхон бекларининг бири эди. Хоқонлик қулаб, турклар сургун қилинганда бобоси Туғберди кўпчилик турклар билан бирга Ўрдўсга кўчирилған, ўзи ўша жойда табғашлар орасида туғилиб, табғашча тарбия олганди. Унинг отаси Буйриқ камбағал эмасди, ўғлини хитой мактабига ўқишга берган эди. Зеҳни ўтқир Тўникўк иероглиф-

* Охир. Бошланниши ўтган сонда.



ларни ўзлаштириди ва дао дастурини ўрганди. Ўн саккиз ёшига келганда имтиҳонлардан муваффақиятли ўтиб, вилоят девонхонасида кичикроқ мансаб олди, аста-аста кўтарилиб дафу лавозимигаям эришди, тажрибали, кўпни кўрган табғаш амалдори бўлиб етишди.

Тўникўкни олдинда катта амалдорлик кутиб турган бўлиши ҳам эҳтимолдан холи эмасди, бироқ у табиатан бўйсунишга эмас, амрини ўтказишга мойил, томирида рухан ўжар ва қайсар, эркинликни барча нарсадан устун қўядиган турк қони оқар, хитой амалдорига ўхшаб кетадиган вужудида эркесвар турк юраги уриб турарди.

Ўрдўсдаги хитой ҳокимининг маҳкамасида ишлаган Тўникўкнинг ўғил-қизлари хитой амалорларининг фарзандлари билан бирга ўқиб, ўйнаб ўсди. Табиийки, хитой тарбиясини олди, улар ҳам ота йўлини давом эттиришга, хитойлашган турк амалдори ёки хоними бўлишга тайёр эди. Лекин, “туркнинг душмани табғаш” деган ота-боболаридан келаётган тушунча отасидан уларга мерос қолган, ҳар ҳолда ўта синчков Тўникўк фақат қизи, хитойча таълим-тарбия олган Пуфу қизидангина умидвор бўлиб, бошқаларининг турклигидан айтарлик таъмаси йўқ эди.

Тўникўк гўдаклик пайтида отаси ўзига ким деб исм қўйганини ҳам унутган. Уни исми билан бола пайтидагина чақиришарди, балоғатга етиб мансабга кўтарилгандан буён хитой анъанаси бўйича исми ҳар хил атала бошлади, Тунюкўк исмини кейинроқ олди, аммо бу исмни тўла талаф-фуз қилишга қийналган туркийлар Тўникўк деб атайверди ва энди ўйлаб қараса, шу исм билан туғилгандек бўлиб кетибди.

Ўрдўсдаги турклар қўзғолон кўтартганда Ўрдўс дафуси лавозимида бўлган Тўникўк пойтахт Чанъанда эди. Қўзғолончиларни ич-ичидан кўллаб турса ҳам табғаш амалдорлари билан бирга “кўзларининг эти ўсиб кетган бир гуруҳ турклар”нинг шаънига “лаънатлар” айтишга мажбур бўлди. Обдан ўйлаб иш қиласидан Тўникўк қўзғолоннинг мақсади табғаш қарамлигидан озод бўлиш эканлигини тушуниб етса ҳам, унинг пировард натижаси қанақа бўлиши ҳакида ўйлаб кўрмаган эди.

Қўзғолон бостирилганидан сўнг Ўрдўсга қайтган Тўникўк турклар нима учун мағлубиятга учраганлиги ҳакида бош қотириб кўрди ва “туркларнинг олди-ортини билгудек, жанг санъати ва сиёсатидан хабардор раҳбарлари йўқ эди, улар шу боис мағлуб бўлдилар” деган қарорга келди. Бу қарори ҳақиқатдан узоқ эмасди. Чиндан ҳам қўзғолон сардорлари ё аскар ёки хон авлодидан, аммо уруш тажрибаси камроқ одамлар эди.

Томирида турк қони қайнаб турган Тўникўк туркларнинг яна оёқка қалқиб, Улуғ далага ҳукмдор бўлишини хоҳларди, шу боис агар қўзғолон бошига бирор тажрибали раҳбар келса, хитой амалорлигидан воз кечиб, қўзғолончилар сафида бўлишни кўнглига туғиб қўйди. Бу ниятини ўзидек амалдор, ҳамфир одами Ашидэ Жуан билан ўртоқлашган эди. У ҳам ўз тилақдошлигини билдириб, гарчи шундай имконият туғилса, уни бехабар қолдирмаслигини илтимос қилди.

Шу орада укувли ва обрўли амалдор бўлган Тўникўк пойтахт Чанъанга



чақирилди. У ўзи ишлаган маҳкаманинг таянчига айланди. Агар турклар томонга ўтса – ахийри бир кун шундай фурсат келишини ўткир зехни билан англаған эди – у холда фарзандларининг ҳоли не кечишини ўйлаб ташвишланди. Унинг ҳам ечимини топди. Тан подшолиги худудида ўғил болалар билан қызы болаларга ҳам баравар таълим-тарбия берилар, имконияти бор одамларнинг ўғил-қызлари учун маҳсус ёпиқ мактаблар мавжуд эди. Ўқувчилар катта-катта иморатларда, ота-оналардан овлоқ жойда ўқитилар, керак бўлса, кимнинг ўғли ёки қизи эканлиги қатъий сир сақланарди. Тўникўк ана шундай ёпиқ мактабларнинг бирига қизи Пуфуни Мэй Ли исми билан жойлаштириди ва қўнгли хотиржам бўлди. Агар кетар бўлса болаларни олиб кетса ҳам бўлади деган қарорга келди.

Ашина Кутлибек Ўрдўсда қўзғолон кўтарганда Тўникўк Чанъанда эди. Дарҳол унинг жанговар ҳаракатларига диққат қилиб, синовчан ва умидворнигоҳ билан жонговар ривожини кузата бошлади.

Кутлибекнинг ўзини шахсан танимаса ҳам, унинг ашиналардан чиққан табғаш аскарида ёлланма тутиқ бўлганлигини, ҳарбий ишлардан, жанг санъатидан яхши хабардорлигини, қошида ўзидек жанговар икки укаси борлигини билиб олди.

Кутлибек Тўникўкка жуда бообру лашкарбоши бўлиб кўринмаса-да, ҳаракатларининг тезкорлиги, кутилмаганлиги, ёвқурлиги маъкул келганди. Масалан, Кутлибекнинг даставвал Буюк хитой деворининг бу ёғидаги табғашларнинг ҳарбий худудларига, истеҳкомларига кўққисдан ва яшин тезлигига килган хужумлари, имкони бўлсаям шошқалоқлик қилиб девор ичкарисига кирмаганлиги Тўникўкни ҳайратлантириди ҳам.

Кутлибекнинг дадил зарбалари табғашларни чорасиз аҳволга, саросимага солиб қўйгани сиёсатдон ва узоқни қўзлай оладиган Тўникўкка аён бўлди ва бу мулоҳазасини ишончли ҳамроҳи Ашидэ Жуан билан ўртоқлашди.

– Менимча, Кутлибекка ишонса бўлади, – деди у хилватхонада учрашувга келган Ашидэ Жуанга. – Кўрасан, яқин орада у ўзини туркларнинг хоқони деб эълон қиласди.

Ашидэ Жуан табғаш лашкарини таъминловчи амалдор бўлиб, уруш ҳадисидан хабардор бўлса ҳам, урушда лашкарга сардорлик қилмас, фақат қурол-яроғ, озиқ-овқат билан таъминлашга масъул, шу сабаб Чанъанда бой ва нуфузли турк саналарди.

– Унинг хужумлари ҳақида ҳар куни эшитаман, – деди у. – Бироқ, ўзига қарши катта лашкар юборилса қандай йўл тутиши номаълум. Ҳозирча табғаш лашкари Тубит билан урушда банд. Эртага катта урушдан бўшаган кўп сонли лашкар ўзига қарши келса Кутлибек эсанкираб қолмасмикин?

– Балки, унгача Кутлибек анча ишларни амалга ошириб улгурап?

– Улгурмаса-чи? Қарши чиқишга куч топа олармикин?

– Тубит билан урушнинг қачон тугаши маълум эмас, шунгача Кутлибек Улуғ далани оёққа турғазиши даркор бўлади.

Хитойлашган Ашидэ Жуаннинг томирида ҳам турк қони оқар, у ҳам Кутлибек қўзғолонини батамом қўллаб-қувватлар, очикдан-очик тилакдошли билдира олмаса ҳам, табғашларнинг Тубитда узоқроқ ушланишини



истар, уни чўзиш қўлидан келмаса-да, чўзишнинг йўлларини ўзича излар, баъзан хаёлида лашкарни таъминлашни кечиктиришнинг қандай йўллари бор экан, деган фикр-ўй пайдо бўларди.

Бу пайтларда Тан подшолигининг Кутлибек қўзғолонига панжа орасидан қарашига сабаб бўладиган важ-корсонлар оз бўлмади.

Тоғли Тубит подшолиги билан бошланган урушнинг охири кўринмас, урушнинг ўзига юз минглаб аскар юборилган бўлса, Тан подшолиги ҳудудида юз мингта лашкар нигоҳи Тубитга қаратилган шай ҳолатда туриб, бу воқеалар табғаш чегараларида қўзғолон кўтарган туркларга қарши катта кучларни сафарбар қилишга имкон бермасди. Табғашларнинг қўлини курашдан боғлаб турган яна бир сабаб бор эдики, уни сиёсатдан кўпроқ хабардор бўлган Тўникўк биларди, унга сабаб бўладиган воқеалар подшо саройининг деворлари ортида яширинган эди.

Пировардида Тўникўк кутган кун келган, ёпиқ мактабга ўзга исм билан жойлаштирилган қизи Пуфудан кўнгли тўқ бўлган бир кунда болалари ва кўч-кўрони билан “Ўрдўсдаги ишларини тартибга келтириш учун” деган баҳонада Чанъандан чиқиб, Улуғ дала бағрида ўз мустақиллиги учун аёвсиз курашлар олиб бораётган турк қондошлари ўрдасини излаб йўлга тушган, бир ўзи эмас, Ашидэ Жуанни ҳам эргаштириб чиқсан эди.

Тўникўк Чанъандаги подшо саройи атрофидаги воқеалардан анча хабардор бўлгани боис Кутлибекка етишишга ошиқди. Унинг келишидан Кутлибек хабардор бўлиб, етиб келиши билан Тўникўкни ўз ўтовига чақирди.

Бекнинг исмини эшитса ҳам, улар бир-бирини танимасди. Ўрта бўй, қисиқ қўз, илиқ чехра ашина беги биринчи бор кўрганда қадди-қомати билан негадир Тўникўкнинг кўнглини тўлдирмади. Уларнинг орасида тўртбеш ёш фарқ бор эди, олган тарбияси ҳам, шуғулланган ишлари ҳам бир-бирига ўхшамайдиган, шу боис бири бирини дилдан тушунишмагандир, кенгроқ фикрлашга одатланган Тўникўк ичидан шундай ўйлади. Ҳарҳолда, улар бири бирининг феъл-авторидаги кам-кўстни иккинчиси тўлдирадиган даражада ишchan, тажрибали ва довюрак эдиларки, бу фазилатлар кейинчалик уларнинг буюк ишларга баҳамжиҳат жазм этишларига ва ғалабаларга эришишларига имкониятлар яратиб берди.

Саломлашиб-сўрашишдан сўнг Кутлибекнинг дастлабки саволи шу бўлди:

– Энди бу ёғига қандай ҳаракат қилган маъқул деб ўйлайсиз?

Тўникўк жавоб беришга шошилмади. Қўзғолончиларнинг аҳволи унчалик яхши эмас, улар бундан сал олдинроқ табғаш подшолиги жўнатган лашкардан Хуанхадай деган жойда мағлубиятга учрагандан кейин Улуғ дала қўйнига чекиниб, янгидан куч тўпламоқда эди.

Зукко сиёсатчи ва тадбиркор Тўникўк Тан подшолигининг Тубит билан олиб бораётган урушини, подшо саройида тахтни эгаллаш учун олиб борилаётган яширин курашни, саройдагилар бу курашни пинҳона амалга оширайпмиз деб ўйласалар ҳам, у кўпчиликка аён эканлигини хаёлидан ўтказди.

– Етарли куч тўпланиши биланоқ ҳаракатга киришмоқ даркор. Ҳозир хоқонлик учун дадил кураш олиб боришнинг айни мавриди. Ортга қарашиб, ҳаяллаш, сусткашлик қилиш – ҳалокат билан баравар, – деди Тўникўк қатъий оҳангда.

У шу сўзлар орқали Тан сулоласи бошқарган Хитой подшолигининг қўзғолончиларнинг ортидан муттасил тушаверишларига имконияти йўқлигини билдирамоқчи эди.

7. КАНИЗАК ЖУ – ТАН ПОДШОСИ

Хитойдаги Тан сулоласини барпо қилиб, неча йиллар подшолик қилган Ли-Юан асли турк бўлиб, кейин хитойлашиб кетган эди. Шу боис ҳам у подшолигининг дастлабки йилларида туркутларга суюнди, атрофига туркутларни тўплади ва аҳдидан қайтиш нималигини билмайдиган туркларга ишонди. Ўша даврларда “туркутдек ишончли” деган ибора ҳикматга айланиб кетган, чиндан ҳам “турк” деган сўзнинг ўзи ҳам мустаҳкам, кучли, муқим деган маънони англатар эди.

Тан подшосининг ўғли 630 йилда туркутлар хоқонлигини қулатгандан кейин ҳам туркутларни кўп таъқиб қилмади, кўпгина жангчиларни Алашан, Ўрдўсга кўчирди, бекларига табғаш унвонлари билан мансабларини берди. Ўзининг яқин дўсти Ашидэ Шэни қаерда бўлса, қошидан қолдирмади, айтишларича, Сумахон қирқ минг турк лашкари билан подшо хизматида бўлди. Турклар подшо саройидаги ҳурматли одамлар эканлиги табғаш мансабдорларига ёқмасди. Улар Улуғ даштдан келганларни кўчманчи, чорвардор ҳалқ дея қабул қилиб, туркийларни маданиятдан йироқ хизматкор сифатида кўрарди.

Тайцзун ўлганда Ашидэ Шэ подшо дўстидан кейин осмонга боришни хоҳламай ўзини ўзи ўлдирмоқчи бўлди. Шунда подшо меросхўри унинг ҳаётини сақлаб қолди.

Тахт меросхўри Гаоцзун соғ хитойча тарбия олиб улгайди. Атрофидагилар ундан умидвор эди, минг йиллар давомида улуғ даони ушлаб, донишманд Кунфузи¹ васиятларига содиклик руҳида тарбияланган хитойликлар Гаоцзун саройни маданиятсиз турклардан тозалайди деб ўйладилар.

Гаоцзуннинг эса диққат-эътибори бошқа томонга қаратилган, оқшомлари гўзал бир канизакнинг ҳусни жамоли тушларига кириб чиқар, лекин бечора меросхўр юрак-бағрини тилка-пора қилаётган маъшуқасига етиша олмаётганди. Чунки ўз отаси унинг йўлида ягона ва енгиб бўлмас тўсиқ бўлиб турарди.

Меросхўрнинг отаси Тайцзун соғ-саломат ҳукмронлик қилаётган даврда гўзал Жу сарой канизаги бўлса на илож?

Хуллас, осмон очиқ пайтда чақнаган чақмоқдек, дафъатан пайдо бўлган муҳаббат ёш меросхўрни хушидан айро қилаёзди. Бир амалдорнинг Шан-

¹Кунфузи – қадим хитой тилидаги “Кун-фу-цзи” сўзидан олинган бўлиб, “Кун авлодидан бўлган устоз” деган маънони билдиради. Фарбда бу ном Конфуций бўлиб танилган.



юй вилоятидан подшога лаганбардорлик қилиб юборган тухфаси – канизак Жу ҳали ўн икки-ўн уч ёшларда, хитойларга хос бўлган гўзаллик тимсолига айланган малак эди. Қийик қора кўзлари, қайрилма қоши, бодом қовоқлари, канизакларга хос турмакланган соchlари бир нигоҳ ташлашданоқ меросхўрнинг эсида қолди. Аммо, одобу тарбия, отага ҳурмат, устози Кунфузи таълимотлари канизакни кўриш учун саройга киришга имкон бермади. Шахзода бу тўсикларни енгиб ўта олмас, подшо отасига тортиқ қилинган канизакка бўлган муҳаббатини оғиз очиб бировга айтишга юраги дов бермади. Уни унтишга жон-жаҳди билан ҳаракат қилса ҳам, уринишлари бехуда эди. Озид кетган тахт меросхўрини ўн беш-ўн олти ёшига етганда уйлантириб кўйишиди. Хаёлига ўша канизак шу қадар ўрнашиб қолган эдики, подшо саройидаги амалдорнинг сулувлиги билан қўпчиликни лол қолдирган соҳибжамол қизи ҳам юрагидан канизак Жунинг қиёфасини ўчиролмади.

Бир гал меросхўр учун кутилмаган воқеа юз берди. Саройда худди канизак Жуга икки томчи сувдек ўхшаш бир қизни учратиб қолди ва уни кўлдан чиқармаслик учун дарҳол кимлигини суриштирди. У ўз онасининг чўриларидан бири экан. Ўз онасидан тортиниб ўтирумади, канизакни сўраб олди ва ўша оқшомнинг ўзидаёқ қучоғига тортди.

Бундан кейин Гаоцзун бир неча марта ошиқ бўлди ва уларга кўли етди, никоҳидаги аёллари табғаш аслзодаларининг қизлари эди. Шундай қилиб, ўсмир пайтида отасининг саройида учратган гўзал канизакни унугандек бўлди.

Орадан тахминан ўн йиллар ўтиб, отаси Гаоцзун ота-боболари қаёқка кетган бўлса, ўша томонга қайтиб келмас бўлиб кетди. Аёллар ибодатхонасида яшайдиган, отасининг ўлимидан кейин мархум подшо Тайцзуннинг ўша ерга доимий яшаш учун юборилган канизаклари орасида канизак Жуни учратиб қолганда юрагига ўткир тиф қадалгандек чайқалиб кетди.

Унинг қархисида сочи тақир қилиб қирилган, қора либос кийган, таркидунё қилган аёл туарди. Орадан йиллар ўтган, албатта, айрилиқда ўтган йиллар кўп нарсаларни, ёшлиқни, интиқлик билан интизорликни, қондаги жўшқинликни олиб кетган. Бироқ, улар бир-бирини унута олмаган экан, бунга, айниқса, бир неча аёлга уйланиб, канизаклар ушлаб, аёл лаззатидан боши айланган кечаги тахт вориси, бугунги Тан юртининг подшоси Гаоцзун амин бўлди.

– Сенми? – деди подшо шу қадар паст овозда, ўз овозини ўзи ҳатто эшифтмагандир.

Уни кўзларидан, ўсмир пайтида кўрганда худди уммонга ғарқ бўлган ғаввосдек бутун вужуди билан сингиб кетган кўзларидан таниди ва орадан шунча йиллар ўтиб, шунча ўзгаришлар бўлганига, бу пайтлар унга қўл етказмаган ғовларнинг баъзилари ҳалиям орада турганига қарамасдан унга жон-тани билан талпинди, аммо, одоб доирасидан чиқмади.

Канизак Жунинг бутун вужуди қулоққа айланиб, ундан биргина сўзни, аникроғи, подшонинг оғзидан чиқсан ҳозирги сўзларни эшитиш-



ни хоҳларди. У шу сабаб, уни аниқ эшиитди. Балки, ички бир овоз унга “семми?” деган саволни бергандир, балки, уни Гаоцзуннинг лаблари ҳаракатидан уққандир, харҳолда, канизак эшитишни хоҳлаган сўзни аниқ эшиитди.

У ичидан “ҳа, мен, мен, мен...” дея минг марта тақрорлагандир, бироқ андиша қилди, шу бир оғиз сўзни тилига чиқармади, унсиз бош эгди.

Саройга қайтган Гаоцзун ҳаловатидан айрилди, сержаҳл ва камгап бўлиб қолди. Сарой мулозимлари унинг атрофида гирдикапалак бўлар, хотинлари билан канизаклари ноз-карашмалар билан кўнглини овламоқчи бўлар, бироқ барча ҳаракатлар бехуда кетиб, тахт сохибига аввалги хотиржамлиги қайтмас эди.

Амалдорлар сабабини билолмай ҳайрон. Гаоцзун бу ҳақда оғиз очишдан, бўлғуси миш-мишлардан ҳайқар, иккинчи томони – отасининг канизагини маъшуқа қилишга, одоб чегарасидан ҳатлаб ўтишга қийналар эди. Подшонинг аросатда юрганлигини, юрагида ечими мушкул бўлган аллақандай тугун борлигини катта хоним дарров англаб етди. Саройда подшо билан болалиги бирга ўтган катта хоним эри билан сирдош эди, ўзгага ишонмаган сирини унгагина айтиб, бир неча маротаба дилдаги дардларидан фориғ бўлганди.

Кечқурун ёнига келган эрини илиқ сўзлар ва ноз-фироғи билан авраган хоним биринчи бўлиб сўз очди:

– Негадир анчадан буён ҳафа кўринасиз, подшоҳим, нима бўлди? Гапи-ринг, иложини топайлик. Ёки соғлигингиз безовта қиляптими? Саройимизга донғи довон ошган машҳур табиблар йигилган.

– Ҳеч қаерим оғримайди, – дея беҳафсала жавоб қайтарди подшо.

– Унда дилингизда сизни қийнаётган қандай сир бор, менга айтинг, енгил тортасиз.

Гаоцзун хўрсинди, бу билан хонимнинг сўзини тасдиқлаб қўйгандек бўлди.

– Айтинг, мендан ўзга кимгаям айтасиз? Ёхуд сирингизни менгаям ишонмайсизми?

Подшо ўйга толди. Хонимдан яқин кимим бор? Тўғри, ҳозирга қадар меросхўр бир ўғилни дунёга келтира олмагани афсусланарли. Бу иш бошқа аёлларининг ҳам қўлидан келганича йўқ. Албатта, меросхўр керак, эртага кўзи юмилиб кетса, тахти эгасиз қолмайдими? Бироқ, катта хоним саройга яна бир канизакнинг, устига устак, бу ерни ипидан игнасигача биладиган бир кундошининг келишини қандоқ қабул қиларкин?

Дилидан ана шундай ўй-хаёллар кечган тахт сохиби бир тўхтамга келолмай азобланарди.

– Айтақолинг энди! – деди катта хоним.

Кўза кунда эмас, кунида синади, кўнгилдаги сўз айтилмаса, эгаси ким бўлишидан қатъи назар, у хонми, подшоми, канизакми, барибир, азоб бераверади, буни Гаоцзун бошидан кечирган, шу сабаб бу гал у дилидагини ҳеч бўлмаса хотинига айтиб, енгил тортишга қарор қилди.



– Хўп, айтаман, сендан яширмайман, – деди таҳт соҳиби. – Биласанми, мен бир канизакка ошиқ бўлиб қолдимми деб қўрқаман.

Гумони тўғри келган хонимнинг юраги санчиб кетди. Олдин ҳам бир канизак ёқиб қолганида эри худди шундай мужмал гап бошлаган эди, охирида ўша канизакни саройга олиб келиб тинчиганди. Бу гал ҳам худди шундай бўлишини катта хоним аёл қалби билан ҳис қилиб, рашидан бағри ўртанди.

– У ёшми? – бу сўз оғзидан беихтиёр отилиб чиқди.

– Ёш деб бўлмайди... – таҳт соҳиби сўзининг изини ютиб, тўхтади.

– Ким экан у?

– Исимини эшитсанг, албатта, танийсан.

– Исли нима?

– Канизак Жу Вэй, қийик кўз, – деб лақабини ҳам қўшди Гаоцзун.

– Канизак Жу? Ахир у... – чексиз ҳайратдан хонимнинг оғзи ёпилмай қолди. Аммо, “отангнинг канизаги эди” деган сўзни айтольмади, уялди. Бўялган оқ юзи лоладек қизарди.

– Тўғри, мен уни ўсмир пайтимда яхши кўрган эдим, – деди таҳт соҳиби. – Шундан буён юрагимдан чиқариб ташломаган бўлсам на қилай?

Хонимнинг қисиниб-қимтиниши бир зумда ўтиб кетди. Оқ упа сурилган юзининг қони қочди.

– Сизни тушунаман, – деди у беҳол.

Хоним мұҳаббатнинг нима эканлигини, айрилиқ азоби нақадар машаққат эканлигини ўз бошидан кечирган, кўрган. Гаоцзун билан тенгдош Ванни – вазирнинг ўғлини болалигидан жонқадар яхши кўрар, бу ҳакда кўпчилик, шу жумладан, ҳозирги эри Гаоцзун ҳам биларди. Аммо, уларни ажратишди. Ван олис вилоятга хизматга жўнатилди, уни эса таҳт ворисига узатишди. Хоним қаршилик қилолмади, эрки отасининг қўлида эди, онаси ҳам қизини Танлар подшолиги саройининг бош хоними сифатида кўргиси келди. Тақдири шундоқ экан. У Гаоцзунни чин юрақдан севмади, ҳалиям севолмасди, лекин ёшлигидан тенгқур эканлиги ва ўзининг оқила ва сермулоҳазалиги туфайли хоним бугун сарой эгаси. Энг мушкул чоғда таҳт соҳибининг ўзи билан пинҳоний сирларини ўртоқлашиши ёқса ҳамки, саройга, ўзининг амри вожиб бўлиб турган саройга эрига кўпроқ ёқадиган канизакнинг келай деб тургани кўнглига ғулғула солди. Бирок, қудратли таҳт соҳибининг фикру истакларини қўллаб-қувватламаслик олов билан ўйнашишдек хавфли эди.

Ўзини ўнглаб, саройга хос маккорликни ҳам ўзлаштириб келаётган бош хоним подшога нима дейиш, қандай маслаҳат бериш кераклигини бир зумда тушунди.

– Жуда яхши, осмон фарзанди, подшоҳим, – деди юзига ёлғондакам қулгидан ниқоб кийиб улгурган бош хоним. – У сиздан олдинги салтанат эгасининг саройида канизак бўлса нима бўпти? Асл мулк ким ва қачон фойдалангани билан тўзиб қолармиди? Биз – аёллар ҳам хўжайнинг бир мулкимиз, ундан қай йўсинда фойдаланиш эгамизнинг измида. Осмоннинг суюкли фарзанди бўлган сизнинг эса ихтиёриңгиздаги аркони давлат, под-



шолик саройи, жами одамлар, бутун халқ мулкингиз ҳисобланади. Фармон беринг, канизакни саройга олиб келиш билан шахсан ўзим шуғулланаман.

Тахт соҳибининг юзига қон югурди. Хина билан бўялган соқолини ту-тамлаб қўйди, у бу одатини хурсанд бўлган пайтларида тез-тез такрорлаб турар, лекин бу одати хонимга ёқмасди.

— Ихтиёринг, сенинг айтганинг бўлсин. Аммо канизакнинг асл исми саройда тилга олинмасин.

— Хўп бўлади, севимли осмон фарзанди, — хоним сарой амалдорлари каби қўлларини қовуштириб, билинар-билинмас таъзим қилди. — Бу ишга ҳозирданоқ киришаман.

Шундан кейин аёллар ибодатхонасига бош хонимнинг ўзи бориб, бошқарувчи аёлни ҳузурига чорлаб, канизак Жуни олиб келишни ва бу ишлар пинҳона амалга оширилиб, сир сақланиши лозимлигини уқтириди.

Саройга олиб келинган, исми Фан деб ўзгартирилган канизак Жунинг сочи ўсиб, чехраси ороланиб, ўзига келаман дегунча орадан анча вақт ўтди.

Бу орада канизак тахт соҳибини қандай қилиб ўз томонига оғдириб олиш, биринчи сарой хонимига айланишнинг турфа, ақл бовар қилмас йўлларини ўйларди.

Илк учрашув окшомида тахт соҳиби саройнинг хилватхонасида бундан ўн уч йил муқаддам, биринчи маротаба учратган қийик кўз ўсмир қизалоқдан ҳам гўзалроқ, аёллик латофати янада барқ урган хонимни кўриб ҳайратланса, унинг ўта жиддийлиги ва бепарволигига дуч келиб, ҳайрати ўн чандон ошди. Канизак Жунинг ўтли қучоги ва оташ муҳаббатига эриша олмаган Гаоцзун канизакка бўлган ишқи худди учқундан аланга олгани каби авжланиб бораётганлигини иложисиз тан олди.

Канизакнинг бир неча ойлар давомида ўйлаб топган маккорона найранглари ўз мевасини бера бошлади. Тахт соҳиби канизак Жуга қаттиқроқ боғланиб борар, бу шунчаки ҳуморлик ёки ишқий муносабат эмас, балки илоннинг совуқ кўзларига кўзи тушган қуённинг ўрнидан кўзғалолмай, илоннинг лукмасига айланаётганига ўхшарди.

Жунинг биринчи орзуси — Гаоцзуннинг маҳбубасига айланиш кўп мashaққатсиз рўёбга чиқди. Энди ясама Фан исмидан қутулиб, ҳақиқий исмини тиклаш учун курашни бошлаб юборди. Бунинг учун атрофига ўз тилақдошларини тўплаш зарур эди. Шу ниятда тахт соҳибига норози кайфиятдагиларни излади ва уларни топди.

Сарой амалдорлари Гаоцзунга бош эгиб турсалар ҳам, ҳар сафар ичларидан унинг томирларида Тан сулоласининг йўлбошчиси, хитойлашган турк Ли Юан қони оқиб турганини унутмас эди. Унинг отаси Тайцзун қонига тортиб, теварагига ёввойи туркларни тўплагани, айниқса, аскарбошиларнинг кўпчилиги кўчманчилар бўлганлиги, уларни кўрқитиб, туркий бошлиқларга бош эгишга мажбур этганлиги ҳали унутилмаган ва ўша вақтларда ўзларининг камситилгани учун ўч олиш фурсатини кутардилар. Шу тахлит фикр юритувчилар саройда оз эмасди.

Бош вазирнинг ўринбосари ана шундайлардан бири бўлиб чиқди. Са-



ройда обрўси ошиб бораётган канизак Жу эски алоқаларни ишга солди. У олдин шу саройда тахт соҳибининг канизаги эди, шу мансаб билан бу масканга иккинчи бора қадам ранжида қилиш насиб этган экан, энди бу имкониятни қўлдан бой бермасдан, олдига қўйган мақсадларга эришиш керак, дея хулоса қилди у.

Шундай қилиб, бош вазир ўринbosари ва унинг атрофидагиларнинг қўллаб-куватлаши натижасида у ўз номини қайта тиклади. Уни канизак Жу деб атай бошлишди. Бу катта мақсадлар сари ташланган илк қадам эди. Кўп ўтмай яна бир имконият қўл келди. Канизак ҳомиладор эди. Тахт соҳиби улкан умидлар билан унинг ўғил қўришини истади. Лекин умиди рўёбга чиқмади, канизак қиз туғди. Бу барибир ярим ғалаба эди. “Қиз туқкан она ўғил туғмайдими?” деган фикр фақат Гаоцзуннинггина эмас, кўпчиликнинг хаёлига келган эди.

Орадан йил ўтиб, канизак Жу иккинчи маротаба ҳомиладор бўлди ва тўла ғалабага эришди. Бу гал ўғил туғилишидан умид қилган тахт соҳиби бош хонимнинг қаршилик қилишига қарамасдан уни ўз никоҳига олди ва янгишмаган эканки, кўп ўтмай канизакдан хонимга айланган Жу тахт ворисини дунёга келтириди.

Гаоцзуннинг қувончи чексиз эди. Аммо бу саъй-ҳаракатлари билан ўзининг аждодлари тиклаган Тан сулоласининг илдизига болта ураётганини қаёқдан билсин?

Ўринbosар ҳамфикр ва ҳаммаслакларини атрофига йига бошлиди. Ҳийлакор вазир ўринbosари энди саройда бош хоним бўлиб олган Жу хонимнинг қўли билан ўз режаларини амалга оширишга киришди. Ҳарбий ишлардан бошқа мансаблардан туркийлар қувғин қилиниб, ўрнига хитой аслзодалари тайинланди. Аскарларга бериладиган харажатлар қисқартирилиб, уларнинг орасида норозилик кайфиятларини туғдириш учун сабаблар юзага келтирилди.

Жу хоним қатъий ҳаракатга киришди. Даставвал жазолашни ўзининг бош кундоши, тахт ворисига ўғил туғиб бера олмаган, ҳалиям Гаоцзун билан пинҳона сухбатлашиш имкониятини қўлдан бой бермаган катта хонимдан бошлиди. Чунки бош хоним лавозими аллақачон канизак Жуга ўтган эди. Шафқатсиз канизак йўллаган жаллодлар уни ўз хонасида қўл-оёғини боғлашди-ю, қопга солиб, номаълум томонга олиб кетишиди.

Саройнинг еrostи кулбаларидаги катта-катта хум қўзалар шаробга тўлиб турарди. Азон пайти ертўлага тушиб, шароб олиб кетишга келган хизматкор қўққисдан чинқириб юборди:

– Ван, Ван! Кўзада кимdir бор!

Хизматкорлар, еrostи ертўлаларининг хўжайинлари йиғилишиб, қўзадан қўл-оёғи боғлиқ хонимни чиқариб олишди. Шаробга димиқиб ўлган хонимнинг анов-мановмас, нақ тахт соҳибининг биринчи хотини эканлигини таниган пайтда, ертўлага йиғилганларнинг қандай ҳолатга тушганларини тил билан таърифлаш мушкул эди.

– Хоним, бош хоним!.. – дея дудуқланарди хизматкорлар бошларини



қуи солган ҳолда. Аммо, ўз хаёлидагиларни ошкора айтишга, хонимнинг бу ерга қай йўсинда келиб қолгани ёки кимлар томонидан олиб келингани ҳакида оғиз очишга ботинмасдилар. Ахийри кимдир бу воқеа ҳакида хабар етказиш учун сарой бошқарувчисини излаб кетди.

Ҳали туш пайти бўлмай туриб бу мудхиш хабарни бутун сарой эшилди. Кундошининг аянчли ўлимини тахт соҳиби Жу хонимнинг ўзи етказди.

– Бош хоним кеча оқшом маст ҳолида шароб сақланадиган ертўлага тушиб, шароб ичига тушиб кетиб, чўкиб ўлибди, суюкли осмон фарзанди – подшоҳим, таъзиямни қабул қилинг. Қайғунгизга шерикман, ҳамдардман. О, қандай оғир мусибат! – У ёлғондакам бўлса-да, ростдек қилиб қайғу чекди. Қийик кўзларининг узун киприкларида бир томчи ёш кўрингандек бўлди.

– Кундошлигимга қарамасдан менга нихоятда меҳрибон эди боёкиш хоним.

Кейинги пайтларда адо бўлмас ўпка-гиналари билан зериктириб юборган катта хонимдан қутулганига ич-ичидан қувонса ҳам тахт соҳиби таъзияни бош эгиб қабул қилди ва бу қилмишнинг сабабларини ечишга, тагига етишга Жу хонимни ишонтиришга уринди.

– Айборлар шафқатсиз жазоланади, – деди тахт соҳиби юзини терс буриб. – Ишонаверинг.

У саройда бунаقا ақл бовар қилмас қатлга бош бўлган одам анойи эмас, ўзидан кам бўлмаган қудратга эга кимса эканлигини англааб турар, унга қарши боришга ҳадди сифишига шубҳаланаарди.

– Бу ишда бош вазирга ёрдамингизни аямайсиз деган умиддаман, – деди у, энди расман бош хоним вазифасини адо этишга киришган Жу хонимга. – Жиноятчилар жазосиз қолмаслиги лозим, шуни билиб қўйинг.

– Менга ишонаверинг, севимли осмон фарзанди, подшоҳим, бу ишни, албаттга, охирига етказаман.

У кетишга рухсат сўраб, орқасига ўтирилди. Чехрасида зоҳир бўлган кинояли табассумни тахт соҳиби кўролмади.

Жу хоним ваъдасида турди. Айборлар – ўлган хонимнинг ва тахт соҳибининг яқинларидан бир неча одам билан маст аёлни ертўлага киритган шаробли кўзалар хўжайини бош вазирнинг кўрсатмасига қўра қаттиқ қийноқларга солингач, ўз “айбларига” иқрор бўлди. Шароблар сақланадиган ертўлалар бошлиғининг гавдаси катта майдондаги дорда бир неча кун осилиб турди. Бошқалар эгаллаб турган лавозимларидан айрилиб, четдаги ўлкаларга оиласи билан қўшиб бадарға қилинди.

Жу хоним сарой соҳибаси бўлиб олди. Бўш-баёв сарой соҳиби эса канизакнинг кирдикорларига қарши туролмасди. Унинг ифлос ишларига баъзан шубҳаланиб, эътиroz билдирса, “мен бу ишларни тахт ворисининг келажаги учун қиласяпман” дея баҳона топарди.

Тахт соҳибининг укаси, акасининг болалари фитна уюштиришда айбланиб, сургун қилинди. Гаоцзунга содик одамлардан анчаси заҳарланиб ёки “ўз ажали” билан ўлиб кетди. Бир неча йиллар давомида сарой тахт соҳибининг ишончли одамларидан тозаланиб, Тан суполаси ожизланиб қолди.



Бу ўзгаришларни ўзларини камситилган ҳисоблаб юрган хитой аслзодалари катта хурсандчилик билан қарши олишиди. Жу хонимни эса бундан-да даҳшатлироқ жиноятларга рағбатлантириб, “биз учун фойдали бўладиган қандай сўзлар чиқаркин” дея унинг оғзини пойлайдиган бўлишиди.

Уларнинг кўпчилиги хитойлар сифинган олдинги динга итоат қилмай кўйган, Ҳиндистон томонидан келган дарвешларнинг динига кириб олган эди.

Бир куни “Чанъянга Тан подшолиги пойтахтига Будданинг шогирди, улуғ устоз келибди” деган гап-сўз тарқалиб, у Жу хонимнинг ҳам қулоғига етиб борган экан.

Хоним бош вазирга амр қилди:

– Будданинг шогирдини кўрмоқчиман.

Саройга таклиф қилинган Будда шогирди дунё лаззатларидан юз ўғирган, Будда кароматларидангина ҳайратланиши мумкин бўлган, ялангоёқ, елкасига тушиб тўзиган оппоқ соchlари таралмаган, эгнидаги кўйлаги тиззасига тушган оқ соколли қария олтин-кумуш билан безатилган сарой устунларига, асл тошлар қадалган ранг-баранг ипак пардаларга, оёғи тагидаги юмшоқ гиламларга, бош хоним ўтирган фил суюгидан ясалиб, олтин ва асл тошлар билан зийнатланган уч оёқли ўриндиққа, атрофдаги подшо саройининг кўрганларни лол қолдирадиган шон-шавкатига қайрилиб қарамади, нигоҳини хонимдан узмай, тўғри хоним ўтирган ўриндиқ олдига келиб тўхтади. Хонимга ҳурмат бажо келтириб, оқ сочли бошини сал эгиб қўйди, сўнгра мурувват кутиб тураверди.

– Ўтиринг, Будданинг ҳурматли шогирди, сизни дикқатингизга арзимас саройимизда кутиб олганимиздан бошимиз кўкка етди, – деди хоним ёлғондакам илтифот билан. – Балки хитой тилини тушунарсиз?

– Мени дунёнинг бойлиги қизиқтирмай қўйганидан буён қанча вакт ўтганини унутибман, – деди Будда шогирди хитой тилида.

– Сиз хитойча биласизми?

– Мен асли хитойликман, – деди Будда шогирди. – Будда ҳеч кимнинг наасабини сўрамайди.

– Мен ҳақимда нима дея оласиз?

Жу хоним асли аёллар тоифасидан эмасми, ўзи, ўзининг тақдирни ҳақида билиш истаги барчасидан устун келди.

– Сенинг қалбинг подшолик муаммолари билан лиммо-лим, – деди Будда шогирди. – Унда Буддага жой йўқ.

Жу хонимнинг жаҳли чиқди. Ўзини аранг босиб сўради:

– Нима қилишни маслаҳат берасиз?

– Ибодат қил!

– Кимга? Нега?

– Буддага. Шогирдимни юбораман. У дуолар – мантраларни ўргатади.

Будда шогирди ўтирмади. Сарой тўридаги оғзидан олов пуркаб турган тилла аждархоларга, ичидаги хушбўй шамлар ёниб турган қоғоз фонуларга бепарво тикилди. Сўнг ортига қайрилиб, саройдан чиқадиган эшик томон кетди.

Кўп куттирмай Будда шогирдининг юборган одами келди ва хоним ундан дарс ола бошлади. У ўзи учун қудратли суюнчиқ топганини дилдан сезган, дин унга подшоликни қўлга киритишга воситачилик қилишига амин бўлди.

Жу хоним саройга келгандан бўён юқорига кўтарилиши учун халақит берадиган тўсиқларни аёвсиз йўқ қилди. Бу йўлда қотилликдан ҳам, сотиб юборишидан ҳам, алдашдан ҳам тап тортмади. Фақат тахт соҳибиға қасд қилишдан ўзини тийди. Тахт эгасига қарши фитна уюштиришдан йироқ бўлиб, Гаоцзун ўз ажали билан қазо қилгунича унга итоат қилиб келди.

Тахт соҳиби оламдан кўз юмганда, Жу хоним ҳал қилувчи аёвсиз ҳужумга ўтди: ўз ўғли бўлган тахт ворисига беклик унвонини бериб, марказий Хитойга жўнатди, бу эса очиқдан-очиқ тахтга чанг солиш билан баравар эди. Бу қарорга норози бўлган Тан сулоласининг оила аъзолари билан яқинларини фитна уюштиришда айблади ва шаҳзодаларни дорга осди. Улар билан бирга сулолага хайриҳо бўлганлар ҳам бошларидан жудо қилинди.

Энди тахтга ўтириш ва ўзини подшо деб эълон қилишгина қолган эди.

Манаман деган маккорларга ҳам дарс берадиган Жу хоним тахтга ўтиришга шошилмади. Тан сулоласида бош кўтаргудек ҳеч ким қолмаган, амалдорларнинг кўпчилиги хитой аслзодаларидан тайинланган, буддачилар Жуни қўллаб туришибди. Бироқ хонимни асосан кўчманчилардан ташкил топган ҳарбий бошлиқлар қўлламаётганлиги маълум бўлиб қолганди. Шу боис ҳам қулай фурсатни кутишга мажбур бўлди.

Бу пайтда Ўрдўс билан Хинганда, Алашанда, Гоби саҳросининг чегараларида турклар кўзғолон кўтариб, Буюк деворнинг нарёғидаги ҳудудларга ҳужум қилиб, хитойликларнинг иттифоқчилари бўлган уйғурларни талонтарож қилаётган, кўшни Тубит билан жанглар бошланиб кетган эди. Албатта, Тан подшолиги саройида тахт учун бўлаётган низолар кўзғолончи турклар учун қўл келди. Подшолик уларга қарши куч юбориб кўрди, улар озлик қилиб, яна жўнатишга эса имкон бўлмади.

Ашидэ Жуанни эргаштириб, Тўникўкнинг кўзғолон кўтарган турклар томонига кетишига ҳам саройдаги аҳвол сабаб бўлди, у турк салтанатини қайта тузиш пайти келди деб ўйлади.

Хоним Жуга айланиб олган канизак Жу кутган фурсат эса келавермади.

Тахт вориси сургунга юборилиб, шаҳзодалар жазолангандан бўён орадан ўтган йилларда Жу хоним тахтга ўтирмаса-да, бошқарувни аллақачон қўлга олган эди. Охири Буддадан хабар келди. Унда Жу хонимнинг Будда қизи эканлиги, унинг тахтга муносиб бўлгани ва Тан сулоласидан подшоликни мерос қилиб олиши лозим кўрилганлиги ёзилган экан.

Кўчманчи туркийлар кўзғолони бу пайтда авжга минган эди. Табғашларнинг томчилаб йикқан асосий кучлари юртнинг ғарбида, Тубит билан жангга ташланганликдан бўлса керакки, туркийларга юборган кучлари мағлубиятга учрайверди.

ДУШМАНЛАР ҚУРГАН ҚОПҚОН

– Бизга табғашдан бошқа кимлар душманлик қиласи деб ўйлайсиз? – деди Элтерис хоқон.

– Табғашлар ўзлари лашкар юбора олмаса, иттифоқдошларига бизга хужум қилишни буюради. Улар эса оз эмас.

– Улар кимлар? – Элтерис хоқон душманларнинг кимлар эканлигини чамалаб билса ҳам доно Тўникўкнинг ўз оғзидан эшитгиси келди.

– Ўйғурлар атрофимизда юрибди. Табғашлар Буюк девор ортида. Тўққиз Ўғузлар уларнинг ёки табғашларнинг берган совғалари эвазига ҳаракат килишади. Қирғиз билан куриканлар Хангайдан йироқда.

– Кидан билан татабларни айтмадинг, Тўникўк?

– Улардан ташқари қарлуқлар билан тургашлар бор. Тўғри, уларнинг ҳар бири бизга душман бўлиши эҳтимол, ораларидан иттифоқдош топиш маъқул бўларди.

– Дастлабки хужумни кимга қаратган маъқул?

Доно Тўникўк ўйга толди. “Энг яқинидан бошлаган маъқул”, деган фикр хаёлидан ўтди. Уларни мағлуб қилсак, яқиндаги хавфдан қутиламиз, олисдагисини ҳайиктирамиз”.

Уларнинг дикқати бўлинди. Кимдир ўтовга яқин келди. Соқчилар билан гаплашди, сўнг хизматкор ўтовга кирди.

– Чопар келди, Ўғузлар орасидаги айғоқчиман, дейди.

– Кирсин!

Айғоқчи уйғурларга хос кийинган, совутсиз эди.

– Сўйла!

Новча, қотмадан келган қора йигит пешонасини босиб турган телпанини елкасига кўтариб, кафтининг орқаси билан пешона терини артиб, ўтирганларни кузатди.

– Бозхон ўрдасида кенгаш қилибди, сўнг табғашга, ундан наридаги киданга элчи юборибди.

Айғоқчи сўздан тўхтади. Ўтирганларга яна бир карра синчилаб қаради.

– Гапир, тортинма, – деди Элтерис хоқон.

– Эшишишмга қараганда, улар хужумга ўтмоқчи, орқа томондан, – деб қўйди.

– Орқа томондан дейсанми? – сўради хоқон.

– Орқа томондан...

– Унда нега табғаш билан киданга элчи юборибди? Мадад сўрашибдими улар?

– Айтишибдики... “Киданлар шарқдан, табғашлар эса ғарб томондан Халхага қараб бир пайтда юриш қилайлик”.

– Шу холосми? Бозхоннинг қанча лашкари бор?

– Минг-мингдан олти-етти гурух чамаси, деб айтишади.

– Барчасими? Барчасини айтиб етказдингми?

- Барчасини.
- Келтирган хабаринг биз учун жуда зарур деб ўйлайман, – деди Тўникўк. Элтерис индамади.
- Улушингни ўзинг биладиган одамдан оласан. Бозхон томонга қайтавер, ўзингни сездириб қўйма.
- Сездирмайман.
- Айғоқчи ўтирганларга сўнгги бор қараб, ўтовдан чиқди.
- Сўзларига ишонсак бўлармикин? Нима дейсиз?
- Тўникўкнинг хаёлидагини билмоқчи бўлган хоқон сўз бошлаган эди.
- Менимча, ишонса бўлади.
- Қандай маслаҳат берасиз, Тўникўк?
- Эҳтимол, Улуғ далада яшайдиган кучли қавмлар бизнинг мақсадимиз табғаш билан уйғурни талашгина эмас, балки турк хоқонлигини тузиш эканлигини тушуниб етди. Хоқонлик йўлида ўз қонимизни ва душманлар конини аёвсиз тўқадиган фурсат етганга ўхшайди, чоғи. Энди ортга қайтишга имкон йўқ, – деди у. Овозида қаҳр ҳам, ғазаб ҳам йўқ эди.
- Хайриҳоҳлар топиш даркордир.
- Ким бор бизга хайриҳоҳ? Биринчидан, кўпи табғашга аралашиб, сонининг қанча эканини Кўк тангрининг ўзи билмаса, бошқа ҳеч ким билмайди, кўп туркот табғаш бўлиб кетди. Иккинчидан, унинг тили ширин. Учинчидан, тилла-кумуш билан ипаги мўл. Бизга ҳозир ҳал қилувчи дадил ҳаракатимиз, қуролимизнинг куч-кудрати билан метинде эркимизгина ҳақиқий хайриҳоҳ, иттифоқдош бўла олади.
- Қарлуқ билан тургаш қариндош эди. Қора алптегиннинг сўзига қараганда, улардан қўллаб-кувватлаш бўлмайдиган кўринади, – деди Элтерис хоқон афсус билан.
- Улар бизга бош эгиб келади, – деди Тўникўк қайсарлик билан. – Ўйлашимча, ғалабага эришишимиз учун қулай фурсат яқинлашиб келмоқда. Тўққиз Ўғузлар ҳозиргача биз билан амал-такал, яъни тегиб-қочиб урушиб юрди. Энди улар билан юзма-юз жанг қилиш фурсатини Кўк тангрининг ўзи яратиб беряпти.
- У қандай фурсат, қандай имконият, Тўникўк?
- Ҳозир киданлар шарқда, нақ Қуриянинг ёнида ўрмонларни паналаб юрибди, жанубдаги табғаш ҳамон Буюк девор ортидан ташқарига чиққани йўқ, Ўғузлар эса уйғурнинг Бозхони бошчилигига биз билан изма-из ортимиздан келаётгани йўқми? Менинг ихтиёримга лашкар берсанг, ҳужумни Ўғузлардан бошлайлик. Уч бошли аждархонинг бошлари бирикмасидан олдин, битта-биттадан мажақлаш фурсати етди деб ўйлайман, хоқон.
- Уч томонимиз ҳам душманга тўла, тўғри, улар мени қўрқитолмайди, аммо орқадагилар учун қўрқаман. Ғарбга орқа суюш имкони бўлиб қолмасмикин, Тўникўк?
- Ғарбда, – деди Тўникўк. – Ўзинг биладиган қарлуқ билан тургашдан бошқа ўн ўқ турклар – қондошларимиз бор, боболар мулки суғд бор, лекин уларга орқа суюб бўлармикан?



Ахийри, улар муросага келишди. Хоқон ўрдада қоладиган, Тўникўк минг ва яна минг нафар лашкар билан тўқиз Ўғузларнинг додини берадиган бўлди. Ашидэ Жуан минг отлиқ билан Курданга – Арол соҳилларига отланди. Хоқон таъкидлаганидек, чекиниш зарурати туғилган маҳалда ўн ўқ туркутларга орқа суяш учун шундай қилинди.

Кутлибекка келиб қўшилган Тўникўк билан Ашидэ Жуанга Элтерис хоқон ишончсизлик билан шубҳали қаарди. Энди иккаласигаям синов муддати етиб келди.

Минг ва яна минг отлиқ аскарни ихтиёрига олган Тўникўк зумда ишга киришди. Куз тонги оқарап-оқармас отлиқлар саф-саф бўлиб от устида шай турарди.

Кечаги қора бўрк ўрнига дубулға, хитойча чакмон ичидан темир совут кийган Тўникўк ҳар бир отлиқ аскарни бирма-бир кўздан кечирди. Отларнинг яроқлилигига, қурол-яроғларнинг созлигига, совутларнинг борйўқлигига эътибор қилди.

Сўнгра лашкарни икки кунлик муддатга тарқатди. Ҳар бирига биттадан кумуш танга берилди. Кимнинг қиличи бўлмаса қилич, совути бўлмаса совут олиши буюрилди. Кигиз совут билан тери қалқон тайёрлашга икки кун етарли бўлиб, усталари ҳам олисадамас, шу ерда, ўтовларида яшаб, от қўшилган араваларида кўчиб-кўниб юрган туркларнинг орасидан топилар эди.

Белгиланган муддатда йиғилган икки минг отлиқ лашкарни Тўникўк бир зум ҳам куттирумади, йўлга отланишга амр қилди. Доно Тўникўк икки кун олдин бир неча отлиқни атрофни кузатишга юборганди, улардан бири тўқиз Ўғузларнинг қайси тарафда эканлиги ҳақида хабар келтирган чоғда аскарлар ўша тарафга от чоптиришди.

Оқшом юлдузларга боқиб от чоптирган отлиқлар тонг оқара бошлаганда дарё бўйига келиб тўхташи.

Айғоқчилар олиб келган маълумотга қараганда, тўқиз Ўғузлар уйғурнинг Бозхони билан ушбу дарё бўйида бўлишлари керак эди.

От устида яхна гўшт тановул қилиб, мешлардаги чанқовбосди сувдан сипқориб, ўзига келиб олган лашкар аста-аста силжий бошлаган пайтда кузатишга кетган отлиқлар қайтиб келишди ва тўқиз Ўғуз ва уйғурнинг бир от чопгулик жойда, дарё бўйида жойлашгани ҳақида хабар етказишиди. Дарҳол жиловни тортиб, ўзларини тартибга келтирган отлиқлар аввал қадам-бақадам, кейин от йўрғалатиб кетишиди.

Лашкар тепаликка чиқиб, пастда наҳорги таомга тараддуд қилаётган душманни кўрди.

Тўникўк зудлик билан ҳужумга ўтишга фармон берди. Пастдагилар, чамаси, икки-уч ҳисса кўп эди. Шу боис турклар сардори, худди ойтақир далада қурилган ўтовнинг очиқ турган эшигидан кирган қуюн кутилмаганда ўтовни кўтариб кетадигани каби қўккис ҳужум билан душманни доғда қолдиришни кўзлади. Бу режаси иш берди. Турклар қиличларини яланғочлаб, тепадан оқсан тошқиндек ёпирилиб келган онда пастдагилар



зарбани кутмаган, шу сабаб хотиржам эдилар. Кимдир уч туёкли темир қозонларда гўшт қайнатаётган, кимдир отини қайта эгарлаётган, кимдир қилич ё найзасини қайраётган, қисқаси, ҳеч нарсадан бехабар ўз ишлари билан машғул бўлаётганди.

Лашкар ором олаётганларнинг қўнағасига от чоптириб келиб, дуч келганларини қиличдан ўтказиб, дарё бўйигача бориб, ортга қайрилди-ю, бехабар ўтирган душманни яна бир карра қирғинбарот қилди. Бунга қадар қиличдан омон қолганлар куролланиб, отларига миниб улгургач, пастда оқаётган дарё соҳилига йиғила бошлади. Турклар учинчи маротаба ҳамла қилганда тўққиз Ўғузлар ва уйғурнинг яланғоч қиличлари билан найзаларига рўбарў келдилар.

Соҳил тикка жарлик, ўтиш имкони йўқ, унга қараб от солиш ўлим билан баравар. Дарё томон тушаман дегунча суворийнинг оти йиқилиб, унга қўшилиб ўзиям нобуд бўлиши ёхуд уни баланддан отилган турк камонининг ўқи кувиб етиши эҳтимол, шу сабаб чекиниш ҳам ўлим билан баравар эканлигини кўрган тўққиз Ўғузлар ҳамла қилаётганлар билан юзма-юз жанг қилишга мажбур эдилар.

Икки лашкар юзма-юз келди. Орани бир неча қадам ажратиб турарди.

Садо тўққиз Ўғузлар ва уйғур томондан чиқди. У япроқларнинг субҳидамдаги шитирлашига ўхшаб аввал аста чиқди, кейин, бора-бора куайиб, от туёқларининг олатасир шовқини сингари акс-садо берди.

- Бозхон қани?
- Бозхон!
- Хонимиз қани?
- Бозхон ўлди...
- Бозхон ўлди?
- Бозхон ўлди!
- Бозхон! Бозхон!Бозхон!
- Ўлди! Ўлди! Ўлди!

Жангда жон олиб, жон бериш ҳайратлантирилди. Лекин хоннинг ўлими ҳакидаги хабар соҳилда тикка жарликка орқа бериб, товоң тираб турган тўққиз Ўғузлар ва уйғурларга ўлимдан-да кўрқинчлироқ эшитилди.

Сардори ўлган лашкар боши кесилган илонга ўхшайди. У ҳали тирик, тўлғониб ётади, даҳшат уйғотади, лекин қўрқинчли эмас.

Тўққиз Ўғузлардан ҳеч ким саф олдига чиқиб, саркардалиkn зиммасига олмади. Хоннинг яқинларидан ҳеч бирининг юраги дов бермади, турклар эса қилич яланғочлаб шай турарди.

– Таслим бўлинглар, тўққиз Ўғузлар! Ё ўлим, ё ҳаёт! Турк қиличи ҳеч кимни аяб ўтирамайди. Кўк тангри фарзандларига хизмат қилинглар! – От устида, жиловни таранг тортиб, узун узангига оёгини тираган сийрак соқолли киши қиличини кўтариб амр қиласди.

Бозхон уйғурнинг қариндошларидан бири отини нуқиб, сафни ёриб ўтди.

– Тўққиз Ўғузлар, уйғурлар! – деб бақирди у. – Мен Бозхоннинг укаси Идиқутман! Бозхон ўлди! Энди беҳуда ўлимимиз кимга керак. Турклар ўз оғанимиз. Келинг, бошимизни омон қолдирса, туркка хизмат қиласдик.



Бошлар эгилди. Кўтарилиган қиличлар, ўқталган найзалар туширилди. Камонга тортилган ёйлар ўқдонларга қайта жойланди.

– Қуролни топширмайсиз, – дея хайқирди Тўникўк. – Лашкар ўрнидан кўзгалмасин, тўққиз Ўғуз ва уйғурнинг ҳар бир уруғидан бир-бир оқсоқол битим тузиш учун хузуримга келсин.

Жипсланиб турган тўққиз ўғузлар сафи ажралиб, сафдаги оқсоқолларига йўл берди, бир нечтаси келиб, Тўникўкнинг ёнига йиғилишиди.

– Тўққиз Ўғуз ва уйғур халқи оқсоқоллари, тинчланинглар ва қулоқларингизга қуйиб олинглар. Сизлар бир пайтлар Кат Элхоннинг будини, туркут будини эдингиз, энди Улуғ дала бағрида олтин бўрилик турк байроғи ҳилпираи бошлади, унинг остига келсангиз яйловларингиз тинч, юртингиз омон бўлади, ўғилларингиз қул, қизларингиз канизак бўлмайди. Мен қамуғ турк будин хоқони Элтерис номидан, Тўникўк, ваъда бераман.

Ўртага оғир сукунат чўқди. Тўққиз Ўғуз ва уйғур номидан ҳеч ким бирор гап айтишга ҷоғланмади.

– Мен сизлардан жавоб кутаман, қиличларнинг қинларга солиниши ёки қон тўкилиши ўзингизга боғлик.

Тўққиз Ўғузлар ўлган уйғур Бозхоннинг укасига қарашди, индамади.

Тақдирлари қил устида ёхуд ўтқир қиличлар юзи остида турарди. Кимнингдир асаби дош бермаса, баланд жарликка қисиб қўйилган тўққиз Ўғуз ва уйғурнинг қолган лашкари бошларидан жудо бўлиши ҳеч гапмас.

Ниҳоят Идиқутдан садо чиқди:

– Биз таслим бўламиз! Аммо шартимиз бор, Тўникўк!

– Гапир!

– Эшит. Тўникўк, биз таслим бўламиз, лашкаrimизни туркларнинг олтин бўри бошли туғи остида жамлаймиз, бироқ биз қамуғ қора будин бўлмаймиз. Элтерис хоқонга эса мутлоқ бўйсунамиз, мен ўзим тўққиз Ўғуз, уйғур лашкарига сардор бўламан.

– Мен бу таклифингни Элтерис хоқонга етказаман, Идиқут. Энди менинг қошимдан қолмайсизлар. Ўрдага кетдик, Идиқут, сен лашкаринга бошчилик қил, гинани унут, адоватни унут, Элтерис хоқон хизматига бор, – деди.

Турк лашкарига “чекин” деган фармон берилди. Қиличлар қинларга солинди, найзаларнинг учлари душманга эмас, ерга қаратилди.

Уйғурлар ва ўғузлар таслим бўлишди. Қуроллари ўзларида қолди, тўққиз Ўғуз оқсоқоллари гаров сифатида қолдирилган эди, улар ёнида турган чоғда тўққиз Ўғуз, уйғур лашкарининг қўли боғлик бўлишини доно Тўникўк билмагандан ким билсин?

Тикка жарлик соҳили бўйлаб келаётган гуруҳ ичидаги Тўникўк:

– Бу дарё нима деб аталади? – деди дарёни қўли билан кўрсатиб.

Тўққиз Ўғуз оқсоқолларидан бири жавоб берди:

– Тўладарё дейишади.

– Мен Тўладарё бўйида тўққиз Ўғузни ва уйғурни бўйсундирдим, – деди Тўникўк.

– Биз ўз ихтиёrimiz билан Элтерис хоқонга қўшилдиқ, – деди оқсоқол орияти кучлилик қилиб.

– Тўғри, – деди Тўникўк. – Бироқ, турк қиличи қинидан суғурилган эди.

Тўладарёда зафарга эришилди, у ғалабадан кўра каттароқ, чинакам зафар бўлди. Халхада, кўл етгудек жойда қуролланган душман қолмади, киданлар тўққиз Ўғузларнинг таслим бўлганлигини ва бу ҳаракатлари билан туркларнинг лашкарини кўпайтирганини кўриб шарқдан хужум қила олмади, татаблар билан бирлашган ҳолда, табғаш чегарасига шарқ томондан ҳамла қилишга куч жамлади.

Шундай қилиб, тўққиз Ўғузлар ва уйғур раҳнамолигида туркларничув тушириш учун қўйилган тузокқа душманларнинг ўзлари тушиб қолди.

ФАРБДАГИ МАҒЛУБИЯТ

Келгуси баҳорда Элтерис хоқон ўрдасига ғарбдан, Курдан бўйи саҳросига кетган Ашидэ Жуандан, аниқроғи, у ҳақида қайғули хабар келди. Уни етказган Қора алптеғингина бир неча отлиқ билан узоқ сафардан омон қайтди. Воқеа бундоқ бўлганди.

Ашидэ Жуан бошлаган минг отлиқ Ипак йўли йўналишида ойлаб йўл юради, қарлуклар устидан ўтиб, Балхаш кўлидан чиқади. Ундан ўтиб қипчоклар юртига дуч келади. Бир неча кун сафар қилганларидан кейин олдиларидан чўл-биёбонларни кесиб оққан суви мўл дарё чиқади. Унинг соҳили узра кўчиб юрганлар дарёнинг номи Инжу эканлигини, охирни қипчоклар, хунлар ва бешениклар макон тутган нордон сувли кўлга қўйилишини айтади. Кўлларнинг кўпчилик қисми Қора алптеғинга таниш эди. Ашидэ Инжу дарёсининг юқори қисмига келиб, ўн ўқ туркларга (дулулар ва нушубиларга) учрашиб, улардан мадад сўрашга қарор қиласди.

Айтишларига қараганда, нушубилар Қора алптеғин хузурларига бориб, ҳарбий салоҳиятини ўз кўзи билан кўрган Ушала тургашлари билан қўшни вилоятларда яшарди. Ғарбдаги ўн ўқ турклари биринчи туркут хоқонлиги даврида ўн ўқ унвонини олган, хоқонлик иккига бўлинниб кетганда, ҳарбий хоқонликда ашина авлодларининг таянчи ва суюнчи бўлган. Шарқдагиси билан бир вактда қулаган ғарбдаги туркларга хоқон умидвор кўзлари билан бокар, сабаби, ғарбдаги худудлар кўлга кирмай туриб, Буюк ипак йўлига эгалик қилиш мушкул эди.

Ўрдўсда, Хангайда, Алашанда бош кўтарган турклар Халхада ўрнашиб олгандан буён Чанъандан чиқиб, Турфан орқали Бухорога, ундан нари Эрон орқали Константинополга қадар етиб борадиган Буюк ипак йўлида қатнайдиган карвон тўхтаб қолган, Элтерис хоқон уни қайта йўлга қўйишни кўнглига туғиб қўйганди.

Ундан ташқари ғарб туркларининг ери “эр бошига кун туғар” бўлса, ҳимояланадиган паноҳ бўлиши ҳам эҳтимолдан холи эмас.

Ашидэ Жуан бошлаган минг отлиқ қамал қилиш учун етарли эмас, элчилик учун ортиқроқ, урушишдан кўра ярашишга мойилроқ бир куч эди.



Баҳор келди. Ёмғирлардан кейин яйловлар ям-яшил майсаларга бурканганди. Бир ҳафта давомида дашт жонзотларини овлаб, гўштларини қуритиб, қоқ қилиб озиқ жамлаган турклар дарёнинг бир жилғаси бўйида бир неча кун отларини уюрга юбориб, ўз эрки билан ўтлашига имкон берди. Назарида, атрофда хавф туғдиргудек душман йўқ эди. Отлар бир ойча эмин-эркин, оёғи ёзилиб, анча тўлишди.

Бу пайтда сариқ тургашлар билан кора тургашлар ярашиб олган, Қора алптегин ҳузурига борганда яхши кутиб олган Ушала уларнинг сардори бўлиб, яқиндагина баға тархан унвонини олган, қудратли лашкар тўплаб, табғашларга қарши юриш қилиш хаёлини қилганди. Кўшни чумилар билан суғдларнинг табғашдан норози бўлганлари унинг атрофига тўпланиб, аскарлари сонини олдингиларидан-да кўпайтирди.

Бир куни зерикиб, отларига миниб, яйловга чиқкан чуми қабиласининг бир гурухи баланддан туриб жилға бўйида қўним топган гуруҳ-гуруҳ одамларни, уюр-уюр йилқиларни кўрди. Кийган кийимлари ва узоқдан эшитилган узуқ-юлуқ сўзлари тушунарсиз бўлиб туюлди.

Пастдагиларга сездирмасдан отларидан тушиб, бир муддат кузатиб туришди. Сўнг сафдагилардан бирини Ушала баға тархан ўрдасига юбориб, ўзлари уйларига қайтди.

Ушала нотаниш одамларни душманлар, балки йилқиларимизни ҳайдаб кетиш учун фурсат кутаётган қарлуқлар ёки қипчоқлардир деган хаёлга борди. Ўғли Суғани чақириб, ёнига бир неча минг лашкар олишни ва жилға бўйида қўним босгандарнинг кимлигини билишни, душман бўлса аяб ўтирасдан қиличдан ўтказишни буюрди.

Қахрамонлик кўрсатишни орзу қилиб юрган қизиқон йигит Суға буйруқни бажаришга бутун вужуди билан киришди. Қошига уч минг лашкар олиб, чумилар бошлаган томонга отланди.

Турк отлиқлари ҳам тепалик бошидагиларни сезиб, улар билан келишувга интилганда зериккан чумилар отланиб, қоралари кўринмай кетган экан.

Дарҳол отлар жиловланиб, эгарланди, улар бироз ҳордик чиқариб, сагрилари болишдек текис ва юмшоқ бўлиб семирган, энди бир неча кунлик йўл юришга яарди.

Курол-яроғлар шайланиб, мабодо, кутилмагандага хавф туғиладиган бўлса, тайёр турилди.

Атрофни кузатиб, дўст-душмандан хабар беришга юборилганлар бу томонга қараб отлиқларнинг келаётганини хабарлади. Уларнинг кимлигини билишга шошилган Қора алптегин ёнига бир отлиқни эргаштириб, сафдан ажралиб чиқди.

Хужум кўққисдан бўлди деб айтиш қийин эди. Кўп ўтмай кенг очиқ далада булутдек бўлиб кўкка кўтарилиган чанг-тўзон кўринди, олддагилар отларини қамчилаб, тўзондан ўзиб келарди. Ортдагиларнинг қораси кўринмай, чанг-тўзонга қоришиб кетган.

Қора алптегин ипак ялов боғланган найзасини боши узра баланд кўтариб қичқирди:



– Тўхтанглар, тўхтанглар! Биз турклар... туркийлармиз!

Минглаб отлар туёғидан чиқаётган чанг-тўзон билан бирга кўтарилиган дупур-дупурлар заминни ларзага келтириш баробарида Қора алптегиннинг овозини кўмиб кетди. У ҳатто ўз товушини ўзи эшитмай қолди, фақат оғзи очилиб ёпилаётгани кўриниб турарди.

Турклар бу манзилда ўзларига қарши қилич кўтариб чиқадиган душманни кутмагандилар. Ким билан жанг қилиб, кимни ўлдираётгандаридан бехабар, урушга руҳан тайёр эмасдилар, фақат қуондай бостириб келаётган қўшиндан ҳимояланиш зарурати туфайлигина қиличларини истар-истамас қинларидан суғуришибди. Туркларни руҳлантиришга, қаҳрини қўзғатишга, ёв билан аёвсиз олишишга чорлаётган Ашидэ Жуаннинг:

– Элтерис хоқон учун! Онамиз қўк бўри учун! Туркий будун учун, ур! – деган хитоби ҳам эшитилмай қолди.

Баланд тоғ устидан оқиб тушган шиддатли оқим каби шитоб билан олға интилган тургаш суворийлари турклар сафини худди кучли сув тошқини олдига қурилган ихота – ғовни оқизгани каби бир зумда бузиб ўтди. От чопиб келаётган суворий аскар бир жойда турган ҳолда ғанимни кутган жангчи устидан доимо ғолиб чиқишини турклар ўз тажрибасидан яхши билишарди ҳамда худди шу усулни қўллаб, ғалабага эришишарди. Бу гал тескариси бўлди: жангга мудофаада туриб киришган туркийларнинг тенг ярми, ундан-да кўпроқ қисми душман отларининг туёқлари тагида қолиб кетди.

Тургашлар иккинчи марта ҳужумга ўтганда, ўз бошини сақлаш учун душман ичига кириб, аралаш чопишаётган бир неча суворий жангчидан ташқари, туркийларнинг кўпчилиги ерда бошсиз, кўкрагига санчилган найзаларни маҳкам ушлаган ҳолда қора қонига беланиб бепоён саҳронинг тепкиланган сарғимтирип тупроғида хор-зор бўлиб ётишарди.

Учига оқ ипак мато боғланган найзани душманга қаратса ўқталиш ўрнига боши узра кўтариб, қўллари ва оғзини катта очиб турган кимсани кўрган, ҳужумга ташланган тургашлар ҳайратланибми, ёки уни ақли заиф кимса деб ўйладими, ҳар тугул қилич ёки найза санчиб ўлдиришмасдан, ёнидан чақмоқдай елиб ўтиб кетишибди. Нихоят, Қора алптеинга ҳам навбат етди. Бир неча тургаш суворийлари шиддат билан от суриб келиб, алпкелбат бу одамга қора чивиндек ёпирилди. Уни отидан ағдариб, қўл-оёғини боғлаб, жангнинг боришини тепалик устида кузатиб турган Суға тархоннинг оёғи остига опкелиб ташлашибди.

Бу пайтга келиб, уруш деярли тугаган эди. Халхадан отланиб чиқсан минг отлиқдан атиги бир нечта жангчигина омон қолганди. Айримлари қочиб қутилган эди, аксарияти ҳалок бўлганди.

– Уни турғазиб қўйинглар! – дей буюрди енгил ғалабадан мамнун Суға тархан ёнида турган мулоғимларига.

Тарханга дубулға остидан бургут назарли бир жуфт кўз қаттиқ тикилиб турарди. Асирининг кенг, айниқса бургутницидек эгилган бурни, алпларни-ки каби йирик гавдаси тарханга танишдек кўринди.



– Кимсан?! Кимсизлар?

– Биз турклармиз, Элтерис хоқоннинг қавмимиз, – деди аламдан лабини тишлаб Қора алптегин.

– Ким билан жанг қилгани отлангандингиз?

– Ҳеч ким билан. Очиғи, ўн ўқ туркларни излаб келаётгандик.

– Нушубийларми?

– Ҳа. Сизлар кимсизлар?

– Бизми, биз тургашлармиз.

– Кимлар?! Тургашлар? – Қора алптегин ўкинчдан бош чайқашдан ўзини тўхтата олмади. Ахир тургашлар қариндошларимиз-ку? Наҳотки, қон тўқилишидан олдин бир оғиз муроса қилишнинг имкони бўлмади? Шунча баҳодир жангчиларим ҳалок бўлди. Эҳ, энди бу ўкинчлардан не фойда. Ашидэ Жуан қаердайкин? Ҳалок бўлмаган бўлсин-да, ишқилиб. Ёки яраландимикин? Тирикмикан ўзи? – деган саволлар унинг миясида гужғон ўйнарди. Сал ўзига келгач сўради:

– Ушала тархан қаерда? Тирикми?

– Ушала баға тархан дейиш керак, – дея унинг хатосини тузатди Суға тархан. – У менинг отам, ўз ўрдасида соғ-омон, тинч-хотиржам ўтирибди.

– Мени унинг ҳузурига олиб боринглар!

Қўли боғлиқ, ҳаёти қил устида турган асирнинг ўқтам овози-ю, ўзини дадил тутишидан ҳайрон қолган Суға тархан унинг илтимосини бажо келтиришга бел боғлади.

Ушала баға тархан асирни кўриши биланоқ таниди.

– Ие, эски қадрдонимни биз томонларга қайси тақдир шамоли ҳайдаб келди экан? – деди у Қора алптеинга ўткир нигоҳли кўзларини қадаб. – Сизларни Элтерис бизга қарши юборганмиди? Кўпсонли лашкар тўплашга қурби етмабди-да? Минг отлик суворий билан ўн ўқ туркларни қўлга киритмоқчи бўпти-да?

Қора алптегиннинг боши эгилди.

– Биз урушиш учун келмадик...

– Ўтган сафар уруш учун келмаганинг ҳақиқат. Бу сафар минг отлик аскар билан элчиликка келдим демоқчимисан?

Қора алптегиннинг бу саволга аниқ бир жавоби йўқ эди.

Баға тархан ўнг қўлинин иягиға тираб асирга олинган бу туркнинг кейинги тақдиди устида бир зум хаёлга чўмди.

“Бошини кесиш осон иш. Бир маротаба бўлса-да, у тарханга меҳмон бўлган одам, бошини танасидан жудо қилмоқ инсофданмас. Агар тирик қўйиб юборсам бир кунмас-бир кун лак-лак лашкар билан келиб, оstonамда ёв сифатида турмасмикан? Келиш йўтини эса билади...” Баға тарханга ички бир овоз: “Элтерис ёв бўлиб келаман деса лашкар бошлайдиган жанговар турк қаҳатмиди? Кел, таваккал қилмайин-да, уни элига тирик жўнатаин. У менинг мардлигимни ва жўмардлигимни бутқул турк ҳалқига ёйсин, овоза қилиб юраверсин” дегандай бўлди. Тархан сўнгги фикрида қолди. Қора алптегиндан сўради:

– Қандай жазога лойиқлигингни билурмисан, эй, турк баҳодири?

Қора алптегин гапирмади. Ерга тикилганча жим тураверди. Ичидан ўйлади: “Водариф, жангда эмас, балки кўлларим боғлиқ ҳолатда беҳуда ўлим топадиган кўринаман”.

Бироқ унинг хавотир тўла ўйлари ўнгидан келмади. Ушала ўз хулоса – ҳукмини эълон қилди:

– Бунинг кўлларини ечинг! Сен озодсан! Ким менга қилич кўтариб келишга уриниш хаёлида юрган бўлса, уларга менинг қуч-қудратимни ўз кўзинг билан кўриб, гувоҳ бўлганингни гапир! Бу сўзларимни эсингдан чиқармайсан деб умид қиласман.

Ҳамма кўллари бўшатилган, боши эгик Қора алптегин ҳозир Баға тарханга ўз миннатдорчилигини изҳор этиб, боши ерга теккунча қуллуқ қиласди, деган фикрда эди, аммо улар кутган ҳодиса рўй бермади. У бирон оғиз сўз айтмади, қуллуқ ҳам қиласми.

Баға тархан асирининг бу ҳолатини ўлимдан омон қолган кимсаларда учрайдиган саросима деб тушунди ва яна такроран:

– Эшитдингми? Сен озодсан! – деди

Шу сўздан кейингина асири тилга кирди:

– Арзим бор?

– Гапир.

– Бедовимни қайтариб берсанглар. Элимга қайтайин!

Жавоб ҳам дарҳол берилди:

– Отини қайтариб беринглар!

Ўтовдан чиққан Қора алптегин қаршисида оқ қора от кишинаб туради.

Қора алптегин қурол-аслаҳасини сўраб ўтиrmади. Улар аллақачон ўзини кишанлаган ёв лашкарлари томонидан мусодара қилиниб, ўлжа бўлиб кетгандир деб ўйлади. Отига миниб, жанг бўлиб ўтган дарё ирмоғи бўйига келди. Уст-боши, қурол-яроқлари олиб кетилган шаҳидлар орасида минг отликқа бош бўлган Ашидэ Жуаннинг мурдасини топиб, унинг юзини тупроқ билан ёпди. Сўнгра келган йўлидан юриб кетди. Йўлда қирғин урушда омон қолган лашкарлардан иккича нафар туркни учратди, бора-бора улар сони ўнга етди. Даштликка чиқиб олишгач, ёввойи ҳайвонларни овлаб, озиқланиб, юра-юра элига етишди.

ЎН ЎҚ ЭЛИНИНГ ТАЪРИФИ

Бир куни Элтерис хоқон Будунли чолни ҳузурига чорлатди.

– Қора алптегин Ашидэ Жуаннинг ҳалокати ҳакидағи нохуш хабарни олиб келганидан бери ўн ўқ турклар борасида ташвиш чекаман. Улар кечагина туркут хоқонлиги фуқароси эдилар. Нега энди бугун биз турк хоқонлигини тузмоқчи бўлганимизда қаршилик қилишяпти? Улар ким ўзи? Қарлуқлар-чи? Албатта, бу ҳақда Тўникўқдан сўрасам ўринли жавоб олган



бўлардим, бироқ уни ўзим хизматга жўнатиб юборганман. Сен, қария, туркйилар ҳақида кўпроқ билсанг керак, деган фикрдаман.

– Ўн ўқлар тўғрисида сўраяпсанми? Улар қадим туркут хоқонлиги ғарбий ҳудуди таянчларидан бири эди. Болалигимда ёши улуғ қариялардан эшитишимга қараганда, ўтган замонларда ғарбдаги кўп элларни босиб олган Ўғузхон бобомиз уч катта ва уч нафар кичик ўғилларига улусларни бўлиб бермоқчи бўлганида, кўпни кўрган қарияларнинг тавсиясига кўра, дунёнинг уч тарафига ўқ ёйдан уч олтин ўқ оттирган ва тўртинчи томонга олтиндан ясатилган ўқ ёйнинг ўзини кўмдирган экан. Ўқ ёйни топиб олган уч ўғлига ва улусларига олтин ўқ ёйни улаштириб берибди-да, қолган кичик уч ўғлига ўзлари топиб келган олтин ўқлар тушган томонларни инъом этибди.

Замонлар ўтибди. Катта уч ўғил олтин ўқ ёйни бузиб, бўлашиб олганликлари учун “Бузуқлар”, учта олтин ўқни топиб олган кичик ўғиллар қавми эса, “Уч ўқ” дея ном олишибди. Бузуқлар ҳар ерда подшоҳ бўлар экан. Бора-бора бу дастур унутилиб, Ўғузхоннинг турк ўғлонлари сони кўпайибди, қабилаларга бўлинишибди, ҳар қабила ўзига олтин ўқ номини қўйишар экан. Нихоят, улар сони ўнга етибди ва улар “Ўн ўқ турклар” номини олган, дейишади.

Ғарбда яшовчи ўн ўқ турклар эндиликда тургашлар қўл остига ўтган, деб эшигтанман. Тургашлар ҳам сариқ ва қора тургашларга бўлинишган. Сариқ тургашлар қавми Манжурда яшовчи мукринлар, қора тургашлар бўлса, аждодларимиз қувиб юборган абарлар ҳисобланишади.

– Қарлуқлар тўғрисида не дейсан?

– Болалигимда улар орасида яшаганман ва улар тўғрисида бир ривоят эшигтанман. Бу ривоят ҳам улуғ бобокалонимиз Ўғузхон билан боғлиқ. У жанг-жадалларда юрганида, унинг улкан қўшинидаги лашкарлардан бир бўлаги асосий қўшиндан узилиб, ортда қолишади. Хабарини сўраса, ҳеч ким жўяли жавоб айтотмайди. Орадан кунлар ўтиб, ўша орқада қолиб кетган лашкарлар етиб келишади ва Ўғузхон улардан:

– Сизларни йўқотиб қўйган эдик, қаерда эдинглар? – деб сўраганда улар:

– Биз фалон манзилга келиб қўндиқ. Тун бўйи қор ёғди. Қор эртасигаям, индинигаям тўхтамади. Ўт-ўлан қалин қор остида қолиб, от-туяларимизга озуқа топилмади. Улар очликдан қирилиб кетишгач, барчамиз уловсиз пиёда қолдик. Аксига олиб, ҳаво совуқ келиб, ёққан қор узоқ вақтгача эrimади. Бу ҳолат баҳор бошланиб, кунлар исигунча давом этди. Мана, баҳор билан қўшилиб келаётганимиз шу... – деб жавоб қилишибди.

Шунда Ўғузхон:

– Боринг, сизларни кечирдим, бироқ бундан буён сизларнинг номингизни “қарлуқлар” деб атаймиз, деган экан. Шундан буён уларни қарлуқлар деб аташади. Тили ва дини муштарак, туркларга жуда яқин халқ деб тахмин қилса бўлади уларни...

– Маъқул, – деди Элтерис хоқон. – Кўк тангрим қўлласа, улар устига ҳам от солиб бораман. Ана шунда, уларга бизга қариндошлиги ҳам ёрдам

бермайди. Ҳозир улар учун турк хоқонлигидан кўра, табғашнинг хушомад сўзи-ю, ипаги афзал кўринади...

Хоқон жим бўлиб қолди. Кўнглида яширин сири бор эди унинг. Ўшани айтсамми ёки айтмасамми деб иккиланаётган эди. Будинли қария болаларининг мураббийси, Кўк тангрига яқин одам, зарурат туғилса баъзида туш йўядиган, ўтмишни, урф-одат, шажараларни биладиган, табобат илмидан хабардор, турк қавмининг донишманд оқсоқоли, унга ҳар қандай сирни ишониб айтиш, маслаҳат олиш мумкин эди.

Охир бир қарорга келди шекилли, сўзини давом эттириди.

– Яқинда бир туш кўрдим. Тушимда Тангритоққа ўрмалаб чиқиб бораётган эмишман. Мақсадим чўққининг қор қоплаган тепасига чиқиб олиш, Кўк тангри билан ёки унинг қошига абадий кетган отамнинг руҳи билан гаплашиш, хоқонликнинг келажак тақдирни ҳақида сўраб, улардан жавоб олиш эди. Чўққининг ярмигача бўлган йўлни унчалик қийналмай босиб ўтибман. Бироқ ногаҳон бир камон ўқи келиб, кўксимга санчилармиш, со-вутим қани, нега киймаганман дея ўкинармишман. Энди Кўк тангри билан, отамнинг руҳи билан гаплашиш ниятим амалга ошмайдиган бўлдими, дея кўрқа бошлабман. Ортга қайтмоқчи бўлиб, пастга қарасам, тик тоғдан тушишнинг имкони йўқ, яна юқорига ўрмалайман десам танамни куч-қувват тарк эта бошлаганини сездим. Нима қилишимни билмай, Кўк тангрига ёлвора бошладим: “О, Кўк тангirim, ўзинг мадад бер, йўлингга пешонаси оқ кўчкорни қурбонлик қиласан! Ёрдам бер, Кўк тангirim!” – деган нидомни акс-садо ўзимга қайтарди.

Худди шу лаҳзада, пастдан – тоғ этагидан марҳум отамнинг товуши келгандай бўлди. Ўгирилсан, пастда отам икки қўлинин мен томон чўзиб: “Кел, ўғлим, ёнимга кел”, – дея чорлаётганмиш. Ноилож ўзимни пастга ташлайман, бамисоли қуш каби парвоз қилиб, отамнинг қучоғига отиласан... ке-йин уйғониб кетибман.

Дикқат билан хоқонни тинглаб ўтирган донишманд қария туш таъбири ни дарҳол айтмади. Чукур ўйга толди. “Хоқонни руҳлар чорлаётган экан, демак, у кўпга бормай вафот этиб, орамизни тарк этади” деган фикр унинг кўнглини қишининг изғирин аёзидек тилиб ўтди. Хоқонга унинг ажали етгани, мудхиш ажал фариштаси тепасида аллақачон учиб юргани ҳақида рўйрост айтишдан кўрқди, юраги дов бермади. Аммо хоқон кўрган тушининг таъбирини кутаётганди.

– Вақти етиб, ҳар биримиз Кўк тангри қошига, аждодларимиз кетган томонга кетамиз. Бироқ ҳамиша қалбимизда тунда сахрода адашган одамга мадад бўлиб, тўғри йўл кўрсатувчи темирқозик юлдуз каби бир илинж борки, у юрт ҳамда яхши амаллардир. Тушингиз таъбирига келсак, марҳаматли хоқоним, ҳозир сиз икки йўл орасида турибсиз. Турк хоқонлигини тиклаш мақсадида кўп машаққатлар тортдингиз, бу мушкул вазифани бажо келтирмоқ учун кўп ўй сурасиз, кўнглингиздан турли хаёллар кечади, кимдан ёрдам сўрашингизни билмайсиз, қардош қавмлар бўлса, сизга ҳаммаслак бўлиб, қўл чўзиш ўрнига чукурга итармоқчи бўлишади, шу



боисдан аросатдасиз. Балки, олдингизда баланд тоғдек бўлиб турган муаммолар Тангритоғ чўққиси тимсолида тушингизга киргандир. Хавотир ва шубҳа-гумонлардан кўнгилни холи қилиб, Кўк тангри ва падарингиз руҳига қурбонлик қилинг, хоқон!

Хоқон бошини кўтарди. Ўткир нигоҳ билан Будинли қарияга тикилди. Хаёлидан “Ўлимдан қўрқдимми?” деган ўй ўтди. Неча марта уруш қилгани эсира тушди. Хоқонлик барпо этиш орзусида йигирмадан ортиқ қонли жангларга ўзи найза ва қилич билан от солиб кирган экан. Бироқ лашкарни неча бор жангга бошлаб боргани-ю, ўзи кўмондонлик қилгандиги сонини аниқлашда чалкашиб кетди. Уларнинг сони анча кўп эди: қирқми ё элликми?

“Кизик, – дея ўйлашда давом этди хоқон. – Жанг пайтида одам ўлим хавфи ҳақида ўйламайди. Нега энди, тинч-хотиржам онда ўлимдан даҳшатга тушади?”

Бу саволга жавоб тополмади.

– Қурбонликка аталган қўчқорни келтириб, сўйинглар! Кўк тангри ва отам руҳига бағишлаб ўтказилажак маросимга ўзинг бошчилик қил! – дея буйруқ берди Будинли қарияга.

ЭЛТЕРИС ХОҚОН ЎЛИМИ. ҚАПАҒАН ХОҚОН

Кўк тангрининг Элтерис хоқонга тушида аён қилгани тўғри бўлиб чиқди.

Баҳор келиши билан Элтерис хоқон жанг қилишга отланар эди. Бу сафарги мўлжал Буюк девор томонга қаратилди. Турклар низо чиқарганига ўн йилдан ошди. Энди деворнинг ичкарисида яшаётган табғашларни қиличдан ўтказмоқни ният қилди. Кўл остидаги лашкари унчалик кўп эмасди: атиги беш-олти минг отлиқ аскарлар худди жангга эмас, талончилик қилишга бораётгандек йўлга чиқди.

Бу вақтда Жу хоним таҳтга ўтирган, унинг оддий канизак бўлгани одамлар хотирасидан кўтарилиганди. Саройда тартиб ўрнатилганди. Бироқ Тубит подшолиги билан уруш давом этаётгани учун туркларга қарши асосий ҳарбий кучларни ташлай олишмасди. Чегара қўшинлари кучайтирилган, уларга девор устида туриб, ёвга ўқ ёғдириш, айниқса, лашкарбошилар, тарханлар, шадларни нишонга олиш топшириғи берилган бўлиб, ҳар бир жангчининг боши учун бир неча кумуш танга ваъда қилинган, шу боис табғаш чегараси мустаҳкамланганди.

Буюк девор ташкарисида жойлашган бир неча аҳоли манзилларига қилинган ҳужум ўн йил аввал бўлганидек кутилган натижани бермади. Бир гурух табғашлар истеҳкомларни паналаса, бир тўдаси Буюк девор устига чиқиб олишди ва туркларни камонлардан нишонга олишди.

Самарасиз ҳужумлар хон лашкарларининг руҳини тушириб юборди. Олисдан кузатиб, жангни бошқариб турган Элтерис хоқон лашкарни қайта

рухлантириш, улар қалбida ғалабага бўлган ишонч чўғини аланга олдириш учун ўзи жангга кириши зарурлигини сезди. Балки, тақдир, пешонасига ёзилган қисмат битиги ёхуд Кўк тангри ихтиёри ўз ажали сари йўллаб тургандир, ким билсин?

Буюк девор бўйлаб ўрнашган, орқасини деворга тираб душман хужумини қарши олаётган табғашлар Улуғ дала бўриларининг хужумини қайтаришга шай туришарди.

Ёши бир жойга бориб, танаси, ҳаракатлари оғирлашиб қолган Элтерис хоқон бу хужумни ўзи бошқараётганди. Мудофаачилар девор дарвозасини беркитиб олишганди. Шунда хоқон лашкарларига қил арқон опкелиб, дарвозанинг оғочларига маҳкамлаб, бир учини отларга боғлаб, тортиб йиқитишга буйруқ берди. Ўнлаб отлар кучи билан дарвоза қўпорилди. Турклар йиқитилган дарвоза ўрнидан ичкарига от солиб кира бошладилар. Қирғин-барот жанг бошланиб кетди.

Қалъанинг ташқи мудофаа деворига тақаб қурилган деворнинг баландлиги биринчи асосий девордан пастрок кўринса-да, ўн қулочдан кам эмасди. Бир гуруҳ табғаш лашкарлари тошлардан мустаҳкам қилиб қурилган, устида бир неча арава бемалол ёнма-ён юрса бўладиган энли деворга арқон нарвонлар ёрдамида чиқиб олишиб, тошларни паналаганча туркларни нишонга ола бошладилар. Улар табғашлар лашкари ўнбошиси Хуаннинг абжир мерганлари эди. Бу кичик жанговар ўнлик девор устига чиққач, жун арқондан ишланган нарвонларни тепага тортиб олишди. Мерганларга ҳар бир юзбоши, мингбоши, туманбоши, тутук, тархан, ботир, жанг пайти алоҳида ўрнак кўрсатган, турк аскарини отиб ўлдиргани эвазига бир кумуш танга мукофот белгиланган бўлиб, улар имкон борича ўқни бекорга сарфламасликка ҳаракат қилишарди. Пайт пойлаб туриб, пўлат совутни ҳам тешиб ўтадиган оғир ўқларни камонга жойлаб, пастда жанг қилаётган туркларни кузатишар, танлаб-танлаб отишарди.

Дарвозадан суворий лашкарларни бошлаб кирган бўз отликнинг бошидаги пўлат дубулға ялтираб турарди. Унинг ўнг ва сўлга чапдастлик билан қилич солиши, абжирлиги Хуаннинг эътиборини тортди. Хуан бу суворийдан қўзини узмай кузатиб турарди. Ботир суворий яна қилич силтаганда, эгнидаги чакмонининг олд қисми очилиб кетди. Хуан унинг кўксидаги бўрининг олтин боши тасвиrlанган доира шаклидаги кичик қалқонга кўзи тушди. Ўнбоши қалқиб кетди, ҳаяжондан юраги тез-тез уради. “Бу одам уларнинг саркардаси эканлиги аниқ! Ё янглишдиммикин?.. Отаман, баригиб, ким бўлгандаям, юкори мансабдаги ҳарбийлиги кўриниб турибди”. Қандайдир завқ аралаш “Саркарда! Турк саркардаси! Ниҳоят, мен уни топдим!” деган ҳайқириқни қўл остидаги мерганлар ғала-ғовурда эшитмасди. Уларнинг ҳар қайси бир тош орқасида беркиниб ўтириб, ўз ўлжасини излаш ва мўлжалга олиш билан машғул эди. “Шошилмоқ зарур! Бундай фурсат ҳаётда бир марта келади! Бошқалардан олдин уни ўзим отиб улгуришим керак...”

Дарҳол ялтироқ дубулғали туркнинг чакмони ёқасидан кўзга ташланган



олтин бошли кўқрак қалқонини нишонга олди. Аксига отлиқ бир жойда турмас, бедови у ёқ-бу ёққа бошини буриб, қўлидаги олмос қиличи билан мудофаадагиларнинг қонини аёвсиз тўкмоқда эди. У қилич ўқталганда кўқраги гоҳ баланд кўтарилип, гоҳ паст тушиб турарди. Бу ҳаракатлари Хуанга нақ юракни, кўксини пойлаб отишга халақит бермоқда эди.

Хуан эман дараҳтидан ясалган камони тутқичини маҳкам сиқиб ушланча, ҳўқиз терисидан маҳсус ишланган, ёй балдоқлариға таранг тортиб боғланган ипга найза учидек келадиган пайкони бор ўқлардан бирини солди ва то қулоғига келгунча тортди. Бу табғашларнинг ёлланма турк аскарларидан ўрганган усули эди. Шундай қилинса, отилган ўқ пўлат совутни ҳам тешиб ўтарди. Хуан қиличини баланд кўтариб, галдаги ҳамлага киришган отлиқнинг нақ юрагини нишонга олиб, ёй ипини қўйиб юборди. Ҳавони визиллатганча кесиб учган ўқдан кўзини узмай қараб турган, парли ўқнинг нишонга аниқ тегиб, бўри боши тасвирланган кўқрак қалқонини тешиб ўтганини кўрди, аниқроғи, хаёлан ишонди. Сабаби ўзи отган пўлат пайконли ўқнинг қандай кучга эгалигини, унинг зарби темир совутни тешиб ўтиши мумкинлигин биларди.

Сезгиси алдамаган экан. Отлиқнинг тепага кўтарилиган қиличи ҳавода бир зум тўхтаб қолди ва ўзи отдан йиқила бошлади. Буни кўрган туркийлар хоқонни суюб, отининг жиловидан ушлаб, жанг майдонидан олиб чиқиб кетишиди. Шу кетишида жанггоҳдан икки от чоптирим масофа қадар олисдаги чодир – қароргоҳга олиб боришиди. Дарҳол отдан тушириб, ичкарига киргизишиди, эгнидаги совутни ечишга уннашди. Бироқ аҳвол анча жиддий эди. Камон ўқи нақ юракка қадалган экан.

Йўлда келишаётганида хоқон алаҳсирай бошлади: “Кўк тангри... тушимда... кўксимга садоқ ўқи қадалиши аён бўлганди... Ўз кўзим билан кўргандим... Будинли қария... Будинли ҳақиқатни айтгиси келмади... Ачинди... Кўк тангри ғазабнок... у... у аямайди... хоқонлик... энди не бўлади...”

Зудлик билан табиблар йиғилишиди.

Улар учи ниҳоятда ўткир қилиб тарашланган, пайкони оғир ўқнинг кўқракка чуқур ботганини кўриб, чиқариб олишга қўл уришдан чўчишиди. Бундай ҳолатларни кўравериб, кўзи ўрганиб кетган луқмонлар агар ўқ суғуриб олинса, хоқон мукаррар ўлим топишини билиб туришарди.

Элчилар чодирдан ташқарида бир муддат маслаҳатлашиб олишгач, ўз хулосаларини Тўникўк билан хоқоннинг иниси Машхурбекка баён қилишиди. Шароитни англаган Машхурбек акаси ёнига кирди. Хоқоннинг кўнглини кўтариш учун бир-икки оғиз хушомад сўзлар гапирди ва асосий мақсадга кўчди. Ундан орқароқда Тўникўк ўтиради.

– Аввало, Кўк тангрига ва отамиз руҳига бориб қўшилмаслигингиздан олдин бизга келгусида қандай ишлар қилишимизни буюрасиз, Элтерис хоқон? – сўради унинг бош тарафида чўқкалаб тиз букиб ўтирган Машхурбек шод.

– Гапларимни дикқат билан тингла Машхурбек шод, қулоғингга қўроғшиндек қуйиб ол, – деди хириллаб нафас оларкан хоқон. – Мен отам

рухи билан учрашишга йўл оларканман, менинг ўрнимга турк хоқонлигини бундан кейин сен бошқаришингни васият қиласман. Тахтга ўтириш. Ўғилларим Муғилиян билан Култегинга улушларини бер, уларни четлаб ўтма. Яна бир гап. Сендан кейин тахтга меросхўр тўнгич ўғлим Муғилиян ўтириши шартлигини зинҳор унутма...

Кўнглидаги барча гапларни тахт вориси бўлмиш иниси Машхурбек шодга айтиб бўлгач, Элтерис хоқон жон таслим қилди.

Саркарда ўлимини эшитган лашкар чекинди. Табғашлар эса мудофаа қўрғони ичидан чиқиб, чекинаётган туркларни таъқиб қилишга журъат қилолмади. Хоқоннинг жонсиз жасадини кўтарган турклар Халхадаги ўрдасига қайтиб кетишиди.

Элтерис хоқонни ота-боболар таомили бўйича дафн этишга пухта тайёргарлик кўрилди. Маросимлар ҳеч бир камчиликсиз ўтишини Будинли қария назорат қилиб борди. Руҳи аллақачон Кўк тангри томон учуб кетган хоқонни тупроқка қўйишдан олдин фарзандларига видолашишга руҳсат берилди.

Муғилиян ва унинг онаси ўзларини тута олмай ҳўнг-ҳўнг йиғлашар, ҳали ўн ёшга тўлмаган Култегин бўлса, кўзларидан бир томчи ҳам ёш томизмай қотиб турагар, бармоқлари мушт бўлиб тугилган бир алфозда, йиғлаб юбормасликка тиришарди. Ички туғёнини куч билан ушлаб турган боланинг юзига қон тепиб, қизариветди. У хоқоннинг кўкрагидан суғуриб олинган, маросим пайтида тобут ёнига келтириб қўйилган қонли ўқдан кўзини узмасди.

Кейинчалик у ўша ёй ўқини катталардан сўраб олди. “Ўқни нима қиласан” деб савол беришганида, индамай қўя қолди. Отаси қонига бўялган, табғаш Хуан томонидан отилган машъум ўқ ҳамиша унинг садоғида турагар эди. Бола нималарни хаёл қилди ва қандай мақсадда қонли ўқни ўз садоғида саклаб юриши сирлигича қолди.

Дафн маросими яқунлангач, Элтерис хоқон ўрдаси сафарга отланди. Улар Қутлибекнинг ота-боболари ҳоки мангу қўним топган макон – Тангритоғори томон шошилмоқда эдилар. Айни баҳор палласи. Улуг дашт қирадирларида лолалар очилган, кўк майса ўтлар тизза бўйи бўлган пайтлар эди. Бу ўтлоқларда кийик ва қулонлар подаси ўтлаб юради. Ҳайвонлар одамларни кўриши билан гурас-гурас қочиб, кўздан фойиб бўлишар, широр учун жуда қулай фурсат эди. Бироқ широр қилиш ва озиқ-овқат ғамлаш ҳеч кимнинг кўнглига сифмасди. Хоқони – йўлбошчисидан айрилган азадор улуснинг эътиборини кенг дашту, ўтлоқзорларнинг мўл-кўллиги жалб қилолмас, улар хоқонни ўз қошига чорлаган отаси ёнига кўмиш фикри билан банд эдилар.

Кўпсонли улус Тангритоғ чўққиси этагига келиб тўхтади. Хоқон аждодлари ётган форга дафн этилгач, унинг руҳига қурбонликлар қилинди. Элтериснинг бўз ўтови эшиги олдига санчиб қўйиладиган, яловига бўри боши тасвири туширилган түғ ётқизиб қўйилди. Қавм-қариндошлар қора либос кийиб, аза очишиди. Орадан роппа-роса қирқ кун ўтиб, русум бўйича яна қурбонлик қилинди ва азадорлик тўхтатилди.



Туркларнинг тартиб – таомили бўйича энди янги хоқон сайланиши керак эди. Кенг майдонга бир гуруҳ куролланган аскарлар кузатувида Тўникўк ва вафот этган хоқоннинг иниси Машхурбек чиқиб келди. Тўникўк улусга му- рожаат қилиб, шундай деди:

– Сўзимга қулоқ тулинг, қардошлар, мен – донишманд Тўникўк Кўк тангрим хоҳиши ва марҳум хоқон Қутлибек-Элтерис хоқон васиятини сизларга етказмоқчиман.

Халқ орасидаги ғала-ғовур, ўзаро пиҷирлашувлар тинди ва орага жимлик чўқди.

– Кўк тангрим хоҳиш-иродасидурким, улуғ хоқонимиз орамиздан кетди. Уни улуғ тангрим ва ота-боболари руҳи ўз ёнига чорлади, жони рух бўлиб учиб кетди. – Тўникўк донишманд бироз тин олиб, хўрсинганча сўзини давом қилди. – Энди Элтерис хоқоннинг сўнгги васиятини айтаман, эшиитинг. Бу васиятни хоқон ўлимидан бир неча сония олдин иниси Машхурбекка айтганди, мен эса гувоҳ сифатида ўша ерда ҳозир эдим, ўз қулоғим билан эшиитдим. Хоқон шундай деганди: “Мен оталар руҳи қошига йўл олмоқдаман, туркларнинг аждодлари амал қилиб келган ўз дастури бор. Ўша дастурга кўра, сен менга меросхўрсан, мен вафот этгач, тахт сеники, хоқонлик сеники” деди ва ўғиллари Муғилиян ва Култегинга ғамхўрлик қилишини, уларни эсидан чиқармасликни сўради.

Йиғилган халойиқ донишманд оқсоқол Тўникўк сўзларини бош эгганча тинглади.

– Энди, Машхурбекни хоқон қилиб сайлаш ва таомилимизга кўра оқ наматга ўтқазмоқ вақти келди, – деди Тўникўк ва буюрди: – Оқ намат келтиrint!

Оқ намат ва удум бўйича қора рўмол ҳам олиб келинди. Қора рўмолни Машхурбекнинг бўйнига боғлаётиб, Тўникўк барчани ҳайрон қолдириб сўради:

– Қапаған хон, қанча муддат хон бўлмоқчисан?

Халойиқ Тўникўкнинг сўзларини аниқ эшиитди. Одамлар орасида олағовур кўтарилиди.

– Нима деди? Қапаған?

– Қапаған хон дегандек бўлдими?

– Бу не дегани?

Тўникўк ўнг қўлини баланд кўтариб, халқни жимлик сақлашга чақирди ва ўзи айтган исм маъносини тушунтириди:

– Бундан кейин бунинг исми Машхурбек эмас, балки Қапаған хон! Душманларни, ғанимларни қоплондай қопадиган жасур хон бўлсин деган ниятда унга шу номни бердик!

Тўникўк донишманд сўзларини тугатиб улгурмасидан кучли ва давомли кичкириклар бошланиб кетди.

– Қапаған хоқон!

– Қапаған хоқон!

– Қапаған хоқон!



Халқнинг гулдурос ҳайқириғи Тангритоғ деворларига урилиб, акс-садо берди.

Тўрт нафар аслзода турк беклари Қапаған хон ўтирган оқ наматнинг тўрт тарафидан ушлаб уч марта кўтариб туширдилар. Бу туркларнинг хоқон сайлашдаги урфларининг энг асосийси эди. Ўша тўрт нафар бек уч марта “Бундан кейин Қапаған хон бизнинг хоқонимиз!” дея такрорлагач, у ҳақиқий хоқон ҳисобланарди.

Туркларнинг биринчи хоқонлиги даврида тахт ворислиги, яъни хоқонликнинг отадан болага эмас, балки акадан инига ўтиш қоидаси Қутли ва Машҳурбек даврида қайтадан урф бўла бошлаган бўлишига қарамай, айнан эски одатни тиклаган одам, яъни Қапаған хоқоннинг ўзи орадан кўп фурсат ўтмаёқ таомилга зид йўл тутди. Худди шу нарса бир неча йиллардан сўнг қонли воқеалар содир бўлишига сабаб бўлди.

Қапаған хоқон тахтга ўтиргач, лавозимларни адолат билан тақсимлаши керак эди. Айнан шу масалада юз йиллик қоидани, удумни бузди. Энг аввало хоқонликка ворис тайинланди. Элтерис васиятига кўра тахт вориси қилиб Муғилиян тайинланиши керак эди. Аммо Қапаған хоқон васиятга амал қилмади, унинг рухини чирқиратиб, ўз фарзанди Кичикхонни ўзидан кейинги бўлғуси ворис деб эълон қилди ва унга Тўлис шод лақабини берди. Тахт вориси ҳамиша ўнг қанотни бошқаарди, Муғилиянга эса тардуш шодни инъом этди. Бу хатти-ҳаракатлари билан янги хоқон табғашлардан кўпроқ тарбия олиб, туркий дастурларни уччалик хурмат қилмаслигини намойиш қилганди.

Тўла дарёси қирғоғидаги жангдан кейин, охири денгизга куйиладиган Селенга дарёси ва унинг ирмоқлари бўйларида яшаётган тўққиз ўғузлар билан уйғурлар турк хоқонига тўғридан-тўғри бўйсунадиган бўлгандан сўнг, турклар Халхада яккаю ягона хўжайинга айландилар. Бироқ шундок қўл чўзса етадиган жойдаги Сибирни эгаллаган қирғиз хонлиги, тундрадаги куриканлар, шарқда киданлар ва татаблар, фарбда тургашлар билан қўшни қарлуқлар, бамисоли хоқонлик кўксига яланғоч қилич каби тираги турган табғашларнинг Тан подшолиги туркларга ўз ўтовида белбоғини ечиб, оёқ узатиб хотиржам ўтиришига имкон бермаётганди.

Исми олдиндан билиб, сезиб қўйилгандек Машҳурбек чиндан ҳам Қапаған хоқон бўлиб чиқди. Агарда теварак-атрофдаги хонликларга ўз куч-кудратини кўрсатиб қўймаса, худди заифлашган бўрининг бошқа ваҳшийларга ем бўлиши каби ахволга тушиб қолиши унга аён эди.

Қапаған хоқон иккиланиб ўтирмасдан Ўрдўсга хужум қилди ва қарамлиқда яшаётган бир неча юз хонадон турк оиласарини кўчириб олиб кетди.

Доно Тўникўқ Қапағанга маслаҳат берди:

– Табғашларнинг Тан сулоласидан қадимда кўп авлод подшолар ўтишган. Минг йиллар мобайнида дао деб номланган удумга амал қилиб келишган. Қадимда яшаб ўтган Кунфузи деган донишманд ўша амалларни бир тар-



тибга солиб, дао шаклига келтирган, сен ҳозир табғашлар нечун бу қадар айёр ва ақлли деб хаёл қилаётган бўлишинг мумкин. Уларнинг ақллилигига сабаб бутун улус қадимда хукмронлик қилиб ўтган, подшолардан мерос анъаналарга суюнишлари, китобга ёзиб қолдирилган қоидаларга қатъий амал қилишларидир. Ҳатто Тан подшоси ҳам дастурдан четга чиқиб иш қилмайди.

– Хўш, биз қандай йўл тутмоғимиз даркор? – сўради Қапаған хоқон.

– Биз ҳам улар амал қиласидан усувларнинг айримларидан ўзларига карши қурол сифатида фойдаланишимиз зарур.

– У қандай йўл экан?

Тўникўк бироз мулоҳаза қилгач, деди:

– Жу подшоҳ аёл ўз ўғлини таҳтдан четлатиб, мамлакат таҳтида ўзи ўтириби.

– Бундан хабарим бор. Ўғлини олис бир чекка вилоятга сургун қилинди, деб эшитганман.

– Эшитган бўлсангиз, худди шу нарса бизга қўл келиши мумкин. Вазиятдан фойдаланамиз. Ўзингиз мундоқ чуқурроқ мушоҳада қилиб кўринг-а, биз Тан подшосининг қонуний меросхўри тарафини олсак, нима дейсиз?

– Шундай йўл тутсак, меросхўр фарзанд номидан қилич кўтарган ҳисобланамиз ва табғашни ўзимизга қаратишимиш мумкин, демоқчисиз-да?

– Тўғри фикрладингиз, Қапаған хон, – деди Тўникўк хоқонга хушомад қилиб. – Аммо бу ишнинг бир нозик томони бор. Даставвал Тан подшолиги турк хоқонлигини тан олмоғи керак. Тан олиши учун унга элчи юбориш лозим...

– Элчими?

– Жу подшога хоқонлик номидан элчи борса, бу подшолик анъаналарига хос иш бўлади. Шахсан ўзим борсам ҳам бўларди-ю, бироқ Чанъянга киришим биланоқ майдон ўргасида бошимни танамдан жудо қилишлари турган гап. Шу боис элчиликка муносиброқ бошқа бирорни топамиш.

Қапаған Ўрдўс туркларини озод қилиш билангина чекланиб қолмай, яна бир неча табғаш вилоятларига талончилик хужумлари уюштириди. Шунинг баробарида Таннинг аёл подшоси Жу хонимга фуқаро бўлмоқчилигини билдириб, элчи ҳам жўнатди.

Янги тайнланган турк хоқонлигининг бу даражадаги шаккоклигидан ғазабланган подшо аёл туркларни тутқун қилишга қўпминг сонли, балки юз мингдан зиёд, оғир қўшин жўнатди.

Турклар бир жойга тўпланиб машварат қилишди.

– Кўпсонли лашкарга карши жанг қилиш мушкул, қиличимизни қиндан суғурмай туриб қириламиз. Яхшиси, Халхадаги хилват жойлари бисёр тоғлар орасига яширинамиз, – дейишиди.

Турклар Ўтукан тоғларига беркиндилар. Табғаш қўшини эса уларни одатий манзиллари – даштга излаб боришиди. Тополмагач, ортга қайтиб кетишиди. Шу тариқа бу тоғлар дашт бўриларини иккинчи маротаба муқаррар қирғиндан сақлаб қолди.

Үрдүсдаги қавмдошларини табғашлардан тортиб олишгач, дашт бўрилари сони анча кўпайиб қолди, рухи кўтарилди. Кудратли турк хоқонлигини тузиш тўғрисидаги армонлари амалга ошишига ишончлари ортди. Элтерисхон хоқонлик тепасига чиққан даврларда тўқиз Ўғуллар ва уйғурлардан бошқа қавмлар турк хоқонлигини тан олмаган эдилар.

Донишманд Тўникуй маслаҳатини олгач, Қапаған хоқон ҳарб ишини сиёсатга мослаб олиб боришга интилди. Илон йилида мўғул қавмидан чиққан татаблар ва киданлар табғашга қарши қўзғолон қўтаришди. Бу ҳол Қапаған хонни ҳал қилувчи ҳаракатлар бошлашга унади. Татаблар ва киданлар ўша даврларда шарқда, Амур дарёси бўйида истиқомат қилишарди.

Қапаған хоқон зудлик билан улар томон қўшин тортди.

Туркларнинг қақшатқич зарбасидан қўрқкан татаблар дарҳол таслим бўлишди ва иттифоққа киришга рози бўлдилар. Киданлар эса қалин тўқайзорларга кириб, ғойиб бўлишди.

Бу воқеалар юз берганида, донишманд Тўникуй бир лашкар билан олиса юргани учун Қапаған ундан маслаҳат сўрай олмасди. Хоқон юзага келган муаммони ўзича ҳал қилмоқчи бўлди. Жу хонимга чопар жўнатди.

Чанъянга узоқ йўл босиб, от чоптириб борган чопар узоқ кутишига тўғри келди. Расмий ишларда асло шошилмайдиган хитой амалдорлари Қапаған хоқоннинг хабарини подшо аёлга етказаман дегунча қунлар ўтди. Ниҳоят чопарни подшонинг ўзи эмас, балки эшитган сўзини бирортасини-ям қолдирмай оқизмай-томизмай ҳукмдорга етказишга устаси фаранг дафу қабул қилди.

Чопар, энди уни элчи деб атаса ҳам бўлаверади, жанговар турк хоқонининг қиличдай ўткир, наиза тифидек совуқ хабарини айтди.

– Улуғ дашт турклари саркардаси, муҳтарам хоқонимиз осмон фарзанди, подшо аёлга умри узоқ бўлишини тилайди, – деди сафарда юравериб, қуёш нури ва дашт шамолидан юzlари қорайган, жанг қилавериб, ўлим ва қонни қўравериб, юраги тошга айланган, ҳаракати ва гапирган гапи дағаллигидан анча қўполлиги сезилиб турган хон элчиси баланд овоз билан. – Яна Қапаған хон айтдики, агар подшоҳ розилик берса ҳамда турк хоқонлигини расман тан олиб, бундан кейин туркийларни ёввойи дала фарзандлари демасдан, қамуғ қора турк будин дея аталишига иқрор бўлса, киданларни ўз инларига қайтадан тиқиб қўйиш қўлидан келаркан!

Чақимчи-ю, хуфя уясига айланган шоҳ саройининг бузилган ҳавосидан заҳарланиб, дараҳт қўланкасида ўсган гиёҳ каби сарғайган қиёфасидан ва айёрлиги сезилиб, шумлиги худди денгиз сатҳи каби тусланиб турувчи дафу турк элчисининг дағал муомаласи-ю, баланд овозига базўр чидаб ўтиради.

– Эшитдим, қулоғим кар эмас, сўзларингни подшоҳимизга етказаман. Кутасан, – деди дафу зардали овоз билан.

– Қанча кутаман?

– Қанча керак бўлса, шунча...



Дафу айтганидек, элчи қанча керак бўлса, шунча кутди.

Бир неча кун чопарнинг қайтишини кутган Қапаған, сабри чидамади, қўл ковуштириб ўтираверишни ўзига эп кўрмади. Бир зарба билан келгусида ўзи ва турк хоқонлигининг содик иттифоқдоши бўладиган киданларни қалин ўрмондаги уйларигача қувиб солди. Шу ерда тўхтади, уларни уйлари остонасига қадар сиқиб боришдан тийилди. Сабаби, бу хатарли эди. Шунингдек, аёл подшодан ҳали хабар келмаганди.

“Темирни қизигида бос” деган эски турк нақлига амал қилган тинибтинчимас Қапаған киданларни қувиш билан қаноатланиб, Жу хонимдан келадиган хабарни кутиб ўтирасдан от бошини Ўрдўс томон бурди. Мақсади биринчидан, у ердаги қолган туркларни қулликдан озод қилиш бўлса, иккичидан, янги барпо этилаётган турк хоқонлиги ғазнасини табғашлардан тортиб олинган олтин-у, жавохир билан тўлдириш эди.

Тан салтанатининг аёл подшоси барча мулозим, амалдорларни чорлаб, маслаҳат қилди. “Бебош турклар хоқонлигини қулатиб ўзларини Ўрдўс билан Алашан тарафларга қувиб юборайлик, ахир олдинлари улар бизларнинг қулларимиз бўлишган. Агар турк хоқонлигини тан олгудек бўлсак, хавф-хатар янада кучаяди” дея жар солганлар бўлди. Улуғ даштда бўрининг боши тасвирланган байроқнинг яна ҳилпирашини ичичидан хоҳловчилар ҳам сарой аҳли орасида бор эди. Аёл подшо саройдаги айрим хитойлашган турк амалдорларидан ҳалигача қутуломаганди. Тан сулоласининг ҳақиқий таҳт ворисини сургун қилган бу подшони ёмон кўрадиганлар дашт бўрилари кўмагидан умид қилишарди. Табиийки, бундай пинҳоний режалар очиқ айтилмасди. У йиллар мобайнида кўнгилларда сақланиб, худди улкан ҳарсангтош остида асрлар бўйи ётган, кўзи очилиб, ерни ёриб чиққан булоқ каби йўл топишга ҳаракат қилишарди.

Улуғ даштда янгидан барпо этилган турк хоқонлигини тан олишни хавфли деб ҳисобловчилар ҳам, уни тан олишни ёқловчилар ҳам, бир неча кунгача бир қарорга келишолмади. Бу орада хон лашкарлари Таннинг бир неча вилоятларига ҳужум уюштириб, анча-мунча ўлжа ва асирлар олиб, Ўтукан тоғларининг минг йиллик чегаралари томон чекиниб кетишиди.

Ҳал қилувчи сўзни пинҳоний фитналардан толиққан Жу хоним айтди.

– Турк хоқонлигини тан олдиқ, – деди подшо ранжиган оҳангда. – Тўғри, Буюк девор бўйлаб чегараларимизда кўчманчи газандаларнинг тез-тез пайдо бўлаётгани мени ҳам хавотирга солмоқда. Лекин уларнинг хоқонлари билан тил топишса бўлади. Кўп сонли ёввойидан кўра, ақли бутун битта ёввойи билан музокара олиб борган маъқулроқ, деб ўйлайман.

Эртасига сарой мирзалари девонига аёл подшо ёрлигини ипак қоғозга ёзишга фармон берилди.

Турк хоқони элчисини кутиб олган сариқ юзли, жаҳлдор дафу буйруқ бўйича довот-қаламини қўлига олди ва ялпок тахта устига энгашганча мактубни ипакка кўчиришга киришди.

“Кўк тангри фарзанди, марҳаматли ва шафоатли Будда қизи, Тан под-



шоси, мартабали Жу хоним буюради: ашина Гудулу² ўғли ашина Мочжо турклар хони, Хитой шанюйига чегара сарҳадларимизга яқинлашиб келган киданли аҳмоқларни қувиб юборишни ва бизнинг мурувватимиздан умидвор бўлишни ва уни улкан марҳамат деб ҳисоблашни буюради”.

Тан подшолиги туркларнинг тинимсиз ҳужумларидан бироз муддатга бўлса-да, қутулишни, чўзилиб кетган Хитой – Тубит урушига мадад кучлар йиғиб олишни режалаштирганди. Аёл подшо ноилож эди. Шу боисдан ҳам Халхадаги хоқонликни тан олди, уларнинг хоқонига илтифот кўрсатиб, шанюй унвонини берди. Аслида улуғ табғаш подшолигининг турк хоқонлигини тан олишининг ўзи етарли эди, Қапаған ўзига берилган бу катта унвонга қайрилиб ҳам қарамади.

Жўнатилган элчи Халхага аёл подшодан хушхабар олиб келган пайтда, Қапаған хон Ўрдўсдаги бир вилоятни талон-тарож қилиш билан банд эди.

Туркларнинг бебошлигига тишини-тишига қўйиб, вақти соати етгунча чидаб туришга қарор қилган Тан подшосининг бу сафар сабри тугади. Туркларнинг ёрлик олгандан кейин ҳам яхшиликка ёмонлик билан жавоб бераётгани аёл ҳукмдорда қучли ғазаб уйғотди ва улар устига лашкар юборди. Турклар қочиб, Халхага, Ўтукан тоғларига бориб тиқилди. Нима бўлгандаям Буюк девор ортидаги улкан подшолик тан олган турк хоқонлиги Улуғ даштда етмиш йилдан кейин қайта тикланиб, уларнинг олтин бошли бўри тасвири акс эттирилган байроби яна ҳилпираи бошлади. Бироқ энди у Туркуллар хоқонлиги эмас, балки ўз аждодлари – Туркуллардан кўп нарсаларни мерос қилиб олган кўк турклар ўрдаси эди.

ТАМОМ

*Қорақалпоқ тилидан Аҳмад ҚОЗОҚ
таржимаси*



² Гудулу – Тан подшоси янглишиб “күтлининг ўғли” дейди.



ҲАЛИМА

**Ҳалима
ХУДОЙБЕРДИЕВА**

Ўзбекистон халқ шоири. 1947 йилда тугилган. Тошкент давлат университетини (ҳозирги ЎзМУ) тамомлаган. “Илк мұхаббат”, “Оқ олмалар”, “Чаман”, “Суяңч төгларим”, “Бобо қүёш”, “Иссик қор”, “Садоқат”, “Мұқаддас аәл”, “Тұмариснинг айтгани” каби шеърий ва насрий тұлпамлари чоп этилған. Фазу Алиева, Сильва Капутикян, Ибройим Юсупов ижодидан таржималар қылған.



АЙЛАНАР ТАҚДИРНИНГ ТЕГИРМОН ТОШИ

Билмаган дараҳтман

Ўз кучи, ўз бардошини билмаган дараҳтман мен,
Коқилгандай битта жойдан жилмаган дараҳтман мен.
Сершох, сербарг новдалари чақчақлатиб құшларни
Умри бўйи ўзи бир бор кулмаган дараҳтман мен.

Холбуки, шўх шамоллар-ла дайдиб кетсам бўларди,
Кўп ишқий қўшиқ билардим, айтиб кетсам бўларди,
Қайтиб кетсам бўларди-я, қайтиб кетсам бўларди,
Аммо, манглайига қайтмоқ битилмаган дараҳтман мен.

Бирор пичоқ билан кесди, сўрди шираларимни,
Бошқа бири каллаклади, кўрди ичим, қаъримни,
Баргим пилла қурти еди, бирор кийди заримни,
Мен-чи, бирорлардан бир барг юлмаган дараҳтман мен.

Баъзан ўйланаман, оёқ берса, юриб кетсам, деб,
Дарёларнинг тўлқинида чаппар уриб кетсам, деб,
Кетмасам...

Шу туришимда ерга кириб кетсам, деб,
Дунё ишларидан кўнглим тўлмаган дараҳтман мен.

Ўз кучи, ўз бардошини билмаган дараҳтман мен.



ОТАМ МЕНИНГ

*Отам Умматқулбой Худойберди ўғли
хотирасига*

Кузакларим, баҳорларим эрта келган,
Баҳорларда олқорларим эрта келган,
Кутмаганда бол, қорларим эрта келган,
Умматқулбой – эрта кетган отам менинг.

Кўшқавиқли тўнларини тўздирмай ҳам,
Довруғ солиб келганини сездирмай ҳам,
Сувларида ўрдақ, гозин суздирмай ҳам,
Тўхтаган сой – эрта кетган отам менинг.

Кўксин яралаб турса ҳам не нокас, кир,
Юракка елка тутаверган мисоли қир,
Мингта ўқдан чайқалиб ҳам умрида бир
Тутмаган ёй – эрта кетган отам менинг.

Ў, дўстлар-а, отам-ку ҳеч ёзғирмаган,
Айтмаган ҳам кўнглидаги бир сирлардан,
Фақат... бошга ёқкан дўлу ёмғирлардан
Чўккан сарой – эрта кетган отам менинг.

Ота, десам, кўксим сим-сим қирқилади,
Бу сўз икки дунёйимни бир қиласди,
Шу сўз мени ер қиласди, шер қиласди,
Умматқулбой – эрта кетган отам менинг.

АНЖОН САРИ

Ўйланаман, йўлим тушса Анжон сари,
Моҳларойим кўзларига кўзим тушса.
Майдалашиб кетмадими мевалари –
Танийманми, қўлга олма, узум тушса.

Моҳларойим тақдиридан куйлаб достон
Қалдирғочлар айвонида юрадими?
Келинлари сахар, аzon айтилмасдан
Обдастада сув иситиб турадими?



Рўмолининг учиға гул битадими
 Қизалоқлар – оналарин тиргаклари?
 Орқа билан юриб, чиқиб кетадими
 Ерга қараб оҳудайин ҳуркаклари?

Кўз олдимдан ўтаверар чопа-чопа,
 Нодиранинг қул кунлари, шоҳ кунлари.
 Қулоғимга келиб тураг
 Моҳларойим кетаётган хон ароба,
 Умархон тўй аробасин шовқинлари...
 Ўйланаман йўлим тушса Анжон сари...



ПАРИШОНХОТИР

Яшаб бораяпман паришонхотир,
 Гоҳ узун, гоҳ қисқа дастга ўхшайман.
 Гоҳ ўзни сезаман ҳар нега қодир,
 Гоҳ ердаги чўпга, хасга ўхшайман.

Дўстлар бор, боши арш-аълога етган,
 Уларнинг уйлари қуёшга беткай,
 Мен гоҳо улардан баландлаб кетган,
 Гоҳ эса баридан пастга ўхшайман.

Айланар тақдирнинг тегирмон тоши,
 Ичимга оқади кўзимнинг ёши,
 Дўстлар бор, баҳтлардан айланар боши,
 Мен қуюқ ғамлардан мастига ўхшайман.

Дунё қадаҳ тутса, кўксим-ку лим-лим,
 Паришон эсам-да, чўзиқдир қўлим,
 Шундан норасодир, эҳтимол, йўлим,
 Шундан гоҳ ўзимга қасдга ўхшайман.

Яшаб бораяпман паришонхотир...





БАХМАЛ

Бахмал боғларида еру осмон – кўк,
Олмалар гоҳ-гоҳи тўкилар тап-тап.
Сангзор сувларидай тез оқар сув йўқ,
Учиб бораётган тойларга ўхшаб.

Кўкжарнинг сел олган жарларида чим,
Жилғалар пойгаси, тошлар гурунгги.
Менга туюлдики, Бахмал – кўп қадим,
Тоғда тошлари ҳам тоза, бурунги.

Сангзор чарх уради, жилғалари жўш,
Кетсам, кўнглим шунда қолаётгандай.
Боқсам, тоғ бошидан икки арча, кўш,
Бир-бир босиб, тушиб келаётгандай.

* * *

Мирхалил отанинг кўк гумбазидан
Самарқанд кўринар, ҳайрон бўлмайсиз.

Новка отанинг беш панжасидан сув
Шифо сувларидан ичинг, ўлмайсиз.

Сифотин тополмай ўйга толдим мен
Минг хил ковул-коврак, оққиз хидини...

...Уч-тўрт қиррасини кўриб қолдим мен
Бахмал – Ўзбекистон марваридини.

МАСЛАҲАТГА БОРАМАН

Ой ўтмас, хафта ўтмас,
Ўзимнинг ақдим етмас,
Маслаҳатга бораман.

Саҳар ё кеч, ўтириб,
Бошингизда ўй суриб,
Сизга кўнглим ёраман.



Мен ўйлайман: “Соз тупроқ
Бехавф ётинг. Суянч тог,
Халибери чўкмайди”.

Онам ўйлар: “Наҳотки,
Оқсоч боламнинг ёши,
Бир жойга етганда хам
Айтганимдан чиқмайди?”



ТАВБА ЭШИГИДА

Ҳамиша айборман, гуноҳим қўша:
Ташим хироману ичкаримда дод.
Ўйлайман, мен кимман?
Мен-чи, мен ўша –
Тавба эшигида қантарилган от.

Ўпаман, фарқ йўқдай, чўққими ё чоҳ,
Фарқ йўқдай шайтонми, раҳмонми ҳамроҳ,
Бу бари ташимда, ичимда мен оҳ,
Тавба эшигида қантарилган от.

Жаннатийманми мен ва ё осийман,
Ўлмоқ шарт бўлганда зигирча қуймам,
Суймаганни суйиб, суйганни суймам,
Тавба эшигида қантарилган от.

Ёллари шамолда ялтиллаб парку,
Парвоз хаёлига бўлса-да фарқ у,
Оллоҳдан афв сўраб йиглайди ҳар кун,
Тавба эшигида қантарилган от.

Гуноҳкор бандангман, тупроқман, ерман,
Кунимда кун йўқдир, ойимда йўқ ой.
Худойим, кечиргин ва менга берма
Тавба эшигидан бошқа жойдан жой.

“ИНЖУЛАР” КИТОБИДАН

Кўклам ҳам гоҳ алдар, ғўр, боли йўқдир,
Алдашга ёздайин дажжоли йўқдир.
Куздан бир амаллаб алданмай ўтсам,
Қишининг алдашгаям мажоли йўқдир.



**Жасур
КЕНГБОЕВ**

1985 йилда туғилган. Ўзбекистон давлат жаҳон тиллари университети халқаро журналистика факультетини ҳамда ушбу факультетнинг магистратурасини тамомлаган. “Оила даврасида” газетасида бош мұхаррир ўринбосари лавозимида меҳнат қылмоқда. Ҳикоялари республика матбуотида ва турли түпнамаларда чоп этилган.

ИККИ ҲИКОЯ

ЮРАКНИНГ БИР ЧЕТИ

Ўзимга мен янги ҳаёт түқидим...
Усмон Азим

У ниҳоят орадан шунча йил ўтиб қалбига яна бостириб кириб келди...

Хонасида мук тушиб, бошини қофоздан узмай ишлаб ўтирган Орзиқул эшиги охиста тақиллаб, секин очилганини, ундан тим қора сочли чехра қараб турганини ҳам пайқамади. Ўқиётганидан кўзини узмади. Келмиш қорасоч узун-узун бармоғи билан эшикни яна мулойимгина чертди. Шундагина бошини кўтариб, бир зум анграйиб қолди... ва ўрнидан туриб кетди.

– Ие, Умида?! – деди овози титраб.

Келмиш қорасоч чехраси ёришиб, минг бир жилва билан ичкарига қадам босди.

Орзиқул бир қадам юриб, тўхтади. Тилига гап келмай, на саломлашишни, на жим туришни билиб, қоқкан қозикдай туриб қолди. Умида ундан ҳам бешбаттар қизариб кетди. Ўргадаги неча йиллик айрилиқ, соғинч хисси шу дамда иккисига ҳам оғир дақиқаларни тухфа қилган эди. Орзиқулнинг ахволини кўрган қорасоч нозиккина қўлини чўзди ва:

– Салом!.. – деди.

Орзиқул унинг қўлини тутар экан, юраги кўпириб, энтикиб кетди... Иссиқ қўл... Қайноқ тафтни туйди. Улар қўлни қўлга бериб, кўзларига тер-



милишиб, бир нафас тек қотиб қолдилар. Дардманд кўзларгина тилга кирди:

“Сени кўрар кун бор экан-ку, Умида?!”

“Бор... Мана, келдим-ку! Фирмангизга иш билан келгандим, шу ердали-гингизни ҳозир билиб қолдим... Ўзингиз-чи, ўзингиз, бир йўқламадингиз ҳам...”

“Ахир...”

“Нима қипти? Ҳеч бўлмаса, йилда бир мартагина... ана, дугонам Сарви-ноз орқали бўлсаям, йўқласангиз бўларди-ку...”

“Бўларди-ю...”

“Эрга тегди, бўлди энди, деб ўйлагансиз-да? Қўрқоқво-ей...”

“Қўй, энди, Умида, менинг ҳам кўнглимни яралама...”

“Халиям хафамисиз?”

“...”

Иккиси ҳам ўтиришди. Орзиқул тикилиб қолди. Умида ҳеч ўзгармабди. Ўша-ўша кўзлар, бир пайтлар кўллари силаганда ярқираб кетадиган манглайи, титраб турадиган лаби, оппоқ кулчадек юзи...

Орзиқул оҳ тортиб юборганини билмай қолди. Бир пайтлар ҳар кўрганда қанча энтикса, ҳозирги энтикиши минг чандон зиёд, эҳтимолки, юракнинг тасаввур қилиш мушкул бўлган тубидан чиққанди. Умида буни сезди, ийманиб, кўзини олиб қочди. Термилгувчи кўз эса ийигандан ийиб кетди. Бир вақтлардагидек унинг қўлини кафтида тутгиси, соchlарини силагиси, меҳрга тўла кўзларига термилиб, ўзни унутгиси келди. Аммо бунинг имкони аллақачонлар қўлдан бой берилган... Иккиси ҳам айро ўзан бўйлаб оқиб кетган сув эди.

Орзиқулнинг юрагини ана шу адоксиз армон кемираrdи. Ўшанда... Йўқ, у ўйлагандай бўлмаганди. Дунёни ғафлат босганда, инсон кўзини хирсу ҳаво қоплаганда гул булбулга зор бўлди, ёруғликда парвонадан дарак ҳам йўқ эди. Қалбда бемисл ташналик илдиз отди.

Ўша машъум кунда кўлига бир парча қофоз етиб келди. Гангиб қолган Орзиқул бу ёғига яшаш абас эканини англағандай бўлди. Абгор қиёфасидан ўзини давраларда ортиқча сезадиган бўлиб қолди. Дунёга сифмай кетди. Мажнуннинг аҳволи ҳаммага маълум эди. Ўйлаганидек, ўтаётган вакт бундай одам учун ўлимдан оғир. Тўғри-да, одам оиласида, ўзини ўзи бегона сезса, нима бўлади? Ўлади! Тириклай тамом бўлади. Қиёфаси, тан-жони бўлади-ю, руҳан ўлади. Шакл бор, маъни йўқ.

У ҳар сония ўйларди: маҳзун бир куй таралса, секин-секин авжига кўтарилса, ноланинг иси келса. Отангни эсласанг, онангни ёд олсанг, акаука, опа-сингилларингни бир-бир кўз олдингдан ўтказсанг. Сўнг... сўнг кўзларингдан оқаётган видо ёшларини артсанг. Орtingда қолаётган одамлар билан бир-бир хайр-хўш қилсанг. Фойибона видолашсанг...

Маҳзун куй давом этса...

Қайтиб кўришмайдиган бўлиб видолашсанг. Ўй-хаёлларинг, орзу-умидларинг билан маъзурлашсанг.



...Орзиқул бошини бир кўтарди-ю, жиққа ҳўл бўлган болишни айлантириб, тескари қилди-да, зилдай бошини қўйди. Ётиб-ётиб кўргани не бўлди?

...Тушида ўлиб кўрди. Жонсиз танасини... ўзи ушлаб кўрди! Ҳайрон бўлиб, ўзини туртди. Қимирламади. Худди бировнинг ўлигини қўшкўллагандай, сесканиб кетди. Мурдаси қотиб ётаверди...

“Демак, ростдан ҳам ўлибман...” – дея хаёл қилди. Кейин нарироқ бориб, ҳавода муаллақ турганча, кузата бошлади.

Ана, танаси ётган хонага бехосдан онаси кирди, кела солиб, ўзини ташлади. Жасадини қучоқлаб, кўкрагини муштлаб, уввос тортиб йиғлади. Онасини овутаман деб, отаси чўйкалади-ю, бўзлаб қўяверди. Рангпар укаси кўзидан отилиб чиқаётган ёшларни арта-арта остонаяга яқинлашди. Синглиси ичидан куйди.

Бу йифи Орзиқулни қайта ўлдирди...

Шу онда очик деразадан эсиб турган майнингина шабада пардаларни бир зайлда хилпира турганда бошлади. Баҳорий ҳаво... Дафъатан қулоғига чалинган куй чала уйқудаги Орзиқулнинг дилини ўртаб юборди. Бу куйда недир бир синоат, қай бир қизнинг ҳазин қўшиғи, ўша хотиридан кетмас дилдорнинг нолалари, охлари бордек эди. Бир пайтлари шивирлаган қалб сирлари бор эди...

Орзиқул узала тушиб ётганча, бугун, қайсиdir қишлоқда ўтаётган қандайдир бир тўй маҳали, ана шу сирларни бир умр қандай қилиб юрагида сақлаб юриш мумкинлигини ўйлади-ю, эти музлаб кетди, Яратганинг бир куни бунча узун бўлмаса...

Орзиқул кўп дўстларининг тўйини кўрди. Шод-шодон жуфтликларни учратди. Ҳаваси кетиб, не-не орзулас қилди. Умида билан ёнма-ён, бирга яшашни тасаввур қилиб юрди, ўғил-қизлари бўлишини ният этди. Баъзан шу ўйларидан ўзи уялиб кетар, кипригида авайлаб юрган Умидасини ҳатто ўзининг телба хаёлларидан ҳам қизганарди. Бу қизганишда Орзиқулнинг бутун олами, ихоталанган кўнгил талаблари бор эди. У қизни фақат ва фақат ўзиники деб тасаввур этарди.

Қизгина буни сезар, сезган сари тағин ҳам очилиб кетгандай бўлар, хушрўйлашиб, Орзиқулнинг кўнглини буткул асир этарди. Курсдошлири ошиқ-маъшуқни зимдан кузатишар, кўпининг дили ғашланиб, очиқча ҳасад ҳам қилишарди. Айрим дугоналар Умидани йўлдан уриш илинжида кўп бор қутқу солиб кўрди. У ақлли қиз эди, парво қилмади.

Орзиқул айни дамда ўша чоғларни эсларкан, юрагининг бир чети жизиллади. Қаршисида ўтирумис жувоннинг дам яноқларига, дам пешонасига термилаверди. Бу ярқираб турган юз ўт бўлиб куйдирди.

– Бир-биримизга анграйиб ўтираверамизми энди, – дея жилмайди жувон нокулай вазиятдан чиқиши ниятида. – Янгиликлардан гапиринг? Нима гаплар бор оламда?

Орзиқулнинг ширингина хаёли бузилди, талмовсираб, нима деярини билмай қош чимириб қўйди.

– Билмасам, – деди. – Яхши гаплашиб ўтирибмиз-ку?



Бу жавобда ҳеч бир маъни йўқлигини, гаплашиш тугул дурустrok саломлашмасдан ҳам олис хотираларга берилиб ўтирганини англаб, қўшиб қўйди:

– Ҳаммаёқ тинч... Чой қуйиб берайми?

– Ихтиёрингиз...

“Уҳ!..” – деди ичида Орзикул. “Ихтиёрингиз!” Умида шу сўз билан Орзикулнинг жонини оларди. Сезишича, бу сўзни фақатгина Орзикулга айтарди. Телба ошиқ бора-бора бундаги бир маҳфий маънини англади: маъшуқасининг бутун борлиғини бағишлишга тайёрлигини ифодаловчи бу сўзнинг мағзини чақиб, эшифтгани ҳамон кўнгли ўн қулоч ўсар, юраги тўлиб-тошиб кетар, арзирли бир жавоб излар, лекин доим сукутдан ўзга чора тополмас, кўзига тикилганча ҳайкалдай қотиб қолар; тикилганда ҳам унинг кўзизда ўзининг суратини кўриб, ахволидан хижолат тортар, бироқ, ҳеч бир куч киприк қоқишидан тиёлмас эди. Лекин Орзикул ҳозиргача бир саволга жавоб тополмайди: нега ўша пайтлар қайси қизни учратмасин, дарров Умидага таққослаб кўрди, уларнинг ҳеч биридан Умидада бор бўлган ненидир тополмади...

Умидა ҳам ўзи каби кўнгил қули эди. У ҳам Орзикулга қандай боғланиб қолганини аниқ эслаёлган эмас. Вақт ўтиб, қарасаки, усиз туролмайдиган, бир сония хаёлидан ўтказмаса, юрагида кемтиклик сезадиган бўлиб қолди. Кейинги пайтлар ҳатто нимагаки қўл урса, гўё Орзикул унга қайдандир қараб тургандай туюлар, тушида ҳам, хушида ҳам кўз кири билан боқиб, соғинчини яширолмаётган телба каби эс-хаёлида гавдаланар, ўзи эса ҳар нарсани унинг қаричи билан баҳолаётгандай бўлаверарди. Бу ғалати туйғу олдида ўзини ожиз сезиб, бошқаролмайдиган даражага етаётганини ҳис қилса-да, ажабки, бундан кўнглида суюнар, жиндеккина ғурурни ҳам туюрди... Ахир, кимсан, ҳар ишда ўз айтганини қиласидиган телба-қайсар, бир сўзли, қатъият бобида маррага биринчи етадиган Орзикулдек йигит унинг олдида доим ҳаяжонда турарди... Мана, ҳозир ҳам, чой қуйиб беряпти ҳамки, бармоқлари қалтираб, шу соҳт-сумбати билан ҳаяжонини босолмаяпти.

– Нима янгиликлар бор, Умидада? – деди Орзикул ҳеч гап тополмай. – Қаерларда... яшаяпсиз?..

– Қаерда бўларди... қўшни туманга тушганман-ку, – деди Умидада.

Кейин Орзикулнинг кўзига синовчан тикилди:

– Нима, билмасмидингиз?

– Йўқ! – деди Орзикул.

Аслида билар эди, шу топда айтишга кўнгли ёр бермади. “Билгим ҳам келгани йўқ”, деб юборишига бир баҳя қолди-ю, тилини тийди.

– Эшифтансиз, деб юрувдим...

Бир муддат жим қолишиди. Иккиси ҳам пиёладаги чойга тикилиб, гапиришга жазм этолмади. Орзикул Умиданинг бармоғидаги никоҳ узугига кўзи тушди-ю, чап кўксисда жизиллок турди. Умидада таъқиб қиласидиган нигоҳни сезди шекилли, қўлинини қўлига чатиштириб, узугини кўздан пана қилиб олди ва:

– Ўзингиз-чи? – деди. – Уйингиздаги...лар яхши юришибдими?
Орзиқул ярқ этиб қаради. Саволдаги алоҳида таъкид нашъя қилиб кетди.
Дангалига тили бормаганини ўзича тушунди ва истехзоли кулди:

– Ҳа, отам ҳам, онам ҳам яхши юрибдилар!

Умида пичингга қаноат қилмади.

– Ҳм, болаларингизнинг... онаси-чи?.. – дея ўсмоқчилади.

– Уям бардам, – чўрт кесди Орзиқул гап йўналиши неча йиллардан бери кутилаётган томонга ўзгараётганидан ташвишланиб.

– Яхши-и-и. Чиройлими... у киши?

– Ҳа...

– Мендан ҳамми?

Орзиқул бундай нозик саволга нима деб жавоб беришни билмас эди, шу боис каловланиб қолди. Умиданинг феъли унга маълум эди-ю, бу каби анчайин жиддий, сирли ва хийла нозик саволни кутмаган эди. Шунинг учун чорасизликдан азалгидай ҳазил аралаштириди:

– Тирик мавжудот ичида чиройда сиздан ўтадиганини учратмадим ҳали....

Умида бу ожизгина илтифот ва айни пайтда “мавжудот” сўзига яши-ринган аллақандай жониворлар “тўзаллиги”га шаъмали сўз ўйини ортидан нима дейилаётганини дарров англади ва шу заҳоти алам отига қамчи босди:

– Сиз доим журъатсиз бўлгансиз...

О, ҳаммаси тамом! Орзиқулнинг жон жойидан олди! Нихоят, ўқланган тўппонча отилди! Назарида Умида шунча йилдан бери ўйлаб-ўйлаб, минг бир хulosалар орасидан чиқарган ўта тиғли сўнгсўз эди бу гўё. Ҳозир бу тиф Орзиқулнинг шундок ҳам шалвираб қолган юрагини тирнаб-тирнаб ўтгандай бўлди. Куйдиргувчи оловга ўзини уриб нобуд қилган парвона каби таслим бўлишдан ўзга иложи йўқ эди, лекин бўш келиш ҳам ярашмас эди.

– Гап журъатда эдими, Умида? – деди ёниб. – Отангизнинг талаби-чи? У талабни эшитган ҳар қандай йигит йўлини шартта терс солиб кетарди. Ҳалиям мен...

– Нима, сиз?

– Ҳалиям мен жимгина, индамай қўйганман...

– Ия! Бу оддийгина синов эди-ку... – деди Умида меҳр билан Орзиқулнинг кўзларига тикилиб. – Аслида отам ундан демаган, мен ўзим сизни синаб кўриш учун ўйлаб топгандим.

– Нима?!

– Шундай...

Орзиқул устидан бир челак совуқ сув қўйгандай бўлди. Умидага қаҳр тўла кўз билан қаради: “Наҳотки... наҳотки, шундай бўлган, Умида? Нега бундай қилгандинг? Нима учун йўлимиз айри тушаётганда ҳам буни айтмадинг? Нега? Ахир сен...”

Тизгинсиз саволлар қўйилиб келаверди. Орзиқул қўлини асабий мушт қилиб тугди.



– Кўп муҳокама қилинган муҳаббат барбод бўлиши рост экан... – деди кейин алам билан. – Демак...

– Нима қилишим керак эди? Ҳеч қандай муаммо йўқ жойда ўзингиз... хайр-хўш ҳам демасдан... Йигит кишиям аразлайдими?

– Мен аразламаганман!

– Унда нега совчи ҳам юбормаган эдингиз?

– Менинг ўрнимда бўлганингизда...

– ...дадилроқ бўлардим!

Орзиқул Умидани таниёлмай қолди. Ўзи у нима демоқчи? Нега ўтмишда колиб кетган, ҳар эсга тушганда юрагини азоблайдиган гапларни қўзгаяпти? Мақсади нима ўзи? Ахир...

– Умода, қўйинг энди шу гапларни, – деди паришонхотирлик билан. – Эр йигит ҳар куни ўзгариб, буқаламундай тусланмайди... Мен ҳеч қачон айтган гапимдан қайтмаганман. Отангиз ўзи ваъда қилганига бериб, орзусига етган бўлса, бўлди-да. Қўйган талабига эрман дегани рози бўлмас эди-ёв...

Умода, бундай кутилмаган кескин ва кескир пичингга тайинли жавоби йўқ эди чоғи, индамади. Шу гап адогида сухбат ҳам узилди. Ҳаммаси равшан эди. Умода қўзгалди. Оғир тин олди. Эшикка йўналаётib, сўнгги бор қаради...

“Майли, қўявер, Умода, айб икковимиздан ҳам ўтган-да...”

“Мен чорасиз эдим... Ахир сиз бир оғиз ҳам “Сени севаман” дея олмагансиз-ку!”

“Мен... айтмасдан севардим, Умода!”

“Совчи ҳам...”

“Тақдир экан-да, Умода, нимаям қилардик... Хўш, ўзинг омонмисан? Ҳаётинг тинчми?”

“Нолисам бўлмас, шукр. Тинч яшаяпман”.

“Бахтингни... топдингми?”

“Ҳм... Ўзингиз-чи?”

“Мен ҳам...”

“Хўжайним яхши одам. Баъзан ўзимнинг эркалигим, тантиқлигим, жуда худбинлигим билан у кишига қўп жабр етказиб, хафа қилиб қўймаяпманни деб ўйлаб қоламан. Лекин у одам мени жудаям иззат қилади. Ҳамма эркалигимни кўтаради. Сизники-чи? Аёлингиз?...”

“Биласан-ку, мен ҳам жуда инжиқман. Аммо аёлим феълимдан нолимайди. Ҳурмат қилади...”

“Болаларингиз-чи? Кимга ўхшайди?”

“Ўзимга... Каттаси онасига... Сенинг болаларинг-чи?”

“Меникининг учови ҳам дадасига тортган... Қуйиб қўйгандек...”

“Шукр... Бахтиёр экансан...”

“Ҳа, мен ҳам сизнинг бахтингиздан хурсандман...”

Минг йиллик айрилиқдан кейинги бу биринчи, эҳтимолки, сўнгги учрашувда нигоҳлар шу зайлда беомон сўзлашди. Бир-бирига қоришиб омонлашди. Бироқ бу нигоҳлар бир-бирини алдаётганини иккиси ҳам аниқ сезиб турар эди...



ҚҮХНА БЕЛБОФ

“Бугун дунёдаги энг “кеекса ит” йигирма олти ёшида вафот этди...”

Деразаси жанубга қараган пастқам уий олдида, кундага чопонини түшаб, ўнг қўлини манглайига тираганча, ковушининг учиға тикилиб, офтобрўяда тобланибгина ўтирган Етмишев айвонда осиғлиқ радиога ярқ этиб қаради. Мийигида кулди.

“Оббо, хумпар-ей! “Вафот этди” эмиш. Иззат-икромни қаранг! “Мархум” йигирма олти ёшда экан. Табаррук ёш-да! Дунёнинг тўрт томонидан одамлар “отам”лаб келгандир?”

Етмишев истеҳзоли кулди: демак, “мархум”нинг бир каромати бордирда...

Етмишев кейинги пайтлар уйда ёлғиз қолса, радионинг қулоғини бураб, шу кунда устида ўтирганча бот-бот хаёлга чўмадиган, ўзига ўзи ғудраниб, бир нималар дейдиган одат чиқарган. Ўйлайди. Факат бир нималарни ўйлайди. Бор – сўзлайди, йўқ – ўйлайди-да... Бироқ қани нафи тегса! Ўйлаб ўйига етган борми. Тағин фикрларичувалашиб кетади, бошига оғриқ кириб, девордаги матоҳни ўчирганча, аччиқ чойдан ҳўплайди-да, кўрпаташак қилиб ётиб олади...

“Қачон булардан пешонам терларкин ўзи...” – дейди димоғи куйиб.

Бошоғриғи бошоғриқ бўлади.

Лекин бироз ўтиб, “кеекса ит”нинг ўлими ҳақидаги хабар унга негадир нашъя қилди. Бу гапнинг тагида одамзоднинг майдалашиб кетаётганига ишора ҳам йўқ эмасдай эди. Кейин беўхшов илжайди: “Гапни қаранг, калтакдай. Ҳе, одам бўлмай кет...” – деди.

Етмишев ўрнидан туриб, чопонини қоқиб, даҳлизга кирди. Тўнини пахтаси титилиб, ичи пўла бўлиб қолган ёстик устига ташлади-да, узала тушиб ётди. Сўнг шифтга – орасидан қовжираган қамиш барглари чиқиб турган болорларга бемаксад термилиб ётди. Хаёлларга эрк бергиси, бемаъни ўйлардан халос бўлгиси, ташвишларни бир дам унуттиси келди. Хаёллар ҳам, Етмишевнинг устидан кулгандай, ҳадеганда жонланавермади.

Ҳозир унга оғир. Бу орада кўнглини очиб, яйраб гаплашадигани йўқ. Тенг-тўшларининг кўпи ўзи билан ўзи бўлиб кетди. Бирови билан гапи келишмади, бировлари бу ёшларга етмади. Не жафоки, кампири ҳам ёлғизлатиб кетди.

Пенсияга чиқсан одам тез қариди. Етмишев ўйлаб қолдики, шундай пайтда одам ишдан чиқсан матоҳдай гап экан: ўтган ҳам, кетган ҳам бир тепиб ўтади-ю, ҳеч ким мундай бир азизроқ жойга олиб қўймайди...

Чолга шуниси алам қиласди. Наздида, бола-чақаси, неваралариям фақат кечқурун йиғилгандагина гўё унинг борлигини эслаб қолишади...

Етмишев минг йилдан бери ёд бўлиб кетган шифтдаги болорни хаёлан қайта санайди: бир, икки, уч... Унинг назарида, болор худди камайиб қоладигандай. Ана, бешинчиси. Энг ингичкаси шу. Бир зум ўзини ўша бо-



лорнинг ўрнига қўйиб кўради. “Синиб тушса, у-бу кимни том босиб қолса-я. Э, қўйсанг-чи, қариётиб бунча ваҳимачи бўлиб қолдинг. Ана, қолганлари жойида қолади-ку, шулар кўтаради-да...”

Эллик йил мактабда бола ўқитган Етмишевдай одамга бу болаларча хаёллар қанчалик ғалати, аҳмоқона туюлмасин, ҳозир айни чоғда қўнглида кечеётган қандайдир зардобли, тушуниксиз кайфиятни тарқатиш учун зарурдай эди шу. Юзга яқинлашиб ўтган отаси бир гапни айтгич эди: “Кечқурунлариям, кундузи ёлғиз қолсам ҳам қўрқиб кетяпман, болам. Жуда қўрқоқ бўлиб қолдим...” Етмишев шу гапни эсларкан, гўё ингичка болор бир синиб тушадигандай, бир синиб тушмайдигандай, қайтанга қалинлашиб, кучга тўладигандай туюлди... Ўйлаб-ўйлаб, аросатда қолди: ҳар икки фаразнинг турган-битгани хомхаёл эканини билса-да, икковига ҳам ишонгиси келди. “Ишқилиб, том босгулик қилмасин-да...” – деди пи-чирлаб.

Етмишев кўзини бир-икки пирпиратиб, юмиб-очди. Ёнбошига ағанади. Шунда ёстигининг тагидан чиқиб турган кўхна белбоғига кўзи тушди. Уни пийпалабгина қўйди ва ярим йилча аввал бўлган воқеани эслаб, ожизгина кулимсиради.

...Ўша куни ўрганча келини эртароқ ишдан қайтган эди. Бир пайт қайнотасининг чой-нонига қарайман деб, у ётган уйга кирди. Кирди-ю, тарашадай қотиб қолди. Тўрда, узунгина болишда Етмишев, ияги белбоғ билан боғлиқ, кўзлари юмуқ, тепага қараб тарашадай қотиб ётарди. Келинининг ранги докадай оқариб, бирпас тили калимага келмай қолди. Сўнг дод солиб, ташқарига югуриб чиқди. “Бувам кетиб қопти...” дея ҳаммани бошига йигди.

Чоп-чоп бошланди. Катта ўғилнинг лойсувоқ уйига туташ қурилган айвонининг кавшандози ковушга тўлди. Ўғил-қизнинг бари йифилган. Болабакра, неваралар пойгақдан жой олган.

Уй тўрида Етмишев бува ётиби. Ёнида тўнгич ўғил – Отаёр пешонасига нам сочиқ босиб туриби. Хона дикқинафас. Шу топда чивиннинг ғўнғиллаши ҳам асабга тегиб кетади.

– Ота, гапиринг энди, – дея ялинди Отаёр. – Одамни қўрқитманг-да, мундай...

– Ҳа, ота, бўлди, гапиринг энди, – деди бўғзи куяётган қизлар ҳиқилламоқдан бери бўлиб.

– Биздан нима айб ўтди, бува? – сўради катта келин.

Етмишевдан садо чиқмади. Шифтга термилиб, тек ётаверди. Отаёр янам хавотирланди. Тикилиб қаради. Отанинг танаси буткул мажолсиз. Воажаб! Қоқсуяк кўлларида ғалати қорамтири доғлар пайдо бўлганини кўрди. Юраги, кимдир арралаётгандек, оғриқ ҳис қилди. Отасининг қаншарида ҳам билин-билинмас қорамтири доғларга кўз тушди-ю, ичидан зил кетди.

“Эҳ, отам-а, бола бўлиб, юзингизга мундоқ... қарамаганимгаям анча бўлибди-я... Суякларингиз терингизни шимиб олганини нега сезмадим экан-а? Манави доғлар қачон пайдо бўлди, ота?!?”

Тўнгич ўғилнинг кўнгли қақшади. Отасининг манглайини нам сочиқ билан артди. Елпиган бўлди.

Шу пайт ташқарида мотоциклнинг “пат-пат”и эшитилди. Нима қиларини билмай, дам Етмишевнинг сўлғин юзига, дам уйга йиғилганларнинг ташвишли нигоҳларига даҳлиздан мўралаб боқиб, ҳеч нимани англомай, дикқати ошиб ўтирган неваралар, худди бу кўргиликнинг тезроқ ўнгланиб кетишини кутгандай, нажот истаб,чувиллашиб, овоз келган томонга югургилаб кетишиди.

– Дўхтир поччам келди-ёв, aka? – деди иккинчи ўғил Нурбек.

– Бор, қара-чи. Тезроқ келсин, – буюрди Отаёр.

Нурбек дўхтир поччасини бошлаб келди. Почча ўтирганлар билан салом-алик ҳам қилиб ўтирмай, тўғри буванинг бошига борди. Қўлини пешонасига қўйиб, дарров ашқол-дашқолини олиб, текшира кетди.

– Ҳеч қандай хавф йўқقا ўхшайди-ку, – деди почча. – Лекин барибир яхшилаб бир текширириш керак бувани.

– Текширирамиз, текширирамиз... – деди Отаёр. – Шахарга оборсак ҳам бўларди, а, почча?

Почча ғинг демади. Секин жойлашиб ўтириб, қайнотасидан сўради.

– Бува, яхшимисиз? Нима бўлди ўзи сизга?

Етмишевдан жавоб бўлмади.

Отаёр ўзи гапириб берди:

– Отам гапирмаяпти. Салима келин ишдан келиб қараса, ияги бойланган эмиш. Отам... кетиб қопти деб, кўркиб кетдик ҳаммамиз. Шукрки, мана...

Почча ажабланди. Етмишевнинг тўнини тескари киядиган одатини кўрмаган, шу боис қайнотасининг ит орқа бўлиб қолганига унча тушунмади. Яна ҳол сўради. Етмишев ингранди. Кўзидан икки томчи ёш сизиб чиқди. Атрофига секин кўз югуртириб, хонани тўлдириб ўтирган болабакраси, невараларини ғира-шира тусмоллаб, худди гўдакка ўхшаб, оғзи кемшайиб кетди. Анчадан бери болаларини бундайин тус-тугал кўрмаган эди...

Бутун уй буванинг оғзига тикилган. Етмишев қараб турди-турди-да, кейинчалик бутун қишлоққа тарқаб кетган латифанамо гапни айтди:

– Мен... – деб ихранди Етмишев. – ...мазам бўлмай қолди бугун. Мабодо уйқумдами, ўнгимдаги ўлиб-нетиб қолсам... буларни бировининг ҳам хабари бўлмай қолади, деб ўйладим. Ҳаммаси ишли-да, омон бўлгурларнинг...

Ўтирганларнинг юраги ачишди. Тилини тишлаб қолгани қанча. Отаёр эса йиғлаб юборди. Почча Отаёрни туртиб, оғирроқ бўл, деди. Кейин қайнотасидан сўради:

– Иягингизни ким бойлади, бува? – деди вазиятни юмшатиш учун кулимсираб.

– Ўзим... ўзим бойладим... – деди Етмишев.

– Оббо, бува-еий... – деди дўхтир почча.

– Ухлаб қопман-да... булар ияк бойлай олармиди...

– Ўзиям ҳамманинг ўтакасини ёрибсиз-ку. Кўрқманг, ҳали кўп яшайсиз.



– Шуни айтинг, почча, – гапга қўшилди келинлар. – Бувам одамни ёмон кўркитди. Юрагимиз қинидан чиқай деди. Энди Салима келинниям бир караб қўйинг, почча, мазаси қочиб ётибди нариги уйда.

Ўғил-қизлар Етмишевнинг тилга кирганига чуқур тин олишди.

Етмишев ўша воқеани эслар экан, юзига табассумга ўхшаш алланечук мавҳум бир ифода ёйилди. Бу худди боягина радиодан эшитган хабар – йигирма олти ёшида вафот этган энг “кекса ит” ҳақида ўйлаганида юзига балқсан истеҳзога ўхшаб кетар эди.

Етмишев белбоғини силади. Сўнг ўша қилиғини эслаб, бола-чақаю неваралари олдида бошқа ўнғайсизланмаслик учун “далил”ни йўқотишни истаб қолди. Ўша қилиғини хотирдан чиқармоқчи бўлди. Белбоғни айириб, узуб отмоқчидек, икки ёнга тортди. Бироқ у кўхна бўлса-да, ҳали пишиқ, маҳкамгина экан. Назарида, бу белбоғи ҳўв шифтдаги ингичка боловора боғлаб, невараларига арғимчоқ ясаса ҳам узилмайдигандек эди...

ҲУҚМАТ

**Ўқишини биљсангиз, ҳар бир
инсон бир қитобдир.**

Али ибн АБУ ТОЛУБ

**Мансабдор мол тӯплайди,
оқиул эса – фазилам.**

Муъинниссин ЖУВАҲИД



*Тошпўлат
АҲМАД*

1942 йилда тугилган. Самарқанд давлат университетининг филология факультетини тамомлаган. “Очиқ эшик” номли ҳикоялар, “Минорлар ва чинорлар”, “Ойдин хаёллар”, “Табассум боги”, “Имон қалъаси” сингари шеррий китоблари босилган. Авемик Исаакян, Жалол Икромий, Петрусь Бровка, Расул Ҳамзатов, Владимир Соловьев, Саидали Маммур, Аҳад Мухтор сингари ижодкорларнинг асарларини ўзбек тилига ўгирган.

ШАФАҚ ЁЛҚИНИ МУҲАББАТ



Билмадим, қай аср сахари эди,
Ёш эдинг, кўзингда порларди ҳайрат?
Дилингда булбулнинг изҳори эди:
“Баҳорим – муҳаббат, борим – муҳаббат,
Мадорим – муҳаббат, орим – муҳаббат!”

Зероким, муҳаббат – дилдоринг эди,
Кўнглингда кўкарган – гул ёринг эди,
Хаётинг, баётинг – алёринг эди,
Шу боис, ишқ майин ичган нор эдинг,
Осмонга сапчиган бир шунқор эдинг!

Борлифинг буғдойдай сочдинг зарралаб,
Кўзингда яшнади шуълаи ҳайрат.
Сўйладинг, бир байтни шому сахарлаб:
“Ғурурим, сурурим, шоним – муҳаббат,
Қанотим, қувватим, жоним – муҳаббат!”

Зероким, муҳаббат – бунёдинг эди,
 Ўғлингу, қизингу – зурёдинг эди.
 Гоҳ Ширин, гоҳ эса Фарҳодинг эди,
 Шу боис дедилар, сени – баҳор у,
 Илдизи қуrimас теран чинор у!



Дунёдай оқарди сочинг-соқолинг,
 Ҳамонки кўзингда чақнайди ҳайрат.
 Тилингда то ҳануз шундай мақолинг:
 “Чорбоғим, чироғим, наҳрим – муҳаббат,
 Ардоғим, қароғим, баҳрим – муҳаббат!”

Зероким, муҳаббат – неваранг эрур,
 Шўху шаън эваранг, чеваранг эрур,
 Дилингда порлаган севаринг эрур,
 Одамзод, шу боис, асло ўлмайсан,
 Хазондай сарғайиб, асло сўлмайсан!

ҚАДРДОНИМ

Қадрдоним, меҳрибоним, биродарим,
 Жигарбандим, жон пайвандим – дил гавҳарим,
 Юриб-юриб топганим сиз – тожи сарим,
 Бу дунёда борлигингиз давлат менга.

Бўйим ўсгай сизни соғу омон кўрсам,
 Йўлингизда сермавж тўлқин имкон кўрсам,
 Чирой очган чеҳрангизни хандон кўрсам,
 Бу дунёда борлигингиз савлат менга.

Мен ўзим деб яшамайман, юртим, дейман,
 Таянганим – халқим дардин дардим, дейман,
 Дўст-ёр, дейман, улар – шоним-бурдим, дейман,
 Бу дунёда борлигингиз қувват менга.

Сиз айтдингиз, рақам қилдим, такрор-такрор,
 Қалбингизни қучгай балки тиник шарор,
 Насиб этсин яна шундай ширин дийдор,
 Бу дунёда борлигингиз ҳаёт менга.



МУСАВВИРГА

Ҳақиқатнинг тили аччиқ, дейдилар,
Нигоҳи ёрармиш ҳаттоки тошни.
Чайир қўлларин ҳам калта деб билманг,
Лозимдир олмадай узгай қуёшни.

Жуда кўп ўйладим унинг тасвири,
Қай хилда чизмоқ шарт дея шаклини.
Гоҳ найза, гоҳ қилич бўлиб туюлди,
Гоҳ эса жилвагар шафақ ёлқини.

Ха, бу сўз талқини шундай душворким,
Уддалар ким агар кечса ўзидан.
Мусаввир ҳақ расмин чизмоқ истасанг,
Нусха ол сен Усмон Носир кўзидан.

КУМУШБИБИ, ОЙ – ОҚҚУШБИБИ

Фарғонага бордимуammo
Марғилонга тушмади йўлим.
Нетай, гарчи, ҳой, Кумушбиби,
Сиз томонга чўзгандим қўлим?

Этмадим деб шахрингиз тавоф,
Ростин айтсан, қилмадим армон.
Чунки ҳаё тимсоли бўлиб
Юракларда кургансиз ошён.

Биламанки, бу юртда ҳар бир
Иболи қиз Кумушбибидир.
Лутфи ширин, ҳар дили соҳир
Вафоли қиз Кумушбибидир...

Дорилфунун қопқасида ман
Кўриб нон-туз кўтарган қизни,
Хаёлимда тиклаб дафъатан
Бир-бир чиздим суратингизни.

Лабингизни қимтиб, наздимда:
“Сиз ўшами?” деб сўрардингиз.
Не деб шархлай, кўзим ўнгига
Малак эмас, сиз туардингиз.



Шу биргина карам – ҳаёдан
Вужуд ёниб, куймасми жонлар?
Ер остидан боққан нигоҳдан
Кўпирмасму томирда қонлар?



Кумушбиби, ҳой, Кумушбиби,
Бухорий шариф – манзилим.
Сиз бизлар-чун Ой – Оққушбиби,
Хеч унутманг ушбу ғазалим:

“Бегим, сиз соф севги қўшиғи –
Куйлар, ёнса ким ёр ишқида.
Сиз абадий ҳаёт ошиғи,
Маликасиз вафо кўшкида”.

ТЎРТЛИК

Исмоил Бухорий ҳазрат мақбарин
Зиёрат этгали келсан, воажаб,
Бинафшалар гуллаб арча тагида,
Хадис айтар эди аста шивирлаб.

РАЙҲОНГУЛ

Ҳой, қалдирғоч – баҳор элчиси,
Кел, кўзимга гулу райҳон эк.
Мен бехато ундирай, ўссин,
Унга меҳрим берай дехкондек.

Сўнг, кўчириб, бир-бир ўтқазай,
Дала, боғлар, йўллар бўйига.
Кекса-ёшга узиб, узатай,
Тортик этай севги тўйига.

Ки, чулғасин дейман заминни:
Райҳон хиди, райҳон ифори.
Ва, тилагим, ҳар бир одамнинг
Райҳонгулдан бўлсин тумори.



МУНААВВАРА

1965 йилда туғилған. Низомий номидаги Тошкент дават педагогика институтини (хозирги ТДПУ) тамомлаган. “Дийдор”, “Сизга ўхшасин”, “Согинч манзили” каби шеърий тұпламалари, “Оила омонлиги тил билан”, “Аёл – миллаттинг тарбиячиси”, “Ёргө құнлар яқын” номлы бадий публицистик китоблари чоп этилған. Шеърлари озарбайжон, немис, тоғсик, рус ва қоракалпоқ тилларига таржима қилингандар. “Шұхрат” медали билан тақдирланған.



МЕН ЎЗИМНИ ТОПМОГИМ КЕРАК

* * *

Икки манзил орасига қурдим макон,
Саробрари соғинчимдан, синчи армон.
Пойдевори маҳкам бўлса қуламас деб,
Тошу тупроқ садқа этди оғам – довон.

Томга чиқсан кўринади ота уйим,
Кўл силкитсан рўмолимдан танир онам.
Қалдирғочлар қанотида хат юбориб,
Овутади: “Кўникамиз, тақдир, болам!”

Мусичалар райхон ташир, қарғалар нон,
Жамбил исин юборади елдан онам.
Капалакнинг қанотига шеърлар битсан,
Умри тугаб, ярим йўлда қолди номам.

Кўнглим яшар, ҳо-о-ов, кун чиқар томонларда,
Ундан сўрар онам ҳолу аҳволимни.
Қоятошлар бўй чўзмоқда довонларда,
Улар тутиб олмасайди рўмолимни.

Томга чиқсан, кўринади ота манзил,
Керак эмас сандиқ тўла бойлигу зар.
Олисларда яшамоқка кўнди кўнгил,
Келиб турса бўлди фақат яхши хабар.



* * *

Бу дунё манзили битта йўлакча,
Билсак ҳам меҳримиз унга бўлакча.
Сарҳисобин қилинг ўтган умрни,
Савобингиз борми, битта қўлмакча.



Оталар пир бўлар, оналар ғимон,
Бириси паноҳдир, бири меҳрибон.
Бўлса хизмат айланг, йўқса зиёрат,
Бири фирмавс эрур, бириси ризвон.

* * *

Эгалламоқ бўлдим борингни,
Сарҳадим йўқ, дея тўхтатдинг.
Ўзинг каби беспоёнликни
Қалбим, раҳмат, менга ўргатдинг!

Эгалламоқ бўлди қалбимни,
Тоқатим йўқ, дея тўхтатдим.
Мендан ҳам қўп азобланардинг,
Раҳмат дегин, мен ҳам асқотдим.

* * *

Излаяпман туну қун тинмай,
Гоҳо ойдин, гоҳо тун ўпар.
Бораяпман қай манзил, билмам,
Ҳатто, зулмат ҳолимни сўрап.

Билмам, яна қайга йўл солдим,
Безовта дил, ҳориди юрак.
Эгам, сени англашдан олдин,
Мен ўзимни топмоғим керак.

* * *

У чавандоз эди, чопқириу чаққон,
Шерга айланарди жанг майдонида.
Ҳар қандай мушкулга топарди имкон,
Диёнат оқарди унинг қонида.

Бир куни ёғийга ён берди осон,
Аламдан ўзининг кўксини ёрди.
Тупроқни чанглаб, шердай ўкириб
Дерди: “Воҳ, сотқинга ишониб қолдим!”



* * *

Ҳаёт, сенинг бағринг бунча кенг,
Макон топган яхши, ёмон ҳам.
Кимдир ёқа, кимдир бўлар енг,
Бири тўкис, бирисидир кам.

Ёвузлик ҳам яшар бир ёнда,
Яхшилигу эзгулик омон.
Дилингга энг яқин томонда,
Мени мудом асра, онажон!

ҚОРА ДЕНГИЗ БИЛАН СУҲБАТ

– Салом сенга, эй баҳри уммон,
Салом сенга, зангор маъволар.
Сен-ла бир бор қўришмоқ учун
Кечиб келдим қанча дарёлар.

– Хуш келибсан, дўсту қадрдон,
Йўл юрмоқлик эмасдир осон.
Мени йўқлаб келибсан шукур,
Денгиз умрин кўргин, эй инсон!

– Соҳилингда яйраб юрибман,
Еру кўқда оқкушлар саси.
Рухимга куч берар мавжларинг,
Кулоғимда денгиз нафаси.

– Турли одам, турфа оламдан
Ким дард айтар, кимдир қувнайди.
Ким томчимни кўзига суртса,
Кимдир бағрим тилиб, ўйнайди.

– Бир қарасам сокин, мулойим,
Гоҳ бўрон-ла олишар тўфон.
О, сенингдек мулки хоқонга
Бас келурга ожиздир инсон!

– Соҳилимда сайру саёҳат,
Кўклам каби яшнаб турар куз.
Чағалайлар сув ичмас, бироқ,
Тенгсизману бағрим тўла туз.
– Талҳдир, аммо, оби ҳаётсан,



Сендан йироқ ғаму ҳасратлар.
Ҳар томчингда қуёш рақс тушар
Кўксинг тўла ганжу неъматлар.



– Кўксим ёриб кезар қайиқлар,
Эҳ, бошимдан нелар ўтмаган?
Баликларни ейди баликлар,
Денгиз борми илон ётмаган?

– Бари беун, бари безабон,
Дардинг билиб, сиринг очмайди.
Бўғзига тиф қадалганда ҳам
Дурларингни кўкка сочмайди.

– Неча аср яшадим, билмам,
Умрим ўтар қайга талпиниб?
Тин олишни истайман гоҳо
Булутлардан кўрпа ёпиниб.

– Қадрдондир сенга булутлар,
Нега кўкнинг кўзи доим нам?
Мен-ку, ёшим тиёлмай қолдим,
Кўчиб кетгач, осмонга отам.

– Еру осмон ўзи бир қадам,
Мен ҳам нола қиласман тўлсам.
Сени кўкка олиб борарди,
Оққушларни чақириб берсам.

– Йўқ, тупроқдан узоқлашгим йўқ,
Юрак тўхтар, узилиб толсам.
Ҳали минг йил кўкда сузарман,
Юлдузларга айланиб қолсам.

– Мен на юлдуз, на кўк бўлолмам,
Ерга қаттиқ ботмиш товоним.
Сен баҳтлисан, эй инсон, мен-чи,
Минг йилдирки, ўртанар жоним?

– Зангор эди сўлим соҳиллар,
Хайр, дея кўпирап қирғоқ.
Қайтаяпман юрагим томон –
Милдираган кичик бир ирмоқ.

*Абдунаби
ҲАМРО*

1961 йилда тугилган. Тошкент давлат маданият институтида ўқиган. Республика матбуотида шеър, ҳикоя ва қиссалари эълон қилинган. “Вақт дарёси” ва “Олтин дарвозали юрт” китоблари чоп этилган.



ЕРТЎЛАДАГИ УМР

Қисса

Оллоҳнинг изну иродасисиз
ҳеч бир жон мўмин бўла олмас.

Куръони карим, “Юнус” сураси

* * *

Бу бедаво дард унга қаердан ёпиша қолди ўзи? Чинордай йигит, мингта тегирмондан бутун чиққан одам, мана, тўшиакка сингиб кетгудай бўлиб ётибди. Ҳарқалай, “мия ўсмаси” деган бало – бор нарса, у олдин ҳам эшишган бунақа гапларни. Бир кун келиб ўзи ҳам шу дарду балога йўлиқишини туши қўрибдими? Катта дўхтирнинг айтишича, болалигида ийқилиши оқибатида бошининг аллақаерида қотиб қолган қон йиллар ўтиб, ўсмага айланиди. Сўнгги йилларда бот-бот хуруж қилиб қоладиган бош оғригига сабаб ҳам шу экан. Энди операция қилиб, уни кесиб ташламаса бўлмасмиш!

Буларнинг барини у жарроҳлик столига ётишдан олдин кўнглидан кечирувди. Энди у ҳатто ўйлаши имконидан ҳам маҳрум: наркоз таъсирида карахтланган онгу шуури қоп-қора бўшилиққа шўнгиди, тафаккурининг энг чуқур, гадойтопмас бурчакларида яшириниб ётган нималардир бош кўтариб, руҳиую қалби минг бўлакка бўлинниб кетди. Хаёлотми, тушими, босинқирашим – буни идрок қиласидиган даражада эмасди у.



– Очилиши қийин бўлади шекилли... – хўрсинди қўзойнакли, тепакал шифокор. – Майли, кумшидан бошқа чорамиз йўқ...

* * *

У ис босган, шипдан бир қаричча пастдаги туйнукчадан тушаётган ожиз қуёш нурлари зўрға ёритган, минг турли ашқол-дашқоллар қалашиб ётган ертўла бурчагида худди Исойи Масиҳдай хочга маҳкамланганча осилиб турарди. Фарқи шуки, унинг қўлларига гулмих қоқилмаган, шунчаки арқон билан чандиб боғланган. Оёги ҳам зах, намчил ерни босиб турибди. Лекин қулоч керганча боғлик турганининг ўзиёқ чормих қилинган Исони эслатиши рост. Ботаётган қуёшнинг сарғимтири нурлари туйнукчадан базўр ёриб кириб, рутубат тўла бу даҳшат маконини олачалпоқ сояларга тўлдиради.

Хушига келганда вақт ярим тундан ошган эди. Тўғрироғи, аввалроқ хушига келган бўлса-да, руҳий ва жисмоний азоблар туфайли чарчаган онги ҳамда вуҷуди беҳушлик домидан чиқибоқ, уйқу чоҳига қулаганди. Демак, уйғонибди. Аникроғи, уни уйғотишди. Йўқ, уни бу ерга опкелиб, ўласи қилиб дўппослаб, сўнг боғлаб кетган кимсалар эмас, бошқа бир товуш уйғотди. У дикқатини тўплаб қулоқ солди. Аянчли, худди чақалоқнинг зорланган йиғисига ўхашаш товуш эди бу. Баданида сонсиз чумолилар ўрмалагандек бўлди, пешонасига совуқ тер қалқди. Бу ниманинг овози?

– Ажал товуши бу! – деди кимдир даҳшат билан пи chirлагan кўйи. – Азро-илнинг ташрифидан дарак! Кунинг битди сенинг!

Ким бўлди бу? Таниш овоз, жудаям таниш... Ногоҳ хотиралар бостириб келди: талабалик йиллари, кеч куз. Ўшанда у охирги курсда ўқийдиган бир йигит билан бирга пахта теримидан қочганди. Йигитнинг исми Исломми, Илҳомми... йўқ, Имом эди.

Кечки пайт ҳамма қатори баракка қайтмай, дала четидаги заҳкашни кечиб ўтди-да, юлғун ва пастак буталар қоплаган улкан яланглик бўйлаб чопа кетди. Бирон километрдан сўнг катта асфальт йўлга чиқишини у яхши биларди. Чарчаганига қарамай, олга кетаверди. Кўп ўтмай кун ботиб, ой чиқди, аччиқ изғирин турди. У пахта солинадиган этакни белидан ечиб, бошига ўради. Ҳарна шамолдан пана. Ногоҳ узоқда бир қора кўринди. Аввалига уни бутами, қумтепами деб ўйлаб, эътибор бермай бораверди. Бирдан ҳалиги қора нарса қўзғалиб, ўрнидан турди-да, таҳдидли товуш берди:

– Тўхта! Кимсан?

Унинг баданидан муздай тер чиқиб, тили калимага келмай, ўтириб қолди.

– Ме... Мен... Ви... Вилорман.

– Нима?! Қанака Вилор? Бу нечук аҳмоқона исм?

– Пахтадан... – у бирдан бўшашиб, ўтириб қолди.

Тамом, қўлга тушди! Бу домлалардан бири ёки мана шу совхознинг катталаридан! Ўлди энди! Лекин ҳалиги кимса кутилмаганда кулиб юборди.

– Эҳ-е, шунаقا демайсанми, ошна! Ўзимиздан экансан-ку! Қўлни ташла! – дея кенг, панжалари чайир қўлини узатди у.

– Сиз... ким бўласиз, ака? – унинг узатилган қўлини олиб ўрнидан тураркан беихтиёр сўради.

– Менми? Имомман. Бешинчи курсдан. Менам сенга ўхшаган

қочоқларданман, – Имом яна кулди. – Иштонга қочирвординг-а, тан олавер. Қўрқма, бу ёғига бирга кетамиз. Қани, юр.

Ой атрофни сутдек ёритарди. Ёнма-ён, сўзлашиб боришаркан, у Имомнинг ўзини эркин тутишига ҳайрон бўларди. Ким билсин, балки битиравчи курсдагилар бари шунақадир. Ҳарқалай, иккинчи курсда ўқийдиганлар орасида ёлғиз ўзи пахтадан қочишга журъат этгани унинг кўнглини ифтихорга тўлдирад, Имомнинг гап орасида: “Оббо сен-ей, баракалла!” деб қўйишлари руҳини кўтарарди.

– Катта йўлгача ҳали узоқми? – дея сўради у нихоят.

– Ўҳ-ҳў, уч километрча бор. Чарчадингми? Майли, бироз ўтирамиз, – Имом шундай деб кичик дўнглик устига этакни тўшаб, ҳорғин ўтириди. Сўнг чўнтағидан сигарет олиб тутатди. – Чекасанми?

– Йўқ, – деди у Имомнинг ой ёруғида қорачиклари ялтираб турган кўзларига, бароқ қошларию даҳани олдинга туртиб чиққан чўтири юзига бир қараб олиб.

– Олавер, “термоядерний” бу, “Прима”! Айни бизбоп!

– Йўқ, раҳмат....

Ўшанда, 1987 йилнинг кеч кузида, ой ёритган чўл осмони остида улар анча ўтиришди. Имом аввалига унга анча ёқимтой йигит бўлиб кўринди. Тўғри-да, ҳарбий хизматдан сўнг институтга кирган, ёши ундан катта, тажрибалироқ, танти, чўрткесар. Бироқ, унинг исми маъносини билди-ю, гўё тўнини тескари кийди.

– Нима? Вилор? Вой сенинг ўша исмингга! Қайси субутсиз қўйган бу исмни?! – дея гулдуради у беихтиёр ўрнидан туриб.

– Бобом қўйганлар. Нимага ҳайрон бўляпсиз?

– Нима, бобонг динсиз бўлганми?

– Дин, қанақа дин, ака? Бобом чекист бўлган! – деди у ифтихор билан.

– А? Чекист? Жаллод демайсанми, хунаса! Вой сенинг ўша бобонгниям!

Астағфирулло! Ҳе, ўша калнинг гўрига!

У вазиятнинг бу қадар кескин ўзгаришини сира ҳазм қилолмасди. Бунга нима бўлди ўзи? Боягина меҳрибонсираб ўтирувди-ку! Энди бирдан тўқимини қорнининг тагига олди-кўйди. Қанақа йигит бу ўзи? Нимага ҳеч нимадан қўрқмайди? Доҳийни “кал” деб сўкиб ўтирибди-я! Бирор эшитса борми?!

– Менга қаранг, ака...

– Ўчир, – дея вишиллади Имом кўзларидан ўт сачратиб. – Бобонга ўхшаган бединлар юртни хароб қилган, тупроғимизни босқинчиларга топтатган! Қуръонни ўтда ёққан, мачитларни отхона қилган! Отанг ҳам ҳойнаҳой мелиса бўлса керак?

– Йўқ ... – деди у дами ичига тушиб. – Отам райқўумда ишлайди.

– Ў-ў! Илон боласи – илон, чаён боласи – чаён! Сенлар дўзахда куйишинг аниқ! Бу кунлар ўтади, ҳали миллат уйгонади, одамлар Худони танийдилар. Сенлар... Эсингда бўлсисн: худосизнинг келажаги йўқ, унутма! Революциянг ҳам, коммунизмнинг ҳам – гирт сафсата! Худо бир, расул барҳақ! Қолгани бир пул, ўлмасанг кўрасан ўша кунларни!

... У кейинчалик кўп ўйлади: Имом бунча кучни, иродани қаердан олди экан? Нега бунчалик қўрқмасдан, очик гапирди? Борди-ю, Вилор унинг устидан икки энлик чакув хати ёзганида нима бўларди? Кетарди дод деб! Институт ҳам, келажак ҳам савил қоларди. Аммо у ёзмади. Тўғрироғи, ёзишга кўрқди. У



билан тағин бир бор учрашишга, ҳамма эътимод қўйган қараашларни ёмонотлик қилганини юзига айтишга юраги дов бермади. Назарида, ўша куз оқшомида жа-завага тушган Имом уни бир мушт уриб, ўлдириб қўйиши ҳеч гап эмасди. Лекин у урмади, фақат унга ғалати, ачинганнамо қаради, холос. Ўткинчи машина-га илашиб, шахарга келгунларича икковидан ҳам садо чикмади. Факат машина институт ётоқхонаси олдидা бир неча дақика тўхтаганда тушиб, икки тарафга ажралишаётганларида Имом унга заҳарханда табассум ҳадя этиб, тиржайди:

– Омон бўл, райқўм бованинг ўғли. Худо хоҳласа, яна учрашармиз.

Бироқ, улар учрашишмади. Демак, буни Худо хоҳламаган кўринади. Ке-йинчалик у орқаворотдан суриштириб, Имомнинг олис чўл туманидан келганини, тарих факультетида бешинчи курсда ўқишини, Германияда ҳарбий хизматни ўтаб, сўнг ўқишга кирганини аниқлай олди, холос. Сўнг Имом исмли чўрткесар, художўй йигит унинг хотирасидан бутунлай ўчиб кетди.

Фақат бугун, 2005 йилнинг кеч куз оқшомида, рутубатли ертўлада қўллари хочга чандиб боғланган бир алпозда ногоҳ ўша ўжар ва ўқтам овоз онгига чақмоқдай ёриб кирди. Ва унинг юраги орқага тортиб кетди. Беихтиёр калима келтирмоқ учун оғиз жуфтлади. Бироқ, афсуски, ҳаддан ортиқ толиқкан шу-ури қотиб қолди, ё у ҳақиқатдан ҳам динсиз эди. Юракни пармаловчи овоз эса, ҳамон жазавага тушарди:

– Ий-й-ёв-ва-вув-ва-а-а...

* * *

Палата ёруғ, деразадан ёпирилиб кираётган қуёши нуридан чарогон бу хона кишининг баҳри-дилини очгудай шинам эди. Бироқ, бу хонанинг ёлгиз соҳиби бўлмиши йигитнинг руҳияти ҳамон зулмат ичра тентираётганди...

* * *

Қўркувнинг ва даҳшатнинг ранги, таъми бўлиши ҳақида у авваллари сира ўйлаб кўрмаган экан. Чунки бундай шароитга тушмаган одам учун бу тахлит хаёллар бегона. Аммо бугун, ҳозир аниқ бўлдики, даҳшатнинг ранги қорамтири қўнғир, таъми эса... қон таъмини эслатар экан. Нега айнан шундайлиги тўғрисида ўйлаб ўтирадиган алпозда эмасди у. Бутун борлиғини исканжага олаётган қўркув бу исқирт зиндан бурчагидан қорамтири қўнғир рангда бош қўтараётганди. Таъми эса лабларидан сизиб, қотиб қолган қон билан айнан бир хил эди.

Хиралашган шуури андак ёришиб, бир фикрга келди: боя анави жонўртар товуш янграганда, у тишлигини маҳкам қисиши баробарида тилини тишлаб олган экан. Мана энди, шўртаъм қон оғзини тўлдириб турибди. Нафас олиши қийинлашиб боряпти. Ниҳоят, амаллаб бошини ўнг томонга буриб, бироз эгилди. Бироқ, чандиб боғланган арқон уни қўйворишни истамади. Шундай бўлса-да, бошини сал эгиб, куч билан тупурди. Туфук ва қон аралашган суюқлик оёғидан нарироққа тушди.

–Уф-ф-ф! – дея нафас олиб-чикарди у.

Кўзлари тиниклашгандек бўлди, ертўла бурчагига, боягина ҳамлага



чоғланиб, пусиб ётган ёввойи махлук шаклидаги кўланкага кўзини оғритиб тикилди. Сакраб, унинг бўғиздан олишга ҳозирланаётган йиртқич бор-йўғи “эшак” эди. Курувчилар гоҳ “эшак”, гоҳ “козёл” деб атайдиган бу қурилма баландроқ деворларни сувоқ қилишда оёқ остига қўйилади. У енгил нафас олди. Нима, булар бари – нурлар ва соялар ўйиними? Даҳшатли махлук қани? Йўқ бўлса, унда бояги товуш...

– Эта кошка... – деди қандайдир серзарда аёл истиғно билан. – Просто жалкая, бездомная кошка. Эх, Вилорчик, трусишкаб¹...

– Нима, қанақа мушук? – пичирлади у алам ва ғазаб аралаш. – Ҳали мен... Аллақандай дайди мушукдан... тўхта, сен кимсан ўзи?

– Эслаб кўр, – тағин ноз ва кесатиқ омухталашган ғайритабий товуш келди. – Яхшилаб эсла: Волгоград, 1983 йилнинг қиши...

– Қанақа қиши, қачон? – у ғўлдирай бошлади, хаста овози пасайиб, пичирлашга айланди. Бу ертўлада ўзидан бошқа тирик жон йўқлигини у яхши биларди, лекин айни дақиқаларда аллақандай аёл уни нималарнидир эслашга ундаётгани рост-ку! Қанақа қиши ҳақида гапирди? Нимага овоз бору жисми йўқ? Ё у ақлдан озяптими? Агар у телба бўлса, бу ертўла, ўзининг бу таҳлит абгор ҳоли балки қораҳаёл ёки тушдир?

– Туш эмас бу Вилорчик, эслаб кўр...

Аёлнинг овозидаги киноя, пичинг ва уларга уйғун эркалик унинг хотираси тубларида мудраб ётган шарпаларни уйғотаётганди. Энди бу кўланкаларга, шунча йил ном-нишонсиз, шакл-шамойилсиз ётган сояларга жон кирди. Улар қора парда ортидан чиқиб келишиб, зал тўла томошибинлар кўз ўнгига мағрур қад ростлашган актёрлардек, ўз ранг-рўйларини топа бошлашди. Беихтиёр унинг чап кўкси санчиб кетди. Уят, хижолат ва надомат терлари баданидаги сонсиз кўринмас тешикчалардан потирлаб чиқа бошлади. Оғзи қуриб, ингрок аралаш тамшанди:

– Им-м-м...

...Ўшанда уни, яқиндагини институтни битириб келиб, “Билим” жамиятида раис лавозимида ишлаётган ёш ва умидли кадрни Волгоград шаҳрига уч ойлик тажриба алмашиш курсига ўқиш учун юборишганди. Ўқишнинг иккинчи ойи якунида у вилоятнинг чекка, ўрмон билан ўралган туманидаги жамиятнинг фаолияти билан танишмоқчи бўлди. “Билим” жамияти аслида фирт даҳрий бир тизим эканлигини, унинг асосий мақсади одамлар онгидаги ишонч ва эътиқодни сўндириш эканлигини у яхши биларди. Ва ўз иши билан фахрларди. Чунки бу пайтга келиб Имом исмли ўжар йигит унинг эсидан бутунлай чиқиб кетганди.

Овлоқ туманда бир ҳафта қолиб кетди. Арzon меҳмонхона ва яхши шароит бунга сабаб бўлолмасди, албатта. Сабаби – меҳмонхонадаги хизматчи қиз Рита – Маргарита эди. Улар тез тил топишдилар. Ританинг онаси туну кун кўлбола ароқдан бош кўтармас, икки кишилик мўъжаз оила юки қизнинг нозик елкаларига тушганди. Бир куни қиз уни уйига олиб борди. Шаҳарча четида, ўрмон этагида кўккайган ёғоч уй йигитни ҳайрон қолдиргани йўқ. Унинг асл мақсади тезроқ қизнинг васлига етиш эди.

– Истасанг, бироз ўрмонда сайр қиласиз, – деди юзлари ичкилик таъсири-

¹ Бу мушук. Шунчаки ночор, бошпанасиз мушук. Эх, Вилор, қўрқоққина...



дан ял-ял ёнаётган қиз хона бурчагидаги каравотда хуррак тортаётган кампирга ижирганиб қараб қўяркан.

– Майли... – истар-истамас қўзгалди йигит.

– ...Эсингдами, ўша тунда, ўрмонни айланиб юрганимизда оддий бўрсиқдан қўркканинг? – Ританинг овози бу сафар жиндай шўхчан янгради. – Бойўғли сайраганда вахимадан бир газ сапчиб тушганинг ёдингдами?

– Им-м... Сен қаердан кепқолдинг бу ерга? Бор, йўқол, алвости! – у қонталаш лабларини ялади.

– Ўҳ-ҳў, энди алвости бўп қолдикми? Қани ваъдаларинг? Ичган қасамларинг қаерда қолди?

...Кизнинг бадани худди борлиқни қоплаган қордай, балки ундан-да окрок, vale, алангай оташ эди...

У қизни севишини, уни ўзи билан Тошкентга олиб кетишини кўп бора таъкидлади...

Эҳтимол, қизнинг дилида бу овлоқ гўшадан қандай бўлмасин қутулиб чиқиш, катта шаҳарларда яшаш умиди уйғонгандир, бироқ йигит уни тез унуди. Олдинда уни мансабнинг сехрли пиллапоялари, чиройли ҳаёт, ёрқин келаҗак кутаётганди.

Эртасига катта шаҳарга қайтди-ю, Ритани бутқул унуди. Юртига келгач эса ҳаётнинг шиддатли тўлқинлари уни ўз гирдобига тортди. Русиянинг олис бир бурчида ўзининг бокира туйғуларини унга баҳш этган, УНИ КЎП ЙИЛЛАР КУТГАН мовий кўзли бир аёл яшаётгани энди у учун бутунлай аҳамиятсиз эди...

– ...Лоақал жиндай пушаймон бўлганмисан? – Рита тағин тилга кирди. – Бирон марта бўлсин, қилган ишингдан афсусландингми?

– Тинч кўй мени, чиқиб кет онгимдан! Сен йўқсан! Сен хаёлларим мевасисан, холос!

– Йўғ-э? – нозланди аёл. – Ўзингни алдама, азизим. Менинг мавжудлигим-ниям, олис рус қишлоғида ўғлинг борлигиниям яхши биласан.

– Қанака ўғил?! Нималар деяпсан?

– Ана, менга гапирияпсанми, демак мен БОРМАН! Ўғлинг ҳам ўзингга ўхшайди, бекарор, тантиқ... Сочлари қоп-қора...

– Бас қил! Гапларинг ёлғон! Мендан ўч олмоқчисан... Сенга уйлана олмасдим, ахир! Галинага ваъда бериб қўйгандим. Унинг отаси...

– Унинг отаси катта амалдор эди, қизига уйланмасанг кунингни кўрсатарди, – чўрт кесди Рита. – Сен эса кўтарилишинг керак эди...

– Оҳ-ҳ...

– Майли, дам ол, – хўрсинди аёл. – Лекин билиб қўй, мен яна келаман. Эсингда бўлсин: нажот фақат тавбада...

* * *

Навбатчи ҳамишира беморнинг юзига ташвиши аралаши тикилди: йўқ, ҳаёт нишонаси сезилмайди. Ҳатто, нафас олиши ҳам секинлашгандек. У шошиб палатадан чиқиб кетди.

* * *

Тун билан куннинг фарки қолмади. У вақт сезгисини йўқотиб қўйди. Қачон келувди ўзи бу ерга? Кечами, бир ҳафта бурунми? Гўё бутун умр шу арқонга осилиб тургандек... “Келувди” эмас, “келтиришувди” сўзи ўринлироқ бўлиши ҳақида ўйлаб ҳам кўрмади. Аслида уни бу ерга келтиришганди. Мажбуран, зўрлаб олиб келишганди. Бўлмаса қайси ахмоқ ўз оёғи билан бу исқирт жойга келади? Шошма, у қаерда ўзи? Бу ер ростдан ҳам ертўлами? Қаерда жойлашган бу зиндон? Гўё минг йил олдинги воқеалар каби, куни кеча рўй берган ҳодиса кўз ўнгидан узук-юлук тарзда ўта бошлади...

У ишхонасидан чиқиб, машинаси сари юрди. Кеч куз қуёши уфққа оғиб борар, дараҳтлар учидаги қолган яккам-дуккам япроқлар енгил шабада остида иситма тутган бемор мисоли қалтирашарди. У юпқа папкани қўлтиғига қисиб, чўнтағидан бир шода қалит олди. Шу пайт нарироқда турган оқ “Нексия”дан тушиб келаётган хушқомат аёл у томонга юрди.

– Кечирасиз... – деди у хижолатли жилмайганча ялтироқ қизил сумкачасини ғижимларкан. – Машинамни бир кўриб беролмайсизми? Негадир ўт олмаяпти...

Қора соchlари елкасини қоплаган бу аёлнинг кўзлари жон олгудай эди. Йигит каловланиб қолди. Агар бу ерда ушланиб қолса, хотини тағин минғир-минғирни бошлайди. Ўзи боягина телефон қилувди.

– Папулямнинг улфатлари келишмоқчи, тезроқ етиб келинг! – деганди эътиrozга ўрин қолдирмайдиган оҳангда.

Қайнотаси Азим Бўриев – истеъфодаги генерал, савлатидан от хуркадиган одам. Унинг собиқ ҳамкаслари келишса, демак, бу кечани ҳам Худо олди. То ярим тунгача ичкилик, беҳаёл латифа, баҳс-мунозара... Хуллас, уйига бормаса бўлмайди. Боради, албатта, бироқ, манови аёлнинг ғамзали қарашлари... У билан танишмоқчи шекилли. Машина шунчаки бир баҳона, аслида бу оғатижоннинг мақсади бошқа. Ҳа, нима, Вилор арзимайдими шундай пари-пайкарга? Жуда арзийди-да! Бу ёғини сўрасангиз, ўзи аёл зоти қачон машинани тушунган? Кел, кетса икки дақиқа вақт кетар шунга, баҳонада хонимча билан танишиб олади. У аёл томонга юрди:

– Нима бўлди ўзи?

– Билмадим, бу ўлгурни кошки тушунсан... Адамларга неча марта айтдим, янгисини оберинг деб...

Аёлнинг товушидаги ноз-фироқ ва эрка оҳанг уни буткул маҳв этди. Воҳвоҳ! Шундай ҳурлиқо қайси баҳтли йигитнинг ёри экан-а?!

– Ҳозир кўрамиз-да, – у ўз қадрини яхши биладиган кишидай бир-бир босиб машинага яқинлашди.

Шу пайт осмондан тушгандай пайдо бўлган уч йигит унинг оёғини ерга теккизмай машинага тикишди. У на бақиришга ва на юлқинишга улгурди. Бир-икки силтанганди, оч биқинига теккан мушт нафасини ортига қайтарди. Зум ўтмай қўлини орқасига қайириб боғлашди, бошига қоп кийгизиши.

Машина анча юрди, шахар ортда қолди. Буни у атрофдаги машиналар шовқинининг камайганидан сезди. Назаридаги асфальт эмас, тош тўкилган йўлдан боришаётганди. У зўр бериб ўйлар, шахар яқинидаги йўлларни хотирлаб, қай тарафга кетишаётганини тахмин қилишга уринарди. Йўқ, фойдаси бўлмади. Эсанкираб қолган онги унга бўйсунишни истамаётганди.

Нихоят, унинг чап томонида ўтириб келаётган босқинчи овоз берди:



– Хўш, Вилор Наимович, ишлар қалай энди? Фирманинг даромади тузукми?

“А-ҳа, – дея ўйлади у. – Булар мени ўғирлашган экан, энди оиласдан товон сўрашади! Хайрият, пул билан кутулиб кетарканман...”

– Қанча керак сизларга? – хириллаб ғўлдиради у, бироқ оғзидаги латта аниқ гапиришга имкон бермади.

– Э-э, шошманлар, бу кишимнинг оғизларини очиб қўяйлик! – деди ҳалиги кимса. Чаққон бир қўл қоп орасидан сирғалиб кириб, унинг оғзидаги дастрўмолни олди.

– Уф-ф! – дея енгил нафас олди у. – Қани, қанча керак сизларга?

– Нима “қанча”? – анқовсиради сухбатдоши.

– Пул-да! Товон пули! Шу учун ўғирладингларми мени? – сўради у.

– Ҳаҳ-ҳа, Голливуд киноларини камроқ кўриш керак, оғайни! – хоҳолади қароқчи.

– Пулингни... керак ерингга тик! – деган овоз келди олдинги ўриндиқдан. – Бизга сенинг ўзинг кераксан.

Бу рулдаги йигит бўлиши керақ, дея тусмоллади у. Демак, аёл унинг ёнида. Бу ерда, икки ёнимда иккитаси ўтирибди. Аёл билан қўшиб ҳисоблагандан тўрт киши улар. Ҳа-а, ахвол мактанаарли эмас.

– Нима истайсизлар ўзи мендан? – хастаҳол ингради у.

– Ҳеч нарса, – деди биринчи босқинчи. – Шунчаки, уч-тўрт кун бизга меҳмон бўласан. Унгача балки ақлинг кириб қолар.

– Менга қаранглар, – деди у овозини бироз кўтариб. – Мен бизнесменман, маблагим ўзимга етарли. Оғзингизга сикқанини бераман.

Шу заҳоти салгина катта кетдим-ов, дея ўйлаб, тилини тишлади. Фирма Галинанинг номида, расмий ҳужжатларда фақат унинг имзоси ўтади. Унда эса чўнтағидаги тўрт-беш тангадан бўлак нарса йўқ.

– Биз сенинг кимлигингни яхши биламиз, – деди ёнидаги кимса хотиржам товушда. – “Сириус” фирмаси хотининг Галина Бўриеванинг номига расмийлаштирилган, аслида фирманинг чинакам хўжайини қайнотанг, сен шунчаки қўғирчоқсан. Отанграйкўм котиби бўлгани, сен аввал худосизлар жамиятини бошқарганинг, кейин отангнинг курсисини мерос қилиб олганинг, Галинага қандай ўйланганинг ҳам бизга маълум.

Унинг юраги орқасига тортиб кетди: демак, булар у ҳақда етарлича маълумот тўплашган, изига тушишган! Хўш, пул керак эмас экан, унда мақсадлари нима?

– Сен сарқитхўрсан! – дея вишиллади рулдаги босқинчи мазах аралаш. – Хотининг қайси бойваччанинг кучогини қанча вақт обод қилгани, кейин сени қандай илинтиргани, уйланмайман деб оёқ тираганингда қайнотанг сени қандай қўрқитгани, отангнинг сенга нималар деб ялингани, онангнинг “сендай ўғлим йўқ” деб қарғагани – хуллас, бизда маълумотлар етарли. Хўш, шу гапларнинг қайси бири ёлғон? Тўйингдан сўнг қайнотанг “химмат қилиб” сенга дангиллама ҳовли олиб бергани, кейинчалик, қайнонанг ўлгач, ўзи ҳам ўша ерга кўчуб келгани ҳам бизга аён. Ёки буларнинг баридан тонасанми?

– Ичкуёв – ички ёв! – дея луқма ташлади шу пайтга қадар дамини чиқармай келаётган аёл.

Энди бу овозда боягидай ноз-фироқ эмас, пичинг ва киноя қоришиқ эди.

Демак, уларга бари маълум. Ишониб юрган тузуми парчаланиб, қайнотаси



истеъфога чиққанини, куёви тўрвасини олдирган гадой каби талмовсираб юрган пайтларда қурилиш-монтаж ишлари билан шуғулланувчи фирма очиб, уни қизининг номига хатлаб берганини, бечора отаси, ишониб юрган ғоялари сароб эканлигини англагач, бир кечада жон таслим қилганини ҳам билишади булар! Онасининг ҳали-ҳануз уни кечирмагани, рости, ўзи ҳам чин дилдан тавба қилиб, волида оёғига бош уриб бормагани ҳам буларга аён. Демак, улар узоқ тайёрланишган бу ишга. Йўғ-ей, бу замонда бировнинг устидан маълумот тўплаш учун нари борса икки соат кифоя. Компьютерларнинг хотирасида ҳамма нарса бор. Аммо, оиласий масалалар, масалан, Галинанинг ўтмиши, қайнотаси билан муносабатлар, онасининг ундан юз ўғиргани – булар компьютерларда йўқ-ку! Унда қаердан... Тўхта, Вилорбек, бу ерда бошқа гап бўлиши керак. Демак, ўргада кимдир бор. Воситачининг, йўқ, сотқин бир кимсанинг хиди келяпти бу ердан! Ким бўлиши мумкин? Ёнида юриб, қўйнига илондай кириб, кўзининг ёғини еб, уни душманга тутиб берган ким ўзи?

Ўз хаёлларига банди бўлиб, ўз ёғига қовурилиб бораётган Вилор машинада тагин бир йўловчи борлигини бутунлай унуган, бу номаълум кимса не боисдан шу пайтга қадар миқ этмагани сабабини изламаётган эди. Ҳолбуки, ўша сирли кимса бор эди. Машина силтанган лаҳзаларда Вилор унинг иссиқ нафасини ўз юзида ҳис этаётганди. Сирли йигит орада бўлаётган гап-сўзларни диққат билан тинглаб, ўзича хуросалар чиқариб бораёттир...

* * *

Етмиишларга кирган, кумуш ранг сочлари орқага силлиқ тараалган, юришилари ўқтам, бургут қарашли чол бош шифокор хонасидан чиқиб, ийгит ётган палатага йўл олди. Ёнида пилдираганча келаётган навбатчи врачанинг жаврашлари қулогига кирмас, у ўз хаёллари билан банд эди...

* * *

Одам боласининг қонида айланиб юрадиган унсурлар орасида ношукурлик биринчи ўринда турса, ажаб эмас. Бу баттол унсур миянинг аллақайси бурчакларида кўздан пана бўлиб яшайверади. Бир куни келиб кутилмагандা бош кўтариб қолади. Топиш-тутиши жойида, егани олдида-ю, емагани ортида бўлган зотлар ҳам, ҳатто итининг ялоғи тилладан бўлса-да, ношукурлик қиласди. Бунинг жазоси ҳам ўзини кўп куттирумайди.

– Эҳ-ҳе, таппа-тайёр муллавачча бўлибсан-ку сен бола!

Бу энди бутунлай бошқа овоз эди. Учга, балки тўртга бўлинган онги унга янги-янги ўйинларни намойиш қила бошлияпти шекилли? Ким бўлди бу янги ҳамсуҳбат? Имом эмас, Рита ҳам бу тахлит зардали оҳангда гапирмайди. Галинами? Йўқ, эркак киши бу! Отасими? Отаси доимо хотиржам, салмоқлаб гапирарди. Унда ким?

Ногоҳ 1987 йилнинг иссиқ ёз кунларидан бирида бўлиб ўтган воқеа хаёлида жонланди. Шоҳариқ қишлоғи қабристони, ранглари бўзарган, кўзларида даҳшат ифодаси қотган одамлар ва улар орасидан сирғалиб олдинга чиққан бароқ қошли, қотма чол...

– Баракалла, эсладинг. Демак, ҳали эс-хушингдан айрилмабсан! – кулди чол ертўлани титратганча.



- Сиз... сизга нима керак? Бу ерда нима қилиб юрибсиз?
- Иссим Сайд Калон. “Сайд батрак” дейишарди мени. Наҳотки, унуган бўлсанг?
- Ҳа... – онгидаги асосий “мен”и, ниҳоят уни танигандек бўлди. – Сиз... ўлмаганимдингиз?

– Хотира ўлиши мумкинми? Умуман, нимага мен ўлишим керак экан?! – чол тағин кулди. – Ўшанда нима дегандим сенга, эсингдами?

У тилини тишлаб қолди. Чолга нима деб эътиroz билдирун? Ахир ҳаммаси худди кечагидай ёдида турибди. Қулаган туғ ҳам, эски сағаналар ҳам, кўркув тилларига тушов солган одамлар тўдаси ҳам...

Отаси анчайин узун вაъз ўқиди: дин – афюн, унга ишонмаслик керак, фаровон турмушимиздан эскилик сарқитларини супуриб ташлашимиз керак, қабристонлардан туғларни олиб ташлаб, қабрларни тартиб билан рақамлаб чиқиш керак, манови мачит ҳам текинхўрлар маконига айланган, уни бузиб ташлашни даврнинг ўзи тақозо этяпти ва ҳоказолар...

Кишлоқ ахли орасидан туғни йиқитадиган мард топилмади.

– Қамасанг қамайвер! – деди Сотимбой бригадир мелиса бошлиғига тик қараб. – Ааламни йиқитиб, боболаримнинг арвоҳини чирқиратмайман!

– Ааламми, туғми, нима бўлишидан қатъи назар, мана шу оқ байроқ осилган хода йиқитилиши керак! – дея шарт кесди вилоятдан келган қўзойнакли вакил.

Отасининг сўзсиз нигоҳидан англадики, бу ишни АЙНАН У ҚИЛИШИ КЕРАК! “Вилор, бўл тезроқ, ўғлим! Келажагинг, ҳаёт-мамотинг ҳал бўлади бугун!” – дерди ота кўзлари.

У бир лаҳзагина иккиланди, холос. Одамларнинг, айниқса, оломон орасини ёриб олдинга ўтган Сайд батракнинг важоҳатига бир он разм солди. Чолнинг лаблари сассиз пиҷирлар, қўзлари аланга сочарди. Йигит унга кўп ҳам эътибор бергани йўқ. Кескин бурилиб, кўкка бўй чўзиб турган, учига бир парча оқ мато ва яна бир нималар илинган узун ходани зарб билан тепди. Йиллар, эҳтимолки, асрлар бўйи марҳумлар оромини кўриклаб келган, умрнинг ўткинчилиги, ўлимнинг ҳақлигини тирикларга эслатиб турган, ЯРАТГАННИНГ МАНГУ ФОЛИБЛИГИ ТИМСОЛИ бўлган, қуруқшаган, даврларнинг шамоллари жисмини ҳилвиратган ТУҒ ҚАРСИЛАБ СИНДИ! Оломон оҳ тортиб юборди, қирғоқни бузолмай сапчиган дарёдай бир гувранди.

– Уф-ф! – дея енгил нафас олишди марказдан келганлар.

– Ўв! – дея ингради кимдир оломон орасидан.

У пешонасига қалқан терни артиб, Сайд батрак томонга ғолибона нигоҳ ташлади. Ҳа, бу сафар айнан ғолибона қаради.

– Бу ёққа кел! – деб пиҷирлади чол оғзини деярли очмай.

Унинг товушини Вилордан бўлак ҳеч ким эшифтмади.

– Нима дейсиз? – йигит беписандлик билан унга яқинлашди.

Чол бармоқлари чангакдек эгри-буғри қўлини бигиз килиб, унинг кўксига нуқиди:

– Сен итдай хор бўлиб ўласан! Кимсасиз, одам кўрмас ерларда чирийди ўлигинг! Бир томчи сувга, бир тишлам нонга, бир оғиз илиқ сўзга зор бўлиб жон берасан! Эсинг борида тавба қил! Яратган эгам кечиримли, эсингда бўлсин!



– Хорош болтать, старик!¹ – пўписа қилди милиса бошлиғи.

– Кўлингдан келса тўпга солиб от мени! – чол жазавага туша бошлади. – Совуқ ўлкаларда бўлиб ҳам келганман, ўтириб ҳам келганман, яна бораман-да, ўша турмангга! Менинг бир кўрпам ҳалиям ўша ерда!

– Бас, топшириқ бажарилди, кетдик! – раис олдинга тушди, қолганлар унга эргашиб, шоша-пиша қабристонни тарк этишиди.

Вилор ҳам бошқаларга кўшилди. Кўнглида ғалаба нашидаси, ўзини кўрсатиб қўйганлигидан пайдо бўлган хузурланиш мавж уриб бораркан, дарвоза олдида беихтиёр тўхтаб, ортига ўгирилиб қаради. Одамлар гувуллашиб, йиқилган туғ олдида уймаланишар, факат ўша телбасифат чол, Саид батракки-на унинг ортидан нигоҳларини ўқдек қадаб турарди...

– ...Бу гаплар, ўҳ-ҳӯй, қачонлар ўтиб кетган, отахон, ҳозир замон бошқача... – деда хўрсинди у.

– Замон жойида турибди, одамлар ўзгарган, – чолнинг овози бу сафар жуда яқиндан эшитилди. – Эсингга тушгандир огоҳлантирганим? Мана, ахволингга боқ, боғланган итдай осилиб турибсан! Дилингда заррача афсус борми? Қилган ишларингдан хеч бўлмаса бир марта пушаймон қилдингми?

“Унутма, нажот – тавбада!” Бу яна Рита эди, у энди овозларни аниқ фарқлай бошлаганди.

“Э, ўлақолса тавба қилмайди бу! Бунинг қони бузук асли! Одам тавба қилиши учун гуноҳу савобни ажратса билиши керак. Бу аввал ҳам дахрий эди, дахрийлигича қолибди”. Имом тағин пайдо бўлди. Бу сафар у бироз тажангрок, серзардароқ эди.

– О, бўлди энди, тинч қўйинглар мени! – у бор овози билан бақирмоқчи эди, бироқ бўғзидан бўғиқ хириллаш сирпаниб чиқди, холос.

– Тавба қил! – ўдағайлари чол.

– Тавба қилақол! – ялинди Маргарита.

– Тавба қил... – маслаҳат берди Имом.

– Ухлашим керак... Ухлаш... Балки ухлаётгандирман? Эҳтимол, буларнинг бари тушдир? – пицирлади у.

– Хомтама бўлма! – кесатди Саид батрак.

– Йўқол! Даф бўл! Мен ухлайман. Мен... чарчадим...

Ва бир дақиқа ўтмай боши кўксига шилқ этиб тушди. У хоб оламининг сирли баҳрига шўнғиди.

* * *

Томирлари бўртиб чиққан қоқсуяқ қўлларини қаерга яширишини билмай, хижолат оғушида бесаранжом қимиirlаб қўяётган кампир гурс-гурс қадам ташлаб келган нотаниши чолга бир зум тикилди. Сўнг сўнник ва умидсиз нигоҳлар яна ерга қадалди. Ғам-гусса тўлдирган кўнгилда, минг хил ўй гужсон ўйнаётган хотирада номсиз ва шаклсиз нимадир гимирлагандек бўлди: бу ўткир қўзлар, хода ютгандек адл қомат нимаси биландир танишидек унга...

¹ Валақлашини бас қил, чол!



* * *

Воқелик ва рўё аралаш-қуралаш бўлиб, шундоқ ҳам толиқкан онгини ис-канжага олмоқда эди. Соялар гоҳ пайдо бўлар, гоҳ йўқоларди. Мана, никобли уч йигит тағин унинг қархисида турибди. Иккитаси худди ўша кунгидек уни уриб-сўқиб хумордан чикмоқчи, учинчиси эса ҳамон жим. Ким ўзи ў? Бу никобдор кимса, сирли шахс ким бўлди? Нега гапирмайди? Унинг сабрини синаяптими ё унга раҳми келяптими? Нега унда шерикларини қайтармаяпти, уни бўшатишга уринмаяпти?

– Кимсан... кимсиз? – пиҷирлади у кўз олдини тўсган хира туман ичра элас-элас кўринаётган шарпага қараб.

Шарпа индамади, лекин нарирокда ётган темир кувур бўлагини олиб, унинг арқонга осилиб турган икки қўлига навбатма-навбат қарсиллатиб ура бошлади. Тутқун жон талвасасида қичкириб юборди ва... кўзлари чараклаб очилди. “Демак, туш экан... – дея ўйлади у жисми жонини қамраган оғриқ зўридан қалтираганча. – Туш... Лекин қўлларим...”

Қўллари тарашадек қотиб қолганди. Бир неча соат ҳаракатсиз, қолаверса, тўқсон килолик гавданинг оғирлигини қўтариб турган қўлларда кон айланиши қарийб тўхтаган, оғриқ борган сари пасайиб, карахтлик бошланмоқда эди. Агар зудлик билан қўлларини ҳаракатга келтирмаса, улар фалаждай қотиб, сўнг бутун танада тутқаноқ бошланиши ҳеч гап эмас. Ана, мушаклари зўриқиб, тортиша бошлади. Хиралашган онгининг олис бурчидা, коронгилик ичра қизил чироқ ёнгандай бўлди: хавф яқин, хушёр бўл!

У жон ҳолатда қўлларини қимирилатишга урина бошлади. Бироқ арқон пишиқни экан, билакларини қўйворгиси келмади. Гавдасини икки ёққа чайқатишга уринган сайин арқон қўлларини қийиб, терисига чукурроқ ботиб бораради. Турникда тортилгандек оёғини ердан узиб, қўллари билан осилиб кўрди, оғриқ кўзларидан ўт чакнатиб юборди. Аммо ана шу уринишлар сабабми, қўлларидаги карахтлик чекиниб, танаси қизий бошлаганини сезди.

– Ишқилиб, томирларим тортишиб қолмаса, акашак бўлмасам бас... – дея хаёлидан ўтказди кўзларидан тиркираб чиқкан ёшга эътибор бермай. – Эй Худо, қайси гуноҳим учун?

Шу он нимадир бўғзига тошдек тиқилди. Ўзи сезмай Яратганга, шунча йил ота-бобоси ва ўзи инкор қилиб келган ИЛОҲИЙ ҚУДРАТГА илтижо қилаётганди. Ҳали ўз аҳволини тузук-қуруқ идрок этиб улгурмай туриб, хотира осмонида тағин чақмоқ чақди. Улкан оловли ҳарфлар билан битилган савол қўзи олдida яраклай бошлади: ҚАЙСИ ГУНОҲИМ УЧУН?

У ўзини ниҳоятда бечораҳол ҳис этаётганди. Оч, ташна, банди қилинган ҳолда БИР АСРДАН БЕРИ осилиб ётган бўлса, ҳолини сўрайдиган, қўмак бе-радиган кимса топилмаса... Кандай айб қилдики, уни бунчалар хўрлашади? Айби – ўз даврига хизмат қилганими? Нима, бошқалар оппоқми, ундан бошқа ҲАММА ТЎҒРИ ЯШАДИМИ ЎША ДАВРЛАРДА? Аравасига тушгач, қўшиғиниям айтасан-да! Ана, ўша давр фарзандларининг кўпи от устида юрганда тўплаган маблағи ҳисобидан бир фирмами, кичик корхонами очиб ёки фермер бўлиб, даврон суриб яшаяпти-ку! Улар кеча ҳам эгарда эди, ҳалиям жиловни бировга бергани йўқ. Нима, Вилор буларни билмайдими? Жуда яхши билади-да! Чунки, ўзи ўша мактабдан чиқкан, ҳозир ҳам ўша жараён ичидиа юрибди, қайнотаси мисолида кўриб турибди бу ишларни. У-чи? У оддий

қўғирчоқ, қайнотаси ва хотини қўлидаги косов. Бор-йўғи шу. Нега энди унинг, на катта мансаби ва на орттирган мўмайроқ маблағи бўлмаган бир кичкинаги-на одамчанинг бошида синиши керак бу таёк?!

...Ногоҳ оёғига совуқ бир нарса теккандек бўлди, бадани жунжикиб, сес-канди. Боягина (балки БИР ҲАФТА бурунди?) иссиқ, ачимсиқ пешобга тўлган туфлисини ўлим азобида ечган эди, мана энди хўл пайпоги ҳам амаллаб сугурилган, намчил тупроқ устида турган ўнг оёғига нимадир ўрмалаётир. У жон ҳолатда бошини эгиб қаради, бироқ қуюқ коронфилик хеч нарсани кўришга имкон бермади. Ҳа, бу ертўла гўрдай зулмат қўйнида эди. “Гўрдай дейсанми? Ҳудди бирон марта гўрда ётиб кўргандай гапирасан-а!” деган фикр онгига йилт этди-ю, изсиз йўқолди. Ҳозир муҳими бу эмас, муҳими – оёғига ўралиб, юқорига ўрмалаётган маҳлук! Ҳа, бу илон эканлигига шубҳа йўқ. Ана, у ёқимсиз вишиллаб, сонларига чирмашди, сўнг тағин юқорига сирғалиб чиқа бошлади.

– Кет... Кет бу ердан... Тинч қўй мени... – алам билан пицирлади у.

Аввалига жон ҳолатда силтангиси, тўлғаниб, бу совуқ газандани устидан отиб юборгиси келди. Аммо, қаердадир ўқиганлари ёдига тушиб, ўзини зўрға босди. Айтишларича, илон кескин ҳаракатларни ёқтирмас экан. Агар силтанса, газанда чақиши аниқ. Унда... Унда нима бўлишини хаёлга келтиришнинг ўзи даҳшат. Алвидо, ҳаёт! Алвидо, ширин орзулас... Майли, чидайди, ўзини бошиб, бу ишнинг натижасини кутади. Борди-ю, илон захридан ўлиш тақдирига битилган бўлса, илож қанча? Ҳарна бу азоблардан кутулади...

У ийғламоқни, аччик-аччиқ кўзёши тўкиб, ўз абгор холига ачинмоқни истарди. Аммо, бу не шўришки, сувсираган, қуруқшаб бораётган вужудда икки томчи ашкка етгулик нам ҳам қолмаган кўринади. Унинг дийдалари жазиллаб ачишли, қорачиқларига сонсиз игналар санчилгандек бўлди.

Илон белдан ўтиб аввал елкага, сўнг бўйинга ўралди. Лаҳза ўтмай даҳшатдан катта-катта бўлиб очилган кўзлари олдида коронфиликда совуқ шуъла сочаётган икки нигоҳ пайдо бўлди. Бу нигоҳлар, сарғиш яшил кўзлар унинг шуурини тобора музлатиб борарди. Вужудида уйғонаётган қалтирокни босиши учун тишларини маҳкам қисди ва шу он бўйин томирлари шишганини ҳис этди. Йўқ, бу ҳол илоннинг газабини уйғотиши мумкин. “Тўхта, нима қиляпсан, тентак? Ё ўлгинг келяптими? Ўзингни бос, оғир бўл. Ҳозир бу маҳлук тушиб кетади, бироз сабр қил. Қалтирама, танангни бўш қўй” деба буйруқ келди онгининг овлоқ бир бурчидан. У мушакларини бўшаштиргандай бўлди, нақ рўпарасида, бурнидан икки энлик масофада чайқалиб турган илоннинг оғзидан уни айри тили отилиб чиқди. “Энди аниқ ўлдим!” деган фикр билан кўзларини юмишга уринди, бироқ қовоқлари гўё котиб қолгандек эди. “У мени сехрлашга уриняпти!” деган ўй хаёлидан кечди. Учи айри тил тағин йўқолди, унинг юзи эса совуқ бир эпкинни ҳис этишга аранг улгурди. Сарғиш-яшил аланг сочилаётган, тафаккурни маҳв этгувчи, туйғуларни карахтлаб, вужудни тахтадек қотирган бу нигоҳлар ундан, жабрдийда пайғамбар янглиғ осилиб ётган бандидан ҳисоб сўраётгандек эди гўё.

– Айбингга иқрормисан?! – деган савол янгради миясида.

– Нималар деяпсан, қанақа айб? – ҳаёлан хитоб қилди у.

– Демак, ўзингни айбдор санамайсан... Демак, тавба қилиш нияting ҳам йўқ. Билардим, шунақалигини билардим. Мени яратган БУЮК ЗОТ сенга кўп



бора имкон берди, сен эса, қайсар, ақли калта одамзод, улардан фойдалана олмадинг. Ҳолбуки, нажот бор эди. Нажот ҳамиша бор, факат уни КЎРА ОЛАДИГАН КЎЗ керак.

– Ахир, атроф қоп-коронғи бўлса...

– Эҳ, гўл, гумроҳ банда! Нажот эшигини кўриш учун ҚАЛБ КЎЗИ лозим. Сенинг дил кўзингни эса қум босган. Бойлик, мансаб, енгил ҳаёт, майшатпастлик, иккиюзламачилик, кўрқоқлик, нотантилик деган хору хаслар кўмган уни! Ҳолбуки, бир оғиз сўз, биргина калом уни очиб юбориши мумкин.

– Қанақа сўз? Қандай калом?! – ҳайқирди жон ҳолатда ваҳимадан хиралашиб бораётган онги.

Аммо тангри яратган ожиз, бироқ донишмандлик тимсоли бўлмиш маҳлук ўзига илтижо билан термилиб турган ялинчоқ нигоҳдан ҳазар қилгандек кўзларини юмди. Ва шу лахза одамзот бўйини бўғиб турган совуқ сиртмок бўшади: илон аста сирғалиб пастга туша бошлади.

– Тўхта, кетма! – хириллади банди. – Айтиб кет, қандай сехрли сўз у?

– Ўзинг яхши биласан... – деган узук-юлуқ жумла шуурига аранг етиб келди. – Сен тузалмайдиганга ўхшайсан. Аслида мен эмас, сен илонсан! АҚЛСИЗ, ГУМРОҲ, ШАФҚАТСИЗ ВА МАККОР ИЛОН!

* * *

Ўнлаб дорилар ва хлор ҳиди анқиб турган палатадаги кенг каравот билан битта бўлиб ётган йигитнинг киприклари сал қимирилагандек бўлди. Пешинг иссиқда мудраётган навбатчи ҳамишира буни пайқагани ҳам йўқ. Бемор қуруқшаган лабларини яламоққа уринди, аммо лаблари хиёлгина очилди-ю, улар орасидан қизарган тилнинг учи сал қўриниб, гойиб бўлди. Мисоли заҳарли илоннинг айри тилидек оний бир тезликда қўриниб-йўқолган бу забон сўзлашига ҳали ожиз эди. Ана шу иложисизлик изтироби натижаси ўлароқ киприклар аро сизиб чиққан икки томчи ёши юзларидан пастга думалади...

* * *

– Илонлар! Заҳарли илонлар! Қора илонлар! Сенларнинг кунинг битади ҳадемай! – чийиллади йигитча юлқиниб. Бироқ, икки милиса унинг икки қўлидан маҳкам ушлаб турар, озингина йигит уларнинг чангалида потирлар эди.

– Ўчир овозингни, ҳе! – ўшқирди қориндор капитан унинг қўлига кишан соларкан. – Вилор Наимович, нима қилайлик бу дардисарни?

– Обориб тикиб қўй КПЗга! – буюрди у олтин гардишли кўзойнаги устидан ўқрайиб бокаркан. – Уч-турт кун оч ётсин, кейин билади сиёсат билан ўйнашиш қанақа бўлишини!

– Хўп бўлади. Қани юр, шоирвачча! – капитан пиҳиллаб кулганча йигитни хонадан судраб олиб чиқа бошлади. Нима бўлгандаям, ҳақиқатпараст йигитча ўзига етганча ўжар экан, оstonага оёқ тираб, роса тихирлик қилди:

– Фикрни, эркин сўзни қамаб бўлмайди, овора бўлманг! Уни ўлдиришнинг иложи йўқ! Унутманг, бу кунлар ўтади, лекин Ватан...

– Чик-ей! – ўшқирди иккинчи милиса ҳам токати тоқ бўлиб. – Тинчгина севги-муҳаббат ҳақида ёзиб юравермайсанми, аҳмок!



Шоир бола қабулхонага судраб чиққанларидан сўнг ҳам тинчимади, кабинет эшигидаги ёзувни ўқиш учун бошини орқага бурди.

– Вилор Раҳимов, ҳозир ўттиз еттинчи йил эмас! Ўртоқ мафкура котиби, эшитяпсизми?

Ниҳоят, уни олиб кетишидди, Вилор оғир сўлиш олиб, олдида турган газетани тағин очди. Кўзи нақ биринчи бетда, ўқловдай ҳарфлар билан чоп этилган шеърга тушди. Эҳтимолки, ўнинчи маротаба уни ўқиб чиқди. Ҳа, йигитча чакки эмас, юраги отнинг калласича бор экан:

*...Туш кўриб ҳур ҷогини
Очганча қучогини
Темурбекни согиниб
Туркистоним йиглагай...*

Э тавба-ей, бунақа бузғунчилик руҳидаги нарсаларни нимага босишади?! Ахир бу фирт сиёсий қўпорувчилик-ку! Мухаррирнинг кўзи қаерда эди? Йўқ, бу газетанинг жиловини ўз қўлига олмаса бўлмайди!

Кўнғироқ тугмачасини босди, котиба қиз Ануза эшикдан бош суқиб, унга саволомуз тикилди:

– Газета мухарририни топ, тез етиб келсин!

Котибанинг кўкиш қўнғир кўзлари ўзига ишвали тикилиб турганини сезиб, ижирғанди, чехрасига жиддий тус бериб, тағин газетага термилди. Қиз бирпас туриб эшикни ёпди. “Оббо, намунча сузилмаса бу... Ҳаёли бузукроқ шекилли. Э, ким билсин, бу ерга келгунча қайси кабинетларни “гуллатган” экан? Галянинг гапига кирмасам, уни бу ерга опкелмасам бўларкан. Хотиннинг қариндоши ёки таниши қачон дўст бўлган ўзи? Балки қайнотаси қўйган жосудесир бу? Бўлиши мумкин. Ҳарқалай, эҳтиёт бўлган маъқул...”

Шу каби шубҳалар кўнглини алағда қилиб, ҳаёлини тўзгита бошлади. Газетага тағин кўзи тушди. Бу шоир бола жуда қайсан экан. Бўлмаса, ҳурматини жойига қўйиб, кабинетига чакирилди, ширин-шакар сўрашди, ҳатто ижодий режалари билан ҳам қизиқди. Бу қўрнамак эса сийлаганни билмади, бурнини кўтариб, “демократия, эркин фикр, миллат, хурлик” деб лоф ура бошлади. Хайриятки, Вилорбек ота таълимини олган, ҳар эҳтимолга қарши деб, икки милисани чақириб қўйган. Аслида у йигитчага бирон ёмонлик қилиш ниятида эмасди, насиҳат қилиб, бироз ақлини киргизиб қўймоқчиди. “Бунақа олди-қочдини қўй, ука, тинчгина ижодингни қилиб юравер. Миллат, Ватан ҳақида сендан бошқаям ўйлайдиганлар бор” деб огоҳлантириш ниятида чақирирганди уни. Ўжар бола оғзидан тупук сачратиб, қиздирилган мойдек чарсилий бошлагач, унинг ҳам сабр косаси тўлди.

Ўшанда, 1990 йилнинг баҳорида, унинг кўнглида туман газетасини жиловлаб олиш фикри туғилган паллада улкан мамлакат қалқиб тургани, энди қўлида қалами борлар билан сал мулойимроқ муомала қилиш лозимлиги тўғрисида ўйлаб ҳам кўрмабди. Рости, бу тадбир унинг илк катта иши, бир пайтлар нимқоронғи кабинетларда ўргатилган йўриқларни амалда қўллаш борасидаги дастлабки қадами эди. Ушбу тадбирни у кўргазмали тарзда, бошқаларга ибрат бўларли даражада ўтказишни ният қилганди. Бироқ, таассуфки, бу иш у кутган натижани бермади.



Газета муҳаррири йигламоқдан бери бўлиб чиқиб кетгач, у зўр бир ишни қойил қилгандек, ўзича жилмайиб қўйди. Ҳа, кекса журналистни роса тавбасига таянтириди ўзиям! Бечора зор қақшаб таваллолар қилди, эгилиб-букилиб, минг бора узр сўради, лекин ёш раҳбар принципиал эди:

– Бундан кейин газетанинг ҳар бир сонини менинг шахсий назоратимдан ўтказиб, сўнг нашрга берасиз! – деди у қатъий қилиб.

Орадан бир ҳафта ўтгач, у ўзининг ilk ғалабасидан маст бўлиб юрган кунларнинг бирида уни Биринчи котибнинг хонасига чақиришди. Борди, кириб, салом берди. Каттаконнинг хонасида “иккинчи” ҳам ўтирган экан. Юрий Николаевич Могильний унга мовий кўзларини хиёл қисганча синовчан тикилди:

– Нималар қилиб юрибсан сен бола! – ўдағайлари Каттакон бароқ қошлигини чимириб. – Икки кишини гўрга тиқибсан-ку!

У ҳеч нарсани тушунмай, Могильнийга қаради, иккинчи котиб айёrona тиржайди:

– Вилор Наимович, Нажот деган шоир йигит ва газета муҳаррири ҳақида боряпти гап. Улар билан... сухбат ўтказган экансиз-а?

– Ҳа... – унинг юраги ёмон бир нарсани сезгандек ҳаприқиб кетди. – Нима қипти уларга?


– Бало қилибди, дард қилибди! – Каттакон тағин ғазаб отига минди. – Ўв, замон ўзгариб боряпти, сен шуни тушунасанми? Журналист халқи билан ҳам шундай гаплашадими одам?

– Ўзингизни босинг, азизим, асабийлашманг, – деди Юрий Николаевич Каттакон томонга бошини сал буриб. – Осмон узилиб ерга тушгани йўқ, ҳарқалай. Та-а-к... Вилор Наимович, ўша шоир болани милисалар КПЗда бир-икки бор қалтисроқ туширишган шекилли, ҳамон бехуш ётибида касалхонада. Наверное, бошига дубинка билан уришган. Чатоқ бўпти... Муҳаррирнинг асли юраги чатоқ эди, сиз билан бўлган сухбатдан сўнг кичик инфаркт берибди. Ҳозир у вилоят касалхонасида. Уларни огоҳлантириб тўғри қилгансиз, лекин... Ладно, милисаларга чора кўрамиз, началнигининг ҳам погонини юлиб ташлаймиз. Қисқаси, бундан сўнг сал эҳтиёт бўлинг.

Кабинетни тарқ этиш олдидан у Каттаконнинг кўзига кўрқа-писа қаради. Ёши ўтиб, соchlari кул ранг тус ола бошлаган раҳбар нигоҳи унга: “Эссиз икки инсон умри-я! Ахир, улар ўзбеклар-ку, ўз одамларимиз! Сен кимларнинг ноғорасига ўйнаяпсан ўзи?” дегандек таъна билан боқарди.

Эсида, ўша воқеалардан сўнг у бир-икки ҳафта ич-этини еб юрди. Кўнглининг бир четида икки бегуноҳга нисбатан ачиниш ҳисси гимирлаб кўйса-да, онгининг пўканак босган бир хилватгоҳида Юрий Николаевичга ўхшаган суюнч тоғлари борлигидан ғурурланиш туйғуси гуллаб турарди. Лекин омад бир кетса ҳар ёндан кетар экан: шоир бола бошидан еган зарбалари оқибатида қайта ўнгланмади, аста-секин ақлдан озди. Уни жиннихонага ётқизиши. Муҳаррир инфаркт натижасида яримжон одамга айланди, уни ишдан олишиб (пенсиясига олти ой колганда!) катталарнинг чизган чизигидан чиқмайдиган адабиёт муаллимини муҳаррир қилиб қўйиши. Собиқ муҳаррир кўп ўтмай омонатини топширди. Бу икки фожианинг асл айборини эса саноқли кишиларгина билишарди...

Давоми бор



*Музаффар
АҲМАД*

1956 йилда тугилган. Низомий номидаги Тошкент давлат педагогика институтини (ҳозирги ТДПУ) тамомлаган. Унинг бир қатор шеърий китоблари чоп этилган. “Дўстлик” ордени билан мукофотланган.

ЮРАК ҲАМОН ТИТРОҚДА ЭШИК



Хонамга кираман ҳатлаб остона,
Очилиб кетади орқада эшик.
Ёпаман, очилар яна ва яна,
Ушлолмас на қулфу на ошиқ-маъшуқ.

Эшик орқасида гўё кимдир бор,
Нафаси келмоқда, ҳозир киради.
Аммо, у негадир бош суқмас зинҳор,
Балки, мендан таклиф кутиб туради.

Юракда бир ҳадик тинчлик бермайди,
Етар, таъқиб қилма изимдан, ахир.
Кимсан, сен, дўстмисан, душманми, майли,
Ижозат бераман, ичкарига кир?

Соғиндим, кўзларим ёшини тўқди,
Бегуноҳ гўдаклик қайтмагай сира.
Ё эшикка келган... қалбим энтиқди,
Бу сенми, болалик? Сенми, хотира?



Эсимда, фалакни юрардим кўзлаб,
Жуда мағрур эдим, жуда шафқатсиз.
Энди-чи? Саломга келдингми излаб,
Эй сен, илк муҳаббат – йиғлаб қолган қиз?..



...Қарсиллатиб ёпдим. Чиқди кўп жаҳлим,
Тавба, эшик тағин очилди шу он.
У ҳамон ҳаяллар, юракда ваҳим,
Дўстлар, бу ким ўзи? Бу нечук меҳмон?

Мен-ку, бу ҳаётда бир инсон мисол
Яшадим гоҳо чин, гоҳ ёлғон сўзлаб.
Эшик орқасида туарп, эҳтимол,
Менинг ёлғонимдан завол кўрган қалб?

Минг фойда йўлида сарф айлаб кучим,
Кимга берган бўлсам бир фириб, озор.
Мендай бадкирдордан ўч олмоқ учун
Келиб турғанмикан бирор қасоскор?

“Бажараман! Ишон! Хўп! Муҳайё!” деб,
Кимга ваъда берган бўлсам мен агар.
Ўша ваъдаларга қани вафо деб,
Ташриф буюрдими қай бир даъвогар?

Гар хиёнат қилиб имон, виждонга,
Бўлган бўлсам ҳаром-харишга мойил,
Энди яшаш ҳайф деб, сендей инсонга,
Уйга кирмоқчими ёки Азроил?..

Дўстим, булар бари шунчаки бир гап,
Хаёл эканлиги ҳаммага аён.
Лекин, кўкрагимда дук-дук, дук-дуклаб
Эшик қоқаётир ғалати меҳмон.

Бўсаға олдида баъзи бир онлар
Куршарми сени ҳам шу ўй, тафаккур?
Ростдан бориб қолса шундай меҳмонлар
Қандай кутиб олажаксан, ўйлаб кўр?



ФИЖЖАК

Деворда осиғлиқ турибди ғижжак –
Отамнинг умрлик йўлдоши.

Деворда осиғлиқ турибди ғижжак –
Онамнинг севимли сирдоши.

Қайда ул азиз қўл, ул меҳрибон қўл,
Қайда ул сехргар – жавоб бер, ахир?!
Минг кун ўтди, балки, ўтгандир минг йил,
Ғижжак чалинмасдан турибди сағир.

Камон қиллари ҳам ташлаёттир тоб,
Кун-кундан тўлиқар қуylашга зор соз.
Қайда, сукут?
Қайда, сукут?
Йўқ жавоб!
Ғижжак ўз-ўзидан чиқарар овоз!

Онам мудрар экан совуқ тўшакда
Ногоҳ, беихтиёр уйғониб кетар.
Ғаройиб мусиқа! Тун ярим чоғда
Ғижжак нола этар, нолалар этар!

“Мени ҳам ўзингни қийнама, жоним,
Оҳ урсам, сендан-да, ўтажак нолам.
У кетди, келмайди!” Девордан олиб,
Сирдошин кучоқлаб юпатар онам.

ЙИРТИЛГАН СУРАТ

Бугун йўлда
Йиртиқ бир сурат кўрдим:
Йигитнинг кўзлари...
Қизнинг кўзлари...
Йиртиқ сурат узра
Маъюс, лол турдим.
Шамол бўзлади:
Ваъда-вафоларни
Пойимга сочиб,
Сўкиниб, қарғаниб,
Оҳ уриб, қочиб,
Қай томонга кетди



Бугун ўзлари?..
 Чинор бош чайқарди,
 Шамол бўзларди,
 Ул кўзларни
 Хазон ичра гизларди...



МАҲАТМА ГАНДИ

Истайман: уйимнинг деразалари
 Доим очик турсин, ланг очик турсин.
 Хонамда ўйнасин қуёш зарлари,
 Етмиш юрт – иқлимдан шамоллар юрсин.
 Хушбўй шабадалар, латиф шамоллар,
 Турфа, тоза, эрка, афиф шамоллар...

Истайман: уйимнинг деразалари
 Доим очик турсин, ланг очик турсин.
 Дунё шамоллари, шабадалари
 Кўл ушлашиб юрсин, эшилиб юрсин.
 Оромбахш шамоллар, шўх шабадалар,
 Муаттарликда тенгги йўқ шабадалар...

Уйимни тўлдирсин бари bemalol,
 Руҳим юксалтирсин бағрига олиб...
 ...Йўқ, мен истамайман: бирон-бир шамол
 Мени йиқитмасин оёқдан чалиб...

* * *

– Севаман! – деб кулди кўқда ой,
 – Севаман! – деб чайқалди терак.
 – Севаман! – деб шовқин солди сой,
 – Севаман! – деб титради юрак.

Сўнг... ҳаммаси алвидо айтди,
 Ой, терак ва сой айтди видо.
 Видо – ханжар. Юракка ботди,
 Бўйсунмади бу ўжар аммо.

Ой яшринди. Йиқилди терак.
 Мана, сой ҳам оқар йироқда.
 Фақат юрак, бу шўрлик юрак
 Ҳамон ўша-ўша – титроқда!



**Гулжамол
АСҚАРОВА**

1978 йилда тугилган. Тошкент давлат университетининг (ҳозирги ЎзМУ) журналистика факультетини тамомлаган. Зулфия номидаги давлат мукофоти совриндори. “Дил фасли”, “Рўшинолик”, “Ўйготувчи алла”, “Бедор қўнгироқ”, “Бахт дастхати”, “Гулнома” каби шеърий китоблари чоп этилган.

ИШҚ ЮВСИН КЎНГЛИМНИНГ ҚИРФОҚЛАРИНИ

КЕЛДИМ

Келдим, чиқиб кутиб ол мени,
Камалакман тутиб ол мени,
Айрилиқдан сотиб ол мени,
Сени жуда соғиниб келдим!

Ҳижронингда қонлар ютдим, мен,
Денгизлардан сакраб ўтдим, мен,
Бахтдан кўпроқ сени кутдим, мен,
Дийдорингга сифиниб келдим!

Дардимни ол, толиқтирди ғам,
Шамъ мисоли ёник турди ғам,
Менга бунча содик турди ғам,
Бир ўзингга юкиниб келдим!

Бахт топмадим сендан йироқда,
Жону кўнглим ёнди фироқда,
Эй қудратлим, кутқар қийноқдан,
Ёш боладек ўкиниб келдим!

Жим турмагил азобинг чексам,
Жим туриб ҳам кўзёшлар тўксам,
Хайрон бўлма пойингга чўксам,
Эски уйдай тўкилиб келдим!

Ишқ рухимни bemакон қилди,
Битта эдим, бир жаҳон қилди,
Ҳижрон мени имтиҳон қилди,
Бу синовдан йиқилиб келдим!

Сени жуда соғиниб келдим!..





ҚАФАСДАГИ ҚУШ

Эй сен қафасига ўрганган қушим,
Ёлғиз қолганида ўртанган қушим.

Мен сенинг уйингни бузмасман ҳаргиз
Ва сендан кўнглимни узмасман ҳаргиз.

Сен ишқнинг овозин унугандирсан
Ва руҳнинг парвозин унугандирсан.

Эҳ, яшаб юрибсан ноламни билмай,
Қафасингдан бошқа оламни билмай.

Хушинг йўқ, кел, озод этайн десам,
Ҳаётингни обод этайн десам.

Полапонларингга жонинг тутасан,
Биламан, сен шундай яшаб ўтасан.

(Баъзида мен томон кетса хаёлинг,
Ёнингда хўрсишиб қўяр аёлинг.)

Иложсизим менинг, бечора қушим,
Ҳаммамиз тутқунмиз, начора қушим.

Ҳалқалар, занжирлар узилмас, билдим,
Бу олтин қафаслар бузилмас, билдим.

Начора, жонга – жон тўларсан қушим,
Шу олтин қафасда ўларсан, қушим.

ИШҚ ЎТИ

Тангрим оч руҳимнинг булоқларини,
Ишқ ювсин кўнглимнинг қирғоқларини,
Ҳис этай тафаккур тўлғоқларини,
Уйғонай!

Завқ олай муҳаббат қаҳридан,
Бол топай илонлар заҳридан,
Энг тоза туйғулар бағрида
Тўлғонай!





Кўл бериб малаклар, ҳурларга,
Дунёлар очмаган сирларга,
Ҳеч завол билмаган нурларга
Чўлғонай!

Кутқудан қонимни қутқарма,
Кўнглимни-хонимни қутқарма,
Бу ўтдан жонимни қутқарма,
Бир ёнай!

* * *

Вақтлар ўтди. Кетди қадрим ҳам,
Сен зор бўлиб келмассан энди.
Ўтган дамлар, о, ўтган дамлар,
Нақ жаннатнинг лаззати эди.

Келар эдинг соғиниб интиқ,
Келар эдинг кумсаб сочимни.
Айт, ким олиб қўйди билдирмай,
Бошимдаги олтин тожимни?

Ёзар эдим сенга мактублар,
Ёқар эдим жисму жонингни.
Уйғуналашиб гўзал қутблар
Тўлқинлатар эди қонимни.

Эй... севганлар кўпам суюнманг,
Севилганлар қувонманг ортиқ.
Билмайсизки, бугун ишқ берган
Эрта ғамни қиласи тортиқ.

Керак эмас лаҳзалик висол,
Ҳеч керакмас ўтар севгилар.
Ошиқларнинг оний ҳислари
Юрагимга ёмон тегдилар.

Мен-ку, сен деб ўтдаман ҳамон,
Исминг айтиб жоним узилар.
Кеча қўриб қўзинг қувнарди,
Бугун қўриб қўнглинг бузилар.

Билдим, ишқдан алам қолгувси
Ва беомон ҳисларнинг қаҳри.
Ошиқларни ўлдирап азал,
Ўтган тотли кунларнинг захри.



МҮЖИЗА

Кўрдим,
оппоқ гулларнинг
қизил олчаларга айланганини...



ЭСЛАДИМ

Кўзларингга термулиб,
Кўзларимни эсладим.
Ишқингда сармаст юрган,
Кезларимни эсладим.

Адашсанг, гар адашган,
Чўққиларни талашган,
Изларингга эргашган,
Изларимни эсладим.

Ким маржон тизиб кетган,
Ким уни узиб кетган,
Оловдек қизиб кетган,
Юзларимни эсладим.

Севги олов, севги ўқ,
Вужудга текканда чўғ,
Боши йўқ, охири йўқ,
Сўзларимни эсладим.

Ким у кўнглимда юрган,
Рухимда лола терган,
Ишқинг азоби берган,
Бўзларимни эсладим.

Бермам оҳорларимни,
Осмондек орларимни,
Ўтган баҳорларимни,
Кузларимни эсладим.

Кўзларингга термулиб,
Кўзларимни эсладим.



*Дилфузা
ЎРОЛ қизи*

1970 йилда тугилган. Тошкент давлат университетининг (ҳозирги ЎзМУ) журналистика факультетини тамомлаган. “Чумчук бола”, “Учинчи чизик” каби ҳикоялар тўпламлари чоп этилган.

БАШОРАТ

Қизалоқ буррогина эди, ўз исм-шарифини жуда яхши кўрарди, бу ном билан ғурурланарди. Шу боис уйларига бирор-бир меҳмон келадими ёки кимдир саволга тутадими, исминг нима деб сўрашса, бас, қошларини ке-риб, иягини бироз олдинга чўзарди-да, дона-доналаб, худди шуни ҳам билмайсизми дегандек таъкидлаб, “ма-а-ан Азиза Азизхўж-жаеваман”, дерди. Азиза дадаси, аясидан ташқари Асрор тоғасининг ҳам эркатойи эди. Асрор ҳамма талабалардек озғирноқ, пўримроқ, билмаган нарсаси йўқ, қизлару ўйин-кулгидан кўра телефони ва компютерини чиқирлатиш, жиянчаси Азизани бижирлатиш-у унинг ҳамма саволларига эринмай жавоб бериши-ни ёқтиради. Мусофир шаҳарда қариндошингнинг вайронга бўлса-да, бош-панаси бўлсин экан. Опасининг ижарада тура-тура, кийналиб сотиб олган мана шу мўъжалазгина уйида тўртталови гункиллашибина яшаб келишарди.

Бу йилги қиши қаттиқ келди. Бир ёқсан қорнинг устига устма-уст кор ту-шаверар, тунги аёзлар деразага чизган қатқалоқ нақшлар расм китобларида-гидек каштасимон, нафис эмас, қандайдир чағрайган, ханжарлардек кескир эди. Шунча “па-па”лашганига қарамай, Азиза томоги оғриб, бир неча кундан бўён иситмалаб ётарди. Ана шундай кунларнинг бирида Асрор уйга яп-янги, хориж пояфзали қутисига ўхшаган ялтироқ картон қути кўтариб келди. Кутининг ичига тўртта оппок, муздай, яп-янги чинни қўғирчоқлар бор эди.

– Қўғирчоқни шунақасиям чиқибди-да, – дейишиди уйдагилар ўйинчоқдан



ҳам кўра шахмат доналарига ўхшаб кетадиган, аммо улардан йирикроқ бўлган чинни одамчаларни бирма-бир қўлларига олиб кўришаркан.

– Менимча бу шунчаки сувенир бўлса керак, – аниқлик киритди Асрор.

– Шуларниям сотиб олдингми? Ўзиям фалон сўм турса керак? – жаворашга тушди опаси Асрорнинг ана шунаقا антиқавор нарсаларга ўчлигини билгани учун.

– Йўғ-е, лишний расходга пул борми ҳозир? Сессиямни ёполмай юрибман-ку, – ўзини оқлашга тушди Асрор. – Боя нариги “дом”ни айланиб ўтаётганимда тўсатдан орқамдан “тўп” этган овоз эшитилди. Қарасам, қорда, ҳозиргина мен босиб келган изларнинг устида мана шу қути ётибди. Куппа-кундуз куни-ю, атрофда ҳеч зоф йўқ, кўчадан ҳам бирорта машина ўтмади, ҳайрон бўлиб “дом”нинг кўчага қараган ойналарига бир-бир қарадим. Бўлса-бўлмаса қутича мен тагидан ўтиб бораётган “дом”дан ташланган. Кутини очиб қарасам, мана шу тўртта қўғирчоқ турибди. Жуда кимматбаҳо! Бунаقا нарсалар ҳеч қачон кўчада ётмайди, уларни ҳеч қачон аямай-нетмай деразадан ҳам улоқтиришмайди. Эҳтимол, кутини билмасдан тушириб юборишган-у ҳозир унинг эгаси зиналарни дўпирлатиб, пастга тушиб келаётгандир деб анча кутиб ҳам турдим. Ҳеч ким келмади. Ахийри ўша уйнинг ҳамма эшикларини тақиллатиб чиқдим. Менга битта ҳам эшикни очишмади, бирор киши чиқмади. Кейин ўйлай-ўйлай буларни уйга кўтариб келавердим. Рости, уларни топган жойимга ташлаб келаверишга кўзим қиймади.

Қўғирчоқлар Азизага ҳам жуда ёқди.

– Ву-уй, – деди қизалоқ тўртта қўғирчоқнинг ҳали унисини, ҳали бунисини иситмадан ловуллаётган ёнокларига бирма-бир босаркан. – Улар меники, ҳаммаси меники!

Наргиза шошганча қўғирчоқларни қизининг қўлидан тортиб олди:

– Шошма, тегинма қизим, уларни яхшилаб ювай, кейин ўйнайверасан.

– Йў-ў, йў-ў-ў! Уларни ўзим чўмилтираман, – инжиқланди қизи. – Сиз ювсангиз, синдириб қўясиз!

– Ростданам, – гапга аралашди Асрор. – Булар тепадан ташланган бўлса-ю, синиб қолмаганини қаранг!

– Тоға, тоғажон, – бидиллади яна Азиза. – Манави қўғирчоғим аям – Наргиза Азизхўжаева! Буниси – дадам, Сарвар Азизхўжаев! Мана буниси эса – сиз, Асрор тоғамсиз! Манави энг кичкинаси – мен – Азиза Азизхўжаева. Мен бу қўғирчоқларимни Азизхўжаевлар дейман, хўпми? Дада, сиз улар учун чиройли уйча олиб берасиз, майлимни?

Сарвар қулиб юборди:

– Бўпти, асал қизим! Эртагаёқ шу қўғирчоқларингга биргалашиб уйча қуриб берамиз.

Эртасига Азизанинг иситмаси тушди. Иштаҳаси очилиб, нима беришса пақкос туширди. Қизалоқнинг юзига қон югуриб, ҳали анча-мунча дармонсизлигига қарамай гул-гул яшнаб, ётган жойида “азизхўжаевлар”ини гапиртириб, ўйнаб ётганини кўрган Сарвар азза-базза фалон пулга ўйинчоқ уйча олиб келди. Азиза бундан шундай суюндики, таърифлашга тил ожиз!



Кунлар ўтаверди. Азиза бошқа ўйинчоқларини батамом унутиб, фақат шу қўғирчоқлар билан ўйнарди.

— Мана-а-а, Сарвар Азизхўжаев уйига келди. “Аяси, нима овқат?” деб сўради у. “Манти қилдим, дадаси!” жавоб берибди Наргиза Азизхўжаева. “Унда шошмай тур, Асрор ҳам ўқишдан келсин”, дебди дадаси. “Урре-урре, бугун аям манти қиларкан!” дебди Азиза Азизхўжаева, – бидилларди қизалоқ.

Қизларининг бир онаси, бир отасига айнан ўхшатиб, овозларини, гап оҳангларини ўзгартириб гапиришидан Наргиза билан Сарвар бирбирига кўз қисиб кулишарди-да, ошхонага ўтиб мантига уннашарди. Эрка қизларининг кўнгли шу овқатни тусагандир-да!

Бошқа куни эса Азиза уйғонибоқ чопқиллаб, айвондаги ўйинчоқ уйча ичида “ухлашаётган” “азизхўжаевлар” ининг бирини олиб келиб, диванга ётқизиб кўйди. Сўнг овозига дўриллаган тус бериб жаврашга тушди:

— “Вой-вой-вой”, дебди Сарвар Азизхўжаев. “Вой қорним”, дебди у ва мана бундай қилиб, ётиб олибди. А-а-а-а... Сарвар Азизхўжаев ишхонасида ёмон нарса еб қўйибди, ўшанга қорни оғриб қолибди! Энди нима бўлади? Энди Сарвар Азизхўжаев каса-а-ал бўп қолади. Ишга бормай уйда ё-ё-ётади. Бир кун ётади, икки кун, уч кун... Ана! Сарвар Азизхўжаев тузалди! Яна ишга отланди, – деди Азиза қўғирчоқлари билан ўйнаркан.

Сарвар қизининг гапларини эшитиб, унинг жингалак соchlарини тўзғитиб-тўзғитиб эркалаб қўйди-да, ишга жўнади. Аммо шу куни унга нима жин тегди, ё ошқозонидаги яраси сабабми, балки тушликда еган овқатими, бирдан кўнгли айниб, ичи бузилиб, мазаси қочди. Уйга амаллаб етиб келди-ю, йиқилди. Уч кун дегандагина ўзига келди. Тўртинчи кун беҳолланиб ётаркан, бирпас ётмоқчи бўлиб кириб кетаётib беихтиёр қизининг бижиллашига кулок тутди:

— “Асрор тоға! Асрор тоға! Қаерга кетаяпсиз”, дебди Азиза Азизхўжаева. “Бизга жавоб беришди! Термизга, бир ойга уйга кетаман”, дебди Асрор тоға. Аммо унақа бўлмабди. Уч кундан кейин Азизанинг тоғаси қишлоқдан қайтиб келибди... – қўғирчоқларини ўйнатганча гапиради Азиза.

Сарвар мийигида жилмайиб қўйди. Ҳақиқатан ҳам, эртага қайниси Асрор уйига кетиши керак. Аммо уч кунга эмас, бир ойга. Кейин бирдан сергак торти: Азиза Асрорнинг кетишини қачон эшита қолди экан? Қизик.

Қишлоққа Асрор зарур ишлари чиқиб, уч кун ўтиб-ўтмай яна ортга қайтиб келди. Ана шундагина Сарвар ғалати бўлиб кетди. Ахир Азиза қўғирчоқлари билан ўйнаб, “Асрор тоғам уч кунда қайтади” демаганмиди? Шундан кейингина Асрор қизининг “азизхўжаевлар” билан ўйнайдиган ҳар бир ўйинини диққат билан кузатадиган бўлди. Қизиги шундаки, Азиза “азизхўжаевлар” билан ниманики ўйнамасин, ўша нарса ўз тасдифини топаверарди. Бехато тарзда!

Борган сари Сарварнинг диққати оша борди. Бир куни у Асрорни четга чақириб, ундан суриштириди:

- Тўғрисини айт! Сен анави қўғирчоқларни қаердан олгандинг?
- Айтдим-ку, топиб олдим деб.
- Аниқми?



– Ҳа, почча, аниқ! Қути мен йўлакдан кетаётганимда орқамдан “тўп” этиб тушди. Кейин унинг эгасини қидирдим. Тополмадим. Нима эди?

– Йўқ, йўқ, хеч нарса! Қизиқдим-да... Шунчалик ғаройиб қўғирчоқларни ким ташлаб юбориши мумкин? Хўп, уларни сен айтгандай, картон қутининг ичига солиб, музлаб ётган йўлакка улоқтириб юбориши ҳам дейлик. Унда бу қўғирчоқлар қандай қилиб синиб қолмаган, ҳаттоқи бирор жойига дарз кетмаган?

– Почча! Билмайман. Мен сизга тўғрисини айтдим. Аммо қўнглингизга бирор гап келаётган бўлса, сиз ҳам ташлаб юборинг уларни! Кераги йўқ...

– Э-э... нимага ташларканман? Сўрадим, қўйдим-да. Қара, Азиза уларни қандай яхши кўриб қолди...

Орадан кунлар ўтаверди. Бошқа бир сафар эса Асрорни опаси Наргиза сўроққа тутди:

– Асрор! Тўғрисини айт! Бу қўғирчоқларни қаердан олдинг?

Бу гал Асрорнинг фифони чиқди: “Нега ҳадеб мени тергайверасизлар? Шу қўғирчоқлар сизларга даҳмаза бўлаётган бўлса, ана, отворинглар ахлатга!”

– Асрор, укажон, – Наргизанинг қўзларида ёш ғилтиллади. – Гап қўғирчоқларда эмас. Поччангга бир бало бўлганга ўхшайди. Хўп, Азизаку гўдак, қўғирчоқ ўйнаши табиий. Аммо поччанг ҳар куни келиши билан қизидан қўғирчоқларини суриштиради. “Қизим, эртага Сарвар Азизхўжаев нима қиласди, Наргиза Азизхўжаева-чи, Асрор-чи, Азиза-чи”, деяверади. Азиза нима деса, ҳаммасини дикқат билан эшитади. Саволлар бераверади, бераверади. Билмайман, бошим қотиб қолди. Поччанг умуман ўзига ўхшамай қолган.

– Э, опа! Шунчалик экан, даф қилинг ўшаларни, тамом-вассалом.

– Каёққа дейсан? Кўрмайсанми, Азиза қўғирчоқларидан бир дақика бўлсин ажралмаяпти. Бирор жойга яшириб ташласам, аюҳаннос солиб, дунёни бузади. “Қани, азизхўжаевларим қаерда? Топиб беринг”, деб холжонимга қўймайди. Нима қилишга ҳам ҳайронман. Бошим қотган.

– Шунга шунчами? – қўл силтади Асрор. – Ўзларизам Азизани жуда эркалаторгансизлар-да! Ахир нима яхши – алдагани бола яхши!

– Алдадим, – оғир ютинди Наргиза. – Неча марта алдашга, чалғитишга ҳаракат қилдим. Янги қўғирчоқлар олиб бердим. Қани уларга қараса, қани ўша “азизхўжаевлар”идан ажралса! Қўлимдан хеч нарса келмаяпти. Ўзинг биласан-ку, Азизамиз касалманд. Шунинг учунам боғчага бермай, ишпишимни йиғишириб, унга қараб, уйда ўтирибман. Дўхтирлар тайнингани учун ҳам уни кўпроқ ўз ҳолига қўяман, – мижжаларига сизиб чиқсан кўзёшларини артди Наргиза.

– Опа, бўлди, йиғламанг, – юпатди уни Асрор. – Азизанинг шу қўғирчоқларидан кечишигга ўзим қўндираман. Факат бунинг учун бир нарсани аниқ билишим керак: қизингиз қўғирчоқ ўйнашдан бошқа яна нимани яхши кўради?

– Рақсни, – жонланди Наргиза. – Рақс жон-дили. Ҳар сафар телевизорда рақкоса қизларни кўрса, “ая, маниям рақсга беринг”, деб хархаша қиласди. Аммо соғлиғи бунга тўғри келармикин?



– Э, опа! Қўйсангиз-чи! Худога шукр, Азиза беш ёшга тўлди. Аяган кўзга чўп тушади, деганлар. Ўша дўхтирларингиз “болангиз уч ёшгачаям яшолмайди” дейишмаганмиди? Худога шукр қилинг, Азиза соғ-саломат юрибди. Рақсни деса, рақсга қатнатинг-да! Бўлди! Мен Азизага “рақсга қатнашиши хоҳлайсанми?” деб сўрайман. У “ҳа”, деса, “унда қўғирчоқларингни менга берасан. У ерга қўғирчоқ ўйнайдиган қизларни олишмайди”, дейман. Мана кўрасиз, у дарров кўнади.

– Илойим айтганинг келсин, – жилмайди Наргиза укасининг пешонасидан ўпиб. – Мен эртагаёқ бориб ўша мактабни гаплашиб келаман. Боғчага боролмаганига яраша шўрлик қизим ўша ёққа қатнаб турсин. Аммо бу ҳақда поччангта ҳеч нарса демай тур. Сюрприз қиласиз!

Мусиқа мактабига бориб Наргиза ҳафсаласи пир бўлиб қайтди. Чунки қабул куз фаслининг бошидаёқ тугаган экан. Наргизанинг бу гапдан тамоман шалвираб қолганини кўрган мактаб ходимлари унга далда беришди:

– Ўн кундан кейин келинг. Бир иложини топамиз!

Ўн кун! Ўн кун! Наргиза шунисига ҳам хурсанд эди. Энди Азизадан қўғирчоқларни олиб қўйишса, бас. Сарварнинг телбavor хатти-ҳаракатларига ҳам чек қўйилади. Ҳаммаси илгаригидек бўлади.

– Ҳаммаси ҳал! – деди Асрор қатъий. – Аммо қачон ўн кун ўтаркин деб кутиб ўтирамизми? Бугун кечкуруноқ Азиза билан гаплашиб оламиз.

Тушдан кейин Асрор уйга қайтиб келди. Кўлида кинога чипталар. Кечкурунги сеансга.

– Поччамнинг ишдан қайтиш вақтини ҳисобга олдим, – дея илжайди.

Орадан бир муддат ўтиб-ўтмай Сарвар ҳам келди. У нимадандир тажанг, сиқилган эди. Келди-ю, тўғри қизининг хонасига ўтиб кетди. Наргиза билан Асрор ҳам беихтиёр унинг изидан киришди.

Бу пайтда Азиза қўшниларининг кизи Дилдор билан ўша, ўзининг севимли “Азизхўжаевлар”ини ўйнаб ўтиради. Бир пайт Азиза ўйинга берилиб кетди-ю... Ҳаммалари сергак тортдилар.

– Кейин Азизхўжаевларнинг уйида мотам бўлибди. Дадаси ўлибди, аяси ўлибди, тоғаси ўлибди, Азизаям ўлибди, – ҳамма қўғирчоқларни ётқизиб чиқди Азиза. – Азизхўжаевларникига кўп, роса кўп одамлар келибди. Ҳамма йиғлабди. Кейин Азизхўжаевларни кўмгани олиб кетишибди.

– Азиза!!! – бақириб юборди Сарвар. – Нималар деяпсан, тентак!

– Ҳеч нима... ўйнайман, дадажон!

– Ҳой қиз! Шунақаям ўйин ўйнайдими, а? Жинни бўлғанмисан? – жазавага тушиб бақиради Сарвар.

Дадасининг важохатини кўриб, қизи қотиб қолди.

– Дадаси, – секин эрини туртди Наргиза. – Ўзингизни босинг.

– Нима? Ўзингизни босинг? Кўрмайсанми бунингни? – яна бақириди Сарвар.

Азиза ортиқ дош беролмай йиғлаб юборди. Қизининг кўзларида ёш кўрган Сарвар бирдан шалвираб қолди. Тиззалаб юриб, қизининг олдига келди-да, уни бағрига босди.



– Бўлди... Бўлди... Попук қизим! Йиғлама. Билмасдан бақириб юборибман, асалим. Бўлди... Фақат... Фақат жоним қизим, иккинчи бундай ўйин ўйнама, хўпми?

– Хўп, – деди Азиза бурнини “шурқ” этиб тортганча дадасининг эркалашларидан юпаниб. – Ўйнамийман...

Сарвар қизини қўйиб, бошини чангаллаганча хонадан чиқиб кетиши билан Асрор билан Наргиза қизалоқни аврашга тушиши.

Мусиқа мактаби-ю, рақс ўрганишга қатнашини эшитиб, Азиза хурсанд бўлиб кетди. Асрор тоғаси айтган шартга ҳам дарров рози бўлди. Кўғирчоқларидан кечди. Наргиза ҳам “темирни қизигида босиш” учун қўғирчоқларни йиғиб олиб, тезда бир қутига солди-да, шошганча ташқарига чиқди.

– Ҳозироқ буларни ахлатга обориб ташлайман! – деб ўйлади ўзича.

Аммо кейин иккиланиб қолди. Шундай чиройли, қимматбаҳо қўғирчоқларни қандай ташлаб юбориш мумкин? Ундан кўра бирорвга бергани яхши эмасми?

Шу хаёллар билан зинадан пастга тушаётган Наргиза бир аёлга рўбарў келиб қолди. Бу хотин рўдапо, қоп-қора, тиланчигами, дайдигами ўхшарди. Наргиза суюниб кетди.

– Саломалайкум, опа! Манг, манавини олинг. Сизга! – деди ўша аёлга қутини узатиб.

Аёл ҳам худди шуни қутиб тургандек қутини ундан тортиб олди.

– Ростданми? Булар ростдан менгами? – деди у қутини бағрига босганча.

– Ҳа, сизга!

– Бутунлайгами? Тоабадми? – тишсиз оғзини очиб хунук тиржайди аёл эсипастлардек.

Наргиза сесканиб кетди. Аммо сир бой бермай:

– Ҳа, сизга! Бутунлай, – деди-ю, зипиллаб тепага, уйига чиқиб кетди.

Кечкурун Асрор чипталарини кўрсатди. “Ҳаммамиз кинога борамиз! Билет куймасин!” деди. Сарвар ҳам жонланди: “Яхши бўларди, юрагим сиқилиб турганди. Кино баҳона бир ёзилиб келардик” деб кийингани хонасига кириб кетди.

Сал ўтмай Асрор билан Сарвар ташқарига отланишиди:

– Сизлар чиққунларингизча такси ушлаб турдимиз, – дейишиди.

Наргиза қизини кийинтириб, кўчага опичиб олиб чиққанда Асрор уларни қутиб олди.

– Нима бўлди, мошин келдими? – сўради Наргиза.

– Ҳа, ана, қутиб турибди. – Азизани опичиб олди Асрор такси турган тарафга уларни бошларкан. – Лекин ҳайдовчиси аёл киши экан.

– Нима фарқи бор, – қўл силтади Наргиза. – Айтган жойимизга оборса бўлди-да!

Сарвар олдинга, Наргиза қизи ва укаси билан орқа ўриндиқقا жойлашгач, “мана бўлдик, ҳайдайверинг, опа” деди таксичи хотинга.

Ҳайдовчи аёл моторни ўт олдиаркан, шошилмай, гўёки яхшилаб кўриб



олмоқчидек Наргизага бурилиб қаради-да, унинг кўзларига қаттиқ тикилди. Ана шундагина Наргиза ҳайратдан “вой” деб юборди. Рулда... боя Наргиза қўғирчоқлар солинган қутини берган ўша турқи совуқ хотин ўтиради.

– Бўлдими? – деди ҳайдовчи хотин Наргизага қараб хунук тиржайганча. – Унда кетдик. Бутунлайга! Тоабад!

ШИРИНЛИК

– Тўсатдан тап этиб ўлиб қолишдан бемаънироғи бўлмаса керак. Биринчидан, бу дунёни тарқ этганингни англағунингча бўлмай, бехимоя, ожиз ва забун танангни оборишади, кўмишади-келишади. Ҳамма сенинг ғамингда адо бўлган, ийғлаган, бевақт ташлаб кетдинг деган, тобутинг ортидан ҳавотири гуссага тўла нигоҳлар, ерга қадалган кўзлар оломони эргашган. Шундай пайтда турсанг-у, ҳаммани ҳар ёққа тиркиратиб ҳайдаб юборсанг. Эндими, десанг, мени билиб, менга куйиб қолдиларингми десанг! Бу икромингни обор энди, десанг! Ўзи тўғри айтишган, ўлимдан кейин ҳаёт борми, деб сўрашганда, сен ўлимга қадар борми деган саволга жавоб бера оласанми? Йўқликдан яна йўқликка қараб кетасан-у, барибир, ҳеч бўлмаса етти кун сенинг мавжуд бўлганингни исботловчи амаллар амалида қолаверади. Бу ёғи энди маъракаларинг бошида турганларга боғлиқ. Аммо уларга ҳам ишонч йўқ. Кўзларини тупуклаб туришгани билан нечтасининг нияти мана шу тўрт хонали уйни қандай қилиб ўзиники қилиб олишда! Билмайдики, билишмайдики... – жаварарди кампир.

Шунчаки, ўз-ўзи билан гаплашгандек сўзлаётгандек бўлса-да, аллаким, кўринмас кимларгadir қаратада намойишчилар сардори каби бақиради, киши билмас, ҳатто ўзи ҳам пайқамай бақиради кампир... жимгина, сунъий тишларини ғийчиллатиб...

Унинг бу қадар ловуллашига, юраги қота-қота ғадирланиб кетишига қарамай, дунёга нисбатан алам-адовати ҳар қанча маддалаб кетган бўлса-да, тан олмасликнинг иложи йўқ, барибир нимагадир тўймасди ҳаётда. Сўнгги нимагадир. Гарчи сўнгги бўлса ҳам. Шундай экан, ҳеч бўлмаса, манави эзилган мандариннинг нордонгина таъми учун ҳам яшаганга не етсин?

Кампир ошхонага ўтиб, тартиб билан терилган ликопчаларнинг энг кичкинасини олди-да, ўша мандаринни сўлакайлари оқиб кетаётганига қарамай шошмасдан, ҳафсала билан, қўлларининг қалтирашини пайқамасликка, буни тан олмасликка уриниб арчди. Атрофга меванинг пўстлоқлари шилинишидан зарра-зарра сабзи ранг томчилар сачради. Серсуvgина, бироз сўлғинлиги анчагина таъм берган мева тилимчаси лунжини суюқ мазага тўлдириб юборди. Кампир роҳатланиб, ғулқ этиб ютинди. Ютинди-ю, аммо бўғилди. Кўзларига жиққа ёш келди. Қулоқлари остида ўша аёлнинг шанғи овози жаранглади:

– Илоё сан ўлмагин, ўлмаслар бўлгин, ўлмай қийнал!!!

Қанча экан улар? Унинг мана шундай ўлмай юргани малол келаётган-



лар? Биттами ё мингта? “Унчаликмасдир-ов, Сталинмидимки...” – ўйлади кампир яна киноя билан.

Кампирнинг эмас, онасининг шу одамдан алами бор эди. Сўнгги кунича шуни қарғади.

– Отангни оттирди, – дерди онаси доим. – Сенинг отингни Марлен қўйдирган отангни-я! Ўшанда исмингни эшитган борки, отангнинг устидан кулганди, уни телбага чиқарганди, аммо аклли одамлар отангнинг соясига қўрпа тўшар эди. Қишлоқдагиларнинг тили келишмай Майрам деб аташди. Отанг уларни сўкарди. Қизимни ўз оти билан атанглар, бу большевик бўлади, дерди.

Кампир аянчли илжайди. Отаси орзу қилганидек ҳам бўлди. Аммо ота бу қунларни кўрибдими, Сибирнинг аллақайси ўрмонларида қашқирларга ем бўлиб кетди-ю...

Отаси жуда келишган одам эди. Марлен эса онасига тортган, кулча юзли, бўйлари ҳам унча баланд бўлмаган, соchlари туссизгина қиз бўлиб ўсади. Отаси қизини ҳаддан зиёд яхши кўрарди. Бир сафар қизча қаттиқ шамоллаб қолди. Иситмаи оташ бўлиб ёнди. Отаси мажлисдан тунги учлардами келган экан, қизидан хабарлашай деб кирса, Марлен лов-лов ёниб ётиби. Элас-элас ёдида: отасидан чарм ва тамаки ҳиди тарапгани. Кейин ҳаммаёқ оппоқ бўлиб кетгани... Бир вақт чанқаб уйғонди. Лабларига сув тутишди.

– Оч қолдим, – ҳиқиллаганди ўшанда. – Қулупнай егим келаяпти... – алаҳсираганди чоғи.

Аммо ташқарида кеч, серёмғир, шилта куз. Эртасигами, отаси яна мажлисдан, яна жуда кеч қайтди. Қизчанинг асли одати шу. Тунги икки ё учда қисталибми ё алаҳлабми, албатта, батамом уйғонади. Бу палла – қизча бир уйқуни оладиган, отаси ишдан этикларини гурсиллатиб, ҳориб кириб кела-диган пайт. Ўша кун ҳам отаси келиб, остона ёнида турган эски сандиқнинг устига ўтириб этигини ечди. Онаси шип-шип чой-нонига уннади. Човгумда чой шифиллай бошлагунга қадар отаси келиб, касалликдан ҳолсизланиб чала уйқуда ётган қизининг пешонасини силади. Қизча таниш хиддан ялт этиб кўзларини очди.

– Отажон?

– Мен сенга қулупнай опкелдим, Марлен, мана, қарагин, – отаси чўнтагини узоқ ковлаб, у ердан бир попукқанд чиқарди. Бунақасини Марлен улар райқўмда ишлайдиган Сотим амакилариникига борганда кўрган. Рангдор қофозга ўралган бу ғаройиботнинг нима эканлигини тушунмагани учун унга ўрамини арчиб, қўлларига тутишганда ҳам ейишга жазм этолмаган. Кафтида маҳкам сикимлаб олган ширинлик бирпасда чилпиллаб эрий бошлагач, қизча ижирғаниб, амаллаб уни хонтахтанинг тагига ташлаб, оёғи билан ичкарироққа сура-сура, ширадан худди кир бўлиб қолган каби кафти, бармоқлари бир-бирига чип-чип ёпишаётганидан нима қилишни билмай қўлларини кўйлагининг этагига артмоқчи бўлган, аммо кейин кафтида бирпасда қотиб қолган ширани кетказиш учун бармоқчаларини ёйиб, дадасига билдирмай, бу ёпишқоқ нарсадан тезрок қутулиш учун беихтиёр



бармоқларини ялаб олгандағина унинг таъмини билди. Шундагина у ўша, аллақандай мушукча сурати туширилган қоғозга ўралган нарса шириң эканлигини пайқаб қолғанди. Бу унинг ҳаётидаги биринчи конфети эди. Шундай нарсани хонтахта тагига, одамларинг оёғи остига ташлаб юборганидан афсусланди, аммо қайтиб дастурхондан яна битта попукқанд олишга журъати етмади. Бугун эса отаси худди шундай қанднинг қип-қизил қоғозга ўралганини кўрсатиб, жилмайиб турарди. Қизча уни очиб, апил-тапил оғзига солди. Талхир танглайи ҳеч бир таъм сезмади. Шунга қарамай, у тошдек қаттиқ бу қандни шимий-шимиий ухлаб қолди.

Шу кундан кейин у қайтиб отасини кўрмади. Онаси аввалига жинни бўлиб қолаёзди. Қизини қўшниларига ташлаб, қаёқларгadir кетар, сўнг кўзлари йиғидан шишиб келар, мунислини, муштипаргина аёлни энди таниб бўлмас, унинг қорачиклари телбавор гир-гир этар, томоғининг че-тидаги кўк томири мудом лўқ-лўқ тепиб турар, ҳеч кимни эшитмас, ҳеч нарсани идрок этмади. Кейин онаси бирдан худди шоқолдек увиллашга тушарди. Марлен йиллар ўтгачгина билди. Ўшанда онаси эрининг ноҳақ қамалганини исботлаш учун идорама-идора юргурган. Кимларга ялиниб-ёл-вормаган, аммо эрини қайтиб кўролмаган экан. Шу кўргиликлардан кейин онаси ҳам кўпга бормади. Уни эса болалар уйига жўнатищди. Душманнинг боласи экан-да, қарангки, Марленнинг бирорта ҳам қариндоши чиқмади. Кимнинг ҳам ўз бошини кундага тутгиси келарди. Кейин... мана, ўлмади, ўқиди, ишлади, ҳатто турмуш ҳам қурди... Факат...

Марлен хола кўзойнагини топиб, телевизорни кўйди. Кино беришаётган экан. Оловиддин ҳақида шекилли? Ҳа, ўша.

– Мен чироқнинг қулиман, лекин сенинг дўстингман! Мен сенинг дўстингман, лекин чироқнинг қулиман... – дўрилларди дев.

– Қулмисан, дўстмисан? – бетгачопарлик билан жириллади хушсурат Оловиддин асабий ҳолда.

– О-о-о-о-ҳ-ҳ-ҳ....

Дев бу ҳаққоний саволга не деб жавоб берарини билмай бир жойда чаппор уриб қолди. Зериккан кампир телевизор пультини “чирқ” этказиб, бошқа каналга ўтди. “...аъло ўқишга сўз бераман”, қарсиллаб ваъда берарди жамалаксоч қизалоқ. Унинг нимасидир Захрога ўхшаб кетарканми? Ҳа, кулгичиям бор, ана. Факат бироз ёши каттароқдай. Аммо телевизор одамни қари кўрсатади. Буни у яхши билади. Йўғ-е, нимага Захродан катта бўлсин? Уни туққанига қирқ йилдан ошмадими? Захро... Захрогинаси... кун кўрмай кетган болам...

“Илоё сен ўлолмай ўл, сира ўлма, ўлолмай ўл!!!” – шанғиллади яна қулоғи остида ўша овоз. Уф-ф... Ўша тушунтириш хатини барибир ёзиш керак. Ҳеч бўлмаса директор боланинг юз-хотири учун. Шу йигитнинг нимасидир отасининг ёшлигини эслатади. Уни кўрса кўнгли ийиб кетади. Шунинг учун унинг бу илтимосини ҳам рад этолмаганди.

– Марлен Сафаровна! Очиги, мен ҳам сизнинг бундай қилганингизга... сира ишонгим келмаяпти. Аммо мактабда шундай ҳодисаларнинг бўлиши



шашнимизга яхши гап эмас. Билмадим, балки сизнинг олдингизда ёшлиқ қиларман, лекин шу соҳада ишлаётганимга ҳам ўн йил бўлиб қолибди-ю, ҳали бунақасига дуч келганим йўқ. Шу машмашаларга янги чиқсан, ўринсиз анъаналарнинг кўпайиб кетгани сабаб бўлаётганини ҳам тушуниб турибман. Шунга қарамай... – директор столи устидан қоғоз-қалам олиб, кекса муаллима томонга сурисиб қўйди. – Хуллас, сизнинг ҳам, менинг ҳам шу даргоҳда қолиш-қолмаслигимиз сиз ёзиб берадиган тушунтириш хатига боғлиқ. Ахир, бу ғавғо бошқармагача етиб борибди. Изза бўлдим. Лекин барibir сизни хафа килдириб қўйгим йўқ. Шундан келиб чиқиб...

Марлен тушунади. Ҳозир кимга қийин, раҳбар зотига қийин! Нимаям қилсин бу шўрлик? Тамом, ишончни оқламадингиз, энди туёқни шиқиллатинг, демаяпти-ку! Нима бўлганда ҳам педагог-да! Ҳа, майли, шу бола учун ёса ёзибди-да. Бошга келганин кўз кўради!

– Ёзаман, ёзаман, – тинчлантириди директорни. – Фақат уйда, майлими, батафсил, яхшилаб узр сўраб...

– Э-э, батафсилингизни ким ўқиб ўтиради? Қилган ишим учун узр сўрайман, бошқа қайтарилимайди, денг-қўйинг, – бетоқатланди бошқа ташвишлари ҳам тўлиб-тошиб ётган директор.

Аммо, айтганида туриб олмаса, Марлен Марлен бўлармиди?

Хола уйига келгач, тамадди қилиб олди, кейин катта, юмалок, ҳозирда қаншарига оғирлик қилиб бораётган кўзойнагини тақиб, болаларнинг диктант дафтарларини текшириб, баҳолаб чиқди. Кейин тартиб билан китобдафтарлар териб қўйилган ёзув столига ўтириб, оппоқ қоғозга қитирлатиб тушунтириш хатини ёзишга тутинди ва... қўллари қалтирамаётганини пайқаб, мийифида жилмайиб ҳам қўйди.

“Чистосердечное признание”... Кейин бир зум бу сўзнинг ўзбекча талқинларини излаб, ўйланиб қолди. “Чин юракдан тавба”ми, ё “соф вижданан икрор?” Унисиям, бунисиям расмий хатга тўғри келмайди. Қолаверса, ундан тилхатни айнан ўзбек тилида ёзилишини талаб ҳам этишгани йўқ. Яна жигибийрон бўлди. Ёзгиси келмаётганди. Лекин шуни ёзмаса, бу аёллар керак бўлса судлашишгача боришади. Кимга зарил ундей ғавғо? Хуллас, ўзининг ҳуснихатида бор гапни қоғозга тушира бошлади:

“Биласиз, умримнинг қирқ йилдан ортиқ даври ўқитувчиликка сарфланди. Илк бор менинг кўлимдан биринчи ҳарфларни ўрганиб кетган болаларнинг кўпчилигини ҳозир эслолмайман ҳам. Умуман олганда, менинг вазифам – ўқитиши ва болаларни саводли қилиш экан, ҳеч иккиланмай ва уялмай айта оламанки, мен шу чоққача бу бурчимни вижданан ва ҳалол уддалаб келдим. Чунки мен ўқитган синфнинг болалари ҳеч қачон қолок бўлишмаган, бунга журъят ҳам қилишолмаган. Чунки уларни бошиданоқ шунга ўргатиб, кўнишка ҳосил қилиб келганман. Балки шунинг учундир ёхуд ҳозирда бошланғич синф ўқитувчилигига асосан тажрибасиз, ўқув юритини зўрға тугатиб, ўлганининг кунидангина мактабда бирор йил дарс бериб, турмушга ёки декретга чиқиб кетаётган муаллима қизларнинг яхши натижа кўрсатолмаётганиданми, пенсияда бўлишимга қарамай, директор,



барака топсин, менинг мактабга чиқиб, болаларга сабоқ ўргатишмни илтимос қилиб қолди. Директорнинг таклифига рози бўлдим-у, ўкув йилининг бошидан битта биринчи синфга раҳбарликни олдим. Ҳаммаси худди илгаригидек эди. Нафақат синфимдаги, балки мактабдаги барча ўқувчилар менга кўзи тушиши билан бирдан жимиб қолишар, одоб билан саломлашишар, агар китоб-журнал кўтариб келаётганимни кўришса, дарҳол олдимга югуриб келиб, қўлимдан олишга, қўмаклашишга шошишарди. Сизнингча, ўқувчиларим фақат қаҳримдан қўрққанидан дарсларимни жим тинглашармиди? Йўқ! Аслида жимлик сақланган, интизом бўлган жойда сабоқ ҳам болаларнинг қулоғига қўрғошиндек қуилиб боради.

Бундан уч кун олдин дарс вақтида эшик тақиллаб қолди. Доскага янги ҳарфни ёзиб қўрсатаётгандим. Бўй билан охирги нуқтани қўйиб бўлдим-да, шошилмай бориб эшикни очдим. У ерда ёши ўттиз-ўттиз бешларда бўлган бир йигит қўлида ка-аттакон торт ушлаганча кулиб турарди.

– Ассалому, алайкум Марлен Сафаровна! Кечирасиз, устоз, сизни безовта қилдим... – узр сўради йигит хижолатпазлик билан.

Унинг “устоз” деганини эшитиб, алланечук бўлиб кетдим. Наҳотки, собиқ ўқувчиларимдан бири бўлса, ўйладим ўзимча. Мени ҳам ўқувчиларим йўқлаб келар экан-да? Очифи, ҳеч кутмагандим. Ахир, шу чоққача мактабда ўтказиладиган охирги қўнғироқ тадбирларидағина биринчи сабоқни ўргатган ўқувчиларим рамзий ва расмий тарзда мени табриклишар, шу билан қайтиб ўқлашмас, мен ҳам уларнинг бирортасини эсламасдим. Вазифам ўқитиш экан, бажардим. Уларнинг иши ўқиши экан, ўқиши – тамомвассалом. Аммо қаршимдаги йигитга меҳрим жўш уриб кетди. Қўлидаги тортга қараб эса, бутунлай қўнглим ёришди. Унга миннатдорчилик билдириш учун: “Кечирасиз, сизни ҳеч эслолмай турибман, қарибман чоғи”, – дея хижолат бўлгандим, йигит дарҳол ташрифининг асл сабабини тушунтириди:

– Ўқувчингиз Шерзод ўғлим бўлади. Бугун унинг туғилган куни эди. Ўшанга мана бу тортни ўртоқлари билан ейишса, болалар хурсанд бўлишса, деб олиб келгандим. Илтимос, устоз, сизга хизмат бўлмаса, танаффусда болаларни бир меҳмон қилсангиз.

Жуда ёмон аҳволга тушдим. Ўз-ўзимдан ҳам кулгим келар, ҳам жаҳлим чиқарди. Бу ота-оналарга нима бўлган ўзи? Биргина туғилган кун учун нафақат боласининг, балки унинг жинқарча дўстларининг ҳам кўнглини олиш учун нималарни ўйлаб топишмайди? Лекин уларнинг кўзини очиб, ҳарф танитаётган ўқитувчисига аввало бир оғиз раҳмат айтиш хаёлига келса-чи! Ҳа, майли, таъмагир бўлмай. Байрам бўлса, байрам экан-да!

Синфга кириб, тортни столим устига қўйдим. Тортга кўзи тушган болалар бирдан ғимирлаб, шивир-шивир қилишга тушишди. Шу пайт қўнғироқ жиринглади. Менинг синфимдаги бирорта ҳам бола рухсатимсиз танаффусга чиқиб кўрмаган. Шу боис улар пичир-пичир қилишганча менга термилиб туришарди.

– Болалар! – дедим уларни кўп интиқ қилгим келмай тантанавор тарзда. –



Бугун синфдошингиз Шерзоднинг туғилган куни! Ҳар доим ана шундай ақли, одобли бола бўлсин! Мана бу торт эса бизга экан. Қани, Назокат, ёнимга кел, – деб синфбошини чақирдим. – Болаларни санаб чик-да, нечтагигини менга айт. Мен тортни шунча бўлакка кесаман, сен эса энг охирги партадан бошлаб ҳаммага тарқатиб келавер.

Шивир-шивирлар бир зумда кувончли гувирлашга айланди. Назокат – фаросатли қиз. Биринчи ликопчани менинг олдимга қўйди, “устоз, аввал сизга”, – деди дадил эркаланиб. Сўнг қизлардан бири унга кўмаклаша бошлади. Болаларнинг қўлига торт текканлари уни ейишга тушишган, навбати келмаганлар бетоқатлик билан ўз тегишлирини кутишарди. Мен ҳам тортмадан кумуш қошиқчамни чиқариб, тортдан кесиб олиб, едим. Ажойиб! Қулупнай шарбати сингдирилган. Бир четда, болаларни ўз ҳолига қўйиб секин-секин ширинликни тановул эта бошладим. Синфни қандайдир ажойиб, шукухли шивир-шивир ва қиқир-қиқир овозлар босган эди. Болаларнинг янайм эркинроқ бўлишлари учун дераза томонга ўтиб, синфга орқа ўтириб олдим.

Шу пайт болалардан кимdir: “Назо, бир бўлаккина қолди, бошқаларга етмай қолмасин”, – деганини эшитдим. Ортимга ўтирилганимда эса Назокат сўнгги бўлакни, яъни ўз улушини олиб, партасига ўтиб кетди. “Устоз, бизга бермадиз-ку-у”, – деб қолди бир қизалоқ. Ие... Қарангки, рўпарамда, биринчи партада ўтирадиган Зилола ва Бунёд деган болаларга шошилинчда торт етмай қолибди. Бошим қотди. Болалар иккита бўлса, торт эса аллақачон бўлиб берилган. Бунинг устига ўзим еяётган тортдан ҳам факат кремигина қолган. Қитмилигим тутди. Чунки кайфиятим хуш эди. Умуман, камдан-кам ҳоллардагина ўқувчиларим билан ҳазиллашаман.

– Э, силар торт еб нима қиласилар ўзи, – дедим пинагимни бузмай. Ли-копчамда қолган кремларни йиғиб, оғзимга соларканман, дедим: – Ана энди биз мана бу-ундай қилиб еймиз, сизлар томоша қилиб ўтираверинглар.

Синфдаги болалар гуриллаб кулиб юборишиди. Зилола ва Бунёднинг боши эгилди. Кейинги дарсга қўнғироқ чалинди.

Эртасига бир барваста аёл шитоб билан хонага бостириб кирди-да, биринчи партада ўтирган Бунёднинг партасига тап этказиб битта торт, иккита “Кока-кола” қўйди. Сўнг синфдаги болаларга юзланиб, шундай деди:

– Ана энди сизлар қараб турасилар, Бунёд билан Зилола торт ейди. Хе, уятсизлар, битта арзимас тортни ўз ўртоқларингга раво кўргиларинг кемадими? Одамни қадри бир оғиз ширинликдан кам бўлдими? Кеча шуларга торт бермай, қанча калака қилганларинг учун ўзларингни айбдор сезмайシリарми? Қани, ўзларингни ҳам бир кўрайлик-чи, ҳозир Зилола билан Бунёд силарга бермай, торт ейди, силар қараб туринглар.

Аёлнинг туришидан, гапи, хатти-ҳаракатидан кечаги воқеага шаъма қилаётгани билиниб турарди. Мен унга бир оғиз нимадир десам, шу билан ўқувчиларнинг олдида мени юмма талаб ташлашга тайёрлигини сезиб, индамай туравердим.

Кейин билсан, кеча болалар уйига етгунча Бунёдни “Торт ейсанми?” – деб мазахлаб боришибди. Зилола эса ўша кун йиғлаб, уйида роса тўполон



қилибди: “Аяжон, айтинг, менинг бошқалардан нимам кам? Нега устоз менга торт бермади? Санга ўхшаганлар торт емайди, деганими бу? Ахир манам “аъло”га ўқийман-ку!” – ва ҳоказо... ҳоказолар...

Бунёднинг онаси менга нафрат билан қараб, чиқиб кетаётганда, йўлакда яна шовқин-сурон эшитилди.

– Кўйворинг, – қичқиради бир аёл. – Мен ўша уятсиз муаллиманинг юзига қараб, айтишим керак! Болаларни хўрлашга нима ҳақи бор унинг? Нега синфдошларини менинг боламга қарши гиж-гижлайди? Ўша лаънати торт етмай қолган экан, буни болага тўғриликча тушунтирса бўлмайдими? Ўзи ёш боланинг олдида кўз-кўзлаб егани етмагандек, нега яна уларни кам-ситади?

Бу Зилоланинг онаси экан. Бу хотин ҳам худди Бунёднинг ойисига ўхшаб мен билан ёқалашгани келибди. Уларни директор, илмий ишлар мудири амаллаб ўқитувчилар хонасига олиб кириб кетишди. Бирпастдан кейин мени ҳам чакиртиришди. Аёлларнинг униси у деди, буниси бу деди. Хуллас, болалар мендан Азройилдан қўрққандек чўчишармиш, уларни қандай усувлар билан бунчалик зириллатиб олганимни бир Худо билармиш, шу сабабдан менинг масалам педкенгашда кўрилиши керакмиш...

Директоримиз аёлларга менинг энг яхши ўқитувчилигимни таъкидлаб, болаларнинг гап-сўзига учиб, мактабга жанжал қилиб келиш сира одобдан эмаслигини тушунтиаркан, ора-сирада менга қараб: “Илтимос, Марлен Сафаровна, фақат сиз асабийлашманг. Ахир тушунасиз-ку”, – деб узр сўраса, аёлларнинг баттар жаҳли чиқар, “бу хотин директорни ҳам бураб олган”, – дейишарди. Нихоят тоқатим тоқ бўлди.

– Хўш, мақсадларинг нима? – сўрадим хотиржам. – Бу ерга шунча ғавго қилиб келиб, одамларни ишдан қолдиришларингдан мақсад нима?

Аёллар бир зум жимиб қолишли.

– Ҳозироқ, – деди шунда Бунёднинг онаси. – Бутун синфнинг олдида болаларимиздан кечирим сўрайсиз!

“Аҳмоқ хотин!” – дедим ичимда. Ўлай агар, кулгим ҳам келди. Сўнг қатъий дедим:

– Кўлингдан келганини қил. Мен кечирим сўрайдиган иш қилганим йўқ!

– Унда, – кўзлари ёниб саннади аёл. – Менга деса, ўлиб кет!

– Йўқ, бу киши ўлмасин, илоё узоқ яшасин! Шундай узоқ яшасинки, шу болагиналар катта одам бўлган қунларга етсин. Ана шунда улар кичкиналикларида бор-йўғи бир бўлак торт туфайли ҳаммага калака қилдириб қўйгани учун шунинг юзига тупуриб ўтишсин! Илоё, ўлолмай ўл! – қарғади Зилоланинг онаси.

Шундан буён бу аёлнинг шу сўzlари қулогим остида жаранглайди.

Мана шунаقا гаплар. Ҳозир бу хатни сизларга уйда ёзаяпман. Қон босимим ошибди. Даволанаяпман. Аммо энди барибир ишга чиқмас эканман, нега кечирим сўрашим керак? Директор мени кечирсин, йўқ, тўғри тушунсин. Умуман, арзимас жанжални деб болаларни ташлаб кетиш ҳеч ҳаётимда бўлмаган эдику-я, аммо билиб турибман, бу гал менинг бунга



кучим етмайди. Чунки энди ўлмаслик учун ҳаракат қилишим керак. Нега дейсизми? Қани, ўша қарғиши амалга ошармикин, шуни билиш учун. Қани, ўша менинг юзимга тупуриши керак бўлган болалар бир кун келиб ота-онасининг ҳам бетига туфламасмикин?

Мени ноҳақ хафа қилишди, демокчи эмасман. Фақат бир нарсага тушунмайман. Биз ҳаётнинг не-не қаҳр-зарбини жимгина, индамай ютамиш-у, баъзида ўша ютувлар ичимиизда бижғиб ёта-ёта арзимаган сабаб туфайли бирдан портлайди. Шунда ҳаммани босамиз, янчамиз, йўқ қилиб ташла-гимиз келади. Менинг бу болакайларда ҳеч бир аламим ё қасдим йўқ эди. Шунчаки ноўрин паллада айтилган бетайнин бир гап нохуш мазмун касб этиб кетди. Менга ўлим, яъники умр тилаб ётган аёлни яхши биламан. Эри ташлаб кетган. Унинг кўзига мен ўша бевафо, боласининг алименти-ни тўламай, кўчаларда “Нексия”сини вағиллатиб ҳайдаб юрган эри бўлиб кўрингандирман-да, бўғиб қўйишга етгулик шашти бор эди. Уни ҳам тушунаман. Чунки бевалик нималигини мен яхши биламан. Етим эдим, бева қолиб, иккинчи карра етим бўлгандим. Шунинг учун мен ўзимни худди бошқалардек бекўст ҳис этишим мумкин бўлган битта жой – болалар-нинг бурунларини “шўрқ-шўрқ” тортиш сасларию, пичир-пичирларига тўла шу синфхоналар, доска билан латта эди. Шундай экан, мен ўзимнинг шу ҳудудимда қатъий ва шафқатсиз бўлсан мумкин эмасми? Ҳаёт шундай эканки, даданг доим ҳам сенга ширинлик олиб келмаслиги мумкин, аммо вақти-вақти билан, талхирлиги оғзингда бир умрга етгулик bemaza таъм бўлиб қолишига қарамай, тақдиринг тўсатдан ҳадя этган луқмасини тотмай иложинг йўқ. Ахир бу ҳам бир насиба-да. Менинг насибамда бир томчи сиёҳ томмаган, оппоқ қофоз каби тоза бўлиб келган ўқитувчилик фа-олиятимда шундай синов ҳам бор экан, уни бемалол, ҳеч бир фожиасиз қабул қиласман. Гарчи бундан буён мактабга қайтиб чиқмаганим сабабини ўша аёллар: “Болаларимизни мазах қилган Марлен Сафаровнани ишдан олдириб ташладик”, – деб тушуниб, керилаверишсин. Аммо барибир ҳеч кимдан кечирим сўрамайман! Ҳеч кимдан!

Марлен ёзганларига нукта, сана, имзо қўйгач, тилхатни қайта ўқиб ҳам кўрмади. Дераза томонга термилганча қолди. Токчада Захронинг расми доимгидек унга кулиб қараб турарди.

“Дугонамнинг туғилган кунига кетаяпман”, – деганди ўша куни у эмрангибина.

Ҳа, шундай деганди. Рухсат берасизми, борсам майлимни эмас, кетаяпман деди. Тугма қадаб ўтирган онанинг жаҳли чиқди. Қизини қанчалик яхши кўрмасин, барибир унга нисбатан қаттиқкўл эди. Аммо кейинги пайтларда қизи унинг бу қаттиқлигини унчалик писанд қилмай кўйганди. Қиқирлаб қулиб, шартта унинг бўйнидан қучоқлаб олар, Марлен бир зумда эрирди-қоларди. Ҳозир ҳам шу найранг ишлатилишини билса-да, барибир қизини тергай кетди.

– Ҳеч қаёққа бормайсан! Дарсингни қил-да, ўтир!

Бу сафар қизи индамай келиб унинг бўйнига осилмади. Юзига тик қараб тураверди. “Ўзиз бирор марта туғилган кунимни қилиб берганмисиз? Яна

бошқаларнигаям қўймайсиз... Ахир синфимиздан ҳамма боряпти-ку”, – деди йиғламсираб.

– Нима бўпти? Ҳамма қилган нарсани қилишинг шартми? Кейин... дуго-нангнинг уйи узокда, дарё лабида. Хавотирланаман, қизим.

“Қизим” дегани ҳамон Захро югуриб келиб уни қучиб, чўлпиллатиб юзларидан ўпди “А-а, демак борсам бўлаверади, а? Хавотирланманг, дарёнинг яқинигаям йўламайман. Нима совға олай? Китоб, а? Барибир китоб яхши. Ҳозир, мана”, – қиз шошиб жавонни титкилади.

– Топдим! Манави китобни оламан. “Йўқолган дунё”. Яхши-а? Кетдим, кетдим, ойижон! Ҳали Дурдонага дастурхон тузатишга ҳам ёрдамлашворишим керак!

Сўнг бало-қазодан қочгандек, ҳатто мактаб формасини ҳам алмаштири-май чопқиллаб кетганди Захргинаси. Сочларига тақилган ленталари, атиргулга ўхшаш оппоқ ленталари бир лип этди-ю, дарвоза ортида ғойиб бўлди. Кейин дарёдан биринчи бўлиб ана шу ленталарини топишиди. Ўзи эса кейинроқ топилди. Унинг оёқлари сув ўтларига ўралиб қолгани учун оқиб кетмаган, аммо шафқатсиз сув ўтлари оқиб кетишдан асраб қолгани баробарида сув юзига қалқиб чиқишига ҳам халал берган экан.

Ўшанда Марлен бир томчи ҳам қўзёши тўқмаган, аммо туғилган куни-ни нишонламоқчи бўлган Дурдонанинг онаси додлаб йиғлаган эди: “Атиги бир челак сув, қизим, югуриб бир челак сув олиб кел, дегандим! Мана, болаларим кечаю кундуз шу дарёдан сув ташийди, кечаю кундуз! Тилимга тирсак чиқса бўлмасмиди шу қизга иш буюргунча?”

Назарида ўшанда бу аёл унга қаратса: “Хе, ўл, қизингни шундан шу ёққа юборгандан кўра, унга қўзим учиб турганмиди? Бошимизга шу бало керакми-ди!” дёётгандай туюлган. Аммо ўзи-чи, нега ўшанда ўзи ҳам: “Сенга менинг қизимдан бошқа хизматкор топилмадими? Ўйламай-нетмай ёш болани дарё-га жўнатасанми? Хўп, ўзингнидан-ку қўрқмас экансан, ахир бу бироннинг омонати, демадингми?” – демаган бўлса-да, кейин минг-минг бор, ичида, кечалари из-из йиғлаган пайтлари, бўғилиб, бўғриқиб, кимни, нима деб саннаётганини ҳатто ўзи ҳам тушунмай айтди. Аммо ўшанда эмас! Кечаги аёллар эса... Балки улар ҳақдир? Она бўлгач, боласини ҳимоя қилиши керак-да. Фақат...

Захрони тупроққа топширгач, қишлоғидан умуман бош олиб кетди. Шундан буён ёлғиз эди. Шундан буён ёвуз. Аммо биронгага тиламади бундайин қисматни. Иш овутди уни, ана шу мишиқи болакайлар юпантирди. Улғайишгач, уни ҳеч қачон эсламайдиган, йўқламайдиган, аммо ундан олган сабоқлари туфайли ҳаётда бошқаларга нисбатан камроқ қоқиладиган болалар...

Ич-ичидан увилларди бу нафрат, одамларга, хотинларга, бу дунёга нафратаи. Лекин билдики, аслида факат болаларнинг юрагида йилтиллабгина қолган заиф бир туйғу туфайли, оналикми деган, қизигами насиб этмай кетган ёки ўзи бир пайтлар ололмай қолган бир ҳис билан севиб келган, аммо сира буни сиртига чиқармаган экан. Бу хисни у мана энди, бой бериб бўлгандан кейин билди. Уйининг бир-биридан озода тўртта хонасини ҳам мандариннинг хушбўй иси гуркираб тутиб ётар, кампирнинг қўзлари эса юраги каби хувуллаган, куп-қуруқ эди.



**Даврон
РАЖАБ**

1967 йилда тугилган. Бенъков номидаги Республика рассомчилик билим юртини (ҳозирги Республика бадий коллежи) ва ЎзМУ Олий адабиёт курсини тамомлаган. “Бир томчи юлдуз”, “Бахт шамоллари” номли шеърий тўпламлари нашр этилган. Шеърлари рус, инглиз, ҳинд тилларига таржима қилинган.



ҲАР БИР КУН ПАРВОЗГА МЕНГЗАЛГАН ЛАҲЗА

* * *

Биллур сувда осмон тасвири
Булутлар-ла сузади сокин –
Акси билан аслини чизар.

Томчи тушса ҳалқа сир ёяр,
Қатра билан кенгаяр олам.
Товуш рақсга тушади зумда.

Шаффоф сувда кўринар расмим –
Хаёл билан чиздим ўзимни.
Аслим эса кезар дарбадар.

* * *

Ҳаммаси ёнимда:
Буржлар ваъда берган маъволар,
Униқиб ҳавога қўшилган
Ёмғир,
Сокин нурга баркаш қўйган
Ҳасан-Хусан ўқ – ёйи.





Ҳаммаси ёнимда:
Тонгда майсада акс этган
Булбул сайроғи
Ва бинафша тоғлар ортидан
Уч бераётган шарор.

Ҳаммаси ёнимда:
Ховурини туширган азим чинорлар,
Дўстларим қувончдан жилмайган лаҳзалар,
Ҳамма нарса бор
Фақат улар бошланмагандек
Мувозанатсиз...

* * *

Қайтариб беришим керак,
Кўзимда акс этган манзараларни.
Ва ўз жонига қўйишим лозим,
Гуллардан таралган ифор рангларин.

Шамолдан,
Тоғлардан,
Хиёбонлардан,
Яширганим етар топганларимни.
Куёш нурлари ҳам меники эмас,
Қайтаришим керак барини...
Бу омонат ёндирап мени...

* * *

Тушларимда кўраман
Шамол эса бошлар Мағрибдан.
О, пок шамол, оппоқ шамол!
Қаёққадир кет,
Менга келиб урилма...

* * *

Ҳамма нарса кулгили қаранг,
Бахт кулгили, қайғу кулгили.
Йўлларимни тўсмоқчи бўлган
Дўсту душман, туйғу кулгили.

Сочларимни ўйнар шамоллар,
Болаликни ёдимга солиб.
Кўзёшларим кулгили, қаранг,
Бўзлар эдим кулгига қолиб.



Ҳамма нарса кулгили аён,
Гумонсираб қараш кулгили.
Кимдир сўзлар қўз тикиб ҳар ён,
Унга жиддий қараш кулгили.



Кулгилидир сенинг армонинг,
Кулгилидир менинг дардларим.
Кулгилидир Ҳақиқат излаб
Дунёлардан безган кунларим.

Дунё борки, бор экан қайғу,
Энди дардлар руҳим оғритмас.
Демак, энди қаҳқаҳа отсам,
Даврон сурсам кулгили бўлмас.

Ҳамма нарса кулгили, қаранг,
Дард кулгили, шодлик кулгили,
Қаранг, мана, дўстим кулгили,
Кулгилидир душманим қаранг.

* * *

Ой билан юлдузлар
Чайқалади кудукдаги самода,
Жилвалар нафасни
Тўлдирап
Сув деб,
Нигоҳ ташласам:
Гоҳ ой
Гоҳ юлдузлар
Илиб чикди,
Сўнг, яна осмонга
Ташладим,
Челакдаги
Ой билан юлдузларни,
Чанқов босилди.

* * *

Сув бўйида ўлтираман жим,
Балки бунда шамол кутаман,
Банди бўлган хаёлларимга.



Сув бўйида ўлтираман жим,
Хотирамда қўшиқ акс этар,
Сўнгги бора янграётгандек.

Сув бўйида ўлтираман жим,
Ишқ-муҳаббат сокинлигидек,
Оқиб турар менинг ҳаётим.

* * *

Хаёлим оҳанглари
Девор ясарди
Бир бошдан.
Гоҳ зарғалдоқ, гоҳ яшил,
Гоҳ нимпушти тусларда.

Тикилиб тушунмасдим рангларига,
Англамасдим:
Кирсамми деб,
Кирмасамми деб?
Улар мени қўймас
Бир хил рангда ўйлашга.

Хаёлимнинг ранглари акс этиб борар,
Ҳар бир тонгда,
Ҳар бир тунда.
Ним яшил, ним нафармон ва бинафша ранглар
Сивизғасида.
Ўйлайман: чиқайми
Ё чиқмаганим яхшими,
Хаёлимнинг рангларидан?..

* * *

Янги кун – мен номини билмаган қуш,
Ҳар бир қуш – умримнинг парчаси,
Кўнглим осмонида айланар, учар.

Ҳар бир кун ўтар қушдек тутқунсиз,
Ҳар бир кун парвозга менгзалган лаҳза.
Эҳ, умрим менинг – қушлар галаси,
Сизни тутиш учун учишм керак...



**Носиржон
ТОШМАТОВ**

1966 йилда туғилған. Тошкент давлат маданият институтида (хозирги Тошкент давлат санъат ва маданият институти) таҳсил олған. Шеърлари республика матбуютида эълон қилинганди. “Сарқаш туйгулар” шеърий китоби муаллифи.



ҚАЙГА БОҚСАМ СЕНИ КҮРАМАН

* * *

Қишлоқни уйғотар карнай овози,
Ош иси чорлайди тўйхоналарга.
Кафтдан кафтга ўтар “ўзбек қоғози”,
Саъвадек сайрайди чой самоварда.



Кўзнинг қизаргани – қазининг кучи,
Юзнинг қизаргани – пахта ёғидан.
Кўкка ўрлар экан паловнинг иси –
Ой тушиб келсан дер ётоғидан?!

Саҳардан бағирни бағирга босиб,
Қалбларга ҳарорат улашар ўзбек.
Аския, пайровда кўнглини ёзиб,
Тонгдан ташвиш билан курашар ўзбек.

Гулхан гурлатгани, созандаларга
Доира қизитиш учун баҳона.
Қуёшга сигинган боболарига
Ўлмас эҳтиром бу – удум шарқона.

Мўйловини силаб мўйловдорлари
Йўлни бўшатишар оқсоқолларга.
Анҳор бўйларида тол ниҳоллари
Тавозе қилгандек қари толларга.



Ўн йил тиним билмас, ўн йил югурап,
Бир қунлик шодлиги учун қондошим.
Топган-тутганини тугунга тугар,
Мехри – мой, метиндеқ сабр-бардоши.

Бунда: барча таниш, барча кариндош,
Ўзбекнинг ичидаги бегонаси йўқ.
Қозон ичидаги гуручдек ёндош,
Кўли очик халқнинг кўнгли, кўзи тўқ.

* * *

Ҳаётдан зўр муаллим йўқ инсонга,
Кечалари – қора, кундузлари – оқ дафтар.
Кўчалари – мураккаб масала,
Ҳар қадамда икс, игрик, зетлар.
Кўшишни ўргатар бу муаллим,
Айиришни,
Олишни,
Бўлишни,
Баъзан қийнаб қўяр баробар.
Ҳар битта илдиз остида
Биттадан номаълум сон ётар.
Табиатнинг конунин ўргатар кимё:
Илдиз остида ётганлар
Илдиз остига тортар.
Барчага teng бўлганни боши қотар.
Айниқса, мен учун энг оғир муаммо,
Уйдаги уч боламнинг саволи:
“Бири икки бўлмаган ҳар соннинг
Бир умр иккими аҳволи?”
Мухаббат аталмиш иншосини
Қайта-қайта ёздириди, аммо,
Қайта-қайта қиласман хато,
“Вафо” дея ёзганимни,
Гўзаллар ўқишиади: “Жафо”.
Шоирлар ҳаёти – ҳаёт адабиёти.
Мени ҳар куни қиласман имтиҳон,
Адабиёт ҳаёти.
Оқ дафтар,
Қора дафтар...
Жонимдан севаман адабиётни,
Ҳатто дарс тайёрлайман кечалар.
Муаллимнинг ўзи эса тинмай
“Алжабр”дан гап сотар...



* * *

Тўймагандек тунда уйқуга,
Чайқалади қизил атиргул.
Чўмилиб қуёшнинг нурига
Гулбаргида шудринг товланур.



Шудрингни еллардан қизғониб,
Хавотирда шўрлик атиргул:
Чунки, шудринг тунда тўлғониб
Булбул тўккан кўзёшидир ул.

* * *

Фаслларга ишонмай қўйдим,
Фаслларнинг бари бевафо.
Фақат сени, ха, сени суйдим,
Сенга бердим қалбимни танҳо.

Кеча кўзим қувнатган гуллар,
Бугун бир-бир тўқмоқдалар барг.
Арзимайди меҳримга улар,
Қиши келмасдан тарқ этмоқда, тарқ.

“Сизсиз дунё қоронғи”, деган
Сулувлар ҳам алдади-кетди.
Менсиз ҳам шод, кулгани-кулган,
Қоронғида баҳтига етди.

О, қанчалаб дўстим бор эди,
Давраларда шароб ичганда.
Кўзларимга дунё тор келди,
Ёлғизликда, ташвиш қучганда.

Бойлик ҳақда аччиқ хulosам –
Кўнгилларнинг душмани удир.
Ким бўйнига зар занжир осса,
Шубҳасиз, у бойликка қулдир.



Вақт дегани шамолдан ҳам тез
Учар, асло, барин тутқизмас.
Тутаман деб уриндим, харгиз
Соясига ҳатто еткизмас.

Фақат сени, ҳа, сени сүйдим,
Сенга бердим қалбимни танхो.
Чунки, сенда вафони туйдим,
Сен қалбимдан кетмадинг, асло.

* * *

Қайга боқсам, сени кўраман:
Тошда ҳам, гулда ҳам, дарёда.
Ерда ҳам, йўлда ҳам, самода,
Борлигинг ҳис қилиб тураман.

Сен мен билан ҳар дам биргасан,
Кўксимни яйратган ҳаводай.
Қуёшга талпинган наводай
Кечакундуз ўйларимдасан.

Ёлғизлиқда, ёлғиз эмасман,
Турмуш, хаёт жумбоқларида
Ўзинг менга йўл кўрсатасан.

Кетаётиб, андуҳ чекмасман,
Қутлуғ уйнинг қўноқларида
Яна ўзинг кутиб оласан.





Кўлдош ПАРДАЕВ

1979 йилда тугилган. Тошкент давлат университетининг (ҳозирги ЎзМУ) ўзбек филологияси факультетини тамомлаган. “Ўзбек миллий уйғониши адабиётини ўрганишида матбуотнинг ўрни”, “Ал Ислоҳ: миллий адабиёт тарихида тутган ўрни” каби китоблари нашир қилинган.



МУҚИМИЙ “САЁҲАТНОМА”СИ МАТНИ ТАРИХИДАН

Миллий адабиётимиз тарихида XIX аср охири-XX аср бошлари Қўқон адабий муҳитида етишиб чиқсан ижодкорлар адабий мероси алоҳида ўрин тутади. Бу адабий муҳитнинг забардаст намояндаси Муҳаммад Аминхўжа Муқимий асарлари ҳамиша мутахассислар диққат марказида бўлган. Шоир ижод намуналари юзасидан кўплаб тадкиқотлар яратилган. Таасуфки, уларда Муқимий асарлари шўро даври мафкураси талабига кўра бир томонлама талқин қилинган. Натижада шоир назмий мероси ўзининг асосий моҳиятидан узоқлаштирилди. Яъни асарлари таҳрирга учради, қисқартирилди, манбаларда қолиб кетди. Бу эса, ўз навбатида, шоир адабий меросини янгича мезонлар асосида холис ва ҳаққоний ўрганиш заруратини кун тартибига қўяди.

Муқимий миллий уйғониш даври ўзбек адабиётида “Саёҳатнома” жанрини бошлаб берган. Унда давр зиддиятлари, чор ҳукуматининг ҳалқ бошига солган кулфатлари, золим ва адолатсиз ҳоким гуруҳлар аёвсиз танқид қилинди, хароб ва вайрон қишлоқлар тасвирланди. Шоир “Саёҳатнома”си ўз вақтида мутахассислар томонидан ўрганилди¹. “Саёҳатнома”нинг жо-

¹ Каримов Ф. Ўзбек адабиёти тарихи. Учинчи китоб. – Т.: Ўқитувчи, 1987.-Б.117-122; Аҳмедов С. Ўзбек адабиётида саёҳатнома // Адабий мерос, 1986, 6-сон.-Б. 7-116; Зарифов Ҳ. Муқимий ҳаёти ва ижоди. – Т.: Фан, 1955.-Б.17-19; Олимжонов А. Муҳаммад Амин Муқимий. Ҳаёти ва ижоди. – Т.: Фан, 1953.-Б.19-20; Сотти Ҳусайн. Танланган асарлар. – Т.: F.Ғулом номидаги адабиёт ва санъат нашириёти, 1974.-Б.131; Абдугафуров А. Муқимий сатираси. – Т.: Фан, 1976.-Б.118; Ойбек. Асарлар тўплами.



рий нашрлардаги матнини аслият ва унга яқин варианtlарга қиёслаш натижалари уларда кўплаб матний тафовутлар борлигини кўрсатади. Бу эса, ўз навбатида, асар талқинига ҳам жиддий таъсир кўрсатган. Энг ёмони, улар Муқимийнинг дунёкарашини, муайян воқеликка нисбатан нуқтаи назарини тўлақонли ифодаламайди, баъзан эса тескари тасаввур уйғотади.

Профессор F.Каримов: “Саёҳатнома”лар 51 банд, 204 мисра шеърни ўз ичига олади. Кейинги вактларда топилган “Исфара саёҳатидан” номли парча ҳам қўшилса улар 244 мисрага етади”,² – дея баҳсталаб фикрлар билдиради. Иzlанишларимиз натижасида шоир “Саёҳатнома”си жами 77 банд, 308 мисрадан иборат эканлиги маълум бўлди. Афсуски, 16 банд, 64 мисра шеър жорий нашрлардан тушириб қолдирилган. Бундан ташқари, баъзи бандлар шўро мафкураси талабига кўра таҳrir қилинган.

“Саёҳатнома” матни фақат тўрт қўллэзма баёзда учрайди. Шундан шоирнинг 7521, 1325-ракамли ўз қўллэзма баёзларида “Саёҳатнома”нинг “Кўқондан Исфарага” қисми 21 банд, 5666-ракамли қўллэзма баёзда асли 30 банд бўлган “Кўқондан Шоҳимардонга” қисми 12 банд тарзида берилган. Қолган 18 банди тушириб қолдирилган. 6352-ракамли қўллэзма баёзда эса “Саёҳатнома”нинг иккита қисми матни тўлиқ ҳолда берилган (“Кўқондан Шоҳимардонга” – 30 банд, “Кўқондан Фарғонага” – 15 банд). “Саёҳатнома”нинг “Исфара саёҳати” деб номланган қисми қўллэзма баёзларда учрамайди. Ягона нусхаси фақат Ходи Зарифов китобида 11 банд ҳолда учрайди. Бу ҳақда қуйироқда фикр билдиради. Асарнинг қўллэзма манбалардаги матни икки хил таҳrirда берилган.

- а) муаллиф таҳрири;
- б) котиб таҳрири.

Муаллиф таҳрири. “Саёҳатнома”нинг “Кўқондан Исфарага” қисми матни 7521-ракамли баёздан 1325-ракамли баёзга шоир таҳриридан сўнг қайта ишланиб кўчирилган. Биргина мисол. 7521-ракамли баёзда (24б-саҳифа) “Саёҳатнома”нинг 9-банди:

*Гар меваси бир туп сотар,
Бир пулни юз ердин тугар,
Берса гадога нон агар,
Минг йилда ҳам душвор экан.*

1325-ракамли баёзда эса (145 а -саҳифа):

*Гар меваси бир туп сотар,
Бир пулни юз ердин тугар,
Берса гадога нон алар,
Минг йилда ҳам душвор экан, –*

9-том. Тадқиқот ва мақолалар. – Т.: F.Ғулом номидаги адабиёт ва санъат нашириёти, 1974.-Б.157-164; Қосимов Б., Юсупов Ш., Долимов У., Жабборов Н., ва бошқалар. Миллий уйғонии даври ўзбек адабиёти дарслиги. – Т.: Маънавият, 2004.-Б.104-106.

²*Каримов F. Муқимий ҳаёти ва ижоди (Монография). – Т.: F.Ғулом номидаги адабиёт ва санъат нашириёти, 1970.-Б.220-235.*



тарзida “агар” сўзи “алар” билан алмаштирилган. Натижада муаллиф ифодаламоқчи бўлган фикрга аниқлик киритилган. Шуни ҳам таъкидлаш жоизки, барча муқимишунос олимлар тадқиқотлари учун 1325-рақамли баёз асос қилиб олинган.

Котиб таҳрири. 5666-рақамли қўлёзма баёзда “Кўкондан Шоҳимардонга” қисмидан 18 банди қисқартирилган ва бандлар таркибидаги мисра, сўз ва жумлалар таҳрирга учраган. Масалан, мазкур “Саёҳатнома”нинг 13-банди мазкур қўлёзма баёзда (80б-саҳифа):

*Аммо назарда “Рошидон”,
Фирдавс боғидин нишон,
Жомеълари оби равон, –*

шаклида бир мисра қисқартирилиб кўчирилган.

6352-рақамли қўлёзма баёзда эса (181б-саҳифа):

*Аммо назарда “Рошидон”,
Фирдавс боғидин нишон,
Жомеълари оби равон,
Саҳни гулду гулзор экан. –*

тарзida тўлиқ ўқиймиз.

Ёки мазкур “Саёҳатнома”нинг 10-банди 5666-рақамли қўлёзма баёзда (80б-саҳифа):

*Боз издиҳоми воизи,
Бадқайф очилмайдур кўзи,
Юқори бошидин тизи,
Эрмаклари гулёр экан.*

6352-рақамли баёзда (182б-саҳифа) эса 4-мисра “Эрмаклари кўкнор экан” шаклида учрайди. Кўринадики, биринчи банддаги бир мисранинг тушиб қолиши котибнинг эътиборсизлиги бўлса, кейинги банддаги сўз онгли равишда ўзгартирилган.

Бу қўлёзмаларни қиёсий тадқиқ қилиш натижасида 1325-ва 6352-рақамли қўлёзма баёзлар таянч манба сифатида олинди.

Шоир асарлари жами ўн икки марта нашр этилган. Шундан 3 таси “Асарлар тўплами”, 9 таси “Танланган асарлар”dir. Аммо бу нашрлар талаб дарражасида эмаслиги ҳамиша мутахассисларнинг эътиrozига сабаб бўлиб келган. Жумладан, адабиётшунос Абдурашид Абдуғафуров бу хусусда бундай ёзган эди: “...Муқимишуносликда яна бир камчилик – шоир асарларини қисқартириб, “таҳрир” этиб ва бежаб нашр қилишларда кўринади”.³

³ Мадаминов А. "Ўзбекистон адабиёти ва санъати", 1990 йил, 9 ноябрь (Муқимиининг 140 йиллик юбилейидаги маъруза материалларидан).



Биз фақат шоир “Саёҳатнома”си матни киритилган жорий нашрлар ҳақида фикр юритамиз.

Гафур Гулом томонидан тайёрланган (1938, 1942, 1953 йиллар) Муқимий “Танланма” асарларида, Абдулла Олимжонов (1951 йил Муқимий “Танланма” асарлари) ва Ўткир Рашид мактаб кутубхонаси учун нашр эттирган Муқимий “Танланма” асарларида (1951 йил), профессор F. Каримов нашрга тайёрлаган “Танланган” асарлари ва Муқимий “Асарлар тўплами” икки жилдлигида “Саёҳатнома” матни учрайди (1958, 1960, 1973, 1974 йиллар).⁴

Таъкидлаш жоизки, бу нашрларнинг барчасида ҳам асар матни тўлиқ берилган эмас. Бундан ташқари, уларда кўплаб матний тафовутлар мавжуд. Жумладан, F. Каримов хизмати билан чоп этилган 1958 йилги нашрдаги “Саёҳатнома”нинг “Қўқондан Шоҳимардонга” деб номланган қисмини 6352-рақамли баёздаги матнга қиёслаганда кўплаб қисқаришлар, бандлар таркибидаги мисра, сўз ва жумлалар ўзгаришга учрагани кузатилади. Бу ҳол кейинги нашрларга ҳам жиддий таъсир кўрсатган. Жумладан, мазкур нашрда асарнинг 5-банди қуидагича берилган:

*Мингбошилик кимнинг иши,
Десам, деди бедониши,
Бир “Қўштегигирмонлик киши,
Хўжса Исо бадкор экан”.*

№6352-баёзда эса (182а-б-саҳифа):

*Мингбошилик кимнинг иши,
Десам, деди бир дониши,
Бир “Қўштегигирмонлик киши,
Хўжса Исо бекор экан”.*

Банднинг 2-мисрадаги “бир дониши” сўзининг “бедониши”га айлантирилиши муаллиф бадиий нияти бутунлай тескари талқин этилишига олиб келади. 4-мисрадаги “бекор” сўзи “бадкор” тарзида таҳрир қилиниши мисралар мазмунига мос эмас.

Професор Н.Жабборов мумтоз адабиёт материалларини ўрганишда матн таҳрирининг алоҳида ўрин тутишини таъкидлайди. Олим бу масалани тадқиқ қилиш ўзбек матншунослигининг долзарб вазифаларидан

⁴ Гафур Гулом. Муқимий баёзи. Танланган асарлар – Т.: Ўздавнашр, 1938.-Б.36-41; Муқимий. Танланган асарлар. – Т.: Фан, 1942.-Б.49-55; Муқимий. Танланган асарлар. – Т.: Фан, 1953.-Б.55-67; Олимжонов А. Танланган асарлар. – Т.: Фан, 1951.-Б.55-62; Ўткир Рашид. Танланган асарлар (Мактаб кутубхонаси). – Т.: Фан, 1951.-Б.34-37; Каримов F. Муқимий. Асарлар тўплами. Иккинчи том. – Т.: Бадиий адабиёт, 1960. -Б.87-95; Муқимий. Танланган асарлар (Мактаб кутубхонаси).– Т.: Ўқитувчи, 1973. -Б.77-80; Муқимий. Асарлар тўплами. – Т.: F.Гулом номидаги адабиёт ва санъат нашриёти, 1974. -Б.427-439.



эканлигига эътибор қаратиб, бундай ёзади: “Д.С.Лихачёвнинг “Текстология” китобида таҳрирнинг қуидаги турлари ажратиб кўрсатилади: 1) ғоявий таҳрир; 2) услубий таҳрир; 3) асарда фактларни бойитиш, кенгайтиришга қаратилган таҳрир; 4) бир неча турни ўзида мужассам этган қоришиқ таҳрир. Муаллиф матн таҳририни бу каби турларга ажратар экан, табиийки, рус адабиёти материалларига асосланади. Бизнингча, бу таснифни ўзбек адабиёти материалларига ҳам татбиқ этиш мумкин”⁵.

Матн таҳрирининг мазкур турлари Муқимий шеърий асарларида ҳам кенг қўлланган. “Д.С.Лихачёв фикрича: “Матнинг “ғоявий таҳрир”дан ўтиши асарнинг стилистик жиҳатлари билан боғлиқ бўлиши ёки боғлиқ бўлмаслиги мумкин. Таҳрир баъзан бутун матн таркибига, айрим ҳолларда унинг алоҳида қисмига алоқадор бўлади. Ёзма ёдгорликка бутунлай тескари маъно юкланиши, матнда у ёки бу хил “ғоявий тозалаш” ўтказилган бўлиши мумкин. Ҳатто асарга унда мутлақо бўлмаган ғоя қўшилиши ёки матнда мавжуд бўлган ғоя “қисқартирилиши” ҳоллари ҳам учрайди”.⁶

Бундай ҳолни мазкур қисмнинг 8-бандида ҳам кузатамиз. Банд барча нашрларда қуидагича берилган:

Унда бўлус Гози деди,
Ҳам муфти, ҳам қози деди,
Юрт барча норози деди,
Килгон иши озор экан.

6352-рақамли баёзда (181б-саҳифа):

Анда бўлус ҳожи деди,
Ҳам муфти ҳам қози деди,
Юрти ҳамма рози деди,
Бечора беозор экан, –

шаклида тўғри берилган.

Умуман, давр талаби нуқтаи назаридан банднинг барча мисралари таҳрир қилинган. Натижада муаллифнинг муфти, ҳожи ва қозилар ҳақидаги рост гаплари ёлғонга дўнган, матн аслиятдан мутлоқ йироқлашган.

Хўш, нега бундай йўл тутилган? Шоир ижодини динга қарши қўйиб талқин қилинганини эътиборга олсак, бу масала ўз-ўзидан аёнлашади.

Професор F.Каримов бундай ёзади: “5666-рақамли қўлёзма баёзда “Саёҳатнома” тексти берилган, лекин шундай катта ўзгариш, тузатиш

⁵ Жабборов Н. Бадиий матн таҳрирининг хос хусусиятлари. – “Ўзбек адабиётшунослигига талқин ва таҳлил муаммолари” мавзудаги илмий-назарий анжуман материаллари. – Т.: “Мумтоз сўз”, 2014, -Б.28.

⁶ Кўрсатилган асар. -Б.29.



“таҳрир” билан берилганки, асарнинг ғоявий йўналиши остин-устун бўлиб кетган”⁷, – дея банд матнини келтиради.

Масалага холис ёндашув бошқача хulosага олиб келади. Бизнингча, биринчидан, 5666-рақамли қўлёзма баёздаги мазкур банд аслида тўғри берилган. Чунки, 6352-рақамли баёздаги банд билан қиёслаш шундай хulosа чиқаришга асос бўлади. Иккинчидан, муқимишунос олимлар “Саёҳатнома”нинг манбаси ҳақида бирон жойда фикр билдиришмайди. 6352-рақамли баёзда 30 банддан иборат бўлган мазкур “Саёҳатнома”нинг бандлари тўлиқ берилган.

Барча нашрларда қуидаги:

*Шерсиз эмасдур бешалар,
Бордур саҳоватпешалар,
Қилманг ёмон андешалар,
Яхшилари ҳам бор экан, –*

банди “Саёҳатнома”нинг “Қўқондан Исфарага” деб номланган қисмида берилади. 6352-рақамли баёзда эса банд “Қўқондан Шоҳимардонга” қисмида келади. Бу ҳақда адабиётшунос Э.Шодиев ҳам қуидагича фикр билдирган: “Муқими асарлари билан боғлиқ яна бир масала “Саёҳатнома”ларга тегишилдир. “Саёҳатнома”ларнинг ҳозирги нашрларида тўртликлар ўрни сезиларли даражада ўзгариб кетган. Оқибатда жой номлари ҳам чалкашиб кетган. Кейинги нашрларда ана шу чалкашликларни бартараф қилиш керак”⁸.

Барча нашрларда “Саёҳатнома” матнлари қисқартириб берилган. Жумладан, “Қўқондан Шоҳимардонга” қисмидан 10 банд тушириб қолдирилган. Шундан 3 бандини 6352-рақамли баёздан келтирамиз (183б-саҳифа):

*Тангрига кўнгил бойлайин,
Бориб зиёрат айлайин,
Ёндим боролмай найлайин,
Устод муриди кор экан.*

*Армон зиёрат қилмадим,
Бир кеча ётиб келмадим,
Кўз бирла кўриб билмадим,
Хуш багри файзосор экан.*

⁷ Каримов F. Муқими ҳаёти ва ижодини ўрганиши тарихидан. Ўрта Осиё Давлат университетининг илмий асарлари. Ўзбек адабиёти. Янги серия, 15-китоб. – Т.: Ўқитувчи, 1957.-Б.26.

⁸ Мадаминов А. "Ўзбекистон адабиёти ва санъати", 1990 йил, 9 ноябрь (Муқимиининг 140 йиллик юбилейидаги маъруза материалларидан.)



*Шоқир нойиби волости,
Химматда денг ҳотамтойи,
Келганда бир меҳмон шави,
Жонигача исор экан.*

Барча жорий нашрларда “Саёҳатнома”нинг “Қўқондан Фарғонага” қисмидан ҳам 5 банд қисқартирилиб нашр этилган. Мана ўша тушириб қолдирилган бандлардан 2 таси:

*Белни Муқимий бойладим,
Шундог юрушини шайладим,
Дунёни таҳқиқ айладим,
Бир маҳзи наму нанг экан.*

*Хуржом бугун савдо бажсо,
Баским қўп эркан ошино,
Эркаклари бири ато,
Хотунлари ам(м)анг экан.*

Кўринадики, жорий нашрлардан тушириб қолдирилган баъзи бандлар ўша давр мафкураси талабига кўра киритилмаган бўлса, баъзилари сабабсиз қисқаришга учраган.

Баъзи тадқиқотларда Муқимий асарларининг жорий нашрларига киритилмаган “Саёҳатнома”лар матни келтирилиб талқин қилинган. Лекин манба ҳақида бирон оғиз фикр юритилмаган. Баъзи тадқиқотларда эса мазкур бандлар оғзаки материаллар сифатида таъкидланади. Жумладан, Сотти Ҳусайн, Ҳомил Ёқубов ва Ғулом Каримов⁹ тадқиқотларида “Саёҳатнома”нинг “Қўқондан Фарғонага” қисмидаги юқорида келтирилган банд ўзгартирилиб қуидагича келади:

*Белни Муқимий бойладим,
Шундог юрушини чоғладим,
Дунёни таҳқиқ айладим,
Дунё қурилган дор экан.*

Мазкур банд юқорида таъкидлаганимиздек, шоир асарларининг жорий нашрларидан тушириб қолдирилган. 6352-рақамли баёзда эса (1826-саҳифа) аслиятга мос берилган. Кўринадики, “шайладим” сўзи “чоғладим” сўзига, “бир маҳзи наму нанг экан” мисраси “дунё қурилган дор экан” тарзида ўзгартирилган. Негадир профессор F.Каримов докторлик диссертациясида мазкур банд манбаси ҳақида фикр билдириб: “1954

⁹ Сотти Ҳусайн. Шоир Муқимий. Танланган асарлар. – Т.: Ғ.Ғулом номидаги адабиёт ва санъат нашириёти, 1974.-Б.52; Ҳ.Ёқубов. Демократ шоир. //Шарқ юлдузи, 1953, 9-сон.-Б.99; Каримов F. Ўзбек адабиёти тарихи. – Т.: Ўқитувчи, 1987, 3-китоб.-Б.122.



йил САГУ экспедиция материаларидан. Одамлар оғзидан ёзб олинди”,¹⁰ – дейди.

Янги топилган “Саёҳатнома”нинг “Исфара саёхати” деб номланган қисми фақат X.Зарифовнинг “Муқимий ҳаёти ва ижоди” номли монографиясида учрайди. Олимнинг таъкидлашича, мазкур “Саёҳатнома” матни шоир Чархий томонидан 1953 йилда тожикистонлик Ғолиб Якубзода деган киши оғзидан ёзб олинган.¹¹

Умуман, Муқимий “Саёҳатнома”лари матни Муқимий асарларининг барча жорий нашрларида аслиятга номувофиқ келтирилган. Табиийки, ноқис матни асосида холис ва ҳаққоний тадқиқот яратиб бўлмайди. Шу жиҳатдан, шоир “Саёҳатнома”лари матнини матншунослик нуқтаи назаридан тадқиқ қилиб, қайта нашр этиш долзарбдир.

ҲУКМАТ

**Ҳинсонни сўз айлади жудо ҳайвондин,
Биалким. гуҳари шариффроқ үйқ ондин.**

Ҳалишер НАЗОУН

¹⁰ Каримов F. Ўзбек демократ шоири Муқимий ва унинг даври адабиёти. – Т.: 1962 йил. Док. дисс.-я.-Б.623.

¹¹ Зарифов X. Муқимий ҳаёти ва ижоди. Т.: Фан, 1955.-Б.41.



**Муҳаммаджон
ХОЛБЕКОВ**

Филология фанлари доктори, профессор. 1950 йилда тугилган. Самарқанд давлат университетининг роман-герман филологияси факультетини тамомлаган. Унинг “Ўзбек адабиёти Францияда”, “Амир Темурнинг Европа қироллари билан ёзишилари”, “Уильям Шекспир”, “XX аср модерн адабиёти манзаралари” каби рисолалари нашр этилган.



СЮРРЕАЛИЗМ ШЕЪРИЯТИ: ГИЙОМ АПОЛЛИНЕР

XX аср Европа шеъриятида Гийом Аполлинер (1880-1918) ижоди алоҳида ўрин тутади. Унинг “Алкоголлар” (Alcools, 1913) номли шеърлар тўплами, шубҳасиз, кубизм¹ руҳидаги шеъриятда муҳим аҳамият касб этди, негаки, у биринчи жаҳон урушидан кейинги шоирлар авлодининг аксарият қисмига ва сюрреализм тарафдорларига йўл кўрсатиб, янги адабий йўналишни белгилаб берди.

Айни пайтда, Аполлинер ўз ижодида ўтмиш анъаналарини қадрлаб, бадиий қадриятларга катта хурмат ва эҳтиром билан қаради. Унинг шеърларида Франсуа Вийондан то Поль Верленгача бўлган элегия (мунгли, ғамгин лирик шеър) руҳи билан сугорилган шеърият намуналари оҳангларини бемалол кузатишимиш мумкин. Аполлинернинг энг машҳур “Мирабо кўприги”, “Севилмаганинг қўшиғи” шеърлари мазмунида романтик рух, “Лендор-роудлик мухожир” шеърида эса Артюр Рембо йўли сезилиб туради. Аммо шоир шеърлари орасида бошқа мавзулар ҳам ўзи ҳақида баралла овоз беради ва муаллиф улар учун поэзияда муносиб жой ажратиб беришни талаб қиласди. “Янги онг ва шоирлар” (1917) номли эссесида у ўз фикрини қуйидагича билдирган: “Самолётлар осмонни тўлиқ эгаллаб олмагунга

¹ Кубизм – санъат ва адабиётда XX асрнинг 1-чорагида вужудга келган ва реализмга қараша-қарши ўлароқ борлиқни геометрик шаклларда тасвирлашига интилган оқим.



қадар Икар ҳақидаги қўшиқ ақлдан узоқ хаёл эди... Айнан шоирлар янги афсоналарга илҳом бахш этишлари, ўзгача рух бағишилашлари, кашфиётчилар эса, ўз ўрнида, уларни ҳаётга татбиқ қилишлари лозим”. Дарвоке, шоирнинг “Алкоголлар” (1898-1913) тўпламида марказий ўринни эгаллаган “Худуд” шеъридаги сатрлар авангард шеъриятининг ҳақиқий манифестидек жаранглайди.

“Худуд” (уни поэма ҳам деса бўлади – М.Х.) Аполлинер “янги лиризм”ининг ёрқин намунаси. Шоир орзу қилинган озодлик ғояси даражасида ҳам (эски дунёга, ўтмишнинг бут-санамларига карши), шакл даражасида ҳам ўзини мутлақ эркин шеърда ифода этади. Ижодий жараён қатъий қоидалардан халос бўлганидек беўлчов, кишининг ғашига тегувчи даражада оҳангисиз, кулоққа ёқмайдиган даражада ёқимсиз (Аполлинер “дид” ҳақида ҳаттоқи эслатиб ўтишларни ҳам истамасди – М.Х.) туюладиган бу шеърнинг муайян бир жанрга мансублигини аниқлаш ҳам мушкул вазифа. Ушбу шеър оғир кечган бахтсиз муҳаббат таъсири остида битилган бўлиб, маъно ва мазмун жиҳатидан шоир тавбаси, дилини ёриши, руҳий қийналиши, азоб-уқубати ва дард-алами, борингки, ёлғизлигининг очиқдан-очиқ манзарасига ўхшайди. Чунки “Мен” бу шеърда “Сен”дек тасвирланган; истиффор келтирувчи шоир гўёки ўзини четдан туриб кузататётгандек, ўз ҳатти-ҳаракатларини ва жойдан-жойга кўчиб юришларини ўзига хос эпосга айлантирган. Композиция негизида ётган бу усул, чамаси, симультанеизм рангтасвир санъатидан ўзлаштириб олинган.

Симультанеизм ҳақида тўхталашибиган бўлсак, бу ҳаётлари бир-биридан алоҳида, ўзга бир жойда ва бир вақтда параллель равишда кечаётган персонажларни ҳар хил ракурс ва ҳолатда тасвирлаш услубидир. Симультанеизм услубидан фойдаланишнинг бир нечта йўли мавжуд. Улардан бири бевосита битта саҳна (манзара)да ҳаракатланаётган позициядан туриб суратга олинган таассуротларни умумлаштирилган ҳолда тасвирлашдир. Натижада тасвирланаётган предметлар шаклининг ўзига хос ўзгариши ва ноаниклиги пайдо бўлади, шакллар ўз структурасидан деярли ажralади, сиртқи кўриниши батамом йўқолади. Бу услубнинг яна бир жиҳати шундаки, тасвирга олиш жараёни бир қатор алоҳида саҳналарга парчаланади ва уларнинг ҳар бири ўз позициясидан суратга олинади. Тасвирга олаётган кузатувчи эса шу вактда бир жойдан бошқа жойга кўчиб юради, суратга олинган саҳналарнинг йифиндиси эса ҳаракатланиш иллюзиясини яратади. Бу ерда адабиётшунос Б.А.Успенский (“Санъат семиотикаси”, 1995) таърифлаганидек, ҳаракатнинг таҳлилий талқини алоҳида аҳамият касб этади; унга кўра тўхтовсиз жараён бир қатор дискретлик² компонентларга парчаланади, уларни синтез йўли билан умумлаштириш реципиентга ҳавола қилинади. Таъкидлаш лозимки, серия таркибига кирувчи саҳналар бир-бирига маъно ва мазмунан боғлиқ, ҳар бир манзара бошқаларга қўшилмаган ҳолда ўз мустақиллигининг бир қисмини йўқотади.

² Дискретлик – (лат. *discretus* – парчаланган, узилган) узлуксизликка қарама-қарии қўйилганлик.



Вақтнинг кенг оқимида айни шу пайтда, айни шу саҳифада турли вақтда содир бўлган воқеалар намоён бўлади. Замон ва маконнинг шу тарзда бир жойга жамланиши обьектив воқеликнинг умумийлигини тасвирлашга қулайлик яратади. Шеър бутун бошли коинот билан тенглашишга тайёр, матн очиқлиги, ошкоралиги, унинг чексиз кенглиги таассуроти пайдо бўлади. Устига-устак, “сайр қилаётган” шоир ўз йўлида ҳамма нарсани, энг аввал янги реаллик аломатларини: автомобиль ва самолётларни, реклама ва албатта, Эйфель минорасини ўз ичига сингдириб олади.

Аполлинер шеърий шаклни ҳар хил чеклов ва қоидалардан бўшатиб юборди, уни қатъий чегаралардан халос қилган кашшофга айланди. Шоирнинг энг муҳим куроли – бу ғоя, образ, сўзларни саралаб териш пайтида “кутилмаганлик” ёки тасодифийликдир (“Каллиграммалар” 1918). Шеърий тилни янгилашни Аполлинер театр соҳасига ҳам татбиқ қилди. У ўзининг “Тиресий сийнаси” (1917) номли бурлеск (муболагали) пьесасида илк дафъа “сюрреализм” сўзини ишлатади. Шоир шунингдек, янги шеърий жанрлар: “суҳбат шеър”лари (“Деразалар”, “Кристин кўчасида душанба”), “симультан шеър”лар (“Бор”), “лирик идеограммалар”³ (“Юрак, тож ва кўзгу”, “Ёмғир”) билан тажрибалар ўтказди.

Аполлинер тажрибасини кубизм шоирлари Леон-Поль Фарг, Андре Сальмон ва Пьер Альбер-Биролар ўзлаштириб олдилар. Масалан, Макс Жакоб (1876-1944) ўзининг “Монастирда вафот этган биродар Маторслнинг муболаға ва тасаввуф асарлари” (1912) асарида тажнис (сўз ўйини)га мойиллигини намойиш этди. Шоирнинг “Бир ҳовуч соққалар” (1916) номли насрый шеърлар тўплами кейинги авлодга мансуб кўп шоирларга таъсир кўрсатди. Чунки бу тўпламда Макс Жакоб Аполлинер кетидан “адабий” ва “ҳикоявий” поэзияга қарши чиқсан эди. Бошқа бир француз шоири Стефан Малларме (1842-1898)нинг “Муваффақият зинҳор қулай фурсатни бекор қилмайди” (1897) номли поэмаси Жакобнинг мақсадларига айни жавоб бўлиб тушди. Унинг иқрор бўлишича, у “ўз миясидан эркин сўз ва дадил фикр, тунги туш ва кундузги орзу-хаёл, ҳаётда йўқ нарса ва ҳоказоларни чиқарап эди”. Шунга ўхшаган олдиндан белгиланганликни рад этиш М.Жакоб ижодида доимий истехзо ва ўз-ўзига заҳарханда ва киноя қилиш жўрлигига вобаста кечади.

Шеърий кубизм ва “янги шеърий онг” яловбардорлари сафининг олд қаторида, Аполлинер билан ёнма-ён яна бир машхур француз шоири Пьер Реверди (1889-1960) жой эгаллади. У символизмга хос бўлган эҳтирос ва ҳис-ҳаяжонни, лиризм билан суғорилган чексиз шодлик ёки бениҳоя хурсандлик ҳолатини Артур Рембога хос кайфиятдаги “тартибсизликни” енгиб ўтишга ҳаракат килди. Реверди ўз шеърий дастурини “тасвирланган обьект” ғояси билан чамбарчас боғлади. Ўз ижодини шарҳлар экан, Реверди қуидагиларни таъкидлайди: “Образ муқоясадан эмас, балки у ёки

³ Идеограмма – (лингв.) бутун сўз ёки тушунчани ифодаловчи ёзув белгиси.



бу даражада бир-биридан узоқлашган иккита обьектнинг яқинлашувидан туғилиши мумкин. Яқинлашаётган обьектлар бир-биридан қанчалик узоқ бўлса, образ шунчалик ўткир бўлиб чиқади, ундаги жўшқинлик ва ҳисстуйғу кучи, шоирона реаллиги кўпроқ бўлади”. Кейинчалик бу тезисдан сюрреализм тарафдорлари фойдаланишиб уни маромига етказишиди. Реверди сюрреализм тарафдорларининг интеллектуализм (ақл-идрокка асосланганлик)ни қабул қила олмасликларини, ёзув столи атрофида узоқ вақт ишлашни хуш кўрмасликларини олдиндан пайқаб олди: “Яхши шеър ўз-ўзидан тугалланган бўлади. Тузатишлар баҳтли тасодиф ҳисобланади. Агар мўъжиза рўй бермаса, улар ҳамма нарсанинг расвосини чиқариши мумкин”.

1910 йиллар Европа авангардининг машхур ва нуфузли намояндаларидан бири ҳисобланган Аполлинер ёнида сюрреализм тарафдорлари – Андре Бретон, Филипп Супо, Луи Арагон, Жан Кокто каби ёш шоирлар майдонга чиқди. 1916 йилда П.Реверди муҳаррирлиги остида ташкил топган “Шимол-жануб” номли журналда, уларнинг илк шеърлари чоп этила бошлианди ва айтиш мумкинки, шу билан ўзига хос сюрреалистлар мактабига асос солинди.

“Янги онг ва шоирлар” номли манифестида Аполлинер шеъриятга бўлган янгича қарашни таърифлади. Унга кўра шеъриятнинг бу жиддий ва оғир вазифаси асосий нишонаси мисли кўрилмаган техник тараққиёт бўлган замонавий даврга тўлиқ жавоб бериши ва ҳар тарафлама мос бўлиши лозим. Аполлинер ижоди шу каби поэтик тамойилларни ўзида тўлиқ мужассам этган этди.

Таъкидлаш лозимки, Аполлинер сюжетга мазмундорлик ва бамаъникини қайтарди. Ўз вақтида символизм тарафдорлари бу муҳим тамойиллар қадрига етмасдан, уларга рўйхуш бермай, кибр билан четга суриб ташлаган эдилар. Шоир ўз шеърларини пухта ўйланган реаллик билан тўйинтириди, ушбу реаллик фақатгина шахсий ҳис-туйғу ва ҳаяжондан униб чиқмай, балки унинг лирикасида (“Мирабо кўприги”, “Муҳаббатда омадсизнинг қўшиғи”) турфа ранг ва оҳанглар воситасида намоён бўлди. Аполлинер замонавий ҳаётнинг асл моҳиятга эга маромини ҳаммадан кўра яхшироқ эшитишга ва ифода этишга моҳир уста эди: у “саноат кўчасининг нозик ҳаракатларини”, заводларга кенг кўчани тўлдириб бораётган ишчиларнинг шиддатли оқимини, осмону фалакда парвоз қилаётган самолётларни, темирийўл вокзалларининг шовқинини шеърий сатрларда тараннум этарди, инсон тақдирларининг чигал тугунини, мудҳиш урушнинг фожиали мусиқасини, ваҳимага солувчи курол-яроғлар товушини, замбарак ўқларининг хавф-хатарли портлашини шеърга солиб, инсониятни уларнинг таҳдидидан огоҳ қиласди. Тараққиёт куйчиси бўлган Аполлинер бир вақтнинг ўзида яқинлашиб келаётган глобал ҳалокатларнинг хавотирга солувчи нохуш кайфиятини ўз поэзиясида мужассам этганини англаб етамиз.

Мавзулар хилма-хиллиги Аполлинернинг бошқа шеърларига ҳам

хос. У “Улкан нафас” (“Худуд”, “Қўрғонлар”, “Сен-Меррилик созанды”, “Малласочли соҳибжамол” ва ҳоказо) поэмаларида ҳаётнинг ҳар хил ҳодиса ва воқеаларини бир-бирига тизиб чиқади. Бу воқеалар энг муҳим ҳолатлардан (уруш, ўз ҳаётидаги кескин бурилишлар) тортиб, то бир қараашда арзимас бўлиб кўринувчи (шаҳар кўчалари қиёфаси, уйлар деворига ёпиширилган афиша ва реклама, дўкон пештахталаридағи газета ва журнал, йўловчиларнинг узук-юлук жумлалари, боғланишсиз гаплар) ҳолатларгача бир-бирига чамбарчас боғланиб, шеърлар дунёсининг бир бутун яхлит ҳолдаги, эпик кўламдаги манзарасини намоён этади. Тиниш белгиларининг йўқлиги мазкур яхлитликка катта хизмат қиласди; аниқроқ қилиб айтганда, бу – жамики мавжудот, бутун борлик ҳажм ва мазмун жиҳатдан тенглиги ва алоқадорлигини, кичикни каттадан, шахсийликни умумийликдан ажратиб турувчи барча чегара, тафовутлар йўқ қилинганлигини англатади. Поэма худди ҳаётнинг шиддатли ва парчаланмаган оқимилик ҳаракатланади.

Аполлинер шеърий тил соҳасида новатор деб ҳам эътироф этилади. У тилни атамалар (телефон, телеграф, телефон, аэроплан, трамвай ва ҳоказо) ҳисобига бойитиб боради, таъриф ва маъно жиҳатдан асло шеърий бўлмаган бу атамалар, поэмаларнинг вазнига, маромига, оҳангига қўшилиб, эстетик нуқтаи назардан бор нарсага, мавжуд фактга айланади. У шеъриятга жуғрофий номларни, жумладан, энг қадимий номларни (Ханаан, Халдея, Эврип, Формоза), шунингдек шаҳар, даҳа ва кўчалар номларини ҳам ҳеч иккilanmasdan қўшиб кетаверади. Унинг шеърлари сон-саноқсиз атоқли отларга тўла, улар орасида Инжил персонажлари, юонон, ҳинд ва бошқа афсоналар қаҳрамонлари, Ўрта асрга мансуб достонлардан олинган образлар, ўтмишнинг буюк мутафаккир файласуфлари, шоирнинг суюкли аёллари ва дўсту оғайниларининг номлари бор. Аполлинер тилнинг хилма-хил қатламларидан, яъни муомаладан чиқиб кетган архаик сўз ва иборалар, содда сўзлашув тили, адабий тилда учрайдиган вульгар сўз ёки ибора, экзотик ном, тарихий атама ҳамда миллий маданиятлардан олинган ўзига хос реалия ва иборалардан кенг фойдаланади. Ўз универсаллиги жиҳатидан устомон ҳисобланган шоир луғати поэманинг чегараланган маконида турли дунё ва даврларни бир жойга жамлаш имконини беради.

Аполлинер анъянавий шеър тузилиш қоидасидан бутунлай бош тортмаганини ҳам таъкидлаш лозим. У кўп ҳолларда аниқ, тўғри қофияли классик строфикага ҳам амал қиласди. Буни биз шоирнинг “Уруш атиргули”, “Қўрғонлар”, “Юлдуз қайғуси” ва бошқа шеърларида кузатамиз. Лекин бир вақтнинг ўзида шоир янги шаклни ҳам яратади. Верлибр тарафдори бўлган Аполлинер, шеър вазнини ғалати ва антиқа тарзда ўзгартиради, қофияни шеър ичига жойлаштиради, қофияни ассонанс (чала қофия, фақат ургули унлиларнинг қофияланиши)га алмаштиради ёки ундан батамом воз кечади. У янги строфикага асосланган шаклни тавсия қилиб, шеър бандининг қатъий белгиланган ва мустаҳкам ўрнатилган



қоидаларини бузиб, шеър бандининг янги қиёфаси, янги шаклини ишлаб чиқади. Бу шаклда битта шеър ўттизга яқин ёки битта ягона бўғинга эга бўлиши мумкин, унда шакл қандай бўлишидан қатъи назар, мутаносибликдан холи, эркин тузилган бўлади. Бундай шакл ўз мазмунига адекват, айнан мосдир: у чегараланмаган ва кўп қиррали умуминсоний борлиқ моделини акс эттиради.

Верлибр ҳақида тўхталадиган бўлсак, бу француз тилида “vers libre”, яъни “эркин шеър” деган маънони англатади. У XX аср Европа шеъриятига хос бўлган шеър вазнининг метрик тизимга асосланган композицион шаклидир. Умуман олганда, верлибр негатив белгилари бўйича аниқланади: унда на вазн, на қофия бор, унинг сатрлари узунлиги бўйича умуман тартибланмаган. Бу агар насрий асардан битта парча олиниб, ихтиёрий равишда сатрларга бўлиниб ташланса, верлибр ҳосил бўлади, деганидир.

Хулоса қилиб айтганда, Гийом Аполлинер ижоди XX аср бошларида Европа шеъриятида эътиборга молик воқеа тарзида намоён бўлди. Икки йирик адабий оқим – тарихга айланиб бораётган символизм ва майдонга келаётган сюрреализм ўртасида пайдо бўлган оралиқ даврни тўлдириш, нафақат тўлдириш, балки шеъриятнинг кейинги ривожига кучли туртки бериш шоирнинг зиммасига тушди ва бу мураккаб вазифани Аполлинер муваффакият билан уddyлади.





ТОНГЛАРНИ ЁРИТГАН МУНАВVAR ҚУЁШ

Наргиз ЁҚУБЖОН қизи

* * *



Бир умр изладим атрофдан сени,
Керак эдинг менга, ҳамон кераксан.
Сенга етмас қўлим, етмас овозим,
Кўксимдаги оғриқ юқкан юракдан.

Бир умр тиладим дил изҳорингни:
“Керакманми сенга, керакмасманми?”
Дилдан туярканман ҳар озорингни,
Сўрдим: “Айтгил менга, керакмасманми?”

Уммонларга отдинг кўзага жойлаб,
Ягона саволим жавобларини.
Мен эса илиндим: йиллаб ва ойлаб
Сенга андухларим савобларини.

Розиман, сени деб, аламлар ютдим,
Ягона армоним, ёлғиз тилаксан.
Ахийри саволим тубига етдим,
Керак эдинг менга, ҳамон кераксан.



* * *



Трамвайнинг ланг очилган бағридан
Кийикчадек, худди, сакраб тушаман.
Шундоққина йўл бўйида чаманзор
Ўртасидан капалакдек учаман.

Дуо қиласар қувониб бир мўйсафид:
"Яратган омаду баҳтингни берсин!"
Юзимни силайди титроқ кафтларим,
Гулдай қувнаб дейман: "Айтганиз келсин!"

Бугун қуёшнинг ҳам очиқ чехраси...

Фарғона

Дилбар РАЖАБОВА

* * *

Юрагимни мижиқлаб ташлаб
Нигоҳларинг ўчоқларига,
Кўзларингда беаёв ёнсам.

Мени олса қучоқларига
Сенсизликнинг оғир даҳшати,
Хаёлингда қайтадан унсам.

Чопаверса тақдир изимдан,
Босиб келса умид шиддати,
Юрагингда жойлашиб қолсам.

* * *

Қулоғим беркитдим қўлларим билан,
Кутар кўзларимни ёпдим, кўрмасин.
Бармоғим оралаб, кирди сирғалиб,
Олис-олисдаги ҳавои сасинг.

Ер чизиб, ер шарин айланиб чиқдим,
Қурдим Амуларга метин кўприклар.
Шунча залворларга етган бу кучим
Етмай, кўтарилди нохос киприклар.

Қанча довул туриб тошди денгизлар,
Дунёга ўт қўйди чақмоклар рақси.
Сен эса, кўзимда ҳануз тенгсизсан,
Ҳануз чайқалади кўзимда аксинг.

Хоразм



Дилноза МУРОДОВА



МУҲАББАТ

Муҳаббат бу – гўзал топишув,
Муҳаббат бу – ҳайратлар акси.
Бир инсонни жондан севишу
Бир инсонни кутмоқлик завқи.

Муҳаббат бу – дилбар коинот,
Парвоздан ҳеч толиқмас юрак.
Рози бўлиб жонини бермоқ,
Рози бўлиб тиланганди тилак.

Муҳаббат бу – кечирмоқ асли,
Ўзга қалбга умид экмоқдир.
Муҳаббат бу – туйғулар баҳси,
Энг сўнггида баҳтга етмоқдир.

ЯНГИ КУНЛАР

Доимгидек эмас кунларим,
Доимгидан қуёш ҳам порлоқ.
Орзу бўлиб колган завқларим,
Кириб келди дилимга ногоҳ.

Юлдузлар-ку ҳамроҳим энди,
Ой нурларин сочади тунлар.
Ёмғирларнинг совуғи тинди,
Бошланади, ох, янги кунлар.

Хаёлларни эркига бериб,
Ниятларга юрдим шу йўлдан.
Пишиб етилган мевани териб,
Куртаклигин эсладим бирдан...

Toishkenim



Дилнавоз БЕРДИЕВА

* * *

Кимнингдир кўксини тўлдирган гулман,
Тонгларни ёритган мунааввар қуёш.
Кимгадир бир уюм совиган кулман
Ё тоғлар этагин тутиб ётган тош.

Кимнингдир дилига юк бўлиб гоҳи,
Бардоши етмади кўзимга боқиб.
Ой ҳам қочиб кетди осмонин ташлаб,
Оғиз жуфтлагандим юрагим очиб.

Кимдир хотирадан ўчирди буткул,
Ёмғир сувларига ювиб хаёлин.
Кимга савоб бўлдим самодек улуғ
Ва ёки умрида катта заволин...

...Мени баҳт қилиб бер, шодлик қилиб бер,
Томирларда тўлиб кулгулар оқсин.
Йироқ қил қайғунинг нафасларидан,
Ёқса дилни, фақат қувончлар ёқсин.

* * *

Хаёлинг-ла ўтмоқда уч йил,
Хаёлинг-ла урмоқда жоним.
Сен ҳам мен деб ўртайсанми дил,
Йўқолгайми мен деб ороминг?

Изтироблар қийнарми сени,
Қийнайдими олис масофа?
Кўзларингдан томарми соғинч,
Хотиралар қучса ҳар даъфа?

Тунлар кўкда қоларми кўзинг
Ё сирдошинг бўларми ҳилол?
Мен қуёшдек ботиб кетдим-ку,
Тонгларинг-чун келгин, қайтиб ол.

Йиллар ўтар: охиста, шошқин,
Майли, мен деб қайғулар кечма.
Мен бир гулман, бўлгунимча хок,
Дийдоримга ошиқ, кечикма.

Қашқадарё



Нурхон ТУРҒУНБОЕВА



* * *

Япроқлардек титрайди юрак,
Япроқлардек узилмоқда жон.
Олтин кузнинг олтин кунида
Ҳаво каби илиқ хаяжон.

Қуёш сочар энг сўнгги нурина,
Хиёбонда хазон сирдошим.
Пойингизга гиласам тўшаган
Менинг куздек тилла бардошим.

Кутаяпман ширин дийдорни,
Ёлғизликда хаста дил билан.
Майюс кузнинг чехрасин очиб,
Сиз келасиз даста гул билан.

* * *

Қора туним ёритиб қўйган,
Кўк шифтига қадалган чироқ.
У бир ўзи хижрондан тўйган,
Сўзларимни кутади муштоқ.

Шамол ёйди кокилларимни,
Хаёлларим сочилиб кетди.
Сухбат қуриб чирофим билан
Бутун сирлар очилиб кетди.

Осмон тиниқ юзини тўсган
Рўмолига сачради олов.
Менинг каби унинг кўксига
Олов қалаб кетгандир биров.

Ёниб кетди бутун бошли тун,
Юрагимга уриларди бонг.
Яна янги муҳаббат билан
Янги ҳаёт бошлаб берар тонг.

Андижон



Моҳинур ИСМОИЛОВА

* * *

Мен қуёшнинг тафтида ёндим,
Сояладим майса остида.
Тонгда гулни кучиб уйғондим,
Үпіб қўйдим баргни оҳиста.

Титкиладим. Энтиқдим. Тўймай,
Минг бўлакка бўлинди умид.
Юрагимнинг амрига кўнмай,
Умидга кўз тикдим, кўз юмиб.

* * *

Мен қишлоқда урадим чаппар
Ва тоғлардек эди ғурурим.
Қояларда сезмасдим хатар,
Бошқа экан шаҳар йўриги.

Кузатаман кўча лиқ тўла,
Ҳар мақомда куйлади хаёт.
Ҳар қадамда фол очар лўли,
Бунда ҳамма бир-бирига ёт...


...Мен сўз излаб кезаман шаҳар,
У ҳайратим қиласи ҳазм.
Кўзларим бўш қайтар ҳар сафар,
Юрагимда туйғулар базми...

Жиззах



Абдулмажид МАДРАИМОВ

Тарих фанлари доктори, профессор. 1946 йилда туғилган. “Расмларда Бобур ҳаёти”, “Камолиддин Беҳзод” (О.Усмонов билан ҳаммуаллифликда) рисолалари, “Камолиддин Беҳзоднинг Шарқ маданияти тарихида тутган ўрни”, “Шарқ миниатюра мактаблари” тўпламлари муаллифи, уч жислдлик “Шарқ миниатюралари” номли каталог (инглиз тилида), “Тарихий манбашунослик”, “Манбашунослик” дарсликларини яратган. Қатор халқаро анжуманлар иштирокчиси, бир нечта илмий археографик экспедициялар қатнашичиси.



НАВОЙИННИГ ҲИНДИСТОНЛИК МУХЛИСЛАРИ

Улуғ ўзбек шоири ва мутафаккири Алишер Навоий фахрия сифатида ёзган эди:

*Олибмен таҳти фармонимга осон,
Черик чекмай Хитодин то Ҳурсон.*

Ҳаётда эса унинг ижоди мухлислари Волга бўйларидан то Нил дарёсига-ча бўлган худудда, ҳатто Ҳиндистон мамлакатида ҳам кўп бўлганлиги маълум. Машҳур хаттот Султон Али Машҳадий “Ҳамса” ва “Терма девон”¹дан нусхалар кўчириган бўлиб, ушбу ноёб қўлёзмаларга Бобурнинг набираси Жалолиддин Муҳаммад Ақбаршоҳ (1556-1605) ва ҷевараси Нуриддин Муҳаммад Жаҳонгир (1605-1627) саройи кутубхонасида хизмат қилган атоқли ҳинд рассомлари Ҷҳарамдас, Лъъл, Маноҳар, Муқунд, Говардхан ва Марказий Осиёдан Ҳиндистонга бориб қолган Фарруҳбек нафис мўъжаз расмлар ишлаган. Шарқ китобат санъатининг мазкур шоҳ асарлари бу-гунги кунда Англияning Винзор саройидаги кироллик кутубхонасида сақланмоқда. Бу суратлардан намуналар профессор Ҳамид Сулеймон ва

¹ “Терма девон”, хаттот Султон Али Машҳадий, Ҳирот, XV аср охири. Винзор қироллик кутубхонаси, “Бухоро қўлёзмаси” деб аталади; уларда ҳиндистонлик расомлар Фарруҳбек, Лъъл, Маноҳар ва Муқунд; “Ҳамса”, Ҳирот, хаттоти Султон Али Машҳадий, 897/1491-1492 йй. Винзор қироллик кутубхонаси, Рақами MS. 65 (A8), расмларнинг бирида Ҷҳарамдас, бошқасида Говардхан номлари битилган.

олима Фозила Сулаймонова 1982 йили чоп этган “Алишер Навоий асарлариға ишланган расмлар”² номли альбомдан ўрин олган эди.

“Хамса” кўллөзмасининг ўн саҳифаси, қўш зарварак, тўрт достоннинг унвони нақшлари ҳамда тўртта расм чоп этилган. Унда олтита расм мавжуд.

Чоп этилган расмларнинг биринчиси (альбом, 81-расм) “Ҳайрат ул-аброр” достонидаги “Сўз таърифи”га бағишиланган 14-бобга ишланган бўлиб, бунда рассом буюк мутафаккирнинг жамият ҳаётидаги сўз ўрнига оид фикрларини юксак бадиий маҳорат билан очиб берган. XVI аср охирида яшаган ҳиндистонлик рассом шоир ғояларини батафсил, еттига жуфт ёшлар воситасида тасвирлайди. Бу расмни ўша давр дунёқарашиб бўйича, орзудаги жаннат богининг тасвири деб аташ мумкин.

Иккинчи расм (83-расм) рассом Ҷҳарамдас томонидан чизилган бўлиб, унда Алишер Навоий Султон Ҳусайнга “Хамса”ни тақдим этаётгани тасвирланган. Бу воқеа очиқ майдонда, улкан чинор дараҳти тагига тикилган шомиёна гилам остидаги тўртбурчак чодирда, улкан гилам тўшалган суппада, сарой аъёнлари, созандалар, хорижий лиbosдаги элчи, совға учун тайёрланган тулпорлар, ов қуши, милтиқ ушлаган икки аскар ва бошқалар иштирокида бўлиб ўтмоқда.

Учинчи расм (85-расм) ҳам “Ҳайрат ул-аброр” достонининг “Вафобоби”га илова қилинган икки вафодор дўстнинг жанг майдонидаги фидойилигига бағишиланган қиссага ишланган. Бу икки дўстнинг ўзаро садоқатини кўрган Амир Темур шаҳар аҳолисининг ҳаётини уларга бағишилайди.

Кўллөзмадаги расмларнинг бири (20-а варакда) асли балхлик, тожтахтдан воз кечган машхур тасаввуф вакили Иброҳим Адҳам ва Биби Робия қиссасига бағишиланган. Навоий “Иброҳим Адҳамнинг Каъбага намоз била борғони ва Робиаи Адвияға Каъбанинг ниёз била келгони” сарлавҳаси остида машҳур қиссанинг шеърий талқинини келтиради. Маълумки, Иброҳим Адҳам ҳаж амалини адо этишни ният қилиб, ўн тўрт йил давомида ҳар қадамида икки ракаат намоз ўқиб, йўл юриб, Маккага бориб кўрсаки, Каъба ўрнида йўқ.

*“Чекти фигонким, “Бу недур, ё Илоҳ?
Хотифе ун бердиким: “Эй тири роҳ,*

*Бодия қатъида дуурур бир ажуз,
Шавқи муҳаббат юкидин қадди гўз.*

*Заъфдин ул бўлмии эди, нотавон,
Қаъба анинг тавфига бўлди равон.*

² Алишер Навоий асарлариға ишланган расмлар. Альбомни тузувчи ва сўз боши муаллифлари Ҳамид Сулаймон ва Ф. Сулаймонова. – Тошкент: Фан, 1982. Бундан бўён альбом.



*Айлади ҳайрон ани бу воқса,
Боқса кейин кўрди келур Робиа.*

*Дедиким: “Эй Ариш матофинг сенинг,
Каъба қилиб азми тавофинг сенинг.*

*Кўрки, жаҳон ичра солибсен не шўр!”
Робиа деди ангаким: “Қилма зўр!*

*Шўр сенингдур бори оламда бил,
Бодия қатъи учун ўн тўрт йил”.*

Бу воқеа хулосаси сифатида Алишер Навоий Робия номидан ёзади:

*“Сенга самар берди, намозу риё,
Бизга бу бар берди ниёзу³ фано”⁴.*

Айни шу воқеа “Ҳайрат-ул аброр” достонининг 25-бобида келтирилган бўлиб, унда чин ихлос намоз ва риёдан афзал кўрилади. Бешинчи руқн ҳажни адо этишда умид, ўтинч ва ёлвориш, ҳар қадамда риё билан намоз ўқиб боришдан афзал эканлиги таъкидланади.

Бу воқеага хиндиистонлик рассом Говардхан сурат ишлаган. Расмнинг пастки қисмида Оллоҳга мурожаат қилаётган оқ саллали, кўк қабо кийган Иброҳим Адҳам қўллари Робия томонга чўзилган. Юқорида эса, қизил тошдан ишланган масжид ичida Каъбанинг тош асоси, қўллари дуога очилган оқ кийимли Биби Робия тасвирланган.

Юқорида келтирилган қиссадан одам қўнглидаги ихлос билан ибодат қилгани афзалроқ, деган ҳисса келиб чиқади. Бу ибратомуз мазмундаги расмни рассом юксак маҳорат билан ишлаган.⁵

Инсонларни эзгуликка чорлаган бу расмнинг пастдаги ҳошиясида “Амали Говардхан” ёзуви бор. Говардхан Ақбар, Жаҳонгир ва Шохи Жаҳон даврида яшаб, баракали ижод этган, унинг олтмишдан ортиқ асарлари бизгача етиб келган. У рассом Бҳавонидас ўғлидир. Ўз имзоларига “хоназода” сўзини қўшиб қўйгани подшоҳ хонадонида тарбия топганига ишорадир⁶. Навоийнинг “Хамса” асари қўллэзмасига ишланган расмлар Жаҳонгир ҳукмронлиги даврига, яъни 1605-1627 йилларга тўғри келади.

Альбомдаги тўртингч (87-расм, 35-а варак) расм Султон Алоуддин Мұҳаммад Хоразмшоҳнинг ўша давр йирик олими Фахр Розий билан

³ Ниёз – ёлвории, ўтинч, умид.

⁴ Алишер Навоий. 10 жилдлик. 6-жилд. “Ҳайрат-ул аброр”. Тошкент, 2012, 102-103-бетлар.

⁵ Milo S. Beach. Govardhan: “Servant of Jahangir /Mughal Masters. Further Studies. Edited by Asok Kumar Das. Mumbai. Marg publication.vol. 49 No. 4.1998. 134-145 pp. 2 ill.

⁶ Mughal Painters and their works. S.P.Verma. Dehli, 1994, 160-167 pp.

ҳаммомдаги тасодифий учрашувига бағишиланган. Султон олимдан охиратда одамлар қай ахволда бўладилар деб сўраганда, ҳаммомдаги каби, шон-шавкат, қимматбаҳо кийимлар ташқарида қолиб, инсон факат ўзининг эзгу ишлари ва билими билан бўлади, яъни инсон бу дунёда ўзига керакли нарсаларга эга бўлса, унга ана ўшалар асқотиши мумкин дея жавоб беради. Расмнинг пастдаги ҳошиясида “Амали Говардхан” ёзуви бор. Демак, бу расмдаги кишилар қиёфасини Говардхан Ҳиндистонда кайта ишлаб чиқкан.

Хаттот Султон Али Машҳадий томонидан XV аср охирида Ҳиротда кўчирилган “Терма девон” Виндзор қироллик саройи кутубхонасида “Бухоро қўллэзмаси” номи билан юритилади. Унда еттига расм мавжуд бўлиб, чоп этилган бештасида ҳиндистонлик рассомлардан Фаррухбек, Лаъл, Маноҳар ва Мукунд номлари битилган.

Расмларнинг биринчиси (92-расм) “Хазойин-ул маоний” тўпламиининг иккинчи девони “Наводир-уш шабоб”га кирган “сайд” (ов) радифли ғазалга бағишиланган бўлиб, расмнинг юқорисида қуидаги уч байт битилган:

*“Билгай ул коғир анга телмурмагимни, билсаким
Не тазаллум бирла қотилни қилур наззора сайд.*

*Муришиди жозиб тилаб, тоғмай гум ўлдим, войким,
Бўлди бу сахрода саййод иста-ю овора сайд.*

*Телба қуидекдир Навоий қўнгли савдо дашибида,
Они то сен айламишсен, эй парий руҳсора, сайд”.⁷*

Расмда сахродаги шер ови тасвирланган бўлиб, унинг марказида кўк тусли қабо кийган ёш шаҳзода Салим қўнғир рангли от миниб турибди. У эндинина камонидаги пайконини отиб бўлган. Рўпарасида, сал пастрокда ярадор шер. Кўлида ов кушини ушлаган мулозим ҳайрат бармоғини тишланган. Расм пастида тасвирланган қўқимтири кийимдаги овчининг чап қўлини шер тишлаган. Овчи узун ханжари билан шерни яраламоқда, ўнгроқдаги икки овчи эса унга ёрдамга шошилмоқда. Расмдаги кишилар кийими XVI аср охири Ҳиндистонга хос. Расм юқорисида, жадвал орасида рассомлар Лаъл ва Мукунд номлари битилган.

Иккинчи расм (93-расм) шоирнинг тўртинчи девони “Фавойид-ул кибар”га кирган 138-ғазал матнига ишланган. Расм остида ғазал матлаъси ва яна бир байт битилган:

*“Парвона қаноти ароким, дод ила қондур,
Хажср ўтию ғам яросидин икки нишондур.*

⁷ Алишер Навоий. 10 жислдлик. 2-жислд. “Хазойин-ул маоний”, “Наводир-уш шабоб”. Тошкент, 2011, 119-ғазалдан, 124-бет.

*Сориқ, қизил алвон била хильялтаринг эй гул,
Раънолиқ эрур улки, либосингда аёндур”.⁸*

Аммо расм “Фарҳод ва Ширин” достонидаги лавҳага ишланган. Ариқ қазиётган Фарҳоднинг ишини кўришга келаётган Шириннинг оти ботқоқда юролмай қолганда, қаҳрамон гўзални оти билан бирга кўтариб, балчиқдан ўтказиб кўяди. Расм марказида от устидаги Ширин ҳайрат бармоғини тишламоқда. Фарҳод дадиллик билан гўзал ва унинг отини кўтариб шахдам қадам ташлаб кетмоқда. Шириннинг канизаклари ҳам турлича ҳайрат ҳолатида тасвириланган. Расмнинг пастида рассом номи Фаррух деб битилган.

Тўртинчи расм (94-расм) учинчи девон “Бадоиъ-ул васат”даги 230-ғазални безаши керак эди. Расм пастида ғазалнинг қутидаги уч байти битилган:

*“Айлаган қадду юзинг борида сарву гул ҳавас,
Даҳр бўстонида андоқ бўлмагай бир бул ҳавас.*

*Нозанин қаддинг ниҳоли бирла рухсоринг гулин,
Кўргали не сарв қилдим орзу ва не гул ҳавас?*

*Сарвинаозим бошида то кўрди мушкин кокилин,
Шамъ айлабтур муанбар дудидин кокил ҳавас.*

*Кўрди то сарв қаду гулдек юзингни боғбон,
Гулишан ичра қилмади шамиод ила сунбул ҳавас”.⁹*

Ушбу ғазалнинг охирги байти – мақтаъсида шоир ёзган эди:

*“Айлади бир холи ҳинду рўзгоримни қаро,
Эй Навоий, тонг йўқ, этсам Ҳинд ила Кобул ҳавас”.¹⁰*

Тақдир тақозоси билан улуғ шоир девонининг ушбу ноёб қўлёзмаси Ко-
бул орқали Ҳиндистонга келиб қолган. Подшоҳ Жалолиддин Муҳаммад
Акбар ёки шаҳзода Султон Салим (бўлғуси подшоҳ Нуриддин Муҳаммад
Жаҳонгир) ўз саройидаги мусаввирларга буюриб, бу ғазални безаш учун ав-
вал яратилган расм асосида кишиларни XVI аср муҳитига мос қўринишида
акс эттиришган. Бу расмда Ҳирот услубидаги бино саҳнида созанда, ҳофиз
ва қўлида китоб ушлаган улуғ ёшли шоир Алишер Навоийнинг рамзий тас-
вири. Очик бино ичидаги шаҳзода ва соқий. Улар олдида ҳам китоб. Бино
устида икки гўзал аёл тасвири.

⁸ Алишер Навоий. 10 жисилдик. 4-жисилд. “Ҳазойин-ул маоний”, “Фавойид-ул кибар”. – Тошкент, 2012, 138-ғазалдан, 143-бет.

⁹ Алишер Навоий. 10 жисилдик. 3-жисилд. “Ҳазойин-ул маоний”, “Бадоиъ-ул васат” – Тошкент, 2012, 230-ғазалдан, 235-бет.

¹⁰ Ўша жойда.



Бу расм таъкидланганидек, аввалги нусхаси асосида ижод қилинган бўлиб, унда бино нақшларига ўзгартириш киритилмаган. Аммо инсонлар қиёфаси, осмон, Ҳиндистонга хос иккита дараҳт тасвири киритилган.

Шоир лирик қаҳрамонини таърифлар экан, рассом, шаҳзода ва соқийни ёш ва чиройли йигитлар сифатида юксак маҳорат билан тасвирлаган. Тақдир тақозоси билан “Хамса” ва “Терма девон” қўлёзмаси Ҳиндистонга келиб қолиб, унга ўз даври подшоҳлари Ақбар ва Жаҳонгир расмлар ишлатгани ажиб бир ҳолдир.

Девондаги бешинчи расм (95-расм) юқорисида “Бадойиъул васат” девонидаги “мараз” (касаллик) радифли 278-ғазалдаги учинчи байтдан бошлиниб қуйидаги беш байт битилган:

*“Гар маразнинг лозими дард ўлди, билмон, эй кўнгул,
Дардманд этгайми оз дилситонимни мараз.*

*Садқаси айланг мени мардудни, эй дўстлар,
Ким заиф этмии улустин тонлагонимни мараз.*

*Дардлиг кўнглум ҳалокин истарамким куйида,
Ёқмии ул овораи бехонумонимни мараз.*

*Юз туман мендек куҳан тир ўлса онинг садқаси,
Килмасун озурда, ё Рабб навжавонимни мараз.*

*То мариз ўлмии ниғорим – қон тўкар гирён кўзим,
Эй Навоий, дей олурман – тўқти қонимни мараз”¹¹.*

Ушбу шеърнинг остига сулс ёзувида адхалаллоҳу алжанната¹² деб битилган. Бу ғазалнинг матлаъси ва иккинчи байти қуйидагича:

*“Қилган эрмии нотавон сарви равонимни мараз,
Зор ўларменким, қилибтур зори жонимни мараз.*

*Чу топар озор жононим мараздин, йўқ ажаб,
Айласа озурда жони нотавонимни мараз”¹³.*

Расмда биз шаҳзода султон Салим, дўсти ва унинг севгилиси тасвирини кўрамиз. Гўзал аёл ўнг кўлинини кўксига қўйиб шаҳзода ишқида мараз – касал бўлганини намойиш этмоқда. Бу рассомнинг шеър руҳиятини жуда яхши тушунганини қўрсатади. Улкан дараҳт яқинида шаҳзода ўз сухбатдоши билан ёй ва камон тўғрисида сўзлашаётгандай кўринади.

¹¹ Алишер Навоий. 10 жилдлик. З-жилд. “Хазойин-ул маоний”, “Бадойиъул васат”. – Тошкент, 2012, 278-ғазалдан, 283-бет.

¹² Оллоҳ жаннатига сазовор бўлгур.

¹³ Ўша жойда.

Ўнг томонда эса ўз дарди – касаллигини изҳор қилаётган маъшуқа. Расм пастида нилуфар гуллар қийғос очилган, икки жуфт ўрдаклар тасвирланган.

Олтинчи расмда (96-расм) “Фаройиб-ус сиғар” девонидаги 355-ғазалнинг охирги беш байти битилган:

*“Токи сайдингмен, ишиңг невчун газабдур чун мудом,
Күш гирифтор ўлса кўнгли хуш бўлур сайёднинг.*

*Ўлмогимни боқма ҳижронингда, эй султони ҳусн,
Қатл ҳукми қиласа шоҳ не эрки бор жаллоднинг.*

*Рокеъ эрдим, чанг уни келди саҳаргоҳ, оҳқим,
Борди мутриб нағмасига ҳосили авроднинг.*

*Йўл қоронгудир, талаబ ноқис, қадам не нав урай,
Ёрумай комил дамидин машъали иришоднинг.*

*Эй Навоий, неча булбулдек физон ул гул учун,
Йўқ анга таъсири чун бу нолау фарёднинг”.¹⁴*

Расмда Ҳирот услубидаги бино саҳнида кўнгил очаётган Хусрав сиймоси ёки Ҳиндиистон шаҳзодаси султон Салим. Унинг икки тарафида аъёнлари ва мулозимлари. Пастроқда созанда ва хонандалар. Рассом шоир ғазалидаги дардини шундай ифодаламоқдаки, айшу базм ҳам унинг ишқи дардини пасайтира олгани йўқ.

Рассом Фаррухбек номи яна бир миниатюра¹⁵ тагига ёзилган бўлиб, унинг ҳошиясига настаълиқ хатида Алишер Навоийнинг “Эрур” радифли ғазалидан қуидаги ўн байт битилган:

*“Ваҳ не сарвидурки то, хилъат кийибдур савсаний,
Чок ўлуб гул хилъати, булбул иши вайрон эрур.*

*Савсану сарви агар йўқтур дамимдин бөг аро,
Үртанибон сарву савсан хулласи барбод эрур.*

*Айни иффатдин ўшул покиза гавҳар жисмида,
Хилъат эрмаским нақши эткан каби пўлод эрур.*

¹⁴ Алишер Навоий. 10 жилдлик. 1-жилд. “Хазойин-ул маоний”, “Фаройиб-ус сиғар”. – Тошкент, 2012, 355-ғазалдан, 376-бет.

¹⁵ The Library of Chester Beatty. A Catalogue of the Indain Miniatures by Th.W.Arnold/ vol.London? 1936. p.25, Pl.64; Ashok Kumar Das: Farrukh Beg: Studies of Adorable Youths and Venerable Saints/Mughal Masters. Further Studies. Edited by Asok Kumar Das. Mumbai. Marg publication.vol. 49 No. 4.1998. p.105, pl. 7.

*Шоми гам кўнглум узору хулласин ёд айлабон,
Мехр ўти ҳар ён бинафши этган булутидин ёд эрур.*

*Қозғони гам Бесутун тогин Навоий илкида,
Ваҳки савсан барги эрмас, тешаш Фарҳод эрур”.*

Бу байтлар шоирнинг “Хазойин-ул маоний” тўплами тўртинчи девони “Фавоид-ул кибар”даги 194-ғазалдан олинган.¹⁶

Китобдаги ва миниатюра ҳошиясидаги ғазал матни солиширилганда, миниатюрадаги учинчи байт нашрда йўқ эканлиги маълум бўлди.

Миниатюра ўртасида қийғос гуллаган савсан дарахтлари олдида, бинафша рангли, булутиларнинг рамзий нақши туширилган – устида “савсаний” – бинафша рангли халъат – тўн, ичидан сариқ қабо кийган, елкасига сочиқсифат мато ташлаган, катта салла ўраган, қуюқ қошли, қулогига сирға таққан ёш йигит тасвирланган. Дарахт шохларидаги гуллар кўркамлигидан хониши қилиб, “иши барбод” бўлаётган бешта булбул турли ҳолатларда нақш этилган. Орқадаги тўқ сарғиш дала ва узоқдаги оппоқ осмоннинг юкори қисмида “ҳар ён бинафш этган” мовий булат тасвири.

Расмнинг ўнг қисмида “Амали Фаррухбек, етмиш ёшида чизган” деган ирик, дағалроқ настальиқ хатидаги қайд мавжуд.

Бу расм кейинчалик катта зийнатланган лавҳага ўрнатилган бўлиб, пастки ҳошиясига “Амали Фаррухбек” деган настальиқ хатида битик киритилиб, ҳошиясига хинд услубида турли гуллар тасвири билан безак берилган.

XVI асрнинг иккинчи ярми – XVII аср бошларида Ҳиндистонда жуда машхур бўлган рассомлардан бири Фаррухбек аслида ким эди?

Мовароуннаҳрлик бўлган Фаррухбек 1585 йилда Ақбар саройига келиб, “Тасвирхона”да ўз ўрнини топган.

Фаррухбек Ақбарнинг вазири, тарихчи олим Абулфазл Алломийнинг “Ақбарнома” ва “Ойини Ақбари” асарларида қайд этилган икки рассомдан биридир. Фаррухбек номи Нуриддин Мухаммад Жаҳонгирнинг “Тузуки Жаҳонгирий” асарида хам қайд этилган бўлиб, рассом ўз асари учун икки минг рупий мукофот олгани ёзилган.

Ёзма манбаларда Фаррухбекнинг илк ижоди ва ҳаётининг сўнгги йиллари тўғрисида маълумот учрамайди. Рассом Эрондаги сафавийлар ва Мовароуннаҳрдаги шайбонийлар даври ижодкорларининг замондоши эди. У ўз ижодини даставвал Кобул шаҳрида, Ҳумоюн Мирзонинг иккинчи ўғли Мирзо Мухаммад Ҳаким ҳомийлигига бошлаган бўлиб, яна бир Фаррух Ҳусайн номли рассом билан бирга ижод қилган. Мухаммад Ҳаким Мирзо вафот этгач, Ақбар саройига таклиф этилган.

Бизгача Мирзо Мухаммад Ҳаким ва унинг хизматкори Ҳожи Ёқут тасвири етиб келган. Бу сурат Фаррух Ҳусайн томонидан ҳижрий 998 или яратилган бўлиб, Жаҳонгир тузган машхур “Муракқаби гулшан” асаридан ўрин олган.

¹⁶ Алишер Навоий. “Хазойин-ул маоний”, “Фавоид-ул кибар”. Наирга тайёрловчи Ҳ. Сулеймон. Тошкент: Фан, 1960, 199-бет, 194-ғазал.

“Мураққаи гулшан”да Фаррухбек яратган ёш йигитлар ва нуроний мўйсафидларнинг ажойиб расмлар туркуми ҳам сақланиб қолган.

Рассомнинг Акбар тасвирхонасида яратган расми Низомийнинг “Хамса” асари қўлёзмасига ишланган. Китобда ўттиз олтига расм бўлиб, шулардан камида еттитаси Фаррухбекка тегишили. Улардан иккитасини бир ўзи яратган, қолганларини яратишда ёш рассомлардан Ҷарамадас (198-б ва 205-а вв.), Ҷанраж (203-а в.) ва Беҳзод (Хожа Абдуссамаднинг иккинчи ўғли) (209-а, 249-б вв.) иштирок этган. Бу расмларни 1586-1588 йилларда яратилган дейиш мумкин.

Фаррухбек расмларининг тарҳлари Жомийнинг 1556-1565 йиллари яратилган “Ҳафт авранг” асарига ишланган расмларга яқин. Улар ўз ўрнида Алишер Навоийнинг “Девони” расмларига ўхшашдир. Фаррухбек шаҳзода Салим тасвирхонасида хизмат қилган Оқа Ризо, Абулҳасан ва Вишнудаслар каби қайтариқлар чизмайди, балки ҳар бир расм учун алоҳида, ўзига хос тарҳ топишга ҳаракат қиласиди.

Барча рассомлар учун умумий хусусиятлар шаклланиши уларнинг ижодий ҳамкорлигига боғлиқ, аммо Фаррухбек бундан истисно тариқасида, кейинчалик яратилган асарларини бир ўзи тугаллашга ҳаракат қилганини кузатамиз.

Фаррухбек иштирок этган расмли қўлёзмалардан яна бири “Бобурнома” бўлиб, унинг варакларидан ўн саккизтаси Лондонда, Англияниң Виктория ва Альберт музейида сақланмоқда. Булардан учтаси 1912 йили Генри Вевер мажмуасида бўлган, ҳозир эса Вашингтондаги Артур М.Саклер галереясида сақланади.

Рассом умри давомида Акбар, сўнгра Жаҳонгир ва кейинчалик Шоҳи Жаҳон хизматида бўлди. Унинг етмиш ёшлигида ўзини бир мўйсафид сифатида тасвирлаган расми бор. Сурат тагига Шоҳи Жаҳон ўз қўли билан “мусаввир Фаррухбек асари ва ўз расми” деб ёзган. Унинг номи тарихчи Абулфазл Алломийнинг “Акбарнома” ва қомусий характерга эга бўлган “Ойини Акбарий” асарида эслатилгани дикқатга сазовордир.

Фаррухбек Алишер Навоийнинг “Мажолис-ун нафоис” тазкираси матни лавҳаси битилган варақ ўртасига китоб ўқиётган қора мўйлабли ёш йигит тасвирини ишлаган бўлиб, четда майда настаълик ҳатида “шабиҳи Шоҳ Таҳмосиб, подшоҳи Эрон” деб ёзиб қўйилган. Расм ҳошияси бўлган меҳробий нақш ичидаги эса қўйидаги ёзув мавжуд: “Икки матлаъ битилур, бири буким:

*“Ииқи ту ки, сармояи мулки ду жаҳон аст,
Алминнату лилаҳки, маро бар дилу жон аст”.*

Яна бири буким:

*“Риндему ошиқему жаҳонсўзу жома чок,
Бо давлати гами ту зи фикри жаҳон чи бок”.*

Бу факир аввал назмеким, ўрганибмен, бу сўнгги матлаъдур. Ҳамоно уч ёш била тўрт ёшнинг орасида эрдим. Азизлар ўқимоқ таклифи қилиб, баъзи ҳайрат изхори қилурлар эрди. Ва маснавийлари ҳазрат мавлоно Жалолиддин (куддиса сирриху) маснавийларининг вазнидаким, “рамали мусаддас”¹⁷ сўзида тугайди.

Бу варакдаги матн Алишер Навоийнинг “Мажолис-ун нафоис” тазкирасидаги шоир ва сўфий Амир Қосим Анвор тўғрисидаги маълумотнинг айнан ўзидир.

Иккинчи рассомнинг ўз расми четидаги меҳробий нақш ичida яна шу тазкирадан қуидаги матн лавҳаси чиройли настаълиқ хатида битилган:

“...дерлар воқеъ бу туурким, мисраъким:

“Буд дар Табриз саййидзодае”

Андин, гўёки мақсад ўзлари дур ва таржеъларининг банди ва байтдурким:

*Туи асли ҳама пинҳону пайдо,
Ба афъолу сифоту зоту асмо.*

Ва ул ҳазратнинг муборак марқади Жом вилоятида Харжард қасабасидадур. Факир ҳам ул остона жорубкашлари динман. Вафотлари санаи хамса ва салосина ва самона миада воқе бўлубдур. Зоро батарки...¹⁸

Ўз вақтида XVI аср тарихчиси Қози Аҳмад Кумий ўзининг “Гулистони хунар” китобида “Мажолис-ун нафоис” тазкирасининг Султон Али Машҳадий хатида битилган расмли қўллэзмасини кўрганини ёзиб қолдирган эди. Бу ноёб қўллэзманинг бир вараги АҚШ мажмуаларидан бирида сакланиб қолган бўлиб, Ҳиндистонда у қўллэзманинг баъзи варакларига Фаррухбек расм ишлаган экан.

Бизнинг тадқиқотларимиз шуни қўрсатмоқдаки, Алишер Навоий давридаги юксак маданият кейинчалик бобурийлар даврида давом эттирилган, буюк мусаввир Камолиддин Беҳзод ва унинг шогирдлари яратган анъаналар Ҳиндистон заминида Акбар, Жаҳонгир ва Шоҳи Жаҳон томонидан ҳомийлик қилиниб, давом эттирилган, бунда эса буюк бобокалонимизнинг учта асари – “Хамса”, “Терма девон”, “Мажолис-ун нафоис” тазкираси алохида ўрин тутган. Навоий асарларига Ҳиндистоннинг машхур рассомлари Фаррухбек, Лаъл, Дхарамдас, Мукунд, Говардхан, Маноҳарларнинг ажойиб расмлар ишлага ни қувончли ҳолдир. Бу мумтоз миниатюраларни Ўзбекистон ва Ҳиндистон дўстлигининг ноёб обидалари деб баҳолаш мумкин.

¹⁷ Ashok Kumar Das: Farrukh Beg: Studies of Adorable Youths and Venerable Saints / Mughal Masters. Further Studies. Edited by Asok Kumar Das. Mumbai. Marg publication. vol. 49 No. 4.1998. p.107, pl.10; Алишер Навоий. “Мажолис-ун нафоис”. 10 жилдлик. 9-жилд. – Тошкент, 2012, 292-саҳифа.

¹⁸ Ўша жойда. Op.cit. p.96.



Шавкат КАРИМОВ

1940 йилда тугилган. Тошкент давлат чет тиллари институти (хозирги ЎзДЖТУ) немис филологияси факультетини тамомлаган. Республика ва хорижий национальларда юздан ортиқ мақолалари эълон қилинган. “Диллардан дилларга”, “Тилишуносликка кирши”, немис тилига ихтисослашган академик лицейлар учун “Немис тили”, “Немисча-ўзбекча лугат”, “Ўзбекча-немисча лугат”, “Немис адабиёти тарихи” каби ўндан ортиқ китоб, монография, кўлланмалари чоп этилган.



АБДУЛЛА ҚАҲХОР ИЖОДИ ХОРИЖИЙ ТАРЖИМОНЛАР ТАЛҚИНИДА

Ўзга халқлар маданий меросидан ўз жамияти ривожи учун зарур томонларни танлашда миллий адабиётнинг етуклиги катта аҳамият касб этади. “Ҳақиқий миллий адабиёт факат бошқа халқлар адабиётлари билан самарали ўзаро алоқага киришгандагина тузилиши ва шаклланиши мумкин” (И.Р.Бехер). Шу боис, ҳар бир миллий адабиёт ўз тараққиёти жараёнида ўзга халқлар адабиётлари билан алоқада бўлиб, уларнинг тажрибасини ўрганиб, ўз миллий анъаналарига муқояса килиб бойийди ва камолот босқичлари томон одимлайди.

Ўзбек адабиётининг халқаро алоқаларини ривожлантиришда миллат ва адабиёт фидойиси Абдулла Қаххордек забардаст сўз санъаткорларининг истеъодд ва қобилияти катта кўмак берганлиги адабиёт ва адабиётшунослик тарихидан маълум.

Абдулла Қаххорнинг жаҳон адабиётидан ўғирган таржималарини таъкидлаганимизда ҳам у адабиётимиз тарихида маҳоратли таржимон сифатида фаҳрли ўринга эга бўлар эди.

XX асрнинг биринчи ярмида жаҳон адабиётидан Абдулла Қаххордек биринчи авлодга мансуб ижодкорлар томонидан қилинган таржималар, ўзга халқлар маданияти, анъаналари бадиий маҳорати билан ўзбек адабиёти ривожига самарали таъсир кўрсатганлиги адабиётимиз тарихида алоҳида қайд этилган. Ўзбек китобхони А.С.Пушкин, Л.Толстой, А.П.Чеховни буюк сўз сеҳргарлари сифатида тарниган бўлса, бунга Абдулла Қаххор ва кўплаб таржимонларимиз ҳиссаси бекиёс.



И.Боролинанинг хотирлашича, Абдулла Қаҳхор ўтган асрнинг 50-йиларида Кибриёхоним билан “Уруш ва тинчлик”ни таржима қилишга киришган пайтларда Толстой қаҳрамонлари билан бақамти яшаш ниятида Москвадаги Арбат кўчасида яшайдиган танишларининг уйида турган ва роман қаҳрамонлари руҳиятига киришга интилган.

Абдулла Қаҳхор ўзга халқ адабиётида воқеа бўлишга улгурган умрбоқий асар нуфузига сазовор бўлган қисса, роман ёки ҳикояни таржимада ўртамиёна асар ҳолига тушмаслиги учун курашар ва бошқа ҳамкасларидан ҳам буни қатъий талаб қиласр эди. Айни пайтда ўз асарларининг бошқа тилларда аслиятдаги даражасини сақлаб қолишни таржима мезони деб қарашларини уқтираср эди.

Абдулла Қаҳхор асарлари сўзларининг мағзи бутунлиги, ортиқчалик ва бежамадан холилиги боис, уларни бошқа тилга ўгириш таржимонга мушкуллик туғдириши табиий ҳол эди. Бир гал ҳикояси таржимада қарийб икки ҳисса кўпайиб кетганини кўриб, таржимонни койиб берганлигини ёзишган. Шунда таржимон адибга эътиroz билдириб:

– Тўғри, сиз ажойиб ҳикоя ёзгансиз. Лекин таржима қилган одам уни жиндеқ бўлса ҳам кенгайтиргиси, жиндеқ унга қўшиб қўйгиси келаверади. Бундай ҳолида эса у ўта сиқиқ, ҳаво етишмаётгандек... – деган эди.

Қаҳхор барибир кўнмасдан:

– Майли, ёмонлигича, аммо-лекин менини бўлиб қолсин. Мен ёзган нарсани “яхшилашингиз” шарт эмас, – деган.

Ёки бошқа бир мисол. Абдулла Қаҳхорнинг ўша пайтларда “Шоҳи сўзана” комедиясини Москванинг машҳур “Моссовет” театри “Янги ерда” номи билан кўймоқчи бўлганида, муаллиф эътиroz билдиради. Бу ном Қаҳхорга жўнроқ, публицистик номдек туюлади. Унинг устига миллий бўёқ, миллий рух йўқолиши мумкин. Абдулла Қаҳхорнинг сўзида туриб олиши натижасида асар “Шоҳи сўзана” номи билан намойиш этилади.

Турли миллат вакиллари бўлган ижодкорларнинг ўзаро дўстлиги нафақат уларнинг ўзларига, балки улар мансуб бўлган адабиётларга ҳам наф келтириши табиийдир.

Абдулла Қаҳхор ва Константин Симоновларнинг дўстона алоқалари ибратли ва манфаатли адабий ҳамкорлик намунасиdir. Устоз адиб Одил Ёкубовнинг хотирлашича, К.Симонов 1959 йил кузагида Абдулла Қаҳхорнинг “Синчалак” қиссасининг таглама (сўзма-сўз) таржимасини ўқиб чиққан, қисса унга маъқул бўлганидан сўнг таржима қилишга киришган экан.

Қаҳхор замондошлари ўша йиллари К.Симоновни кўп бора Абдулла ака хонадонида бўлганини эслашади. К.Симонов Абдулла Қаҳхор қиссасининг ҳар бир жумласига, сўзига эҳтиёткорлик билан ёндошиб, муаллиф фикрига диққат билан қулоқ солиб, ҳар бир жумла маъносига чуқур кириб боришдан ташқари, унинг нимага шаъма қилаётганини, ёзувчининг ўзига хос юморини илғаб олишга ва аниқ беришга ҳаракат қилган. Русчага қилинган яхши таржима туфайли “Синчалак” кўпгина хорижий тилларга ўтирилди.

Воситачи тилдан “Синчалак” таржимон Э.Брюмлер томонидан немисчага ўгирилди. Табиийки, К.Симонов эришган ютуқлар ва йўл қўйган қусурлар немисча таржимада ҳам ўз ифодасини топган.

Абдулла Қаҳҳор асарларини ўзбек миллий турмуш тарзининг бадиий энциклопедияси дейиш мумкин. Бир сўз билан нишонга тегадиган деталлар, имо-ишора орқали ўзбекларга хос турмуш тарзини ифодалаш Абдулла Қаҳҳорга хос. Ўзбек хаёти ва турмуш тарзини билмайдиган таржимон буни таржимада ифодалай олмаслиги аниқ. Натижада, асарнинг бадиий ўзига хослиги йўқолади. Шу боис, у ёки бу миллий адабиётга дахлдор асарни таржима қилишдан олдин ўша ҳалқ ҳаётини яхши ўрганиш мақсадга мувофиқ.

Абдулла Қаҳҳор асарларида ҳалқона ибораларни бадиий қайта ишлаш ҳоллари тез-тез учраб туради. Натижада, фразеологизм маъноси янгиланади, иборалар таркибидаги ифода ўзгаради, жозибадорлик касб этади. Айни замонда, сиқиқлиги ва ифодалилиги ҳалқона бирликларга яқин янги иборалар пайдо бўлади. Ўзбекча, русча ва немисча ибораларни муқояса қилганимизда ҳар учала тилда ҳам табиий жаранглаган ибораларга гувоҳ бўламиш.

Айрим мисолларга мурожаат қиласиз. “Афлотуннинг қизи бўлсангиз ҳам гапни тонналаб олинг-у, граммлаб сотинг” (“Синчалак”, 30-бет). “Даже мудрецам советуют покупать слова пудами, а продавать золотинками” (“Птичка-невеличка”, 42), “Auch dem Weizen rat man die Worte pfundweise eunkaufen, aber grammveise zu verkaufen” (Sekräter Saida, 41). “Тўғри, жуда тўғри: игна билан битадиган ишга жуволдиз тиқиб ўтирасаг-у, сизнинг ўрнингизга ўша одамларимиздан бирини киргизсак” (“Синчалак”, 41-бет). “Вот и мне кажется, что нечего лезть с шилом туда, где может и иголка спрашиться!” (“Птичка-невеличка”, 58). “...daß man die Ahle nicht dort aussetzen soll, Wo die Nadel genugt!” ((Sekräter Saida, 65). “Афлотуннинг қизи”, “гапни тонналаб ол, граммлаб сот”, “игна билан битадиган ишга жуволдиз тиқма” каби фразеологик бирликлар ҳар икки тилда ҳам аслиятдагидек ўгирилган. Оригиналлик ва ифоданинг табиийлиги сақлангани муаллиф индивидуал услубини ифодалашда муҳимдир.

Ҳар икки таржимада ҳам сўзма-сўз таржима усулига таржимонлар тез-тез ва муваффакиятли равишда мурожаат этганлар. Қиссада Мехри Саида ҳузурига келиб, ўзининг Зулфиқоров билан муносабатлари ҳақида алам билан сўзлайди:

– Мен бу итга қанақа қилиб иккинчи хотин бўлиб қолганимни ўзим ҳам билмайман, – деди Мехри ўпкасини тутолмай. Саида унинг силлиқ қилиб тараалган ва йилтиллаб турган сочига, ўз аҳволини идрок этиб, мусибатдан бирпасда сўлиган чўтироқ, тўла юзига қаради ва ўзича гапиргандай, ўйчан:

– Ит очиқ қолган қозонни ялайди, – деди (“Синчалак”, 71-бет).

Бу парчада “ит” сўзи билан боғлиқ сўз ўйинини ўқувчи сезмаслиги мумкин эмас. Мехри беписандлик билан Зулфиқоровни ит деб атайди. Саида унга жавобан “Ит очиқ қолган қозонни ялайди”, – деб жавоб қайтаради.

Мазкур ибора ҳам рус ва немис тилларига сўзма-сўз таржима қилинган. Лекин катта маъновий юқ, образлилик ва лўндалик сақлаб қолинган.



Йиллар ўтиб, таржимонларда Абдулла Қаҳхор ижоди билан хорижий китобхонларни кенгроқ таништириш истаги пайдо бўлганлиги унинг асарлари барча даврларда ҳам ўз долзарблигини йўқотмаганлигидан да-лолатдир. Ёш мутаржим Ойбек Остонов немис шоири Хайнц Эрхардинг “Яна бир шеър...” китобининг таржимаси орқали машаққатли таржима амалиёти азиятларини ўзида синаб кўрди. Сўнгра Шарқ до-нишмандлиги ривоятларини тўплаб, “Буюк ипак йўли ҳикоятлари” номи билан немисчага ўгириб, немис ўқувчилари эътиборига тушди. Бу рағбат унга Абдулла Қаҳхорнинг йигирмата ҳикоясини саралаб, немис тилига ўгириш журъатини берди. Натижада “Der Granatapfel” (“Анор”) дунё юзини кўрди. Таржимашуносликда ўз тилидан ўзга тилга ўгириш ҳамма вақт ҳам ижобий натижа беравермаслигини таъкидлайдилар. Дарҳақиқат, таржимада фақат тил билиш кифоя қилмайди, уни хис қилиш, ўша тилда яшаш, дунёни ўз тилингда идрок этиш даражасида фаҳмлаш зарур.

Ойбек Остоновнинг ўзбекчадан немисчага таржима қилиш майли ва хоҳишини оқладиган жиҳатлар бор. Биринчидан, ўзбекларнинг халқчилиги бўлса, иккинчидан, Абдулла Қаҳхор ҳикоялари орқали халқнинг феълатвори, урф-одати, менталитетини намоён этиш имкониятининг кенглигига. Учинчидан, таржима жараёнида Ойбек Х.Биркли, Г.Фрич, Д.Клен, Ю.Варлес каби немис мутахассислар билан бақамти ишлагани, шунингдек, ўзбек германист филолог-таржимонлар Ҳ.Қўчкорова, Я.Эгамоваларнинг холис маслаҳатларидан самарали фойдаланишга интилгани Абдулла Қаҳхор аслиятига яқин матнларни яратиш имкониятини берганлигини ҳам айтиб ўтиш жоиз.

Ўзбек нашриётида, ўзбек таржимони томонидан ўгирилган асар немис ўқувчисини топармикан, деган савол туғилиши табиий.

Шу ўринда таржимон Ойбек Остоновнинг мамлакатимизда равнақ топиб бораётган сайёҳлик саноатига дахлдорлигини айтиб ўтиш ўринли. У Германия, Австрия, Швейцария, Люксембург, Лихтенштейн каби немис тилли мамлакатлардан келган сайёҳларга юртимиз осори атиқалари, диққатга сазовор тарихий, меъморий ва маданий ёдгорликларини кўрсатади, улар ҳакида сўзлаб, меҳмонларни мамлакатимиз ҳакида кўп ва хўб манбалар билан ошно қиласди. Сайёҳлар олимлар, шоирлар, санъат ахллари қадамжоларини зиёрат қилганларида таржима қилинган асарлар қўл кела-ди.

Европа туризм саноати тажрибасида машҳур шахслар номлари билан боғлиқ жойлардан сайёҳлар қадами узилмайди. В.Моцарт, И.Бах, С.Бетховен, Й.Гёте, Ф.Шиллер, Х.Хессе, М.Лютер ва бошқаларнинг қадамжолари чинакам зиёратгоҳга айланган. Австрияда саккиз миллион ахоли истиқомат қиласди, аммо ҳар йили ўн саккиз миллиондан зиёд сайёҳга хизмат кўрсатилади. Бу табиийки, мамлакат даромадининг катта улуши сайёҳликдан тушади, дегани.

– Қирғизистонда “Чингиз Айтматов манзиллари бўйлаб” туристик йўналиши мавжуд, – дейди таржимон Ойбек Остонов. – Шу маънода машҳур адибларимиз асарлари орқали дунё ахлини юртимиз ва унинг одамлари билан таништириш иштиёқи боис мен ҳам Абдулла Қаҳҳор,Fafur Ғулом, Ўткир Ҳошимов асарларини, Шарқ ривоятларини немисчага ўгиришга қарор қилдим. Германия туризм саноатида ишлайдиган ҳамкасларим билан ҳамкорликда Германиянинг ўн тўртта катта-кичик шаҳарларида китоб тақдимотларини ўтказдик. Натижа кутилганидан зиёда бўлди. Тадбирларимизда мингдан зиёд муҳлислар қатнашди. Немисчага ўгирилган китоблар билан бир қаторда йиғилганларда Ўзбекистон билан танишиш истаги ҳам пайдо бўлганлиги таҳсинга лойиқdir.

Ўзбек тилининг кўрки – нафосатини, ширадорлигини, миллий ўзига хослигини ўзида мужассамлантирган ҳикояларни аслиятдагидек ўгириш улкан билим, тажриба ва малака талаб қилишини Ойбек Остонов яхши билади, таржимани меъёрига етказиш бўйича ижодий ишлар давом этаётганини назарда тутсақ, қилинган ишлар хамир учидан патир эканлиги аён бўлади.

Абдулла Қаҳҳор асарларининг турли минтақаларда севиб ўқилишининг боиси, ёзувчининг ўз ибораси билан айтганда “халқнинг тили учидা” турган гапларни айтганлиги ва умумбашарий муаммоларни кўтарганлигидадир.

Абдулла Қаҳҳорнинг “Шоҳи сўзана” комедияси инглиз, испан, немис, поляк, француз, юнон, вьетнам тилларига таржима қилинган. Абдулла Қаҳҳорнинг Ослода норвег тилида “Ҳикмат бобо”, Стокгольмда швед тилида “Анор”, чех тилида “Даҳшат”, поляк тилида “Адабиёт муаллими” асарлари эълон қилинган.

“Синчалак” қиссаси Р.Тренков таржимасида болгар тилида “Птичкамничка” номи билан, Тху Хи Онг таржимасида вьетнам тилида, Эдемтрауд Брюммер таржимасида икки марта немис тилида, “Саида” номи билан румин тилида чоп этилган.

Абдулла Қаҳҳор асарлари хусусида германиялик ёзувчилар, танқидчилар газета ва журналлар сахифаларида, илмий рисолалар, оммавий китобларда ўз фикр ва мулоҳазаларини билдирганлар, адаб асарлари фазилатлари ни юксак баҳолаганлар. “Die Literaturen der Föllker der Sovjetunion” (Лейпциг, 1967) тўпламида адабиётшунос Герхард Дудекнинг ўзбек адаби ҳақидаги фикрлари эътиборлидир: “Қўқонлик чилангар ўғли Абдулла Қаҳҳорнинг отаси билан Фарғона қишлоқларини кезганлиги унинг кейинчалик ёзган асарларида ҳаққоний ифодасини топди. Абдулла Қаҳҳорнинг ижоди кўп қиррали: у моҳир сатирик, йирик прозаик, атоқли драматург, рус ҳамда жаҳон адабиётининг моҳир таржимони”, – деб таништиради. Абдулла Қаҳҳорнинг сиқиқ, лекин мавзу муҳимлиги билан ўқувчиларга манзур новеллалари кўпгина мамлакатларда севилиб ўқилаётганлигини ёзиб: “Қозоқ Мухтор Аvezov, ўзбек Абдулла Қаҳҳор, туркман Берди Кербобоев ва қирғиз Чингиз Айтматов ҳалқаро миқёсда эътироф этилган, кўпгина ҳалқларнинг ҳурматига сазовор бўлган санъаткорлардир”, – деб баҳолайди



“Дие мултинационале Карактер дер Литератур” (Берлин, 1969) деб номланган түпламда.

“Моҳир хикоянавис сифатида эътибор қозонган Абдулла Қаҳҳор адабиётнинг вазифасини тўғри ва чуқур тушунади. Унинг бу жанрга тез-тез мурожаат этганилигининг боиси давр ҳодисаларига муносабат билдиришда эпик жанрларга нисбатан кичик жанрларнинг оперативлик билан фарқланишидир. Ҳаётнинг тезкор одимига ҳамқадам бўлиш, турмушда шаклланиб бораётган янгилик куртакларини илғаш ва ифодалаш ҳикоя учун характерлидир. Абдулла Қаҳҳорнинг ҳикояга мурожаат этишининг яна бир сабабини адабнинг ижодига хос принцип – ихчамликка интилиш тенденцияси билан изоҳлаш ўринли бўлар. Лекин ихчамликка интилиш майли, бадиий ифоданинг қашшоқлигини билдиrmайди, албатта. Актуалликка, конкретликка мойиллик жамият ҳаёти ва тараққиётидаги типикликни бош масала қилиб кўрсатишга монелик кўрсатмайди, у, аксинча, маҳоратни на-моён этадиган бир воситадир” – деб тўғри муносабат билдирилган мазкур асарда.

Германиялик адабиётшуносларнинг холис баҳоси адабиётимиз билан таниш, жаҳон маданияти тақдирига алоқадор мутахассисларнинг нуқтаи назари ҳамдир.





Эрих ФРОММ

1900 йилда тугилган. Гейдельберг университетида таҳсил олган. Немис социологи, психологи ва файласуфи, Франкфурт фалсафа мактаби вакили, неофрейдизм асосчиларидан бири. Берлин, Колумбия, Мичиган, Мексика Миллий университетлари профессори. Инсон рухиятининг шаклланишида табиий ва ижтимоий омилларнинг нисбати мавзусида қатор асарлар яратган, ижтимоий тадқиқотлар билан фаол шугулланган. “Озодликдан қочиш”, “Одам – аввало инсон” номли китоблари уни дунёга танитган. 1980 йилда вафот этган.



ИНСОН ҚАЛБИ*

Иккинчи қисм

УНУТИЛГАН ТИЛ

IV. Фрейд ва Юнг

Менинг тушга берган таърифим, гарчи Фрейд назариясига асосланган бўлса-да, кўп жиҳатдан ундан фарқ қиласди. Туш мия фаолиятининг энг қутийир иррационал¹ вазифасини ҳам, энг олий даражадаги муҳим вазифасини ҳам ифодалаши мумкин, деб хисоблайман. Фрейд эса, ҳар қандай туш онгизлиқда содир бўладиган ғайришуурый ифода, деб хисоблайди. Туш таъбирининг кўп асрлик тарихини кузатадиган бўлсак, ҳар учала нуқтаи назар алоҳида ёки биргаликда қўлланганлигини кўрамиз. Бу мавзуга қуйироқда яна қайтамиз. Фрейдгача бўлган бу уч назарий йўналишни муҳокама қилишдан олдин Фрейд назариясини кўриб чиқамиз. Чунки айнан Фрейд туш таъбири ҳақидаги ҳозирги замон фани ривожланишига улкан ҳисса қўшган.

Унинг туш ҳақидаги назарияси ҳам, ўзининг инсон психологияси назарияси асосига қурилган, яъни инсонни бошқараётган куч унинг англаб етмаган ҳиссиётлари, интилишлари ва истак-хошишларида ётади, деган

* Охири. Бошланишии аввалги сонларда.

¹ Иррационаллик – қонун-қондадардан холи, ақл-идрок билан билиб бўлмайдиган.



тушунчага таянади. Бу интилишларни у “онг ости” (англашилмаган онг) деб атади. Уларни англашга биздаги ички “назорат” (цензор) йўл бермайди, демоқчи бўлади. Турли сабабларга кўра бундай истак-интилишларни тўсиб турамиз, энг асосийси, ота-онамиз, дўстларимиз ишончидан маҳрум бўлиш, истакларимизни ошкор қилиб қўйганимизда ўзимизни айбордек ҳис қилишимиз, улар ишончини йўқотишдан қўрқанимиз учун уларни ички онгимизга ҳайдаб, “қамаб” қўямиз. Аммо истаклар бутунлай йўқолиб кетмайди. Амалда уларнинг таъсири кучли, улар турли шаклларда кўриниш беради, “эшикдан ҳайдасанг, тешикдан кириб келганини” англамай қоламиз. Онгимиз эса бундай номақбул сезги ва истаклардан кутулдим, деб ўйлайди: шундай нарса борлигининг ўзи унинг учун даҳшатлидир. Улар қайтиб келгач эса, шу даражада ўзгариб, таниб бўлмас даражада намоён бўладики, онгимиз уларни мутлақо тушунмайди.

Невроз ҳолатини тушунтиromoқчи бўлган Фрейд айнан шундай мулоҳаза юритади. Унинг фараз қилишича, “назоратчи” томонидан онг остига ҳайдалган кучли истак-ҳоҳиш невроз касаллигининг баъзи кўринишларида ўз аксини топади, лекин улар ниқоб остида бўлганликлари учун биз қасаллик билан боғлиқ ўз азоб-уқубатларимизнигина кўра оламиз. Ўз ҳолига ташлаб қўйилган истаклар эса қониқмай қолаверади. Шундай қилиб, невроз қасаллиги ички жараёнларимиз билан боғлиқ эканлигини, унда моҳият борлигини, уни тушуниб етиш учун эса маҳсус йўл излаш кераклигини биринчи бўлиб Фрейд аниқлаб берди.

Бундай хulosани мисол билан ойдинлаштириш мумкин. Бир аёлнинг шикоят қилишича, ҳар гал бирор нарсага тегиб кетганда қўлини ювиш эҳтиёжи туғилаверган. Бу табиий бир белги бўлса-да, уни жуда қийнаб юборган, нима иш қилмасин, шу истак унга халақит бераверган. Нима сабабдан шундай бўлаётганини у тушунмаган. У ўз аҳволини, агар шундай қилмасам, енгиб бўлмас хавотирга ўхшаш безовталиқ таъқибига тушиб қоламан, деб тушунтиришдан нарига ўтмаган. Бундай аҳволга ҳеч бир сабабсиз тушиб қолишининг ўзи уни янада қийнаб қўйган. Унинг орзу-хаёллари ва эркин мулоқотларини таҳлил қилиб, аёл ўзининг кучли даражадаги душманлик кайфияти билан курашаётгандигини аниқлаш мумкин. Касалликнинг бошланиши эри унга хиёнат қилган пайтга тўғри келди. У эрига доимо итоат қилиб келган, ҳеч қачон унинг истагига қарши чиқмаган, уни ёмонламаган, гап қайтармаган. Ҳатто уни ташлаб кетмоқчи эканлигини эшитганда ҳам бир оғиз таъна қилмаган, айбламаган. Касаллик айнан ана шу пайтдан бошланган. Кейинги таҳлиллардан маълум бўлишича, аёлнинг отаси шафқатсиз, золим одам бўлган, аёл болалигига унга гап қайтариш, ундан хафа бўлишдан қўрқсан. Таҳлил яна шуни кўрсатадики, аёлнинг мулоҳимлиги, итоаткорлиги унинг ҳиссиётдан бегона эканлигини билдирилди. Аксинча, унинг ички оламида нафрат тўпланаверган, хатти-ҳаракатларида эса буни билдираган: факат ўй-хаёлларида гина отаси ўлганлигини, ўлдиришганини, мажруҳ қилишганини тасаввур қилган, холос. Нафрат ва ўч олиш истаги борган сари кучаяверган, лекин қўрқув ва виждан азоби



бундай истакларни босиб турган. Эрининг қилмиши яширин ҳиссиётларини ловулатиб юборган. Шундаям у истакларини юзага чиқармаган, нафратини сездирмаган. Душманлик кайфиятини англаб етганда эди, ҳеч бўлмаганда, эридан ўч олиш истаги пайдо бўлган, невроз авж олмаган бўларди. Аммо у ўзидаги душманлик кайфиятини англай олмаган.

Аёлдаги невроз касаллиги душманлик кайфиятига қарши жавоб тариқасида пайдо бўлди.

Бирор нарсага тегиб кетишни, ғайриихтиёрий равишда, уни йўқ қилишга қаратилган ҳаракат деб қабул қилган ва бундай “бузғунчилик”дан покла-ниш учун қўлинни дарҳол ювган. Содир этган “жиноят”идан фориф бўлиш учун миясида ўрнашиб қолган фикрдан қутула олмаган, бунинг сабабини билмаган. Онг остига киргачгина аёлнинг маъносиз ҳаракати аён бўлди. Англашилмаган бўлса-да, шу усулда аёл ўз нафрати билан курашган, айб-дорлик ҳиссидан қутулмоқчи бўлган.

Онг остида содир бўлаётган жараёнларни тушунишни ўрганиб ол-ган Фрейд янгилик каشف этди, бу кундалик турмушимиздаги айрим хатти-ҳаракатларимизга, масалан, кўп тадқиқотчиларнинг бошини қотириб қўйган ҳодисалар – хотирамиздаги бальзи нарсаларни тўsatдан йўқотишимиз, янглишиш каби ҳолатларни тушунишга ойдинлик киритди. Эскидан таниш бўлган одамнинг исмини бирдан унтиб қўйиш ҳолати бар-чамизга маълум. Албатта, бунинг сабаблари кўп бўлиши мумкин. Аммо Фрейднинг аниқлашича, кўпинча ичимиздаги аллақандай нарса ўша исм ҳақида ўйлагиси келмайди, бунга кўпинча ўша исмнинг қўркув, нафрат ёки шунга ўхаш ҳиссиётлар билан боғлиқ эканлиги сабаб бўлади. Бундай малол қеладиган истакдан қутулиш ҳисси хотирамизга таъсир қилади-да, уни унтиб қўямиз. Бир гал Ницше айтганидек: “Хотирам шипшитганидек, мен у ишни бажарганман, ғурурим эса ундан бўлиши мумкин эмас, деяпти. Хотирам унга ён берди”.

Бундай тасодифий келишмовчиликларга доимо қўркув ёки айбдорлик ҳисси сабаб бўлади, деб ҳам бўлмайди. Агар бирор киши ким биландир учрашиб “салом” дейиш ўрнига билмасдан “хайр” деб юборса, у ҳолда ўша киши ҳақиқий ҳиссини билдириб қўяди: у танишидан тезроқ қутулмоқчи ёки у билан кўришишни истамаган. Мавжуд қоидаларга кўра, у ўз ҳис-стуйғусини очиқ айта олмайди, шунга қарамасдан, ўзи билмаган ҳолда уни ёқтирмаслиги ошкор бўлди, дилидаги тилига чиқди. Онгли ҳолатда у ал-батта саломлашган бўларди, кўришганидан хурсанд эканлигини айтарди.

Фрейднинг фикрича, туш кўриш онгсиз истакларимиз кўринишининг яна бир томонидир. Бедорликда назорат остида бўлган истакларимиз, онг-сизлик остида, худди невроз ва янглишиш каби, тушларимизда намоён бўлади. Бостирилган ҳис-туйғуларимиз ва фикрларимизнинг уйқумизда кўринишини туш кўриш деб атаймиз.

Туш ҳақидаги умумий тушунчалардан бир қатор конкрет фаразлар ке-либ чиқади.

Тушимиз сабабчилари онгсизликдаги истакларимиздир. Бедорликда



ўзимиз ҳам тан олишга журъат эта олмайдиган истакларимизга жон киради. Қонун-қоидаларга бўйсунмайдиган, бедорликда онгимиздан чикариб ташланган нафрат, шухратпастлик, рашқ, ҳасад ва айниқса, хирсий майл-истаклар тушимида намоён бўлишга йўл топади. Бундай онгизистаклар барчада ҳам мавжуд, деб ҳисоблади Фрейд. Жамиятдаги қонун-қоидаларга бўйсуниб, уларни босиб турамиз, аммо улардан бутунлай қутула олмаймиз. Тушимида эса онгимиз назорати пасайиб кетади. Шунинг учун улар ташқарига интилади ва тушимида намоён бўлади.

Бу масалага Фрейд янада чуқурроқ кириб борди. Туш кўриш назариясини уйқунинг вазифаси билан боғлади. Уйқу жисмоний эҳтиёж – вужудимиз иложи борича уни қўриқлади. Тушдаги онгизистакларимиз кучли бўлганда эди, улар бизни безовта қилиб, уйғониб кетган бўлардик. Бундай истаклар, шубҳасиз, жисмоний эҳтиёжимиз бўлган уйқуга халал берган бўларди. Уйку оромини сақлаш учун биз нима қилган бўлардик? Биз истагимиз қондирилди, деб хаёл қиласиз ва кўнглимиз жойига тушади, ўзимизни алданган деб ҳисобламаймиз, акс ҳолда безовта бўлардик.

Фрейд тушнинг моҳияти онгизистагимиз амалга ошиди, деб қилган хаёлнимиздадир, деган фикрга келади: яъни туш кўришнинг вазифаси уйқуни асраб қолишдир. Агар истагимиз онгиз бўлмасдан, туш мазмуни бузилмасдан “одатдаги” тушлардан фарқ қиласа буни осонгина тушуниш мумкин. Айтайлик, одам уйқудан олдин тўйиб шўр овқат еган. Туни билан сув ичгиси келади. У тушида сув қидириши ва қудукни топгач, чанқогини истаганча қондириши мумкин. Уйғониб, чанқогини босиш ўрнига уйқудаги хомхаёл билан қаноатланади, бу эса уйқудан уйғонмасдан ундан тўла фойдаланишга имкон беради. Хаёлан қониқиши ҳаммамизга ҳам таниш: соат жиринглашидан уйғониб кетамиз. Шу аснода тушимида черков қўнғироғи жаранглашини эшитамиз, бугун дам олиш куни деб ўйлаймиз ва эрта тургимиз келмайди. Бу ерда ҳам, тушимида уйқумизни қўриқлаш вазифасини ўтайди. Истакларимизнинг бундай оддийгини амалга ошиши моҳиятан онгизликни билдиримайди, деб ҳисоблади Фрейд. Бундай воеалар катталарда камроқ, болаларда кўпроқ учрайди ва асосан туш моҳияти ақл-идрок доирасидаги истакни эмас, балки бедорликда босиб турилган истакни билдиради, деб фараз қиласи.

Фрейднинг иккинчи фарази шундан иборатки, тушдаги амалга ошмаган онгизистагимизнинг илдизи болалигимизга бориб тақалади. Болалигимизда аниқ бўлган, вақт ўтган сари ўз ҳолига ташлаб қўйилган истакларимиз энди тушимида ўзини кўрсатмоқда.

Фрейднинг фаразича, бундай тасаввурлар асосида иррационалликдан иборат бўлган болаликнинг ўзи ётади.

Фрейднинг фикрича, бола феълида кўплаб ғайриижтимоий истаклар мавжуд. Уларни амалга ошириш учун унда жисмоний куч ҳам, билим ҳам етишмайди, шунинг учун ўзига зарар етказа олмайди, ундан ҳимояланиш зарурияти ҳам йўқ. Ниятларига эришганини эмас, балки уларнинг моҳиятини оладиган бўлсак, бола ғайриижтимоий ва ғайриахлоқий бир мавжудот. Би-



ринчи навбатда бу нарса унинг жинсий майллариға тааллуқли. Катталарда меъёрдан четга чиқиши деб аталашиб майл болалардаги мўътадил жинсий ривожланишнинг асосий қисмини ташкил қиласди. Чақалоқнинг жинсий куч-қуввати оғиз атрофида бўлади, кейин дефекация (бўшаниш) билан боғлик ҳолда жинсий аъзолари атрофида тўпланади. Ёш болаларда садизм² ва мазохизмга³ мойиллик кўпроқ кузатилади. У тешикдан мўралашга ишқибоз, ўзини яхши кўради, яъни нарцисстик шахс хусусиятлари кўринади. У ўта рашкчи, рақибларини аямайди. Жазодан кўркиш ҳисси унинг истакларини босиб туради. Отасининг буйруқ ва таъқиqlари остида унга бўлган нафрати аста-секин унга тақлид қилишга ўтади, отасига ўхшагиси келади. Виждоннинг шаклланиши “Эдип комплекси”⁴ кўринишининг натижасидир.

Фрейднинг бола ҳақидаги тасаввури муқаддас Августиннинг шу ҳақдаги тасаввурини эслатади. Августин инсондаги азалий гуноҳга мойилликни боланинг одобсизлигидан деб ҳисоблайди. Унинг мулоҳазасига кўра, бузуклик азалдан одамнинг қонида бор, чунки боладаги иллатлар ҳали у жамият билан алоқа боғламасдан олдин пайдо бўлади. Фрейд ҳам Августин каби боладаги самимият, кўнгилчанлик, одамларни, уларнинг муносабатларини бехато тушуниш, уларнинг фарқига бориш қобилияти, атроф-олами ни ўрганишга бўлган интилиш, қисқаси, ажабланишимизга сабаб бўлган хислатлариға эътибор бермайди. Агар бундай сифатлар катта одамда бўлса эди, улар бебаҳо бойлик ҳисобланиб, эгасини кўкларга кўтарарди. Фрейд дикқат марказини биринчи навбатда боладаги ёмон одатларга қаратишида сабаблар кўп. Улардан бири викториан даврида⁵ гўдакларнинг “бегуноҳ” эканлиги ҳақидаги ғоя, болада ёмон истаклар пайдо бўлмайди, деган тушунча ҳукмрон бўлганлиги эди. Фрейд умумжамият томонидан қабул қилинган бундай тасаввурга қарши чиқкан. Кўпчилик оилада бола қадрини юқори кўйган давр учун бундай қарашлар begunoх болага иснод келтириди, дея Фрейдни айблади. Бу қурашда Фрейд ўзини “ўтдан олиб чўққа” солди, болани фақат бир ёқлама – ёмон томондан тасвирлади. Болага фақат салбий томондан баҳо беришнинг яна бир сабаби, Фрейднинг одамлардаги ахлоқсизлик, файриижтимоий истакларни босиб туриш, яхши хислатларни юзага чиқариш жамиятнинг вазифаси, ёвузликни эзгуликка айлантириш эса, Фрейд айтганидек, “таъсир жавобини шакллантириш” ва “сублимация”⁶ йўли билан эришишда, деб ҳисоблаганидадир. Масалан, садизмга ўхшаш ёмон ниятларни босиб туриш унинг акси бўлган меҳрибонлик сифатларини юзага чиқаради, ёмон иллатлар одамларнинг фикрларини, хатти-харакатларини, ҳиссиётларини эгаллаб олмайди. Сублимация де-

² Садизм – ўзгаларга азоб беришидан роҳат олиши. Маркиз де Сад исмидан олинган.

³ Мазохизм – садизмнинг акси бўлиб, ўзига азоб беришидан роҳат олиши. Захер Мазока исмидан олинган.

⁴ “Эдип комплекси” – психологияк ҳолат.

⁵ Викториан даври – қиролича Виктория (1837-1901) номидан олинган. Ўша давр маданияти вакиллари тарафдорларини ҳам шу ном билан атаганлар.

⁶ Сублимация – мақсадни ижтимоий фаолият ва маданий ижодкорликка қаратиши.



гандада, Фрейд инсондаги дастлабки ёмон истак ва ниятлар ўрнини юксак, жамият учун фойдали ниятлар эгаллаши ва инсоннинг шунга қараб интилишини тушунади. Ўзидаги бирорга азоб бериш истагини енгиб, кейинчалик моҳир хирургга айланган одамни мисол сифатида келтириш мумкин. Фрейд инсондаги меҳрибонлик, муруват, севги, яратувчанлик унинг азалий хусусияти эмас, балки дастлабки ёмон иллатларни енгиб ўтиш ва шу сифатларга эришиш натижасидир, деб ҳисоблади. Унинг тасаввурicha, маданият ҳам худди шу йўл билан эришилган натижадир.

Руссодан фарқли ўлароқ, Фрейд инсонни бошқараётган куч унинг азалий иллатларида, деб билади. Жамият ривожланган сари, инсонни бу иллатдан кутулишга мажбур қиласи. Маданият қанчалик юқори даражада бўлса, иллатларни бостириш ҳам шунчалик юксак даражада бўлади. Лекин “таъсир жавобини шакллантириш” ва “сублимация” қобилияти чекланган бўлганлиги сабабли кўпинча мақсадни охирига етказиб бўлмайди. Азалий истакларни очик-оидин қониқтириб бўлмаслиги унинг қайта пайдо бўлишига сабабчи бўлиб, оқибатда невроз хасталигига олиб келади. Фрейд инсон зиддиятлардан ҳолос бўла олмайди, деб ҳисоблади. Маданият ривожи қанчалик юқори бўлса, иллатларга босим ҳам кучаяверади, невроз касаллиги ҳам кўпаяверади.

У ҳолда бола то жамият назоратига дуч келмагунча ахлоқсиз бўлиб қолавериши мумкин, босиб турилган иллатлар эса йўқолиб кетмайди, аксинча, назоратдан чиқиб кетиши мумкин.

Фрейдни боланинг ўзбошимча эканлигини таъкидлашга мажбур қилган сабаблардан яна бири бор. Ҳайрон қоларли томони шундаки, ўз тушларини таҳлил қиларкан, ҳатто руҳий жиҳатдан рисоладагидек вояга етган одамларда ҳам нафрат, рашқ, шухратпарастлик каби иллатларга тўла хиссиётлар бўларкан. XIX асрнинг охири – XX аср бошларида касал ва соғлом одам ўртасида аниқ чегара мавжуд, деб ҳисоблашган. Туппа-тузук одамнинг тушига “телба” истаклар киришига ишониш қийин. У одам ҳақидаги ижобий, соғлом фикрларимизни четга суриб тушини таҳлил қиламиزمи? Қийин бўлса ҳам Фрейд бунинг ечимини топди. У одамнинг болалик даврларида бу “истак”лари онг остига чўкиб қолган ва энди улар тушларида кўриниш бермоқда, тушида ҳам англашни истамаган бўлса-да, улар бузилган ва никобланган ҳолда бўлса ҳам, намоён бўлган, деб ҳисоблади. Фрейд туш таъбири ҳақида ёзган китобида кўрган тушларидан бирини мисол қилиб келтиради.

“Тушим икки хил фикр ва икки сиймодан иборат. Унинг биринчи қисмини келтираман. Чунки иккинчисининг бу муҳокама мавзусига алоқаси йўқ.

1. Ҳамкасбим Р. – амаким бўлади. Унга меҳрим баланд.

2. У жуда ўзгариб кетди. Юзи чўзинчоқ бўлиб қолди, кўзимга унинг катта, сариқ соколи кўринади.

Үйғонгач, тушимни эслаб, кулиб юбордим ва қандай бемаънилик, деб ўйладим. Кун бўйи ундан кутула олмадим, ёдимга тушаверди. Кечқурун ўзимга ўзим танбех бердим: агар даволанувчиларингдан кимдир ўз туши



ҳақида “бемаънилик” деб айтганда жаҳлинг чиққан бўларди ёки бу тушнинг ортида ўзи ҳам тан олгиси келмаётган нохуш фикр ётибди, деб ўйлаган бўлардинг. Сен ҳам худди унга ўхшаб тушни bemāni deyapsan, demak, taҳhil қилишни истамаяпсан. Ўз ишончинга ўзинг қарши чиқаяпсан.

Тушни таъбирлашга киришдим. “Р. – амаким бўлади” – бу нимани англатади? Менинг бор-йўғи биргина амаким – Юсуф (Иосиф) амаким бор. У билан қайгули, фавқулодда воқеа содир бўлган. Бир кун (бунга ўттиз йилдан ошди) у нафс кўйига кириб, катта пул ишлаб олмоқ мақсадида қонунга хилоф иш қилган. Фам-аламдан бир неча кун ичида соchlari оқариб кетган. Кейинчалик отам Юсуф амакинг ёмон одам эмас, шунчаки аҳмоқ, деб тез-тез таъкидлаб туради. Агар ҳамкасбим Р. Юсуф амаким бўлса, балки уни аҳмоқ демоқчи бўлгандирман. Бу эҳтимолдан узоқ, ҳам жуда тушунарсиз. Шунда ёдимга тушимда кўрган узунчоқ юзли, сариқ соқолли одам тушди. Амаким ҳам чўзинчоқ юзли, оқиш малла соқолли эди. Ҳамкасбим Р. эса қораҷадан келган бўлиб, унга ўхшаш одамларнинг сочи оқара бошласа, туси ўзгариб “мош-гуруч”га айланиб қолади, кейинчалик оқариб кетади. Ҳамкасбим Р. шу даражага етиб қолганди, қолаверса, ўзимнинг ҳам соқолим шунга ўхшаб қолганини яқинда билиб, хафа бўлиб кетгандим. Тушимда кўрган одамнинг юзи амакимни ҳам, ҳамкасбимни ҳам эслатди. Шубҳага ўрин йўқ, деб ўйладим, ҳамкасбим ҳам амакимга ўхшаш аҳмоқ. Бундай ўхшатишдан ўзим ҳам норози эдим, лекин нима мақсадда шундай хаёлга борганимни тушунмасдим. Бу ўхшатиш шунчаки юзаки, чунки амаким жиноятчи, ҳамкасбим Р.нинг эса умуман судга иши тушмаган. У бир марта велосипедида бир болани уриб юборганилиги учун жавобгар бўлган, холос. Наҳотки, шу қилмиши таққослашга сабаб бўлса? У ҳолда кўрган тушим ҳақиқатан ҳам bemāni bўлади. Тўсатдан худди шу мавзуда бошқа бир ҳамкасбим Н. билан сухбатлашганим хаёлимга келди. Мен уни кўчада учратгандим. У ҳам профессорликка номзод бўлиб, менга қилинганди ҳудди шундай таклиф учун мени табриклаган эди. Унинг табригини рад қилдим. “Сиз бундай ҳазил қилмаслигингиз керак эди. Ахир, бундай таклифнинг нозиклиги сизга маълум-ку”, – дедим. Жавоб унчалик жиддий бўлмади: “Билмайсизми ахир, бир хоним бир вақтлар менга қарши судда иш қўзғатган. Энг тубан товламачилик эди бу. Кейинчалик у аёлни инсофсизлик билан кўйган айби учун суд жавобгарлигидан ўзим сақлаб қолганман. Балки, вазирликдагилар бундан хабар топишгандир. Сиз бундай ишларга ҳеч қачон аралашиб қолмагансиз”. Мана, қаршимда ўша “жиноятчи”, айни пайтда тушимнинг ечими ҳам ўзи. Амаким Юсуф профессорликка тайинланмаган икки ҳамкасбим сифатида намоён бўлди – бири “аҳмоқ”, бошқаси “жиноятчи”. Бу бирлашиш мақсадини энди тушундим. Ҳамкасларим Р. ва Н.нинг тайинлашини кечикириш уларнинг диний эътиқодидан келиб чиққан бўлса, у ҳолда менинг ҳам тасдиқдан ўтишим шубҳа остида. Агар менга алоқаси бўлмаган сабаб билан улар тасдиқдан ўтмаган бўлса, мен бундан умид қилишим мумкин. Кўрган тушим улардан бири бўлмиш Р.ни “аҳмоқ”ка айлантиради, мен униси ҳам, буниси ҳам



эмасман. Ўртамиздаги манфаатлар умумийлигига путур етди, мени тайинлашади, деб хурсанд бўлишим мумкин. Ҳамкасбим Р.га юқори мартабали таниши нима деб жавоб берганлиги мени қизиқтирмайди. Тушимнинг таъбирини шу билан якунлайман. Ҳали етарли даражада аниқ эмас, ўз манфатимни кўзлаб икки ҳурматли ҳамкасбимга нисбатан енгилтаклик билан қарашим ҳалиям мени безовта қиласяпти.

Ҳаракатларим нимани англатишини тушунгач, ўзимдан бўлган норозилигим бироз бўлса-да, пасайди. Ҳақиқатан ҳам ҳамкасбим Р.ни аҳмоқ деб ҳисоблаганимни қатъян рад қиласман, ҳамкасбим Н.га қўйилган ноҳақ айбга мутлақо ишонмайман. Шунга қарамасдан, яна қайтараман, тушимнинг таъбири якунланмаган, уни давом эттириш керак, деб ҳисоблайман.

Туш кўришда яна бир унсур мавжудки, шу пайтгача таъбирчилар унга ёзтибор беришмаган. Тушимда амакимга нисбатан ёқимли ҳиссиёт туйганмишман. Бу ҳиссиёт кимга аталган экан? Юсуф амакимга нисбатан бундай ҳиссиёт ҳеч қачон бўлмаганди. Ҳамкасбим Р.ни қадрлайман, лекин бундай ҳиссиётни унга изҳор қилганимда, у ҳайрон бўлади. Ўзимга ҳам бундай ҳиссиёт сохта бўлиб туюларди. Масаланинг моҳиятини тушунгандек бўлдим. Тушимдаги нозик ҳиссиётлар унинг мазмунига алоқадор эмас, балки ундан ташқаридағи фикрларимга тааллукли бўлиб, тушнинг ҳақиқий моҳияти мендан яширин. Туш талқинига истамайгина киришганим ёдимга тушди. Уни қанчалик пайсалга солмай, тушим бемаъни; психоаналитик машғулотларимдан маълумки, талқин қилишни истамасликнинг аҳамияти муҳим. Кўпчилик ҳолатларда унинг масала моҳиятига алоқаси йўқ, у ҳиссиётларимиз ифодаси, холос. Қизчам олма беришганда егиси келмаса, бу аччик, деб баҳона қиласди, ваҳоланки, олмани татиб ҳам кўрмаган. Даволанувчи аёллар ўзларини худди қизчамдек тутса, биламанки, ёқимсиз тасаввурдан қутулиш учун баҳона қилишган. Кўрган тушим ҳақида ҳам шундай дейиш мумкин. Тушимни таъбирлашни истамаганлигим унинг менга ёқимсиз эканлигидадир. Тушим таъбирини билгач, ҳамкасбим Р.ни “аҳмоқ” дейиш мен учун ёқимсиз эканлигини тушундим. Ҳамкасбим Р.га бўлган ёқимли ҳиссиётни туш мазмунига сингдира олмаганимда эмас, балки талқин қилишни истамаганимда. Тушимга яширилган фикрим мазмунан Р.га нисбатан тухмат, гўё ўзим билмаган ҳолда тушда намоён бўлган қарама-қаршиликдир” (Фрейднинг “Туш талқини” китобидан).

“Шу ерда туш талқинини давом эттираман, ахир ундан амаким ҳақида қимматли хулоса чиқариб олдик-ку. Таъбир шуни кўрсатадики, унинг асосида, шубҳасиз, профессорликка тайинланиш истаги ётибди, тушимдаги Р.га бўлган ёқимли истагим эса ҳар икки ҳамкасбимга кўрсатилган ҳақоратга қарши норозилигини билдиради. Ўз тутумини таҳлил қилаётганим сабабли уни тўхтатмайман, чунки таҳлилдан кониқмадим. Туш мазмунини ташкил қилувчи ҳамкасбларим ҳақидаги мулоҳазаларим бутунлай бошқача. Профессорлик унвонига сазовор бўлиш истагим уларнига қарама-қарши бўлса ҳам, бунинг аҳамияти катта эмас, гарчи ўнгимдаги ва тушимдаги мулоҳазалар турлича бўлса-да. Агар бу унвонга эришиш истагим кучли



бўлганда, бу шухратпарастлигимдан далолат берарди, лекин мен бундан узоқман. Дўстларим, танишларим бу ҳақда нима деб ўйлашлари менга но-маълум. Балки мен шухратпарастдирман, лекин профессор бўлиш ҳақида гап кетганда учалик эмасдир.

Тушимда менга ёпиширилган шухратпарастлик қаёқдан келди? Эслашимча (болалигимда менга буни кўп гапиришган), туғилганимда бир қишлоқи кампир онамга боланг буюк одам бўлиб етишади, деб башорат қилган экан. Бу ерда ҳайрон қоларлик ҳеч нарса йўқ. Бундай башорат кўп оналарга маълум. Наҳотки, шухратпарастлигим шундан бўлса? Болалигим хотирасидан шунга ўхшаш яна бир таассуротни эсладим. Ота-онам кўпинча Пратердаги ресторанга олиб боришарди (бу вақтда ёшим ўн бир ёки ўн иккida эди). Бир кун кечкурун ўша ерда даврада юриб арзимаган пул эвазига яхшигина шеърлар тўқиган кишига кўзим тушди. Ота-онам уни ёнимизга таклиф қилиш учун мени юбориши. У киши ёнимизга келгач, менга мадхия айтиб шеър тўқиди ва келажакда министр бўласан, деб башорат қилди. Мен буни яққол эслаб қолдим. Шу воқеа арафасида отам янги тайинланган министрлар портретларини олиб келганди. Улар орасида яхудийлар ҳам бўлиб, омад кулиб боқади, деб ишонган болалар министр бўлишни орзу қилишарди. Бундан таъсирланиб, мен ҳатто юридик факультетга кирмоқчи ҳам бўлгандим, аммо кейин воз кечгандим. Министрлик мансаби медицина ходими учун етиб бўлмас амал, яна тушимга қайтамиз. Энди тушуниб етдим: туш мени қайгули воқеалардан болаликдаги орзумга эриштирди. Министр мансабини эгаллаб, хурматли ҳамкасбларим яхудий бўлгани учун улардан бирини “аҳмок”, иккинчисини “жиноятчи” деб ҳақорат қилдим. Боплаб ўчимни олдим! Мени профессор лавозимига тайинламаганлари учун унинг ўрнини тушимда эгаллаб олдим”.

Иррационал шухратпарастликдан узоқ бўлган Фрейд учун бундай туш талқини ажойиб бир ўrnak бўлди. Лекин ўнгида буни қатъий инкор қилди. Ақл-идрок билан мулоҳаза қилди: “Агар унвонга интилишим кучли бўлганда шухратпарастлик касаллик сифатида намоён бўларди”. Шухратпарастликдан эса у “анча узоқ” эди. Атрофдагилар уни шухратпарастга чиқарганларида ҳам, бу нарса профессорлик унвони билан боғлиқ эмас, деган бўларди. Шундай қилиб, у шухратпарастлик ўзининг болалигидаги истагидан келиб чиқсанлигини тан олди. Бундай истаклар бола феълининг шаклланиш даврига хос, аммо ёши улғайган одам ундан бутунлай қутула олиши қийин. Фрейд каби ақли расо шахслар бунинг фарқига боради, болаликдаги орзу-ҳаваслар билан катталар ҳаётидаги чегара ҳам ана шунда. Ҳозирги замонда бундай чегарани қатъий ўрнатиб бўлмайди, бунда Фрейднинг таъсири ҳам бор. Ақли расо одамларнинг тан олишларича, кўпчилик амалга ошмайдиган орзу-истакларга қараб интилади. Бу унинг истаги, лекин бунинг илдизи эрта болаликка бориб тақалади.

Шу пайтгача биз Фрейднинг туш назариясини бир томонлама муҳокама қилиб келдик. Унинг тушунчаси бўйича туш амалга ошмаган, сиқиб чиқарилган истакларнинг, айниқса, ҳиссий майлларнинг хаёлан амалга



ошишидир. Бундай истаклар эрта болаликда пайдо бўлиб, инсон улғайгани ва шу баробарида ички назорат кучайгани сари бошқа бир истакка айланади, лекин батамом йўқ бўлиб кетмайди. Онгимиз назорати бўшашгач, улар тушда бўлса ҳам амалга ошади. Тушда намоён бўлган, сиқиб чиқарилган истаклар реал воқеаликда амалга ошганда эди, тушларимиз бу даражада мавхум бўлмас эди, ўзимизни нокулай сезмас эдик.

Баъзан тушимизда қотиллик ёки бошқа бир жиноятни содир этамиз, аммо бу бизга қувонч келтирмайди. Фрейднинг тушунтиришига кўра, уйқуда ички ахлоқий цензурамиз ҳам мудраб қолади, шу сабабли фикримиз ва фантазиямиз онгимизга кириб олади. Ички цензура хушёр бўлганда эди, бунга йўл қўймаган бўларди, унинг хушёrlиги эса таъқиқланган фикрларимизга очиқ-ойдин йўл бермайди. Агар тушнинг вазифаси уйкудаги оромимизни қўриқлаш бўлса, онгимиздан сиқиб чиқарилган ва тушимизга кирган истаклар ниқоб остида кириб келган бўларди. Тушлар ҳам невроз касаллиги каби, босиб турган истагимиз билан “ўзлигимизни” босувчи кучлар қоришувидан иборат.

Баъзан қоришувлардан иборат ниқоб механизми етарли ишламайди ва тушимиз очиқ ҳолда қолгач, биз уйғониб кетамиз. Бинобарин, Фрейд фикрича, тушнинг асосий белгиси унинг никобида ва онгсиз истакларнинг бузук ҳолда кўринишида. Ана шунда биз уйқу оромидан маҳрум бўлмаймиз. Бундай тасаввур Фрейднинг рамзлар аҳамиятини тушунишига жиддий таъсир қилди. Унинг фикрича, рамзларнинг асосий вазифасини тушунишга айнан шу тушунча ёрдам берди. Рамзларнинг вазифаси яширин истак-ҳоҳишлиарни ниқоблаш ва бузиб кўрсатишдан иборат. Рамзлар тили қандайдир “сири код”, туш таъбири эса уни ечиш усулидир.

Фрейд тушлар мазмуни ақлдан ташқаридаги нарса, у болаликда ги холатимиз билан боғлиқ бўлиб, айни пайтда ниқоб вазифасини ҳам ўтайди, деган холосага келиб, унинг тилини рамзлар тилига кўчирди. Бу тил ҳар қандай ҳиссиётни эмас, балки оддий туфма ҳиссиётларнигина ифода қилиши мумкин.

Туш талқинида Фрейд кўпинча универсал рамзлардан кўра кўпроқ та-содифий рамзларни кўллайди. Ундаги ярим-чала мантиқли кетма-кетликни алоҳида қисмларга бўлиб талқин қилиш учун тушни бир неча қисмга бўлиш керак, деб ҳисобладайди. Туш кўрувчининг тушнинг ҳар бир қисми ҳақидаги фикрини билиш, ҳар бир фикр орқасидаги “ғаразли ниятларни” аниқлаш зарур. Агар уларни бирлаштирса, янги фикр келиб чиқиши, унинг ички мантиқан боғлиқлигига суюниб тушнинг моҳиятини билиш мумкин.

Тушларнинг сиқиб чиқарилган истакларни билдирувчи ҳақиқий мазмунини Фрейд “яширин моҳият” деб ҳисобладайди. Тушнинг ниқобланган вариантини “ҳақиқий моҳият” деб атаган бўлса, уни бузиб кўрсатиш ва ниқоблашни “тушнинг қилмиши” деб таърифлаган. Яширин моҳиятини очиб ташлаш механизми деганда уни бўрттириш, сиқишириш, силжитиши, қайта ишлаш тушунилади. Бўрттириш деганда Фрейд уни қисқартиришни, яъни турли элементларнинг мазмуни биттасида акс этишини назарда тутди.



Масалан, тушида кўринган, кўркувни англатувчи эркакнинг сочи отасига, юз тузилиши мактаб ўқитувчисига, кийимлари бошлиғиникига ўхшаб ке-тиши мумкин. Чунки ўз вақтида улардан қўрқкан ёки бир маҳаллар ёмон аҳволга, бахтсизликка тушган ҳолатига йўлиқса, тушида шуни эслатувчи жойларга бориб қолиши мумкин. Бундай унсурлар йигиндиси битта об-разда ифодаланиши мумкин, улардаги ҳиссиётлар мазмунан бир-бирига ўхшаш. Рамзлар хусусиятини назарга олганда бўргтириш жараёнини тушу-ниш осон. Ташқи оламдаги реалликда икки одам ёки икки предмет ҳақида гап кетганда уларни алоҳида тушуниш муҳим, кичик воқеаликда эса бу ун-чалик муҳим эмас. Муҳими, уларнинг ўзаро боғлиқлигидир, чунки улар бир хил ҳиссиёт қўзғатади.

Силжитиш деганда Фрейд шундай ҳолатни назарда тутадики, қўпинча жуда муҳим, яширин маъноли англатувчи унсур, ўзига ўхшаш унсур орқали эмас, балки ундан узоқ бўлган, очиқ маънони англатувчи бошқа, аҳамиятсиз бир унсур орқали тушда намоён бўлади. Натижада психик аҳамияти қимматли бўлган унсур у қадар муҳим бўлмаган нарса билан никобланади.

Қайта ишлаш деганда эса Фрейд никоблаш жараёнининг якунланишини назарда тутган. Моҳиятнинг бўш жойларини тўлдириш, номувофиқликни тўғрилаш натижасида яхлит бир кўринишга эга бўлади, унинг ортида эса ҳаяжонга солувчи жиддий воқеа ва фожиа яширинган бўлиши мумкин.

Фрейд туш вазифасини бузиб юборувчи ва уни тушунишни қийинлаштирувчи яна икки омил ҳақида айтиб ўтади. Бир томондан, тушда-ги айрим унсурлар ўзига зид маънони англатувчи кўринишда акс этади. Туш-да кийинган ҳолда бўлсанг, яланғоч ҳолатни, бой бўлсанг, камбағалликни, меҳр-муҳаббат эса душманлик, нафратни билдиради. Бошқа томондан, тушдаги ошкора маъно айрим унсурлар орасидаги мантиқий алоқани бил-диради. Тушда “аммо”, “чунки”, “нега деганда”, “агар” деган тушунчалар йўқ, лекин мантиқий боғланишлар образларнинг ўзаро муносабатида билинади. Масалан, одам тушида кимнингдир тураётганини, қўлларини кўтараётганини ва жўжага айланиб қолганини кўради. Оддий тилда жўжа нимжонлик ва қўрқоқлик аломати. Тушида кўринган киши ўзини ботир ва кучли қилиб кўрсатмоқчи, лекин амалда у жўжага ўхшаш кучсиз ва қўрқок. Тушнинг ошкора маъносида бундай мантиқий боғланиш икки образ орқали кўринган.

Фрейднинг туш ҳақидаги назариясини якунлар эканмиз, муҳим бир қўшимча қилиш лозим. Фрейд таъкидлаганидек, туш хусусиятларининг асосида болалик кечинмалари ётади, яъни ҳозирги кунни ўтмиш билан боғлайдиган ва бизда гўё шу кунларда бўлаётгандек таассурот қолдиради. Лекин, бу жудаям тўғри эмас. Фрейд фикрича, одатда туш кўришга уйқуга ётишдан аввалги янги таассуротлар туртки беради. Лекин туш рўй бериши фақат болалик тасаввурларига ва истакларига бориб тақалади. Унинг асо-сида болалик кечинмалари ётса-да, янги таассуротлар туртки бўлади. Буни оддий мисол билан тушунтириш мумкин. Ўз амрини ўтказувчи раҳбар



қўлида ишлаган одам унинг олдида доим сабабсиз қўрқиб туради, чунки болалигида отасидан қўрқкан. Бошлиғи унга танбеҳ берган куни кечаси тушида босинқираб, отасига ва айни пайтда бошлиғига ўхшаш одам уни ўлдирмоқчи бўлади. Агар болалигида отасидан шу даражада қўрқмаганида бошлигининг танбеҳи унчалик қўрқувга солмаган бўларди. Бошлиқ унга дағдаға қилиб танбеҳ бермаганида, яширин қўрқув тушида кўриниш бермас эди.

*Рус тилидан Абдунаби АБДУКОДИР
таржимаси*

ҲУҚМАТ

Ҳәлини ишлатган одам ақллиидир. Бошқаларнинг ҳам ақлни ишлатган одам ундан-да ақллиироқдир.

Ҳали ибни АБУ ТОЛДИ



**Юсуфжон
МИРЗАМАХМУДОВ**

1941 йилда тугилган. Тошкент давлат университетининг (ҳозирги ЎзМУ) ҳуқуқшунослик факультетини битирган. Кўп йиллар ҳуқуқ-тартибот идораларида турли лавозимларда фаолият қўрсатган. “Кўнгил боғи” номли шеърий китоби чоп этилган.



БОҚИШЛАРИНГ ДИЛ ҚУЛФИНИ ОЧАР

ИСТАР КЎНГИЛ

Не ажабки, фасли куз ҳам
яшил баҳор истар кўнгил,
Ифорлари хўб мастигар
бир чаманзор истар кўнгил.

Кимдир кулар деб: “Бу одам
аклу ҳушидин мосуво”,
Гул ишқида булбулдайин,
чекмак озор истар кўнгил.

Тутиб пинҳон не ҳам топдим,
мен бу жаҳон айвонида,
Чаманзорин макон этган
шўх бир дилдор истар кўнгил.

Бор эканми бу танда жон,
орзуларга ҳеч йўқдир айб,
Бу дунёда фақат баҳтдан
tingглаш алёр истар кўнгил.





Тинч-осуда, хур замоннинг
нашидасиму эй Юсуф,
Не ажабки, фасли куз ҳам
яшил баҳор истар кўнгил.

ҲИЖРОНИНГ СЕНИНГ

Ситами жон бўлди эй ёр,
аразу ҳижронинг сенинг,
Йўқмиди билгали ҳолим
бирон имконинг сенинг?
Қайда қолди, айтармусан
ўртадаги ваъдалар,
Тоабад биргамиз деган
ахду паймонинг сенинг?
Ошиқ аҳлин не куйларга
етакларму шайдолик,
Шай эдим бўлмоққа мен ҳам
кулинг, қурбонинг сенинг.
Айларди кўксимни абгор,
оздириб роҳларимдин,
Мужгонларингдин отилган
ўтли пайконинг сенинг.
Чиқмагай ёдимдин харгиз
юлдуз санаб тунлари,
Лаъли хандонлар болидин
қилган эҳсонинг сенинг.
Осон эрмасдур унчалар
ўзингга ҳам унумтоқ,
Вафодоринг билан ўтган
ҳар лаҳза, ҳар онинг сенинг.
Хонишлари Юсуфжонни
буғун маҳзундир, боис –
Ситами жон бўлди эй ёр,
аразу ҳижронинг сенинг.





МУВАШШАҚ

Зор этганди малагим
мехрининг булоғига,
У сабаб ҳасратларим
етмасди адогига.
Хазинлик эди ёрсиз
үтганида бу онлар,
Рўй энди лола янглиғ
тегиб ол яноғига.
Айлади тақдир насиб
қилмай армон кезгани,
Хазонсиз олма, анор,
атиргулли боғига.
Оlam баҳтнинг яроғи –
тўйсам гар шаробидан,
Нозли ўшал санамнинг
лаб қўйиб дудоғига.
Гўзалга сен вафони
Тангридан тила Юсуф,
Алёр тинглаб яшасин,
етмайин саноғига.



ЎЗИНГСАН

Менинг қалбим ичра унган
боғу бўстон ўзингсан,
Армон йўқдир, дилимга ёд
ажиб достон ўзингсан.
Ҳаёда ҳам, вафода ҳам
дердим, танҳосан жоним,
Боқишиларинг дил қулфини
очар имкон ўзингсан.
Умр ўтар, умр кетар,
бироқ орзулар бисёр,
Бир сухбатинг жон озуғи,
шўх сухандон ўзингсан.



Аҳли ишқ ичида мендек
 Мажнунгинаң устидан,
 Хандон уриб бағрим ёқкан
 оташниҳон ўзингсан.
 Олсанг олгин, сенга бўлсин
 садақа, ширин жоним,
 Нозларинг афғон чектириб,
 эттан сарсон ўзингсан.
 Гар ишқини рад этсангда,
 Юсуф ўқир тасанно,
 Ағёрни ҳам дўст қилолган
 соҳиб боғбон ўзингсан.

Наманган

ҲИҚМАТ

Өқиаллар зикрдан тафаккүрға, тафаккүрдан зикрға
 ўтмадилар. Қаалбларининг гапиришини талаб қуладилар. Ва ниҳоят
 қаалблари ҳикматли сўзларни айта бошладаңди.

Ҳасан БАСРУЙ



Ҳамиджон ҲОМИДИЙ

Филология фанлари доктори, профессор. 1935 йилда туғилган. Тошкент давлат педагогика институтининг (ҳозирги ТДПУ) тарих-филология факультетини тамомлаган. “Дўстлик” ордени билан мукофотланган. Олимнинг “Тасаввуф алломалари”, “Авесто” файзлари”, “Фирдавсий ва ўзбек адабиётни” каби ўттиздан зиёд китоблари чоп этилган.



САРКОР

Мен атоқли навоийшунос Азиз Қаюмов ижодини ўрганиб, унинг тадқиқотларидан файз топиб юраман. Устоз менинг номзодлик, докторлик диссертацияларимга оппонентлик қилган. Мен Азиз Қаюмов билан дилдан сұхбатлашиш, у кишининг ижодий жараёни билан ошно бўлишни жуда-жуда истар эдим. Шуқрким, муаллим билан бир пиёла чой устида сұхбатлашиш насиб этди.

— Дадам адабиёт мұхаби әдилар, — дейди Азиз Қаюмов аждодлари ҳақида сүзлаб. — Бобом Абдуқаюм Мирзо хаттот бўлганлар. “Ажаб уссалотин” асарида бу ҳақда қисман маълумот бор. У киши кўчирган баъзи китоблар тошбосмада нашр қилинган. Бобомнинг дадалари Абдураҳим Мирзо Қўқон хони саройида котиб бўлган. Бир томондан, ана шу анъана, иккинчи томондан эса, биринчи синфдан ўнинчи синфгача менга дарс берган ўқитувчим Ҳамзахон Аббосов (машҳур кинорежиссер Шуҳрат Аббосовнинг амакиси) менинг қалбимда адабиётга завқ уйғотган. У киши менинг дастлабки шеърларимни Қўқон шаҳар газетасида бостирган. Мен шеър, ҳикоя, ҳатто драмалар ҳам ёзганман. Кейинчалик хонадонимизга тез-тез келиб юрган таниқли шоир Чархий домла менинг шеърларимни таҳрир қилиб, Фарғона вилояти газеталарида эълон қилдилар. Мана бу мисралар ҳамон ёдимда:

Дилем магур үлкамнинг ободидан,
 Ёргудир йўлим баҳт бунёдидан.
 Териб гунча гуллар кўнгил шодидан,
 Очилди бу таъбим Ватан ёдидан.
 Хуши илҳондур, хуши илҳонлар.

Чархий домла билан у кишининг умри охиригача устоз-шогирд эдик. У киши менга аруз қоидаларини ўргатган, шеърият назариясидан сабоқ берган. Демак, бадиий-илмий ижодда менинг дастлабки устозларим Ҳамзахон Аббосов ва Чархийдир.

Бир воқеа менинг оёққа туришимга, ижодда, ҳаётда балогатга етишишмга асосий турткни бўлган. Иккинчи жаҳон урушининг айни қизгин пайтларида Фазлиддин қори деган ҳофиз меҳнат фронтидан қайтди. Чархий домла уни ўз ҳимояларига олиб, қўшиқ қилиши учун шеърларидан берардилар. 1944 йилда Кўқонга келган ўша даврнинг зиёли ва масъул кишилари иштирокида шаҳар боғида бўлиб ўтган мусиқали кечада Фазлиддин қори Чархий газалларига басталанган қўшиқларни ижро этиши асносида менинг шеърим асосидаги ашуслани ҳам айтди. Шу сабаб Кўқон нефть техникиумининг иккинчи курсида ўқишишмга қарамай, мени Тошкентга чакиришиб олишиди. Ўрта Осиё Давлат университетига ўқишига кирдим.

Университетнинг Шарқ факультетидаги ўқишишм давомида Ёзувчилар ўюшмасидаги йигилишлар, анжуманларга қатнашиб юрадим. Ёшлидан ёзувчи бўлиши ниятида юрган менга – ёш йигитчага давр олатасирлари, адабиёт аҳли атрофида айланган қора бутутлар қаттиқ таъсир этди.

Университетни имтиёзли диплом билан тутатган Азиз Қаюмов “Исмат Бухорий ижоди” мавзусида диплом иши ёзган. У бутун фаолиятини қалбига адабиёт меҳрини жо қилган Кўқон адабий муҳитини тадқиқ этишга сафарбар этди. Натижада XVIII аср охири ҳамда XIX аср ўрталарида Кўқон хонлигидаги маданий, ижтимоий, иқтисодий, сиёсий ҳаёт, адабий муҳит мавзуси тадқиқи унинг номзодлик ҳамда докторлик диссертацияларининг юзага келишига асос бўлди. Ана шу узлуксиз изланишлар кейинчалик “Кўқон адабий муҳити” деган фундаментал рисоланинг юзага келишида пойдевор вазифасини ўтади.

Шу соҳадаги дастлабки иирик тадқиқот ҳисобланган ушбу рисолани яратишида муаллиф, бир томондан, ўзигача бўлган шарқшунос, тарихшунос, элшунос олимларнинг илмий тадқиқотларига, иккинчи томондан эса, Фазлийнинг “Мажмуаи шоирон”, Қори Раҳматуллоҳ Возехнинг “Тухфат ул-аҳбоб фи тазкират ул-асҳоб”, “Тазкират уш-шуарои Ҳашмат”, Ҳакимхон Тўранинг “Мунтаҳаб ут-таворих”, Имомали Қундузийнинг “Таворихи манзума”, Мирзаолим Ҳўқандий бинни Мирзараҳим Тошкандийнинг “Ансоб ус-салотин ва таворихи хавоқин”, Мушриф Исфарангийнинг “Шоҳномаи нусратпаём” сингари кўплаб ўзбек ва форс тилларидаги қўллэзма манбаларга таянган. Айни пайтда ҳам тарихий шароит, ҳам адабий жараённи изчил ёритишида Пўлатхон домулло Қаюмийнинг “Кўқон тарихи ва адабиёти”



дастхат асари, замон шоирларининг бевосита бадиий ижодидан, девонидан ҳам бир манба сифатида истифода этган. Натижада кенг қамровли ижодкор XVIII асрнинг охиридан XIX аср ўрталаригача бўлган даврдаги Кўқон хонлиги ҳудудидаги ижтимоий-сиёсий, иқтисодий ҳаёт, қўшни давлатлар билан савдо-сотиқ муносабатлари, давлат тузилиши, идора усуллари, юқори ва қуи давлат бошқарув тизимларини атрофлича текширган, таҳлил қилиб, яхлит, зарур илмий хуносаларга келган. Бу олимнинг XX аср ўрталаридаги дастлабки серкірра қашфиёти эди. Тадқиқотчи ўрганилаётган даврда Кўқон хонлиги ҳудудида ўзига хос бир адабий муҳит пайдо бўлганлиги ва уни Амирнинг ўзи бошқарганлигини уқтирас экан, маданий-адабий ҳаётнинг барча жабҳаларини бутун зиддиятлари билан изчил, ўзаро мутаносибликда ўрганади, жуда кўп далилларни илк бор илмий истеъмолга жалб этади. Уч қисмдан иборат мазкур рисолада шоир Акмалдан тортиб Мирзаолим Мушрифгача бўлган ўндан зиёд шоирларнинг ҳаёти, фаолияти ва ижодий мероси анча батафсил, тадрижийликда таҳлил қилинган. Китобда давр адабиётининг жанрлар таркиби, мавзу доираси, образлар силсиласи, етакчи ғоявий-бадиий хусусиятлари ҳам илмий-назарий таҳлил қилинган. Бу рисола биринчи бор тадқиқ доирасига тортилганлиги, кўп масалалар илмий жамоатчилик эътиборига муҳим адабий ҳодиса сифатида ҳавола этилганлиги билан ҳам қадрлидир. Кейинчалик Маъдан, Нодира, Увайсий, Ҳозик каби ижодкорлар ҳақида устоз раҳбарликларида маҳсус тадқиқотлар ёзилди ва докторлик диссертациялари ёқланди, алоҳида монографиялар яратилди.

Хуллас, “Кўқон адабий муҳити” китоби ўз вактида илмий ва адабий тилимизда катта ҳодиса, ўзбек илм-фанида фақат дастхат манбалар асосида ёзилган биринчи залворли тадқиқот бўлди.

– Сиз Кўқон адабий муҳитини ҳар жиҳатдан мукаммал ўрганиб, Ҳозик, Махмур, Нодиралар ҳақида биринчи бўлиб алоҳида китоблар ҳам яратдингиз, асарларини чоп эттирдингиз. Лекин ўтган асрнинг 70-йилларига келиб Навоий ижодини астойдил тадқиқ этишга киришиб кетдингиз. Бу маънавий эҳтиёжмиди ёки бирон бир сабаб бормиди?

– Кунлардан бир кун уйимга укам, адабиётшунос олим Лазизхон (Оллоҳ унинг охиратини обод қилган бўлсин) кириб келди ва сухбат орасида: “Нашиёт учун “Буюк кишилар ҳаёти” рукнида Алишер Навоий ҳақида китоб ёзиб беришингиз керак”, – деди. “Бу таклифингиз маъқул. Лекин нашиётнинг ўзи менга бу ҳақда мурожсаат қилиши керак-ку”, – деб қўшиб қўйдим.

Ҳақиқатан ҳам, кўп ўтмай ўша нашиётнинг бош муҳаррири, таниқли шоир Барот Бойқобилов хонадонимга келиб, “Алишер Навоий” номли асар ёзиб беришини илтимос қилди. Ўша кунлари мен Сочига истироҳат учун жўнаши тараффудида эдим. Бертельс ва бошқа олимларнинг Навоий ҳақидаги китобини, 5 жислдлик хрестоматиянинг 2-жислдини ўзим билан олиб кетдим. Бу орада айрим масалалар бўйича маслаҳат сўраб навоийшунос Суюма Ганиевага мурожсаат ҳам қилдим. Устозларнинг тадқиқотлари, шоир асарларининг аслини кўплаб мутолаа қилиши жараёнида “Алишер

Навоий” номли китоб юзага келди. Назаримда илмий-публицистик, бадиий мөхиятдаги бу асар кенг китобхонлар томонидан илик кутуб олинди.

Ана шу жараёнда менда *Навоий* ижодий меросини янгидан мукаммал ўрганиб, кенгрок жиiddий таҳлил қилиши эҳтиёжи сезилди. Назаримда *Навоий* ижоди асосларнинг асосидай туюлаверади менга. Унинг асарларида тасвириланмаган, акс этмаган бирон бир мавзу, ҳаётий масала қолмагандай. Натижада “Хамса” достонларини қайта бошдан синчилаб ўқиб-ўрганиб чиқдим. Муаллиф ижодий ниятининг ҳар бир достондаги ботиний жиҳатларини илгашига интилдим, кўп мушоҳадалар юритдим. Охир-оқибатда беши достонга бағишиланган маҳсус илмий-оммабоп рисолалар вужудга келди. Менинг *Навоий* меросига юз буришимда Ўзбекистон халқ шоири Барот Бойқобиловнинг ўрни катта. Шунинг учун ҳам бу шоир ижодини алоҳида ардоқлайман. Ҳатто унинг асарларини алоҳида таҳлил қилгум ҳам келади. Назаримда унинг ижоди алоҳида монографик тизимда тадқиқ этишига арзийди.

Дарҳақиқат, “Хамса”га бағишиланган рисолаларида Азиз Қаюмов ҳар бир достон, улар таркибидаги ҳамд ва наътлар, ҳикояларнинг анча батафсил, изчили талқин ва таҳлилларини яратишга муваффақ бўлган. Мазкур китобларни мутолаа қилган ўқувчи буюк шоир ва мутафаккир Алишер Навоий достонларининг кўп қиррали туб мөхиятини тушуниб етади, унинг санъаткорлик сехри билан ошно бўлади. Навоий ижодига бўлган ана шу меҳр, дилбасталик “Лисон ут-тайр” достони, насрый асарлари ҳақида кўплаб тадқиқотлар яратишга сабаб бўлди. Академик Азиз Қаюмов бир қанча навоийшуносларга ҳам раҳбарлик қилиб келмоқда. Бундан ташқари, устоз Навоий асарларини рус тилига таржима қилиш ва русийзабон ўқувчилар орасида тарғиб этишига ҳам катта улуш қўшиб келмоқда.

— Аслида бадиий, илмий ижод уйқу ҳисобига, кўп ҳолатларда соғлиқ ҳисобига бажарилади, — дейди устоз. — Ижод учун том маънодаги шартшароит ҳамма учун ҳам ҳамиша муҳайё бўлавермайди. Инсонда ижод дарди бўлмоги лозим.

Мен устознинг идораларида, шунингдек, ижодхоналарида бўлганимда бунинг шоҳиди бўлганман. У киши ҳамиша Навоий ижоди бўйича нимадир ёзаётган, шоир асарларининг ўзга тилларга таржимаси устида бош қотираётган,Faфур Гулом, Ойбек сингари адибларнинг ижод сехри хусусида мушоҳада юритаётган, кўп ҳолларда эса, устоз адабиёт тарихининг муҳим муаммоларига доир ёки ҳозирги адабий жараённинг долзарб масалаларига бағишиланган илмий рисолаларни таҳрир қилаётган, ўқиётган бўлади.

Ана шундай! Академик Азиз Қаюмов адабиётшунослигимизнинг ҳар бир жабҳасида саркор бўлиб келмоқда. У кишининг раҳбарлигида йигирмадан зиёд ўшлар мумтоз адабиётимизнинг долзарб масалалари, матншунослик, ҳозирги адабий жараёнга доир масалалар бўйича докторлик, номзодлик диссертацияларини ҳимоя қилганлар. Домланинг бағри кенглиги-ю заҳматкашлиги, барчага бирдай меҳрибонлиги-ю ўта меҳнатсеварлиги ўзига хос ибратдир. У кишининг асарлари ҳамиша ўшларни сабот ва ма-



тонатли бўлишга, самимийликка, меҳрибонликка ва адолатпешаликка ун-дайверади.

Кейинги йилларда устоз ижодий ишлар билан янада жиддий шуғулланмоқда. У бисотидаги илмий ва бадиий асарларни йиғиб бир неча жилдлик мукаммал нашр тайёрлади. “Мумтоз сўз” нашриёти улардан 10 жилдини чоп этди.

Устознинг далолатлари ва қўллаб-қувватлашлари туфайли Низомий “Хамса”си ўзбек тилига тўла таржима қилинди. Ўзи “Панж ганж”нинг ҳар бир достони ҳақида маҳсус рисола яратди. Бу тадқиқотнинг қиммати шундаки, уни ўқиган китобхон Низомий Ганжавийнинг ҳаёти, ижодий мероси, санъаткорлик маҳорати ҳақида яхлит мукаммал тасаввурга эга бўлади, шоир достонларининг туб моҳиятини тугал англаб етади.

Бундан ташқари, ушбу рисолада Шарқ хамсанавислигининг асл манбалари, Низомий даҳосининг умумбашарий аҳамияти, Саноийнинг “Дакиқатул ҳаёт” маснавийси, Атторнинг “Илоҳийнома”си бўйича ҳам теран, мутлақо янги фикр-мулоҳазалар илмий асосланган ҳолда изҳор этилган.

Олим X-XII асрларда Хурросон ва Мовароуннаҳр ҳалқлари адабиётининг жаҳоний шуҳрати, туркий ва форсий тиллардаги шеъриятнинг муштарак жиҳатлари хусусида тўлқинланиб гапирди, истиқболдаги иш режалари, иқтидорли навоийшуносларнинг тадқиқот ишлари ҳақида ижобий фикрлар билдириди.

*– Низомий даҳоси бўши ерда пайдо бўлмаган, – дейди атоқли олим.
– Бу даврга келиб форс адабиёти жаҳондаги энг пешқадам адабиёт дарражасига етган эди, кўплаб ишқий-саргузашт, ижтимоий-фалсафий, ахлоқий-таълимий асарлар вужудга келганди. Абулқосим Фирдавсий, Фахридин Гургоний, Ҳаким Саноийнинг достонлари яратилган эди. Ана шу хамсанавислик илдизларини қидириши-ўрганиши жараёнида “Газна адабий муҳити” деган рисола ҳам инишо этилди. Назаримда бу масала ҳали жиоддий тадқиқотларни талаб қиласди. Бизнинг бу борадаги мулоҳазаларимиз дастлабки кузатишлар сифатида қабул қилинмоғи лозим. Сизларга кўпдан бери қалбимда асрраб келаётган истакларимни нияти хайр сифатида изҳор этимоқчиман: пойтиахтимизда буюк ўзбек шоюри ва мутафаккири Алишер Навоий музейи бўлишини чин қалбимдан истардим.*

Назаримда истиқтол шарофати билан Ўрта аср туркий ва форсий адабиётни бир-биридан ажратмай яхлит ўрганиб, фундаментал тадқиқотлар яратиш учун барча шарт-шароит муҳайё бўлди.

Биз энди янада гайрат билан ишилашимиз керак. Ажсадодларимиз бизга қолдирган мерос – бебаҳо. Биз шу мероснинг муносиб эгалари бўлмогимиз керак.



Жуманиёз ЖАББОРОВ

Ўзбекистон ва Қорақалпогистон халқ шоири. 1930 йилда тугилган. Тошкент давлат университетининг (ҳозирги ЎзМУ) филология факультетидага таҳсил олган. “Ватанимни куйлайман”, “Баҳор нафаси”, “Она ер қўшиги”, “Субҳидам хаёллари”, “Хаёлимда ўзинг” каби шеърий тўпламлари чоп этилган. “Ўжарлар”, “Тўйдан олдин томоша” пьесалари саҳнадаширилган. Байрон, Лермонтов, Шевченко, Тагор, Ҳофиз Шерозий ва Фирдавсий ижодидан таржималар қилган. 2010 йилда вафот этган.

СЕН – МЕН УЧУН АБАДИЙ ЁГДУ

ҲАЁТНИ СЕВ

Ҳаёт мураккабдир, мураккаб,
Томчидан то уммонга қадар.
Чигитдан то олтин кўракка,
Зумдан тортиб, замонга қадар.

Унинг сўқмоқлари ва чўққилари
Синайди ироданг билан қалбингни.
Бўлар юксаклари ва чўнқирлари,
Имтиҳон этажак қадрингни.

Оталар журъати, меҳнат, садоқат,
Муҳаббат, ёвқурлиқ, ер или осмон,
Йўл юрсанг ўқтамлик курашда тоқат,
Бу борлиқ, бу бойлик, бу улуғ замон –

Сенга тааллуклидир, сеникидир давр,
Бу шарафга етмоқ осонмас.
Ҳаёт мураккабдир, чўнг, ажабтовур,
Уни улуғлаган енгилмас.



Сен билан юзма-юз туриб сўзлашар,
 Чап бериб бўлмайди тик боқкан чоғи.
 Сенлашсанг – сенлашар,
 Сизлашсанг – сизлашар,
 Кондирап чашмаси, ёндирап чақмоғи.



Уни саёз дарё ўйлама сира,
 Енгил-елпи сузид бўлмас мавжида.
 Уни эҳтиёт қил, кўзингдек асра,
 Ҳам кучли, ҳам нозик у жуда.

Сен унга қалбингни эт тортиқ,
 Юз карра қайтарар ҳақингни.
 Ҳаётни жонингдан сев ортиқ,
 Севурсан ўшандада халқингни.

ОЙ

Боғлар оша
 Секин, билдирмай,
 Зорланиб уфқдан кўтарила ой.
 Гулханда тобига келган чилдирма
 Мисоли тарангдир.
 Чертсанг, ҳойнаҳой...
 ...Асрий муаммолар бўлаётир ҳал,
 Ой – илм қўлида бир сиқим тупроқ,
 Яъни, ўнқир-чўнқир, чўтири, нотугал
 Фазовий заррадир.
 Мен эса кўпроқ
 Унинг гўзаллиги, олтин ўроғи,
 Нури, тўлинлигин мангу асири.
 Ой – ишқий шеъримнинг вазну туроғи,
 Ишқий достонимнинг жозиба сири.
 Гарчи, тез йилларда ой ва ер йўли
 Яқинлашиб қолар қош орасидай,
 Серқатнов йўлчининг биттаси бўлиб,
 Неча бор учарман иш борасида.
 Аммо, шу ишончга қўнгил ёр экан,
 Шундай бир ҳақиқат сўнмас, ҳойнаҳой:
 Токи, бу жаҳонда севги бор экан,
 Ошиқ-маъшуқларга зийнат бўлур ой.



БИРИНЧИ ДАРС

Ўйлар эдим:
Филдиракларга оғир,
Туну кун сирғаниб,
Йўлга урмоқ юз.
Билсам,
Бўлар экан тош йўл ҳам яғир
Филдирак зарбидан кечаю кундуз.
Икки кучнинг шундоқ тўқнашувидан
Туғилади буюк ҳақиқат,
Икки қўлдан чикқанидай қарс.
Бу – сен учун
Энг биринчи дарс.

* * *

Хоним дейму ё эркам, жоним,
Бегим дейму ё дейму бону?
Аёл отли буюк жаҳоним,
Сен – мен учун абадий ёғду.

Ойим дейму ёхуд қуёшим,
Барча сифат ожиз қаршингда.
Сенинг билан кўқдадир бошим,
Сен порлайсан кўнгил аршимда.

Кўклам ўзинг, кўркам ҳам ўзинг,
Бу оламнинг завқу сафоси.
Дилга қувват меҳрли сўзинг,
Сен – оиласам нурли самоси.

Дейдиларки:
Бу олам ичра
Қолса ҳамки бир дона аёл,
Заргар зоти кундузу кеча
Безагини этармиш хаёл...

...Тушунгайсан ҳазилни эркам,
Сенсиз яшаш ўзи бир пулдир.
“Сенинг бирла чиқишишмоқлик ҳам
Даги, жоним, бисёр мушкулдир”.



Бешик эмас, дунё тебратган
 Кўлларингни ўпсам бўлур оз.
 Оёғларинг остида эркан
 Жаннат деган энг олий эъзоз.



Битта кулгинг – ҳаёт қувончи,
 Битта ғаминг – жаҳоний андуҳ.
 Жаҳонларни қамрар қулочинг,
 Оналарда – энг қудратли рух.

Сочларингнинг ҳар бир толаси
 Сомон йўли қадар мунаввар.
 Бешикдаги жажжи боласи –
 У – келажак аталмиш гавҳар.

Аёл номи қошида дунё
 Эҳтиром-ла этгайдир таъзим.
 У – ҳаётнинг рамзидир гўё,
 У – ҳаётдай мангув азим.

ЎЗБЕК ТИЛИМ

Агарчи сўз завқин сурмоқ истасанг,
 Ўзбек тили деган уммонда суз:
 Унда ҳар ибора – илоҳий жаранг,
 Ундаги ҳар бир сўз – нурафшон юлдуз.

Навоий – бу олтин хирмон соҳиби,
 Ҳайратин оламга этаркан изҳор,
 Қалбида бир дунё ғурур бор эди,
 “Хамса” бўлиб ёғди ўшал ифтихор.

ТУЮҚ

Ёнгинангга келдим сойлар кеча-кеча,
 Ҳузурингда ўлтирай деб бирор кеча.
 Юрагимда сенга айтар гапларим кўп,
 Дарвозанг оч... гуноҳларим кеча-кеча.



Берди РАҲМАТ

1957 йилда туғилган. Тошкент давлат университетининг (ҳозирги ЎзМУ) журналистика факултетини тамомлаган. “Даракчи булултар”, “Йўл” номли шеърий тўпламлари нашир этилган. Рабиндронат Тагорнинг “Шоҳ Жаҳон”, “Тожмаҳал” достонлари ни, Рафаэль Альберти, Расул Ҳамзатовнинг туркум шеърларини таржисима қилган.

ЮРАКДАГИ ХОРАЗМ

Эссе

*Баҳодир Содик, Матназар Абдулҳаким,
Рустам Назар, Муҳаммад Раҳмонларнинг
порлоқ хотирасига*

1

Хоразм... Менинг юрагимга уни илк бор Комилжон Отаниёзов қўшиқлари олиб кирган. Ўн-ўн бир ёшдаман, дала шийпони олдидағи симёғочга ўрнатилган радиокарнайдан ҳар куни Комилжон Отаниёзов, Жуманазар Бекжонов, Эргаш Йўлдошев, Таваккал Қодиров қўшиқлари янграб турар, бу қўшиқлар мени ўзига батамом сехрлаб қўйган кезлар эди.

...Сўнг Абдулла Ориповнинг

*Сени Чингиз газабга тўлиб,
Йўқотмоқчи бўлди дунёдан.
Жалолиддин самани бўлиб,
Сакраб ўтдинг Амударёдан.
Сенсан ўша саманим, маним
Ўзбекистон – Ватаним маним!*

каби бетакрор сатрларга дуч келганимда уни қайта кашф этдим.

...Талабалик йилларимда Хоразм менинг юрагимга дўстим, шоир ва мунаққид Баҳодир Содик тимсолида кириб келди. Кейин эса Хоразм шоир ва таржимон Матназар Абдулҳаким тимсолида юрагимдан жой олди. Уларнинг ҳар бири ўзича бир Хоразм эди...

Уларнинг ҳар бири менинг қалбимда қўшикка, шеърга, оқибатли дўстга айланган Хоразм бўлиб қолди...

Сўнг Хоразм менинг бошимда бир оппоқ дунёга айланди...

...Мен бу табаррук заминга илк бор 1980 йилнинг кузида дўстим Баҳодир Содик вафот этган кунлари боргандман.

Бу менинг ҳаётимдаги энг ғамгин кунлар эди. Орадан бир йил ўтиб ушбу заминга шоир Қадам Сайдмурод билан бирга Баҳодир вафотига бир йил тўлиши муносабати билан яна бордик. Урганч аэропортидан тӯғри Матназар Абдулҳакимнинг уйи томон йўл олдик. Бунга қадар ҳам мен бу шоир ҳақида Тошкентда Қадам акадан эшитганман. Эсимда қолгани: “Яхши шоир, Таганрог шаҳрида ўқиган, Николай Рубцовдан таржималар қилган...” Сўнг шоирнинг ўша пайтлар нашр этилган “Тиниқ тонглар”, “Фасллар қўшиғи” шеърий тўпламлари орқали билганман. Энди эса шоирнинг ўзи билан учрашиб турибман. Шу оқшом Матназар аканинг уйида меҳмон бўлиб, эртаси Шовотга, Баҳодирнинг қишлоғига бориб, унинг қабрини зиёрат қилиб қайтдик...

Матназар ака билан Тошкентда, Ёзувчилар уюшмаси биноси олдида учрашганимизни эслайман. Мен китоб дўконидан “ХХ аср немис шеърияти” номли немисча-русча талқинда чоп этилган китобни харид қилмоқчи бўлиб турган пайтим Матназар ака келиб қолди. Сотиб олмоқчи бўлган китобими ни сотувчига қайтардим. Ёнимда пул камроқ экан. Буни сезган Матназар ака “Олинг китобни, етмаганини мен тўлайман”, деди. Китобни олганим эсимда... Матназар акадан қарздорман... Фақат моддийлик маъносида эмас. Мен бу азиз инсондан кўп нарсада қарздорман...

1986 йил... Матназар ака билан Тошкентда, Fafur Fулом номидаги нашриётда учрашиб қолдик.

Шу учрашувимиздан сўнг кўп вақт ўтмай мен Урганчга, Матназар акага хат жойдим. Ўша хатнинг бир нусхаси ўзимда сақланиб қолган экан:

“Салом Матназар ака!

Биз – Баҳодирнинг бир неча дўстлари унинг вафотидан сўнг қабрига қўйиш учун хотира тош тайёрлатган эдик. Маълум сабабларга кўра у тош унинг қабрига қўйилмай, ҳозир Баҳодирларнинг уйида турган экан. 19 апрель – Баҳодирнинг туғилган куни арафасида Хоразмга борсак, ўша тошни сизлар билан биргаликда унинг қабрига қўйисак...

Биласиз, Баҳодир Содиковнинг шахси ва юксак истеъод эганлиги ҳамда ундан катта адабий мерос қолганлиги фақат тор доирага маълум. Бу ажойиб инсоннинг ишларини кенг жамоатчиликка, халқимизга танитишимиз, унинг шундай улуғ фарзанди борлигини айтишимиз керак. Шунинг учун Баҳодирнинг хотира кечаси ҳам ўтказилса. Унга барча ижодкорлар, вилоят газетаси ва радиоси, имкони бўлса, телевидениени ҳам таклиф этсак.

Баҳодирнинг ҳозирги замон ва классик шоирлар ижоди ҳақида ёзган тақриз ва мақолаларини тўплаб (улар беш босма табоқقا яқин), ёзув машинкасида кўчиртириб, Fafur Fулом номидаги нашриёт танқид бўлимига топшириб кўйганимга ҳам уч йил бўлди. Китоб чиқариш ҳозир қанчалик мураккаблашиб кетгани ўзингизга маълум. Яқин кунларда шу масалада Эркин Воҳидовнинг ҳузурига кирмоқчиман. Баҳодирнинг ижодий мероси-



дан намуналарни “Ёшлик” журналида ҳам чоп эттириш мақсадида Омон Матжонга учрашган эдим. Омон ака “Майли, берамиз”, деди.

Яна бир гап, Баҳодир бир-икки ижодкор билан бирга кинотасвирга олингандек экан. Ўша кинолента Баҳодирнинг хотира кечасида намойиш этилса ва ундан бир нусха уйига ҳам бериб қўйилса, яхши бўларди. Яна Хоразмда бир рассом Баҳодир ҳақида туркум картиналар яратганини эшигдим. Хотира кечасида ўша рассомни ҳам картиналари билан иштирок этишга таклиф этилса яхши бўларди. Шу ишлар ҳақида нима дейсиз? Жавоб хатингизни ўқийман деган умиддаман. Хайр, соғ бўлинг!

*Хурмат билан Берди Раҳмат.
8.02.1986 й. Тошкент”.*

Орадан кўп ўтмай Матназар акадан жавоб хати олдим:

“Азиз Берди Раҳмат!

Мактубингизни олиб, хурсанд бўлдим. Раҳмат.

Албатта келинглар. Фақат бир илтимос. Баҳодирнинг асарлари бизга барвактроқ етказилса, акс ҳолда бирон бир иш қилишга улгуриш ғоятда мушкул (матбуот, радио, телевидение маъносида).

Бир марта Баҳодир билан учрашиб, узоқ сухбатлашганмиз. Дийдори яхши ёдимда.

Баҳодир Содиковнинг номини абадийлаштириш ҳамда бошқа масалаларни ҳам тегишли ўртоқлар билан учрашиб, гаплашиб қўяман.

Менинг ўзим ҳам Тошкентга отланмоқдаман. Эҳтимол, йўлиқишиб ҳам қолармиз.

Салом билан Матназар Абдулҳакимов”.

...1989 йил апрель ойида Баҳодир Содикни хотирлаш муносабати билан бир гурух ижодкорлар: Абдул Жалил, Чори Аваз, Баҳром Рўзимуҳаммадлар билан бирга Хоразмда бўлдик.

Ўша пайтлар мен Республика халқ ижодиёти марказида ишлардим. Бу жойда шоир дўстим Яҳё Тоға, таниқли мунаққид Яшар Қосим ҳам ишларди...

Бир куни кечқурун ишдан энди қайтмоқчи бўлиб тургандим, ишхона олдидаги ўриндиқда ўтирган икки кишига қўзим тушди. Уларнинг бири дехқонободлик машҳур шоир Қодир баҳшининг ўғли Қаҳҳор, иккинчиси Қодир баҳшининг шогирди Шодмон баҳши эди. Салом-алиқдан сўнг, уларнинг нимадандир безовта бўлишаётганини сезиб, сабабини сўрадим. Улар Озарбойжонда ўтказилаётган республикалараро баҳшилар кўриктанловида қатнашиш учун таклиф этилганликларини, самолёт Бокуга эрталаб учишини, шу оқшом бирорта меҳмонхонада тунамоқчи бўлиб турганликларини айтишиди. Мен уларга:

– Меҳмонхона ҳақида ўйламанг. Ҳозир бизникига борамиз. Сўнг шоир Чори Авазнинг уйига ўтамиз, – дедим.



Ўша пайтлар Чори Аваз ва Аъзам Ўқтам оилалари билан бир татар монинг ҳовлисида ижарада туришарди.

– Қандай бўларкин, – дейишди иккаласи ҳам бироз хижолат тортишиб.

– Хижолатга ўрин йўқ. Биз эртага эрталаб Урганчга учамиз. Самолётга кечикиб қолмаслик учун ҳаммамиз ўша жойда тунашга келишганимиз. Келганингиз яхши бўлди. Сизларни кўриб улар ҳам хурсанд бўлишади.

Шу оқшом бахшилардан тонгга қадар достонлар тингладик. Шодмон бахшининг “Абу Муслим” достонидан айтган термалари ҳамон эсимда. Шу тун биз хаёлан болаликка қайтган эдик...

Тонг отиши билан аэропортга йўл олдик. Бахши дўстлар билан хайрлашдик. Улар Бокуга, биз эса Урганчга жўнадик.

...Бахром Рўзимуҳаммад бизни Ёзувчилар уюшмасининг Хоразм вилоят бўлимига бошлаб борди. Матназар aka ўша пайтлар шу бўлимда адабий маслаҳатчи бўлиб ишларди.

– Қани кетдик, – деди Матназар Абдулҳаким. – Хоразм телеведениеси ходимлари бизни кутиб туришибди. Баҳодир Содик хотирасига кўрсатув тайёрлашмоқчи.

Кўрсатувни Матназар Абдулҳаким бошқариб борди. Бу кўрсатув шу ижодий даргоҳда фаолият олиб бораётган, университетда беш йил бирга ўқиган дўстим Ҳайитбой Матёқубовнинг ташаббуси билан уюштирилган эди.

Кейин ҳафта давомида Хоразмни айланиб, турли ижодий кечаларда қатнашдик. Ёмғирли кунлар эди. Чори Авазнинг тоби қочиб юролмай қолди. Баҳодир Содикнинг отаси шифокор эди. Уни қишлоғида “Каримберган дўхтири” дейишаркан. Каримберган aka Чорининг белига қиздирувчи чироқлар кўйиб даволади. Эртасига уни самолётда Тошкентга кузатиб қўйдик. Биз эса сафарни давом эттиридик.

Хоразмда ёмғир ёғар, ҳаво баданни жунжиктирадиган даражада совук эди. Қишлоқ клубида Баҳодир Содик хотирасига бағишлиланган кеча бўлди. Баҳодир ўқиган мактаб ўқитувчилари, қишлоқ аҳли зални тўлдириб ўтиради. Ижодкор ҳаёти ва ижодига оид саволлар тинмай ёғиларди. Мен жуда совқотиб кетдим. Кечани бошқариб бораётган Матназар акадан ташқарида офтобнинг кўзида бироз исиниб келишга ижозат сўрадим. Шунда у киши залдагиларга қараб:

– Берди Раҳмат Тошкентда яшагани билан асли ўзи қашқадарёлик. Ҳавоси иссиқ замин фарзанди. Биласиз, у туғилган жой республикамизниң жануби, Хоразм эса шимолий қисми. Шунинг учун бу ер унга шимол бўлиб туюлаётган бўлса ажаб эмас, – деди.

Залда енгил кулги кўтарилди.

Хоразмда кечган ўша сафар энди мен учун армонли хотиралар бўлиб қолди. Чунки ушбу сафардан сўнг икки йил ўтиб-ўтмай Чори Аваз вафот этди. Ундан сўнг Аъзам Ўқтам оламдан ўтди. Шоир дўстларимиз эллик ёшга етиб-етмасдан ёруг олам билан видолашди... Армонли хотиралар...



Орадан йиллар ўтди... Ўтиш даврида ҳамма ўзи билан ўзи бўлиб қолган пайтлар...

...Онам вафотидан уч кун ўтиб, Шахрисабз-Урганч автобусида Хоразмга йўл олаяпман. Автобус кўримсиз бўлса-да, салони топ-тоза. Нарсаларимни ўриндиқка қўйиб автобусдан қайтиб тушаман. Ғилдиракларга қарайман, ейилиб кетган. “Бу баллонлар билан Хоразмга етиб бора олармикин”, дея ўйлайман. Бироздан сўнг йўлга чиқдик. Автобус салонида бор-йўғи етти-саккиз йўловчи. Ҳамма жим. Кимдир уйқуга солган ўзини, кимдир автобус деразасидан ташқарига қараб хаёл суреб кетаяпти... Мени ҳам хаёл чулғаб олган... Онамни эслайман... Энди қишлоққа қачон қайтаман...

...Кўзим илингандан экан, бир пайт одамларнинг шовқинидан уйғониб кетдим. Ҳамма уйкуда. Унда бу қандай шовқин бўлди? Автобус ниҳоятда секин юрар, бояги шовқин ташқаридан келаётганди. Ташқарида ҳам одамлар кўп эмасди. Бир кишининг “Тезроқ бўл, автобус ўтиб кетиб қолади”, деган сўзлари шундай қаттиқ жаранглардиди, назаримда бу овоз бутун тунни уйғотиб юборди... Мен дастлаб ҳеч нарсани тушунолмадим. Гўё ташқарида бир фалокат рўй бергандек. Шу пайт кўзим автобус билан ёнма-ён югуриб бораётган аёлга тушди. У шундай югурадиди, хаёлимда худди бирор нарсасини йўқотиб қўйган ёки кимдир унинг нарсаларини тортиб олган, у эса нажот сўраб югураётган бўлса керак, деган сўзлар ўтди. Автобус назорат постидан ўтиб тўхтагач ҳайдовчидан сўрадим:

– Нима гап, тинчликми? Қаерга келдик?

– Тинчлик, Мискин чорраҳасидамиз.

Сўнг ҳайдовчи салондаги йўловчилар қараб: “Пастга тушиб овқатланиб олишингиз мумкин. Автобус ўн беш-йигирма дақиқадан сўнг жўнайди”, – дея эълон қилди.

Ҳайдовчининг изидан пастга тушишим билан бир аёл “Гўмма ейсизми, ака, иссиққина гўмма” – деган сўзлар билан менга пешвуз чиқди. Бу ўша боя автобус билан ёнма-ён югуриб келаётган жувон эди. Мен шундагина тушундим, уни тирикчилик шундай югуртириб қўйганини. Бир-икки киши гўммалардан харид қилган бўлишди. Аёл шундай озғин эдики, унга қараб юрагим эзилиб кетди... “Эй, ҳаёт, сенинг шундай синовларинг ҳам борми?”

Автобусимиз жойидан қўзгалди. Анча йўл босган бўлса-да, бу ҳолат ҳеч кўз ўнгимдан кетмасди. Мен кейин ҳам бу ҳолатни ҳеч унуголмадим. Қачон бу воқеа ёдимга тушса, ўша аёл тирикчилик деб чорраҳанинг гоҳ у томонига, гоҳ бу томонига эмас, хаёлимда ярим тунда чексиз саҳронинг, йўқ, саҳронинг эмас, у коронғи дунёнинг гоҳ у томонига, гоҳ бу томонига югуриб кетаётгандек туюла-веради... Бу галги сафарим шундай оғир ҳаёллар билан бошланган эди.

Ниҳоят, 2009 йил ноябрнинг бошларида “Ўзбекистон” радиоканали йўлланмаси билан тағин Хоразм сафарига жўнадим.

...Яна Матназар ака билан дийдорлашдик. Шоирнинг ўша қадрдон ҳовлисида дўстим Ҳайитбой, шоир Ошиқ Эркин билан меҳмонмиз, Матназар ака – мезбон. Мехмондорчилик тугагач улар хайрлашиб кетишли. Матназар ака иккимиз узоқ вақт гурунглашдик.



– Матназар ака, радиода менинг “Умр дафтари” деган туркум муаллифлик эшииттиришим бор. У ҳар якшанба куни “Ўзбекистон” каналида эфирга кетади. Ҳозир имкониятдан фойдаланиб сизнинг умр дафтaringизни биргаликда варакласак, – дейман шоирдан розилик сўраб.

Матназар ака дастлаб бироз ўйланиб қолди. Сўнг:

– Яхши, меҳмоннинг амри вожиб, дейдилар. Суҳбатни нимадан бошлаймиз? Тўхтанг, аввал мен сизга сўнгги йилларда босилган китобларимни берсам, танишиб чиққанингиздан сўнг суҳбатлашсак, – деди.

Шоир 2008 йилда “Шарқ” концерни томонидан чоп этилган “Жавзо ташрифи” номли сайланмаси билан бирга 2009 йил “Янги аср авлоди” нашриётида чоп этилган шеър, достон ва мақолаларни ўзида жамлаган “Кўприк” номли китобларини менга тақдим этди. Ҳеч кўз ўнгимдан кетмайди. Шоир “Жавзо ташрифи” китобига дастхатни чап қўли билан жуда қийналиб ёзди. Кейин билсам, Матназар ака яқинда инсульт деган хасталикни бошидан ўтказган экан. У киши дастхатда ғадир-будир ҳарфлар билан шундай сўзларни ёзди:

*Сергей Есенин:
Поэт поэту – кунак.
Бу фикрга тамомила қўшилиб,
Берди Раҳматага.
М.Абдулҳаким
7.XI.09.*

Китобларни вараклайман... “Кўприк” тўплами шоирнинг “Соат” номли шеъри билан бошланган. Унда шундай сатрлар бор:

*Вақт – ҳеч нарса эмас, вақт – ҳамма нарса,
Вақт – орзу, вақт – умид, тоқат ва сабр.
Юракка ўҳшайди жаражжи бу ларза,
Ўлиб тирилади ҳар бир лаҳза бир.*

*Лаҳзалар рухсорин дилга нақши этди,
Тинмай юриб турган қутлуг шу маъдан.
Фалаж билагимга ҳаёт баҳи этди,
Шу соат баҳона меҳрибон Ватан.*

Шоир ҳаётида кечган ҳар бир лаҳзадан мана шундай меҳрли, мана шундай фалсафий хулосалар яратса олган, воқеликнинг мана шундай гўзал манзарасини чиза олган қалам соҳиби эди.

– Ижодингизни кўп йиллардан бери кузатиб келаман, – дедим Матназар акага. – Хўп дессангиз ҳаётингиз ва ижодингиз ҳақида суҳбатни ҳозир бошлиласак.

У киши рози бўлди. Илк савол:

– Болалик йилларингиз қандай кечган? Болаликни соғинасизми?



– Соғинаман. Онам вафотини эсласам соғинмайман...

Кейинги саволларим шоирнинг талабалик йиллари, илк китоб қувончи, ҳаётида кечган унуглиларини лаҳжалари, шеърий таржиманинг ўзига хос мashaққати ҳакида эди... Ўша сұхбатимизни түлиғича диктофондан минидискка ёзип олган эдим. Ўша диск ўзимда сақланиб турибди.

Ёдимда, Матназар акадан хоразмлик бошқа шоир ва ёзувчиларнинг манзили ва телефон ракамларини топишда ёрдам беришини сўрадим.

– Э, бунинг йўли осон, – деди у киши. – Ҳеч кимни қидириб овра бўлмайсиз. Бугун болалар шоири Содик Иноят ўғлини уйлантираяпти. Ҳамма ижодкорлар шу тўйга келишади. Мен билан тўйга бирга юринг, улар билан ўша ерда кўришамиз.

Шунда йўқотган нарсасини топиб олган одамдек, Матназар оғанинг юзида табассум пайдо бўлди:

– Бизда Рустам Назар деган ажойиб болалар шоири бор. Ҳазорасп туман газетасида ишлайди. Бу йил олтмиш ёшга тўлди. Шу шоир ҳакида ҳам эшиттириш тайёрлассангиз яхши бўларди.

Матназар акадан Рустам Назарнинг китобини сўрайман.

– Менда ўзи совға қилган биргина тўплами бор. Фақат қайтариб берасиз, – дейди у.

Сўнг меҳмонхонанинг бўйи баробар узун стол устида сочилиб ётган китоблару қўлёзмалар орасидан ўша китобни излашга тушди. Лекин китоб ҳадеганда топилавермади. Матназар оға дикқат бўла бошлади:

– Боя, сиз келишингиздан олдин шу китобга кўзим тушган эди. Шу ерда, қаердадир турибди.

Ва ниҳоят, топиб менга узатди. Бу шоирнинг 2008 йилда “Хоразм” нашриётида чоп этилган “Ердаги қуёш” номли сайланмаси экан.

Гурланга йўл олдик. Йўлда Матназар aka менга ўша китобдан Рустам Назарнинг “Сумалак” деган ажойиб бир шеърини ўқиб берди:

*Яйраб-яйраб учгандаи
Гулзор узра капалак –
Кизча жсўшиб куйларди:
“Сумалак, эй, сумалак!”
Кўзларида шундай пайт
Порлар эди ажисб нур.
У кашиф этган оламга
Тор келарди тасаввур.
Наврўз эди. Онаси
Кишилоқдан шод қайтганда;
– Мен сизларга сумалак
Келтирдим! – деб айтганда,
Акалари косага
Ёпишидилар талашиб.
Кизганишиб едилар,*



*Тўймадилар ялашиб.
 Қизча эса донг қотди,
 Ҳайрон уйди қошини.
 Чапиллаган оғизлар
 Келтиради гашини.
 Косадаги таомга
 Тикиларди паришон,
 У қашф этган оламдан
 Қолгани йўқ ном-нишон.
 Қизча хомуш, жим эди,
 Билмасди не дейшини –
 Истамасди қўшиққа
 Ноң ботириб ейшини!..*

– Бу бошқача шеър, – деди Матназар ака уни ўқиб тугатгач ҳаяжонланиб. – Яхши шеърни ҳар сафар ўқисангиз ҳаяжонланасиз.

Матназар ака ушбу шеърни бир неча бор ўқиганлиги аниқ. Ҳозирги ҳаяжон-чи? Қувонч Матназар аканинг кўзларида порлаб турарди. Мана сизга ҳақиқий ижодкорнинг самимияти, мана сизга шеърга муҳаббат!

...Содик Иноятнинг қишлоғига, тўйхонага этиб борганимизда кун ботиб, қош қорайиб қолган, ноябрь эмасми, кун жуда совуқ эди. Кутимаган ташрифдан Содикжон жуда хурсанд бўлиб кетди. Тўйда Мурод Иброҳим, Маҳмуд Ражаб, Рустам Назар каби ижодкорлар билан танишдим. Яна бир гуруҳ меҳмонлар ёнимиздаги столдан жой олишди. Рустам Назар билан ёнма-ён ўтиридик. Олдин ҳеч учрашмаганмиз. Рустам ака қотмадан келган, озғин бўлиб, нимагадир ўйчан, маъюс ҳолатда жим ўтирас, деярли ҳеч нарса тановул қилмас, ҳар-ҳар замон қадаҳдаги шарбатдан озгина ҳўплаб кўяр, фақат тез-тез сигарет чекарди.

Тўйдан чиқиб ҳаммамиз шоир Маҳмуд Ражабнинг уйига йўл олдик. Маҳмуд Ражабнинг уйида улфатчилик, гурунг тонггача давом этди. Рустам Назар ниҳоятда кам сўзлар, жимгина тинглаб ўтирас, кўзи ва юзида ўша маъюслик ва фақат ўзигагина аён бўлган қандайдир ўйлар акс этиб турганини сезиш мумкин эди. Рустам акани сухбатга чорлайман. Матназар ака:

– Берди Раҳмат, бундан гап олиш қийин, – дейди.

Лекин гапларимиз қовушиб, яхши сухбат бўлди. Шунда Матназар ака яна:

– Э, балодай гапиаркансиз-ку, – деди шоирга ҳазиллашгандек бўлиб, сўнг менга қараб: – Буни бундай очилиб гапиришини энди кўриб турибмиз, – деди.

Шундан сўнг Матназар аканинг таклифи билан мушоира бошланди. Мурод Иброҳим, Маҳмуд Ражаб ва Матназар Абдулҳакимнинг ўзи навбат билан шеърлар ўқишли. Матназар ака мендан ҳам шеър ўқиб беришимни сўради. Лекин ўша пайти нима биландир chalғиб шеър ўқиёлмадим. Ичим-



да қайси шеърни ўқисам экан, деб ўйладимми, билмайман. Нега шундай бўлди? Нега шеър ўқимадим? Биз ҳали кўп учрашамиз, кейин ўқиб бе-рарман, деб ўйладимми? Матназар аканинг энг сўнгги илтимоси менинг қалбимда армон бўлиб қолди.

Эрталаб нонуштадан сўнг гурланлик шоирлар билан хайрлашиб Урганчга қайтдик. Кун ниҳоятда совуқ эди. Матназар aka юпунроқ кийингани учуми, совқотгани сезилиб турарди. Урганчга етиб келгач хайрлашдик. Матназар aka уйига, мен дўстим Ҳайитбойнинг ишхонасига, вилоят телевидениеси томон кетдим...

...2009 йил 8 ноябрь. Бу бизнинг шоир билан энг сўнгги бор кўришган кунимиз эди.

Тошкентга қайтгач, Матназар aka ижодига бағишлаган эшигтириши эфирда қачон берилишини айтиш учун Урганчга қўнғироқ қилдим. Гўшакни уйидагилардан кимдир олди. Матназар акани сўрасам, “Бироз тоблари йўқ, шифохонада”, – дейишиди. Бир неча кундан сўнг яна қўнғироқ қилдим. Гўшакни ҳеч ким кўтартмади...

2010 йил январь ойи. Бир куни ишхонадан энди чиқиб кетаётиб шоира Ҳалима Аҳмедова билан кўришиб қолдим. Ҳалимахон:

– Э, aka, Мухаммад Раҳмоннинг аҳволи оғир деб эшиждим, уйига бир ўтиб келсак яхши бўларди, улар ҳам ғанимат, – деб қолди.

Мени Мухаммад Раҳмон билан Баҳодир Содиқ таништирган эди. Тала-балик пайтимизда уйига бирга борганмиз. Ўша пайтларда Мухаммаджон aka “Ғунча” кинотеатри яқинидаги кўп қаватли уйларда турарди. Бу – 80-йиллар, Мухаммад Раҳмоннинг “Яшил дарё” номли иккинчи шеърий тўплами нашр этилган, Баҳодир Содиқ шоирнинг шу китобдан ўрин олган шеърлари хақида такриз ёзган кезлари эди.

...Орадан икки-уч кун ўтиб-ўтмай Мухаммад Раҳмоннинг Чилонзор Оқтепасидаги уйига бордим. Эшикни шоирнинг ўзи очди. Менга кўзи тушиши билан қувониб кетди. Шу куни узок сұхбатлашдик. Шоир Тоир Юнусни эсладик. У яқинда оламдан ўтган эди. Мухаммаджон aka “Яхши инсон эди, дарвеш эди”, деди.

– Сайланмам, янги китобим чиқаяпти, “Шарқ”дан, – дейди шоир.

– Қандай ном кўйдингиз?

– “Йўл кўраётган одам” деб номладим. Матназар Абдулҳакимни биласиз, шу дўстимиз китобга сўзбоши ёзган. Китоб яқинда чиқиб қолади.

Мен шоирга бундан икки ой бурун Хоразмга борганимни, Матназар aka билан бўлган сұхбатларимизни айтиб бердим. Бу икки ижодкорнинг хокисорлиги ҳам, камтаринлиги, вазминлиги ҳам, шеърга, сўзга садоқати ҳам бир-бирига жуда ўхшарди. Улар руҳан яқин дўст эди...

– Сұхбатимиз поёнига етай деб қолди. Уни яхши бир шеърингиз билан яқунласангиз, – дейман Мухаммаджон акага.

Шоир шеър ўқий бошлайди:



ЁМГИР МУШОИРАСИ

*Ҳасратлашар боз билан ёмгир,
Куюқлашар шивир-шивирлар.
Ошиқмикан, савдоий шоир, –
Ху, йўлакда кимдир гивирлар.*

*Изҳор истар, тавалло истар,
Балки ундан юрак садоси.
Балки шундан юргандир музтар,
Битта сўзниңг бўлиб адоси.*

*Бўлмасин у бошқалардан кам,
Иймон қадар тийрак кўзни бер.
Савлат берма сен унга, эгам,
Давлат берма, ўша сўзни бер!*

*Сабр бергин, илҳом, илойим,
Рух парвози, дил рози билан.
Давраларда бор бўлсин, доим,
Ўз ёмгири – овози билан!*

Муҳаммад Раҳмон ҳаёти ва ижодига бағишлиланган эшиттириш 2010 йил 24 январь куни “Умр дафтари” номи остида эфирга берилди. Икки кун ўтиб, телефон жиринглаб қолди.

– Берди Раҳмат, мен, Муҳаммаджон акангизман. Эшиттиришни эшитолмай қолдим. Лекин қўпчилик ўртоқлар эшитишибди, “Яхши эшиттириш бўлибди”, деб қўнғироқ қилишди. Сиздан илтимос, ўша эшиттиришни дискка кўчиртириб берсангиз, ўзим ҳам эшитиб кўрсам.

Эшиттиришни дискка кўчиртириб олгач, Муҳаммаджон акага қўнғироқ қиласман. На қўл телефонига, на уй телефонига тушаман. 29 январь, жума куни дискни олиб уйига бордим. Эшикни шоирнинг рафиқаси Холтош опа очди. Акани сўрайман. Опа маъюс ҳолатда:

– У киши шифохонада, комада ётибди, ахволи оғир, – деди.

Опага ака дискни сўраганини, шуни олиб келганимни айтдим.

– Э, уйга киринг, Қашқадарёдан тоғалари келишган.

Уйга кирдим. Бир қиз – Муҳаммаджон аканинг жиянларидан бири, янганинг қўлидан дискни олар экан: “Тоғам бу ҳақда кўп сўради. У киши хушига келиши билан уни эшиттирамиз”, – деди.

Афсуски, уни эшитиш шоирга насиб этмади. Якшанба куни эрталаб шоир Рустам Мусурмон уйимга қўнғироқ қилди:

– Ака, Муҳаммад Раҳмон оламдан ўтибди, пешинга чиқаришар экан.

Ҳалимахоннинг сўzlари ёдимга тушади: “Бу кунлар ҳам ғанимат экан...”

Киши ўтиб, баҳор кунларининг бирида шаҳар марказида жойлашган



“Шарқ зиёкори” китоб дўконига кирдим. Муҳаммад Раҳмоннинг ўша ўзи айтган сайланмаси чиқиби: “Йўл кўраётган одам”. Сўзбошини ўқийман:

“Адабиётсиз халқ, агар шундай халқ бўлиши мумкин бўлса, виждонсиз халқдир. Мен Муҳаммад Раҳмонни халқимизнинг виждонини таъмин этаётган инсонлардан деб биламан. Бундай ижодкорлар умумжаҳон маънавиятининг олдинги жабҳаларида маҳкам туриб ижод этадилар ва ҳамиша тараккиёт сари илгарилайдилар…

Муҳаммад Раҳмоннинг шеърияти кўплаб мутафаккирларимиз, шулар сафида Муҳаммад Раҳмоннинг ўзи ҳам орзу қилган улуғвор сукунатнинг қобигини парчалаб юксалган азамат сўздир”.

Матназар Абдулҳаким шоир дўсти шаънига, унинг шеъриятига берган мазкур баҳога айни пайтда ўзи ҳам муносиб ижодкор эди.

Энди Матназар Абдулҳаким ҳам, Муҳаммад Раҳмон ҳам, Рустам Назар ҳам орамизда йўқ…

Энди қалбимизда армонли соғинчлар бор…

Энди улардан бизга “Ёмғирлар” мерос бўлиб қолди…

Энди бу “Ёмғирлар” гоҳ соғинч бўлиб, гоҳ армон бўлиб руҳимиз боғларига ёғаверади…

ҲУҚМАТ

**Бедси бўлса, одам ўйла
агашмаиди, ақди бўлса, қиши
сўзга агашмаиди.**

Махмуд ҚОШИҒИРУҲ



Лиляна СТЕФАНОВА

Болгар шоираси, адабаси, публицисти ва таржимони. Асарлари жаҳоннинг 31 тилига таржима қилинган. 1929 йилда тугилган. София университетининг филология факультетида, Москва давлат театр санъати институтининг режиссура бўлимида ва М. Горький номидаги адабиёт институтида таҳсил олган. Шеърият, наср, эссе, публицистика, драматургия жсанрларида элликдан ортиқ китоблари нашр этилган. Болгариянинг адабиёт соҳасидаги “Димитров” мукофоти, “Кирилл ва Мефодий” ордени, “Дора Габе” миллий мукофоти билан тақдирланган.



ЮРАГИМДА ЁНГАН МУҲАББАТ

ШАМОЛ

Шамол эшигимни қоқар бемаҳал,
рашқчи эркак каби инжиқ, бадгумон.
Бевафо деб ўйлаб, қиласи жанжал.



Шошмагин,
мана, тун – бегараз гувоҳ,
билиб-билмай мени айблама ноҳақ,
ҳеч қачон хиёнат қилмадим, ахир,
тинчлан,
менда йўқ-ку ҳеч қандай гуноҳ...

Мен сени бир лаҳза унудимми, айт?
Ёлғизлик меҳмони бўлдим,
сукунат
сийлади кўрсатиб меҳр-оқибат.
Хаёл шаробини ичдим мен бу пайт,
серкуёш боғда сайр айладим фақат,
менга қучоқ очди мезбон – сукунат.



Кизиши ма,
жаҳлингни жиловла, шошма.
Сукунатда лаҳза –
қумдек зарра, гард.
Мени меҳмон қилди бир дам сукунат.
Ахир, сеникиман –
сенники фақат.

Ишонмаяпсанми ҳалиям?
Эсла,
дўст эдик иккимиз
ҳамсухбат, сирдош.
Мени рашк қилмагин, девонагинам.
Кундуз сеникиман,
чошгоҳда, тушда –
ҳар кун сеникиман.
Тушдан кейин ҳам
сен билан бўламан ботгунча қуёш.

Деразам ойнаси титрар ногаҳон,
эшигим тақиллар қаттиқ, бетоқат.
Ишонмаяпсанми ҳалиям, наҳот,
ўзингсан-ку менга ёлғиз хукмрон?!

Эрта нима бўлар менга,
билмайман,
сенга юрагимни қўйдим олдириб.
Мен нима қиласман
сен кетиб қолсанг,
фақат сукунатни менга қолдириб?





ТҮЙ

Тўйнинг алёри, завқи,
 Ноғора овози шўх.
 Юракка тегар шавки,
 Юракда ёнади чўғ.
 Овоз қуш каби учар,
 Еру кўкни гангитар.
 Оёқлар раксга тушар –
 Ерни тепиб чангитар.
 Ўйин-кулгидан ҳовли
 Кема каби қалқийди.
 Раққоса қиз рўмоли
 Маёқ каби балқийди...
 ...Оқ кўйлакли келинчак
 Гуллаган каби олча.
 Кўзёшимни артаман,
 Кўлимда дастрўмолча.
 Сўзлайман, кўзимда ёш,
 Кулиб турар лабларим:
 “Келин, тиконсиз бўлсин
 Бошингда гулчамбаринг”.
 Айб бўлса ҳам синдиринг
 Дараҳтлар бутоғини.
 Қуёш қўзига суртсин
 Келинчак оёғини.
 Менинг орзу-тилагим
 Офтоб мисоли ёнур –
 Дераза ойнасидан
 Уйига ёғилсин нур.
 Ноғорачи зарб билан
 Юрагимни чалади.
 Гуриллаб ўйин-кулги
 Тобора авж олади.
 Ҳилпираиди оқ кўйлак,
 Қушдек қанот қоқар енг.
 Даврада сузиб кетар
 Оққуш мисоли келин.





ЁЗ

Тобланаман қуёшда обдан
 Кун чиққандан ботгунга довур.
 Захира тўплайман офтобдан
 Кўпроқ меҳр,
 Ҳарорат,
 Ҳовур.

Ярқирайди оппоқ тишларим,
 Нур юзимни ёндириб суря.
 Пешонамга тушган соchlарим
 Майса каби қовжираб куяр.

Гоҳ кум каби чўл-биёбонда
 Ловуллайман қуёшда ёниб.
 Гоҳ чағалай каби уммонда
 Дам оламан мачтага қўниб.

Тобланаман қуёшда обдан
 Кун чиққандан ботгунга довур.
 Захира тўплайман офтобдан
 Кўпроқ меҳр,
 Ҳарорат,
 Ҳовур.

Қиши келганда бир кун ногаҳон,
 Қаҳратонда қолган пайт борлиқ,
 Ҳамла қилса аёз, муз, бўрон,
 Қақшаганда музлаб тирик жон,
 Қовоқ уйса осмон ҳам совуқ,
 Ҳузурингга кириб борурман:
 Меҳр, ҳарорат ва нур олиб.
 Иссиқкина қўлларим билан
 Қучоқлайман ёнингда қолиб.
 Йўғон арқон каби тўлғонган
 Узун ўрим соchlарим билан
 Билагингни белимга боғлаб,
 Иситаман сени қучоқлаб.
 Мен борман, сен қолмайсан музлаб,
 Бахш этаман меҳр, ҳарорат.
 Доим сени топади излаб,
 Юрагимда ёнган муҳаббат.

*Рус тилидан Мавсума МАНСУРОВА
 таржимаси*



Ранко МАРИНКОВИЧ

Хорват ёзувчиси, шоури, драматурги, киносценаристи. 1913 йилда туғилган. Унинг энг таникли асарлари “Альбатрос”, “Гlorия” пьесалари, “Циклон” романидир. Ёзувчи мамлакатнинг маданият ва санъат соҳасида бериладиган миллий мукофоти – Владимир Назор номидаги мукофотга икки марта сазовор бўлган. 1991 йилда Хорватияда энг яхши новелла учун Ранко Маринкович номли мукофот таъсис этилган. Ёзувчи 2001 йилда вафот этган.



ТИМСОЛ

Ҳикоя

Қип-қизил юзларига бўжама тошган дароз йигит бемор ётган хонага кирап экан:

– Хайрли тонг! Қалай, енгил тортмадингизми, уста? – дея сўз қотди.

Уста тоқатсизланиб бошини силтади-да, гўё аччиқ дамлама хўплаб кўйган кишидек юзини буришиди.

Уста ҳамдардлик санъатида анчайин муваффакият қозонган бесўнақай бу ношуднинг кунда берадиган аҳмоқона саволига жавобан ғижиниб:

– Тузукман, тузукман, – дея сўзланди.

– Мен устахонанинг калитини олгани келувдим, – давом этди йигит қўлидаги қалпоғини хижолатомуз ғижимлар экан.

Бир дақиқача сукут сақлаб, бемор ётган каравотни кўздан кечириб чиққандан сўнг ғўлдиради:

– Ҳалиги... ишга киришсам... дегандим...

Нихоят, у беморнинг юзига қаради. Бу тўрсликнинг ўзгинаси, сўлғин, хира, хасталик қовжиратиб юборган кўзларга дангалига қадалган қараш эди.

“Мунча хунук қарамаса!”

Уста ёрдамчисига ижирганиб боқди. Йигит эса устанинг назарига дуч келиб, бошини қуи солди-ю, яна сукут ичра каравотга тикилиб, уни аввал энидан бўйига, кейин у ёнидан-бу ёнигача кўз билан чамалай бошлади.

“Хаёлан ўлчаяпти, хомчўтляяпти, кесиб тўғриляяпти, тахталарни аппалаб мосляяпти, мих қоқяпти...”

Уста сесканиб кетди. Адёл остидан чиқариб ётган озғин қўлларини чалмаштириди, лекин шу заҳоти қўрқинч ичida уларни бир-биридан айириб, ёстигини тўғрилади-ю, шу ҳолича, қўлларини ёстиққа чўзганча ётиб қолди. Ҳатто шу алфозда ҳам унинг қўллари жонсиздек эди. Тобутни михлаётган, гўр қазиётган бу шафқатсиз қарашлар олдида ҳаммаси ўлим сурагига айланади. Бу қараш заҳар янглиғ, ранж, бетоқатлик сочади, кутишга тоқати қолмаган, шекилли. У аллақачонлардан бери бор умидини устанинг уйига тиккан эди, энди эса сабрсизлик билан вақт-соати етишини кутяпти. Қачон? У ҳар куни калит олгани киради, калит йўлакда, эшик ёндоридаги



миҳда илиғлиқ туради, бироқ қалитни қўлга олишдан аввал худди тутундек сирғалиб ичкари киради, ялтоқланиб ҳол сўрайди:

– Қалай, енгил тортмадингизми, уста?

Уста неча марталаб ўз-ўзидан гина қиласди, тубан гумонларини итқитиб юборишга, ўзини ташландик, кераксиз одам билиб берилган ғамгин ҳисларини қувишга уринади... У холис турмоқни, бир лаҳзага бўлса-да, “бир оёғи гўрда турган” одам қисматидан халос бўлмоқни истайди. Аммо уста бир оёғи гўрда турганини, шифтга боқиб ётган кишига дунё хунук тусда, номутаносиб улкан, енгилмас, унинг ожизлигидан иршайган кимсадек туюлишини биларди. Буни идрок этар экан, ҳеч курса, хаёлларининг юксалишини, ҳақиқатнинг кўзларига тик қарашни истар, бир вақтлардаги кўз чамасини, макон ҳиссини қайтаришга, бармоқлари билан мармар метинлигини сезишига иштиёқманд эди. У ҳаётни соғлом кишилар кўзига очиладиган бор рангларда кўришни истарди.

Дароз эса ҳамон хона ўртасида қаққайиб турар, довдираганча қалпоғини эзғилар, гўё ниманидир кутарди. Нимани?

Қалит эшик ёндорида илиғлиқ. Балки, бу йигитнинг кўнглида са-мимий ачиниш, ўзини ифодалаб бера олмаётган, ибтидоий, итларча содиқ ҳамдардлик бордир-у, зоҳирان қўпол, хиралиги боис гумон туғдираётгандир?

Лаънати хасталик дунёга пастдан туриб қарашга мажбур қилаётганидан ҳаммасичувалиб кетди!

– Қалит қаерда туришини биласан-ку, Лойз! – Беихтиёр кескин гапирганини сезиб, қўшиб қўйди. – Ё у ерда йўқ эканми?

– Йўғ-э, бор, кўрдим. Фақат, олдин устани кўриб қўяй дедим, ахволи қалай экан. Мана, Худога шукур, тангри марҳамат кўргазгани билингапти, бугун анча енгил тортибсиз. Худо хоҳласа, Биби Марям қўлласа, анави, китобга ёзув битаётган фариштани ўзингиз ясад тугатасиз. Сиз тузалмагунингизча унга қўл теккизмайман...

– Ҳайкалга тега кўрма, эшитдингми?

Унга нима бўляпти? Устанинг ўзи ҳам буни тушунмас эди. Юзи нега бу қадар бужмайиб кетди, қўркинчли бўкирган бу овоз танасининг қай бир яширин еридан чиқиб келди? Вужуди яраклаган ханжар қаршисида тургандай сесканди-ю, икки қўлини шафқат сўраган мисол чўзди. Лойз аввалига қўркув ичра чекинди-ю, бироқ ўзига томон чўзилган заиф, нотавон қўлларни кўргач, бемор томон отилди, қўлларни жон-жаҳди билан тутдида, хиқиллаганча садоқат билан ўпа кетди.

Лекин уста қўлларини тортиб олди. Унга Лойзнинг оғзидан теккан намлиқ ёқмаган, худди қўлларини кучук ялаб сўлак теккизгандек туюлган эди. Шу заҳоти қўлларини илиқ сувда, хушбўй совун билан ювгиси, топ-тоза қилиб ювгиси, хаёлларини bemazаликдан халос қилгиси, фариштанинг қабр устига сочилаётган кўзёшлари мисол тўкилган шўртак шилимшиқни тозалаб ташлагиси келди.



Бундан ўн-ўн беш йиллар муқаддам уста тошдан мана шундай фариштапарни ясар экан, уларнинг қиёфасига жингала соч митти болакай – Лойзекни андоза қилиб олар эди. Ўша пайтда бундай фаришталар урф бўлганди, давлатманд кишилар қабр устига кўзёши тўкиши ёки жуда бўлмаганда, сағана атрофидаги гулларга сув сепиши учун фаришта тимсолидаги хайкалчаларни буютиришарди.

Уста эса оппок мармардан ўзи учун, сағанаси учун Лойзнинг бошчасидан кўчирилган митти тимсолни эмас, балки улғайган ғилмонни ясади. Ўлим тимсоли тиз букиб, очик китобга устанинг исмини ёзар эди... Гёй ғилмон шамол шиширган елканлар каби улкан қанотларини ёзиб кўз кўрмас юксакликдан устанинг қабри тепасига учеб тушяпти, қора гранитдан ясалган силлиқ тахта устига оёқ учини салгина теккизиб, қўлидаги каттакон пат билан тош китобга хусниҳат битяпти: Альберт Князъ, сангтарош уста.

Қўлларининг тиришқоқ ҳаракати, қаддининг астойдил эгилгани, бошининг чап елка устига енгилгина энгашгани, яланг оёқлари бош бармоқларининг йигилганлиги – бари дикқатнинг бир ерга тўплангани, эътиборнинг жамланганидан далолат берарди. Уста ғилмоннинг юзида тасвирламоқчи бўлган, кўз илғар-илғамас эркакча мунг ўзгалар учун акл етмас даражада маҳдуд. Лекин Лойзнинг оғзи четидаги кескин чизиқлари бемаъни ва маккор ишшайишга айланиб, унинг қўпол башарасида қотиб қолган. Худди қўзичоқдек жингала соч Лойзекнинг сирли қулимсираши, унинг чор-атрофга мушукдек айёр кўз ташлашлари усталик билан яширилган қалбаки содиқлик билан қўшилиб, тимсолнинг юзларида нодонлик ва тантанадан иборат ғалати аралашма тарзида акс этди.

Мана у, ўша юз! Уста тушуниб бўлмайдиган бу андозага (андоза эса бу вақтда хона ўртасида ҳиқиллаб, бурни-ю, кўзини қасмоқ босган мовут қалпоқ билан артарди) қанчалик узоқ тикилса, ушбу йигит ва ўзи ясаган ғилмон ўртасидаги даҳшатли ўхшашликни шунча аниқ кўрар эди.

Лойз ғилмон қиёфасида! Ҳаммаси айнан шундан бошланди. Тўшакка михланган пайти кўнглига ўрнашган шубҳа бир неча ойлардан бери устанинг қулоғига заҳархандалик билан: “Лойз – ғилмон! Ҳа-ҳа-ҳа, фаришта Лойзек! Лойзек, фаришта эмас, Лойзек исмимни ўлим китобига ёзяпти. Унинг башарасини қийшайтираётган нарса аслида менинг ўлимимдан хузурланиш!” – деб шивирларди.

Унинг тўшагига кириб олиб, оромини заҳарлаётган чидаб бўлмас хаёл, азобли, шафқатсиз, жирканч хаёл – иблис...

Бу хаёллар билан қийналаркан, Лойз тўккан кўзёшлардан охирги умидларни териб оларкан, уста терга пишиб кетди. Ахир Лойз йиғлади-ку! Устанинг қўли унинг ҳақиқий кўзёшлари билан ҳўлланди... Қалпоғи билан ёшларини бутун юзига суркаб юборди...

– Агар мен ўлсан, уни тугалланмаган ҳолиҷа гўримга қўй, хўпми, Лойз?

Йигит:

– Йўқ, уста, йўқ! – дея хитоб қилди-ю, яна овози йифидан титраб кетди.

– Китобга фақат менинг исмимни ўясан, уқдингми? – тантанавор, худди

васият қилаётгандек совуқ оҳангда давом этди уста. – Исмимнинг тагига сангтарош уста деб ўйиб қўй, бошқа ҳеч қанақа ёзувнинг кераги йўқ, ҳеч қандай сана қўймайсан, англадингми?

– Исмингизни мен ёзишим керакми? О, уста!.. – Лойз юzlари оппоқ оқарганча ортга чекинди.

– Нима бўлти? Сен хафа бўлма, булар одатдаги нарсалар, – Йигитнинг тортингани нашъя қилиб, тақдирига шодиёналиқ билан қўнган киши каби сўзлади уста. Кейин заҳарханда ғамгинлик билан қўшиб қўйди: – Одам зоти бир кун келиб ўлиши керак. Қари-қартанглар, ҳаммага халал берадиган, ҳеч кимга кераги йўқлар...

Йигит қалпогини юзига босиб олиб, худди сурнайникидек ингичка овоз чиқариб ҳўнгиллай кетди.

Уста томирларида қон эриганини, оққанини, танасининг ҳар томонига қараб таралганини, ҳар бир катакчани тепиб ўтганини, жонланганини сезди. Сал бўлмаса, ҳушини йўқотай деди.

– Йиғлама, Лойз. Мен факат сен бу ишни бошқалардан кўра яхшироқ уddalaisan, демоқчи эдим...

Шогирднинг ҳўнграшлари ҳамон тинмас, бу овоз энди худди гулхан алангаси мисол чолни исита бошлаган эди.

– Сен бу ишни санъаткорона, меҳр билан адо қиласан, демоқчийдим...

Лойз гўё эсидан айрилган мисол чайқалди, лекин йиқилмади, устанинг каравоти ёнига тиз буқди-да, бошини адёлга тиқиб олди. Йигитнинг танаси аччиқ, бетаскин йиғидан титрар, худди каравот ёнида абадий, умрининг охиригача йиғлашга аҳд этгандек, қўзёшларини ҳеч тўхтата олмас эди.

Кўзёши худди тарновлардан жилдираған ёмғирдек тўкилар, ўтган кунлар ва тунларнинг хавотир ҳамда шубҳаларини супуринди янглиғ олиб кетарди. Болаларча софлик булоғидан тоза қўзёшлари оқиб чиқаркан, қайғули ёлғизлик саҳросига ўзининг нами билан жон бағишлиар эди. Ёлғизлик аслида хасталик орқасида тугаб бораётган умрнинг аянчли қолдигини заҳарлаётган шубҳа илонларига тўла сувсиз тақирилк каби бераҳмдир.

Уста яна ижоднинг улуғвор устунлигини ҳис қилди, гўё қўлига болға билан исказа тутгандек, бешакл харсангдан қабри устига тўкилажак шаффоф, хурлардек соф йиғини ўя бошлагандек ишончи ортди. Шу заҳоти устанинг қўллари остида хиссиз тош вужудга илиқ жон югурди-ю, қайғуга ботиб, ўз яратувчисига бош эгиб, миннатдорчилик ёшларини тўка бошлади...

Альберт Князь ҳали бунчалик эътирофга сазовор бўлмаганди. У исми жисмига мос, сангтарош усталар орасида мисли оқсуяк князь эди. Баъзи ҳайкалтарошлар уни ўзларининг ҳамкасби деб билишар, бу унинг истеъдоди тан олинганига далолат, кўргазмаларда бир неча марта мармар ва гранит ҳайкалчалари ижод аҳли яратган асарлар билан тенгма-тенг намойиш қилинган, юқори баҳолар олиб, санъат билимдонларининг мақтовларига сазовор бўлган эди. Лекин болалигидан итларча садоқат билан унга занжирбанд бўлган, адашганлик, эси пастлик ниқоби остига яширинган, инсонга хос барча хусусиятларни ўзининг маккорлиги билан тўлдирган мана



шу писмиқ йигитда инсон юраги уйғонганини уста ўз ижодининг гултожи
деб ҳисобларди.

– Борақол, Лойз, борақол, азизим. Балки тузалиб ҳам кетарман, сен
бўлсанг, аза тутиб ўтирибсан... – оталарча койинди уста.

– Қандоқ қилай, уста, ўзингиз ҳамиша мени... худди мен... ҳалигинаقا...
Ух... – ич-ичидан хўрсинди Лойз. – Қийналиб кетдим, уста...

– Биляпман, Лойз, қийналиб кетдинг... Бор ташвиш сенинг елкангга
тушди. Айтмоқчийдимки, устахона, ишлар...

– Э, мен буни айтганим йўқ, – хафанаомо қўл силтади Лойз. – Сиз, мана
сиз қасал бўлиб... Оғир-да бу.

– Сен мени ўйламагин-да! Яхши нарсалар тўғрисида ўйла. Ёшсан ахир...
Яхши кўрганинг борми?

Лойз қиз боладек уялиб кетиб, кўзларини яширди. У устанинг бунақа
ҳазил қилишини кутмаганди, лекин итоаткорлик билан бу ҳазилга чидади.

– Ҳазил қилаётганим йўқ, – уста худди керакли ипни топгандек, хотиржам
торта бошлади. – Яхши кўрганинг дилингдаги бор ташвишингни, ғамингни
аритади, тегишиб чимчиласанг, биргалашиб кулишади, қарабсанки...

– Эҳ, уста, бунақа гапларни айтиш уят бўлади, – кўзларини ерга тикиб
минғирлади Лойз. – Бунақа ишлар менга тўғри келмайди...

– Нега тўғри келмас экан? Авлиёмидинг сен?

– Авлиёмасман-у... Барибир...

– Кимсан бўлмаса? Жафокашмисан? Гапимга кир, Лойз, яхши кўрган
қизинг бўлсин. Йўқса, йигитлар сени қалака қилишади. Миянгдан қора ха-
ёлларни чиқариб ташла, мен амаллаб қутилиб оларман, агар уддаласам...

Лойз устанинг дадиллигидан руҳланган каби кулимсиради.

– Тузалиб кетасиз, Худо кўллайди, тузалиб кетасиз, уста!

– Мана, Худо ҳам қўллаб юборади, деяпсан. Биргалашиб бир илож
қилишимиз турган гап...

– Худо сиздан марҳаматини дариф тутмайди! – Лойз гўё Худои таоло-
ни шифо йўллаш билан овора ҳолда кўриб, бу хайрли ишга куйингандек
илҳомланиб хитоб қилди. – Мен тонгда ҳам, шомда ҳам ибодат қиляпман,
руза тутяпман. У шафқат кўрсатади, унинг марҳамати улуғ!

“Менинг тоқатим ҳам улуғ!” – ўйлади уста. Лойзниң художўйлик билан
айтган гаплари устага дағн маросимидағи марсияларни эслатди-ю, дили
ғашланди.

– Майли, бу кунларам ўтиб кетади... – У лапашанг бу йигитнинг
хўрсинишлари боис ёпирилган сирли туманни ёйиб юборгиси келиб, деди:

– Яна аввалги, иккаламиз сибизға чалаётган чўпонни ясаган пайтлари-
мизга ўхшаган вақтлар қайтади... Эсингдами, менга андоза бўлатуриб ух-
лаб қолганинг... Мана шуни ўйла.

– Мен шу тўғрисида ўйлајпман. Ўша пайтда аввалги бекам ҳаёт эдилар,
жойлари жаннатда бўлгур, – аввалги бекасини эслаган заҳоти кўзларини
шифтга тикди. – Ух, шу чўпон бирам менга ёққандики... ўтган кечаси туш
кўрдим: сиз соғ-саломат, шу чўпонни ясаётганмишсиз, у эса ҳеч бўй бер-



масмиш, исказана билан урармишсиз, у чап берармиш, ҳаммаси тушимда. Сиз чекинмас эмишсиз, у бўлса, ён бермасмиш. “Шошма, бадбахт, – деярмишсиз. – Тაъвия эканингни кўрмаяпсанми, сени чиройли қилиб қўйай!”. “Қўйвор, – деб қичқиравмиш чўпон. – Қийнаб юбординг мени! Менга хусн эмас, адолат керак. Менинг орқамдан пул ишлаб олмоқчисан! (Ҳаммасини тушимда эшитяпман.) Улушимни бер, кетаман мен!” Шу пайт қаерданdir аввалги бекам келиб қолганмишлар. “Манави бадкирдорни қара-я! – деярмишлар бекам. – Шошма, Альберт, мен уни ушлаб тураман, сен яхшилаб ур!” Сиз куч билан урармишсиз, чўпон бир силтанармиш, исказана бўлса, учиб бориб бекамнинг пешонасига урилиб, ярмигача кириб кетармиш... Йўқ, у ёғини айтмайман. Мазангиз қочиб қоляпти. Жуда ёмон туш, билиниб турибди, эслашга ҳам кўрқади одам...

– Ҳеч қиси йўқ, айтавер. Кейин нима бўлди?

Устанинг ҳақиқатан ҳам мазаси қочди, ранги ўчиб, адёл остидаги қўллари қалтираб кетди.

– Ишқилиб, чўпон айтармишки: “Менга хусннинг кераги йўқ...”

– Буни айтдинг.

– Шу... У ёғига уйғониб кетдим...

Худди сув остидан шўнғиб чиққандек, Лойз чуқур сўлиш олди.

– Алдама! Кейин ҳам туш кўргансан.

– Тўғри... Алдаётганим йўқ... – дея туриб олди йигит. – Фақат у ёғини айтиш уят-да...

– Нега энди? Бу туш-ку, сен айбдор эмассан.

– Биламан, айбим йўқ, бу – туш. Ҳушёрнинг хаёли миясида, мастники – тилида, деб бежиз айтишмаган-ку. Туш ҳам мастиликка ўхшаган нарса, одам ўзини ўзи эслай олмайди. Миясига нималар келмайди... Шу пайт кейинги бекам кириб қолганмишлар, менинг хаёлимда ҳалигиндай нарсалар йўқ эди... тўғрими? Мен ҳаммаси ҳалол, Худо буюрган қонунларга, виждон амрига биноан бўлишини хоҳлаганман. Ўзингиз ҳам у пайтлар иргай дарахтидек бақувват эдингиз. Майда тош кўзингизга тегиб жароҳат етказганини айтмаса, тамомила соғлом киши эдингиз. Ўшандан бери қанча йил ўтди? Етти йилдан ошгани йўқ. Ҳа, одам боласи шунаقا яралган экан.

“Ҳа, одам боласи шундай яралган экан. Дарҳақиқат, бир сиким чиринди, бебақо”. Устани қалтироқ тутди. У қора гранитдан ясалган ҳашаматли сағанани, унинг тепасидаги филмон қанотли мармар Лойзни эслади. Филмон қалин китобга устанинг исмини ёзарди. Лойз ёзяпти-ю, башарасида иблисона кулимсираш... Ҳа, айнан шу вақтда уста ёш, кўхлик бева – Фридани учратган эди. Марҳума хотини Магда анчадан бери касал бўлганидан хунуклашиб, юрак хасталиги оқибатида шишиб кетганди. Одам боласи шундай яралган экан-да! Уста хотинининг рашки, жанжаллари, боз устига хасталиги жонига текканидан баъзан унинг ўлишини хоҳлаб қолар, бу ҳақда совуқ бир хотиржамлик билан ўйларди-ю, кейин ўз ҳаёлларидан ўзи уялиб кетарди. Шу ўйлари боис виждони қийналар, лекин чиройли, оқ малла соч Фрида ҳақидаги ҳаёллар уни баттарроқ қийнарди...



Фрида марҳум эрининг қабри учун ёдгорлик буюргани келганди. Унинг эри оркестрда гобой чаладиган мусиқачи бўлиб, кутилмаганда, концерт чоғи ўлиб қолган экан. Сахнада бирданига мазаси қочибди, олиб чиқиб кетишга ҳам улгуришмабди, томошибинларнинг олдидаёқ жон таслим қилибди. Фрида марҳум эрининг сағанаси ҳам мусиқага боғлиқ бўлишини истаб, ўзгача, таъсирли бир нима ясад беришни сўради. Уста билан гаплашар экан, бетасалли йиғлар эди. Уста шу захотиёқ сибизга чалаётган чўпон ҳайкалини таклиф қилди. Ўзи ҳам бева аёлнинг қайғусидан ларзага тушган эди. Ўшанда кун илиқ, қуёшли, аёлнинг йиғиси эса олислардан келаётган, қуёш остида эриб кетаётган маъюс сибизга товушини эслатарди. Аёлнинг қайғуси устанинг илҳомини жўштириб юборган, уни юпатаркан, титроқ овоз билан илиқ, самимий сўзларни топиб айтарди, бу сўзлар қаердан тилига келаётганини ўзи ҳам билмасди...

Уста кўплаб инсоний баҳтсизликларга гувоҳ бўлган, ўлим унинг учун илоҳ, илҳом париси, тасавурларининг ягона санами эди. У гўё аёллар шляпалирининг янги андозаларини қидиргандек, тинмай янги қиёфалар, давр руҳига мувофиқ, мижозларнинг дидига мос келадиган янги тимсоллар изларди. Уста беҳисоб тош ҳайкаллар: маъюс парилар, мотамсаро аёллар, ғамдийда оналар, мозорга келиб, оппоқ соколи билан ер супурувчи қадди букик кексалар, кўплаб даҳолар, фаришта ва ҳурлар, савдогар, уй соҳиби, ўт ўчирувчиларнинг серсоқол бошларини, ватанпарвар шоирларнинг қиёфаларини яратган. Бу тош ҳайкаллар қабристоннинг тор панжаралари оралиғида торли ҷолғу ва ноғоралардан шаҳдам садо таралиши биланоқ адабият сари дабдабали қадам ташлашга шайланган раққослар каби саф тортган. Лекин мусиқа садоси эшитилмайди, чор-атрофда сукунат ҳоким. Ҳамма уларни унугтан. Фақат сўлиган, қуриган гулларгина шамолда шитирлади...

Буларнинг барини уста яратди, бегона қайғуга бефарқ, уни мижозларнинг шахсий иши деб хисоблаб, ўз мижозига ҳамдард бўлишга ҳеч қандай эҳтиёж сезмай ясади. Лекин Фриданинг қайғуси уни ҳайратга солди, ўз мотамидек ларзага тушди. Аёлнинг кўзёшларига чўмилган юzlари уни илҳомлантириди, киприклиридан тўкилган томчилар сағаналар яратувчисининг касбий лоқайдлигини эритиб юборди. Унинг юрагида рассом қалби ўйғонди.

Шундай қилиб, ҳаммаси сибизга чалаётган чўпон туфайли бошланди. Лойз андоза вазифасини ўтар, марҳума Магда эса аччиқланиб, аҳмоқона фикрлари учун қарғар, лекин кўпроқ Лойзга таъна қиласарди. Аслида иш бошқа буюртмалардан фарқ қилмас, ҳатто сибизга чалаётган чўпон бўлсада, оддийгина ёдгорлик эди. Шунақа экан, муҳтарама хонимга не сабабдан сибизга, чўпон зарур бўлиб қолибди? Бу хоним эргинасининг мозори совимай турибоқ бошқасини топиб олса, ажабмас! Бунақангি аслзода беғойимлар аслида қанақа эканликларини Магда билмайдими? Уларга фақат пул бўлса... Ёлғондакам йиғлайди-ю, юз-кўзини бўяшни унутмабди! Битта ёғупанинг ўзидан қанча сарфлаган экан-а, беҳаё?



Магда рашкчи, салга шубҳа қилаверадиган хотин эди. У севилмаган аёл сезгиси билан қайси томондан хавф келаётганини бехато топиб, ўша жойга зарба беришга интиларди. Рашкка одатдаги зиқналиги ҳам қўшилиб, буюртма учун келишилган ҳақни ололмай қолишдан чўчиб, Магда зарбни қулочкашлаб уради. Шунда ҳам унинг жаҳли эрига эмас (эрини у жонидан ортиқ кўярди), тенги йўқ дангаса ва уйқучи Лойзекка қаратиларди.

Магда Лойзни ёмон кўярди. Лойзни кичкиналигида қишлоқ ўқитувчиси устага шогирд қилиб олиб келганди. Ўқитувчи болакай истеъоддли эканини даставвал ўзи сезганини қайта-қайта таъкидларди. Бу келажакда унтутилмайди деб умид қиласди, шекилли. Ўқитувчининг фикрича, болакай улғайганда “янги Мештрович”¹ бўлиши тайин, ҳатто маҳаллий руҳоний ҳазратлари ҳам шу фикрда эди. Бола эса етимча, ҳеч кими йўқ...

Уста болани ёқтириб қолди, зурриёди бўлмаганидан, уни фарзандликка олмоқчи бўлди. Лекин эҳтиёткор Магда эрини бола улғайгунча сабр қилишга, унинг қандай одам бўлиб етишишига қараб иш тутишга кўндириди.

“Мана энди унинг қандайлигини кўриб турибсан, – деганди марҳума Магда эри сибизға чалаётган чўпон ҳайкалини ишлаётган пайтда. Ўшанда Лойз ўн саккиз ёшга тўлганди. – Ярамас алдоқчи! Менинг юрагим ёрилса – тамом. Гапимни эслаб қол, Альберт: бу муттаҳам сени гўрга тиқади”.

Қабрдаги улуғвор гранит тахта, унинг устида эса мармардан ясалган Лойз. “Менга хусн эмас, адолат керак”.

Бир куни тунда Магданинг юраги хуруж қилди-ю, ҳаммаси тугади. “Гапимни эслаб қол, Альберт: бу муттаҳам...”

Шунда ёш бека Фрида пайдо бўлди. Кўлида сибизға ушлаган Лойзекни мусиқачининг қабрига ўрнатиши-ю, ўзлари никоҳдан ўтишди. Бари ўз шаънларига яраша, Худо буюрган қонунларга, виждан амрига биноан қилинди. Одам боласи шундай яралган экан! Уста у пайтларда ирғай дарахти сингари бақувват эди. Тўғри, исказа тагидан ўтқир тош учиб чиқиб, қўзини шикастлади, шуни айтмаса, тамомила соғлом эди. Шундан бери қанча вақт ўтди? Етти йил ҳам бўлмабди. Мана, инсон зоти қанақа! “Улушимни бер, мен кетаман!”

– Борақол, Лойз, борақол, – устанинг овози хотиралар доғидан бўғилди.

Икковлари сукут ичра қолишганда, Лойз уста нималар ҳақида ўйлаётганини тушунишга, сезги билан унинг фикрларини топишга уриниб кўрди.

– Аччиғингизни келтирдим шекилли, уста. Баъзида маънисиз гапларни валдирайди киши... Ишонасизми, ростдан ҳам тушимга кирганди... Худо урсин, агар алдасам, – Лойз қўлинин юраги устига қўйди.

Уста шогирдининг сўзларини кесмади, қасам ичишига бемалол йўл кўйиб берди.

Лойз бир зум қулоқ солиб турди. Жимлик. Кўлларини афсус билан осилтириб, хўрсинди.

“Э Худо, агар бу ёлғон бўлса-чи?” Лекин уста ичидагини ташига чиқармади, тоқатсизланиб:

¹Иван Мештрович – хорват ҳайкалтароши (1883-1962).



– Ишондим, Лойз, ишондим. Борақол, менга бекангни чақириб бер, – деди.

Лойз бошини күйи эгиб, ранжиганнамо чиқиб кетди. Эшикни ёпар экан: “Кечириңг”, – дея шивирлади. Унинг бу пичирлашини “Кечириңг, бошқа халал бермайман”, деб тушуниш мумкин эди.

“Худога шукур!”

Уста кўзларини юмиб олди-ю, Лойзек айтган сўзларнинг чигалини хаёлан еча бошлади. Фрида эса шу захоти, худди парда ортида саҳнага чиқишни кутиб турган актриса сингари кириб келди.

Юзига ясама ташвиш аломатларини чиқарган қобилиятсиз актриса. Ҳар қандай хомхаёлдан йироқ одам, ҳатто у қадар синчков бўлмаса ҳам унинг юзида амаллаб яширган бетоқатликни ўқиши мумкин эди.

– Бирон еринг оғрияптими, Альберт?

Аёлнинг овози бир маромда, ҳиссиз жаранглади. Дераза ортидаги тер- мометрга қараб ҳаво неча даража эканини хабар қилаётгандек осойишта.

Уста жавоб қилмади, факат кўзлари ғазаб билан чақнади.

Аёлни кузата бошлади. У чиройли эди. Тепага тараалган соchlари бош устидан энса томон енгил тўлқин сингари ўтиб, энса тепасига санчилган тароққа тўқнаш келарди-да, тароқ тишлари орасидан тўғон ичидан тошган олтин ранг шаршара мисол елкаларига тўкилиб, бўйин атрофида учқун таратувчи шаффоф тўр ҳосил қиласади. Кулранг тор кўйлак унинг баданини ўраб, гўё ҳашаматли пештахта магазиннинг бор давлатини кўз-кўзлагани каби аёлнинг бўлиқ қоматини бутун жозибаси билан намойиш қиласади. Бирдан устанинг кўнглида ёнгинасида адо билан буралиб, кишидаги яширин туйғуларни жунбишга келтириб юборувчи шу мағрур вужудга эгалик қилиш истаги бош кўтарди...

У титроқ кўлини узатиб, хотинининг сонини силаган бўлди. Шу захоти ёдида бир вақтлари кўнглида шу аёлга нисбатан жўш урган эҳтирослар, аёлнинг эркалашга даъват этувчи нозик қилиқлари ҳақдаги хотиралар бош кўтарди. Лекин Фрида унинг меҳрини рад этгандек четланди. Устанинг қўли садақа учун бехуда чўзилган гадонинг қўллари янглиф осилди. Демак, барчаси тугабди...

Уят овозини сиқиб кўйганидан:

– Фрида, – дея шивирлаб чақирди.

Хотини деразага қараганча овоз берди:

– Ҳа, Альберт!

– Бирон нарса де...

– Нима? – ўғирилди Фрида. Лекин дераза ёнидан кетмади. У беморга яқинлашишга чўчирди.

Уста шифтга нигоҳларини қадаганча индамай ётарди.

Эрининг жимлиги аёлни қўрқитиб юборди, каравотга томон бир қадам ташлади-ю, хона ўртасида қотиб қолди.

– Нима дей, Альберт?

– Ҳеч нима, – бефарқ жавоб қилди уста. – Илтимос, менга илиқ сув келтир. Совун ҳам...

– Илиқ сув? – Фрида эрини алаҳляпти деб ўйлаб, кайфи учиб кетди. Уста ҳеч қачон шунчалик индамас, сирли, қўрқинчли бўлмаганди. – Нега сув зарур бўлиб қолди? – Аёлнинг тоқати тоқ бўла бошлаганди, шу сабаб овозида кескинлик пайдо бўлди.

– Кўлларимни ювмоқчиман...

– Буни қаранг-а! Энди қўлини ювмоқчимиш! Нима учун?

Уста нима хоҳлашини биладиган кишининг истехзоли илжайиши билан заҳарханда қилди:

– Кўлларим тоза бўлиши учун!

Кейин қўшиб қўйди:

– Агар малол келса, кераги йўқ. Очиги, Фрида, қийналсанг, келтирма, керакмас. Фақат тўсатдан тоза...

Хотини ўзининг фидойилигидан ғуурланган мисол енгил сўлиш олдида, беморнинг бемаъни инжиқлигини кўтаришга мажбур бўлганларга хос ройиш билан чиқиб кетди. Бошқа бирор унинг ўрнида буларга чида бурагиди? Хотин ўз назарида таҳсинга лойиқ матонат билан тақдирига тушган шу кўргиликка чида бурагиди.

Уста хотинига ачиниб кетди. Ўзини ўзи айблар экан, дилида уйғонган ташландиқлик ҳиссини бостиришга, Фридага меҳрибонлик ва фидойилик туйғуларини қайтаришга, ўз-ўзини эса рафиқасига ишонч билан қарашга ундамоқчи бўлди. Лекин шафқатсизлик билан рухини енгиллатмоқчи бўлган бир пайтда аёл яна унинг кўз ўнгидаги ёш, чиройли ва итоаткор бўлиб қолди. Уста хотинининг итоатида сўзсиз таънани ўқиди, Фрида эса итоат панасида интиҳони кутарди. Эркакнинг кўнгли яна оғир тортди.

Фрида иссиқ сув тўлатилган тогорани кўтариб келди. Тогорадан кўтарилаётган буғ хонада ёқимли илиқлик ва тозалик исини таратди. Хотиннинг билагида оппоқ сочиқ. Совун келтиришни ҳам унутмабди. Худди эри айтгандек.

Фрида тогорани каравот ёнидаги стул устига қўйди, сочиқни стул суюнчиғига осди, совунни эса ўнг томонга, bemor қўлига олиши учун қулай тарафга қўйди. Бари инсофли ҳамширанинг bemорни парваришилаш қоидаларига аниқ, пухта риоя қилишини эслатади. Хотин ҳамма нарсани таҳт қилгач, яна хотиржам дераза олдига келиб, ҳовлига қаради.

Деразадан ҳовли тўридаги устахона кўриниб турарди. У ердан искананинг кескин, ғазабнок дўқиллаши эшитилди. Гранитни худди қурилишдаги тошни майдалагандек тўмтотқ, ҳиссиз жаҳд-жадал билан бурдалашар эди. Худди искананинг бетакаллуп сиқуви остида тош инграб юбораётгандек...

“Тўнка! Бор нодонлигини мармарга қоқиб киргизмоқчи... Кўксини очиб, мушакларини ўйнатиб, кучини кўрсатиб мақтанияпти. Ишлаётганини билсин деб, бор кучи билан уряпти! Кўрганлар ким ишлаётганини, тирикчилик ғами кимнинг зиммасида эканини, хўжайиннинг хасталигини



күтариш, бечора бекага ғамхўрлик қилиш кимнинг елкасига тушганини билиб қўйишишн...”

– Альберт, нега қўлингни ювмаяпсан? – деразадан нари кетмай, муло-йимлик билан сўради Фрида.

– Кейинроқ... – ҳовлидан келаётган тентакона зарб товуши устанинг кулоқ пардаларини ёрат даражада қийнар, лекин улардан беркинишнинг сира иложи йўқ эди.

– Кейинроқ сув совиб қолади, – хотинининг овозида билинар-билинмас фазаб титради. Лекин у дераза ёнидан нари кетмади.

– Совимайди, иссиқ экан... Бу аҳмоқ нимани шунчалик гумбурлатяпти? – Лойзнинг зарбаларига ортиқ чидай олмаслигини илғаб норозиланди уста.

Фрида ўгирилиб, эрига узок, масхарали қараш билан тикилди: мана, энди бу ҳам ёқмади...

– Нега гумбурлатсан? Ишляяпти! – охирги сўзга ургу бериб деди хотин. Кейин тағин деразага қараб олди. – Иш деган шунаقا бўлади-да. Биласан-ку, тошни тешиш пат юлиш эмас. Тош йўнганингда ўзинг дўқиллатмасмидинг?

Аёлнинг овозида янгича оҳанг пайдо бўлди. Демак, унинг тоқати чегараси шу ерда экан-да: Лойз! Шу нуқтагача у ҳар нарсага, ҳатто қўл ювиш, сув келтирилгандан кейин эса қўл ювишдан айниш каби инжиқликларга чидаши, бардош бериши мумкин, энди эса эри бўлмағур шу гапни топиб ётиби... Уста касал экан деб умуман ишни ташлаш керакмиди? Ишни ташлаб, фақат беморга қараш керакми?

Йўқ, у эри нима демоқчи бўлганини тушунмади...

– Мен унинг зарби бошқача демоқчийдим. Ҳайкалтарош мармарни бунақа урмайди, мен товушидан эшитяпман-ку... У тошни хис қилмаяпти...

– Лекин йигитчанинг кучи зўр, – деб юборди Фрида ногаҳон. “Йигитча” деган сўз аёлнинг тилларида самимий меҳр билан янгради.

– Қишлоқи! – гапини тузатишга шошилди у. – Қанақа тақиллатишни унга кўрсатиб берсанг бўларди.

Уста жавоб бермади. Ҳовли бутун дунёни қулатишга аҳд қилган Лойзнинг шафқатсиз зарбалари остида зирилларди. Фрида эса ҳамон нозик нарсалар салтанатида яйраётган жоҳил кучдан завқланганча дераза олдиди турарди. “Лекин йигитчанинг кучи зўр!..” Уста манфур зарбалардан кутулмоқчи бўлиб, бошига адёл тортди.

Фрида деразадан нари кетди. Эри бошини беркитиб олганини кўриб, маъюс жилмайди-да, изтиробли сўлиш олди.

– Э, Худойим! Майли, айтаман, ишини тўхтатсан, – деганча эшикка йўналди.

– Фрида, қаёққа кетяпсан, қолсанг-чи! – дея ўтинди уста жон ҳолатда адёлни отиб юбораркан.

Фрида чиқиб кетди. Жаҳл билан эшикни очди-ю, охирги лаҳзада фикридан қайтиб, тавақаларни ушлаб қолди, эшик тарақламасдан ёпилди. Сал ўтмай, ҳовлидаги дўқир-дўқир ҳам босилди. Сукунат чўқди.

Бу сукунат тунги, у қоронфиликда уйқусизликдан қийналиб ётаркан, ҳар

бир шитирлаш, ҳар бир сирли товуш унга улкан, ақл бовар қилмайдиган, унга бўйсунмайдиган ваҳимали олам ҳақида сўзлайдиган сукунаттга ўхшарди. Бу оламда Фрида яшайди, Фриданинг эринчоқ ҳиссиётлари қондирилади, бу оламда Фриданинг мафтункорликда тенги йўқ вужуди мавжуд.

У – аянч, ўлимга маҳкум одам, ушбу қалбаки ва бузук оламда умрининг интиҳосини кутяпти. Хасталик белгилаган сирли тартибга бўйсуниб, хасталикка тегишли қатор мажбуриятларни риёкорона бажарган холда интиҳони кутяпти. Гўё барча ташвишлар айнан касалликка жамланган-дек, дардга барча қулайликлар муҳайё этилган тўшакдан, ўз ёнидан жой бергандек.

Аввалига уста Фриданинг янгича кўринишдаги меҳрига қаршилик қилиб кўрди. Жон-жаҳди билан халос бўлишга уринаётган кишига хос ўжарлик билан аёлнинг ўзига, гўзаллигига етишмоққа уринди. У ёлворарди, кейин унга марҳамат кўргазиб ён беришарди. У кўргазилган марҳаматни рад этиб, муҳаббат талаб қиласади. Қанчалик ғазабланиб қайсарлик қиласа, кўргазилаётган марҳамат шунчалик ортар эди. Соғлом кишиларнинг ожизларни бўйсундиришга ёрдам қилувчи устунликлари шундан иборат.

Шундай қилиб, уста бўйсунди. Тўрут девор ичида, ўлимга маҳкум одамнинг тўшаги ёнида юз бераётган воқеаларнинг сирли ва тушунарсиз алмашинувига ғарқ бўлди.

Айлана эса кун сайин торайиб, шафқатсизларча тортилиб, ёпилиб борарди. Беморнинг атрофини кудратли чегара девори билан ўраб олган жонкуяр бедорлик, Худодан қўркиб қўрсатилган эътибор уланган жойларидан дарз кета бошлаган, ёриқлардан очиқ яраларни даволовчи ҳаётий кучлар оқиб чиқарди. Яра эса унинг ўзи эди. У барча ташвишларнинг сабабчиси, унинг хасталаниши боис ҳамма ўз фароғатидан воз кечган, энди эса яширишнинг иложи қолмаган асабийликка маҳкум, барчани ўз-ўзини қурбон қилишга мажбураётган айбдор эди. У ўзини айбдор сезиш хиссидан қутулишга, Фриданинг ўзини қурбон этишга тайёр туришдек фидойилигини суистеъмол қилиш эҳтимолидан халос бўлишни жон-дилдан истарди. У алдаётганларига ишонч ҳосил қилишни, зардаси қайнаган маҳалда ўлишини хоҳларди. Ўшанда у ўлимни ҳам бир иноят, узил-кесил озодлик деб қабул қилган бўларди.

Уста ўз шубҳаларининг манбани излаб топишга уринди. Лекин шубҳа ёйилиб кетиб теварак-атрофни ғарқ қилиб юборганидан манба кўздан яширинган, фикрлари занжирида биринчи бўғинни яратиб, уни ларзага солган дастлабки ногаҳоний гумон шууридан изсиз ўчиб кетганди.

Лекин қачондир бунинг ибтидоси бўлган-ку! Қаерда, қаерда у, ибтидо? Ўша нигоҳ, ўша кулги, зулматдаги ўша шивирлаш, шитирлаш, ўғринча қадамлар қани?

Аммо бу қачонлардир, ё унақасига, ё бунақасига бошланган-ку! Бир куни тонгда ёки шомда шубҳанинг сояси пайдо бўлган, балки у азоблагувчи ёлғизлиқдан тугилгандир... Ноаниқ, ғайрииҳтиёрий бу шубҳа, эҳтимол, ёлғизликнинг совуқ сахросида, Фриданинг висолига етиш истаги, хоти-



нининг овози, нафаси, меҳрига чанқоқликдан пайдо бўлгандир? Фрида эса ёнида йўқ... Балки кейин у Лойзни эслагандир... Ушбу ғимон – ка-бутар қанотли пок, оппоқ, жинссиз мармар вужудни эслагандир. Мана шу қиёфани мармарда яратиб, уни жисмсиз тимсолга айлантириш истагини эслагандир...

Бу икки истак қачон учраша қолди? Бу икки фикр қачон бир-бирининг бағрига кирди-ю, унинг ишончини бўғиб ўлдирди?

...Қабристонда яна қўнғироқ чалинди. Бугун охирги марта чалинди ше-килли, ахир қоронғи тушяпти. Қўнғироқ бонги аталган кимса эса аллақачон кути ичида қўғирчоқдек ётибди, даҳшатли ўйинчоқлар тўпловчи ажал ортидан жўнатилиш соатини кутяпти.

Беморнинг туни – жар устидан ташланган чирик кўприкдир: оёқ қўйишинг билан оғир хаёллар юки остида пастга қулайсан. Уста бундай тунларга хаёлан киришга ҳам ҳеч қачон журъат килмаган. У фикрларини катақ ва қутиларга қамаб, ётиш жараёнининг майда-чуйда, ўз жисмига алоқадор тафсилотларига диққат қиласди. Каравот унинг учун номаълум, душман олам бўлиб, қийинчиликлар ва муаммоларга тўлиқ эди.

Уста ивиб кетди. Танаси теккан жамики нарса нам тортиб, ёқимсиз дарражада ёпишқоқ бўлиб қолаверди. Тер теккан адёл оёқларига ўралашиб, харакатларини тушовлаб қўярди. Чойшабнинг иссиқ, нам матоси чандик, ажин, буришиқ каби ғижимланиб кетарди. Ларьнати латталар... Оёқ бармоқлари чалкашган латта-путтталар орасидаги салқин ариқчаларни пайпаслаб топади, чукурчалар, ўрачаларга кириб қолади, қутилмаганда кенг бўшлиқларни топади-да, ўша ерларда эсган енгил салқинликдан ором олади. Унинг оёқлари ёпишқоқ, кир, тартибсиз латталар асиригидан чиқадиган йўлларни ўжарлик билан излайди.

У қўлларини майн силайдиган текис, силлиқ мармар билан ишлашга ўрганган экан. Каравот эса мармар эмас...

Каравот соғлом кишилар учун шиширилган уйқу елканлари остида суза-ётган оппоқ кемадир. Тонг соҳилига сузib келгач, саёҳатчилар орқаларида ажойиб тушлар изини қолдирганча қирғоққа тетик чиқиб келишади. Уйқуга тўйиб олиб, эснаб, керишиб, “хайрли тонг”, дейишади. Таналари оғримай, гумон-у шубҳалардан қийналмай, тунги саёҳатлардан хиргойи қилганча бепарво чиқиб келишади. Кейин ашула ёдлагандек, иштаҳа билан нонушта чайнашади. Овқат ҳазми уларни ҳамроҳ шамол сингари олға ундайди, улар кўчалардан кема сингари енгил сузib кетишади. Одамлар ўз некбин хаёлларини ейишга ҷоғланган ширин олмадек эркалайдилар. Соқоллари, мўйловлари, бўйинларини, аквариумдаги балиқларини, қафасдаги қушчаларини авайлаб парваришлайдилар.

Хаёт ва мамот улар учун teng мувозанатда: бир кунмас-бир кун ўлимнинг оғир тоши тарози палласини босиб юбормагунча яшайверадилар... Мана шунда уста Альберт Князь уларга таъсирчан ўйинчоқ – қабр устидаги йиғлайдиган ёки гулларга сув сочадиган кўркам митти фаришта – Лойзек-



ни совға қиласы. Баъзиларга гўрлари устида кўзёши тўкилгани ёқади, баъзиларга эса гулларга сув қуийлгани маъқул келади. Лекин ёқимтой фаришта айёр, у кўзёши тўкмайди, сув ҳам сочмайди, у актёр янглиғ турланиб, ўз вақти-соатини кутади...

Пастда, шаҳарда, катта бутхонадаги соатлар бонг урди. Оғир зарб то-вушлари биринж қуймаси мисол узилиб, йўлкаларга юзтубан йиқилди. Беморга бу зарблар вақт ўтаётганини билдиримайди, унинг вақти боши остидаги ёстиғида исиниб ётибди, соатнинг бонги эса бошини нарига олиши зарурлигини эслатади, ёстиқни бир хил микдордаги салқинлик улушларига бўлишга ёрдамлашади. Ҳар чорак соатда уста салқинликнинг янги улушкини сарф қиласы, ёстиққа юзини босиб иштиёқ ва чанқоқлик билан салқинликни ичади.

У каравотни кимсасиз оролга умрбод сургун қилинган қувғинга хос ҳафсала билан тиришиб тадқиқ қилди. Лекин ҳеч қаерда бир зарра ҳам охор, бир томчи ҳам салқинлик қолмаган, бари чиқитга чиқиб бўлган эди. Барчаси иситманинг қайноқ нафаси билан забт этилиб, уйқусиз тун гирдо-бидиа ғижимланган.

Нажот излар экан, bemor ёстиқни ўғирди, тескари томондаги салқинликни худди чўлдаги сувни авайлагандек эҳтиётлаб сарфлай бошлади.

Сахро эса тун каби чексиз, ниҳоясиз. Сахро бўйлаб титроқ қўллар ғимирлайди, изғийди, тундан, оғриқдан, ярамас латталар уюмидан, хасталик устанинг бошига солган барча кўргиликлардан қочиш йўлларини ахтаради. Қўллар зулматни оғриқдан, оғриқни хаёлдан ажратиб, ҳар бирини алоҳида тадқиқ этишга имкон берадиган кундуз ёруғлигини излайди.

Қўллар каравот четига таянади, қўллар саҳарни, деразага тушадиган тонг шафағини, хўроздинг эрталабки қичқириғини, трамвайнинг биринчи жиринглашини, илк йўловчининг қадам товушларини, инига шўнғиб кетган сичқоннинг шитир-шитирини кута олмайди...

“О, ўғри одамлар, ўткинчи одамлар, хўроллар, тонгти трамвайлар!”

Уста ёрдамга чақиради, атроф эса тилсиз зулмат ва бўшлиқ уммони. Қўллар зулматга ғарқ бўлиб, бўшлиқ билан тўқнашганидан қўрқиб титрайди.

“Ҳеч нима йўқ, – дейди қўллар. – Биз бўшлиқда ҳеч кимни учратмадик. Фақат ўз-ўзимизни кўрдик, холос”. На шабада, на пашша бор, бари зулматда йўқ бўлиб кетган. Тунда фақат ўз ожизлигини ҳасрат билан ҳис этган қўллар яшайди.

Қўллар зулматда яшайди. Гранитнинг қора сувлари устидаги оппоқ мармар қўллар. Оппоқ қўллар зулматда, девор ортидаги гумбаз ва равоқлар остида, ўлик шаклларнинг сирли шаҳрида худди озгина ҳамдардлик, озгина ҳаяжон, лоқайд қўзлардан иккита самимий томчи ундиromoқчидек дардли илтижо билан букилади.

Уста сесканиб кетди. Гўё зил кетган умидлар тўсиғи ортидан ўз орзусига мўралагандек бўлди. У ерда ҳамон очиқ китоб тепасида филмон – Лойз ўтиради. Ишга киришишга тайёр жаллоддек ўтиради...



Лекин китоб ҳали тўлдирилмаган, сахифалар тоза, муқова ғилмоннинг тиззалари орасига сиқиғлик, варақлар иккита енгил тўлқин мисоли осилиб тушган...

Бу ерга ҳали сағаналар ижодкори – устанинг исми ёзилиши керак. Уста ўз асарини кўздан кечиради, баҳолайди, ундан лаззатланади. Уни қувончли қониқиши ҳисси чулғайди. Бу миттигина йиғлоқи Лойзек эмас. Йўқ, бу улкан, даҳшатли, машъум тимсол, бу фаришта ўзининг қудратли қанотларини бир марта силкиш билан кимнингдир ҳаётини таг-томири ила суғуриб олади. Устанинг кўз олдидан эса мана шу асарни кўриб ҳайратдан қотган келажак авлодлар ўтади. Ўзи ҳам томошабин оломонга қўшилиб кетади, ўзини ҳеч кимга танитмай, одамлар орасида бегона бўлиб, мақтовларни бепарво, гўё улар нотаниш кишига аталғандек эшитади. Қисқа, расво воқеликнинг ушбу хилват, ташландиқ бурчагида ётган устага абадиятнинг чексиз кенгликларидан эътироф етиб келгандек. Унга бокийлик нафаси тегди. Мехмоннавозлик билан очилган эшиклардан унга гўзал, улуғвор, абадий нимадир кулиб боқди.

Оёқлари ўз-ўзидан шиппакларини пайпаслаб топди-да, уни эшикка томон олиб кетди. Наҳотки, танаси унга қулоқ солаётган бўлса? Оғриқсиз, қаршиликсиз. Оёқлари остида унинг қадам қўйишини жон деб кутаётган қаттиқ, ишончли ер! У ўзини одам бўйи баландлиқдан туриб маккорлик билан зулматга яширинган тўрт оёқли, пакана нарсалар дунёсидан баландга кўтарилигандек ҳис қилди. Юриш санъати ҳали унутилмаган экан, у чанқоқликдан жон таслим қилаётган киши жилға жилдирашини эшитиб ҳовлиқандек, шошиб борарди. У яна бир марта ижод захрига тўйиб олиш, суви заҳарланган ушбу булоқни ўпишни истар эди.

Йўлакда эски пўстин ва устахонанинг қалити илиғлиқ турарди. Ҳовлида илиқ баҳор туни ва юлдузларнинг эркалаб милтиловчи нурлари хукмрон. Юлдузлар остида эса қалъя деворига уланган миноранинг қораси кўринди. Кўкиштоб сарғиши осмонга санчилган минора устанинг рўёсида арши аълоға интилган Бағдод гумбазларини жонлантириди.

Ҳовли – туғилмаган тимсоллар ором оладиган, сукутга чўмган жой. Ҳар ёқда қўпол, бешакл, тарашланмаган тошлар сочилиб ётади. Уста туғилмаган сиймолар, озод этилмаган изтироб оралаб худди алғов-далғов орасида юрган қодир яратувчикидек ўтиб боради. Сангтарош оппоқ тош зарралари тўкилган илонизи сўқмоқдан юради, унинг ўнг ва сўл томонларида – зулмат ва ухлаётган дунёларнинг қора шарпалари. Сўқмоқ сут рангидаги нурга кўмилган, гўё устанинг оёқлари остига майда юлдузлар сочилиган.

Зулмат тўрида, алғов-далғов ичида, ҳув ҳовли охиридаги бостирма деразасида кўз илғар-илғамас нур иблисона милтиллайди. Липиллаётган олов коронгиликда яширинишга интилиб писибгина титрайди.

“Тўхта, бу ерда ҳаёт бор!” Бостирмада кўринган шуъла шундай дея таъкидлади, аммо тун устага деразада кўринган нур тилида ўлим талвасаси қаерда ниҳоя топганини шипшиди. Ўлим унинг вужудига ўрнашди-ю,



ўзининг муздек қўли билан уста жон-жаҳд ила билишни истаган ўша “аниклик” томон етаклади... Ва устанинг бошини ойнага теккизиб, ичкарига мўралашга, шафқатсизлик қадаҳини тубигача ичишга мажбур қилди...

Ичкарида эҳтиром билан ҳошиялаб қўйилгн ёшлик ҳимоячиси авлиё Алоизий Гонзаго сиймоси илиғлиқ, унинг олдида хира шамчироқ безовта липилларди. Чироқнинг ночор ёруғида кўринган суратда ёш авлиё ўзини ўзи азоблар, нарироқда эса мурданинг кўз косалари бўш, бурни ботиқ бош чаноғи осилиб қолган жағларини тиржайтириб ётарди. Бу мурда тириклигидага тўйиб-тўйиб гуноҳ қилган, энди эса авлиёни мазахлар эди. Пастда, ушбу фидокорона тазарру ва орсиз ўлим тасвирланган маъюс суратнинг остида, титраётган шамчироқнинг бекарор липиллаган нурида оппоқ ёстиқда ёнма-ён ётган, уйкусида бир-бирига қапишиб кетган иккита бош кўзга чалинди.

Устанинг кўзларини бу манзарадан ғазаб эмас, нафрат эмас, совук ни-магадир тегиб кетиб сесканиш ҳисси четга олиб қочди. Ҳатто ачинишга ўхшаш нимадир унинг қорачиқларини намлади ҳам. Шу бостирма, шу тўшак, милтиллаётган ожиз шу чироқ, оппоқ ёстиқдаги, Фрида ғамхўрлик қилиб ўзининг бўм-бўш каравотидан келтирган, шамчироқ ёш авлиё чекаётган азобларни ёритаётган, бечора ғилмоннинг ўзи эса хаётни қучиб, ширин уйқуга ғарқ бўлаётган ифлос жаннатга олиб келган оқ ёстиқдаги ғамгин севигига ачиниш. Бу камбағалнинг уйкуси эди: худога – худойи, авлиёга – тақво, ўзига эса... қўлга илингани...

“Бечора Фрида!”

Уста зулматга қараб юрди. На юлдузли сўқмоқ, на туғилмаган дунёлар бор! Бари ғойиб бўлди! Фақат қўпол тош палахсалари ва ёзувлар битилмаган кўр тош тахталарга тўлган хунук бир ҳовли қолди. Мана бу ерда, чапда икки тавақали катта дарвозасида кичкинагина эшиги бўлган устахона бор. Уста калитни қўлида маҳкам сикди. Оч, мойланмаган қулф хўжайнини таниб, садоқатли ит сингари ғингшиди. Уста дарвозани қўллари билан силади, электр чироқни ёқадиган тутгани пайпаслаётib, қадим содик деворларни сийпалади.

Бирдан ёнган чироқ нурлари остида улкан оппоқ фаришта худди устани анчадан бери кутаётгандек қанотларини қувонч билан ёзиб юборди...

Уста бағрикенглик билан очилган бу қучоқни кўрганда ишонқирамай, тошдан йўнилган Лойзда келажак авлодларга аталган ўша улуғ, ўша ақл бовар қилмас, ўша ўлмас ва даҳшатли “бошқа” нарсани фаҳмлашга уриниб ортга чекинди.

Лойз, бостирмадаги бечора ғилмон, китобга ёзув ўйишга ултурган экан:

АЛЬБЕРТ КНЯЗЬ, сангтарош уста, рассом.

Фалон санада тугилган – (санда кўрсатилмаган) вафот этган.

Йигит чиройли ҳарфларда, катта меҳр ва қунт билан, сўнгги алвидо азобини жойлаган каби ўйибди.

“Мана шу холос, Лойз, бошқа ҳеч нарса керак эмас! На ўлмас, на даҳшатли. Оддийгина!”




Уста сагана усти чамбаридаги таъсирчан ёзув янглиф қўшилган “рассом” деган сўзни кўргач, ўзича кулиб қўйди.

“Бечора Лойз!”

Альберт Князь қўлига исказа ва болға олиб, қўзлари билан девордаги календардан бугунги санани қидирди: 21 июнь – авлиё Алоизий Гонзаго куни.

Уста Лойзни исм куни билан қутлаб, унга охирги буюк тухфани қолдирди – ғилмоннинг қўлидаги китобга ўзининг ўлими санасини битиб қўйди. Болғанинг сўнгги зарби тиниши билан устахонада сукунат чўкди. Кураш тугади. Уста асбобларини ташлади-да, ўз фариштасининг хукмига бўйсунди.

Rус тилидан Рисолат ҲАЙДАРОВА таржимаси





АДАБИЙ ҲАЁТ

Ўзбекистон Ёзувчилар уюшмаси бутун ёз бўйи республикамиз вилоятлари бўйлаб турли тадбирлар ўтказди. Уюшманинг адабиёт тарғиботи, ижод майдонига кириб келаётган ёшларни қўллаб-қувватлаш йўлида ташкил қилаётган турли хил тадбирлари бир мақсад – ўзбек адабиётининг эртанги кунини янада серфайз қилишга қаратилган. “Истеъдод мактаби – 2015” минтақавий семинари аввало Жиззахда бошланиб, навбати билан бошқа вилоятларда ва ниҳоят, Қорақалпоғистон Республикасида бўлиб ўтди. Мазкур семинар истеъдодли ёшларни кашф этиш, уларни қўллаб-қувватлаш, янги-янги асарларга йўл очиш, ижод майдонида ўзининг илк қадамларини қўяётган ёшлар ва элга таникли шоир, ёзувчи ва драматурглар ўртасидаги ижодий мулоқот ва маҳорат сабоқларини уюштириш каби хайрли мақсадларни ўз олдига қўйган эди. Ушбу семинарларда ижобий баҳо олган ижодкорлар республика семинарига йўлланма олишди. Республика семинари эса кузда, мамлакатимиз ҳаётида қизғин бир палла – ҳосил кўтариладиган бир давр бошланганда бўлиб ўтади. Бу ҳам ўзига хос мажозий бир маъно касб этади. Ижодий семинарлар ёз бўйи пишиб, ўз мевасини кўрсатади ва якунга келинади: бу йилги семинарлар ғолиблари орасидан “Биринчи китобим” лойиҳаси иштирокчилари танлаб олинади.

Уюшма “Биринчи китобим” лойиҳаси доирасида чоп этилган китобларни тарғиб қилиш ва шу аснода ёш ижодкорларни элга танитиш, ўқувчи ва талабаларни китобга меҳр руҳида тарбиялаш мақсадида мазкур лойиҳа қатнашчилари иштирокида ҳам талай тадбирлар ташкил этди. Биринчи китобларини чоп эттирган ёшлар Самарқанд, Фарғона, Қашқадарё, Хоразм вилоятларида ҳамда Қорақалпоғистон Республикасида бўлишиб, китобхонлар билан учрашишди, тенгдошлари даврасида турли адабий кечада ҳамда учрашувларда қатнашишди.

* * *

Ўзбекистон Ёзувчилар уюшмасида бўлиб ўтган “Маънавиятимизга бефарқ бўлмайлик!” номли давра сұхбати жамоатчилик ўртасида катта қизиқиши ўйғотди. Ўзбекистон Ёзувчилар уюшмаси раиси, Ўзбекистон ҳалқ ёзувчиси Мухаммад Али раислик қилган мазкур тадбирда Ўзбекистон Бастакорлар уюшмасининг раиси, Ўзбекистон санъат арбоби Рустам Абдуллаев, академик Бахтиёр Назаров, Миллий эстрада санъатини ривожлантириш ва мувофиқлаштириш кенгаши раиси, Ҳалқ шоири Иқбол Мирзо, таникли журналист Аҳмаджон Мелибоев, “Ўзбекнаво” эстрада бирлашмаси бош мутахассиси Азизбек Турдиев, таникли шоира Шарифа Салимовалар сўзга чиқдилар.

Тадбир бугунги кунда яратилаётган ва телевизорларда, радио тўлқинларида ҳамда турли аудио ва видео тасмаларда омма орасига олиб кирилаётган қўшиқларнинг бадиий савиясига бағишланган бўлиб, унда қўшиқ ва куйларнинг тарбиявий аҳамиятга эга бўлиши кераклиги, ёшларнинг маънавий оламини бойитишга хизмат қилиши кераклиги таъкидланди. Айниқса,



қўшиқларнинг миллийлиги масаласи катта баҳсларга сабаб бўлди. Айтиш керакки, интернет саҳифаларида ҳам ушбу давра сұхбати боис турли баҳслар кўтарилиди. Баҳс иштирокчилари турли ёшдаги қўшиқсеварлар бўлиб, уларнинг чиқишиларида битта муштараклик – қўшиқларнинг савияси масаласида қайғуриш борлиги кишини қувонтиради.

Давра сұхбатида, шунингдек, Ўзбекистон халқ шоири Анвар Обиджон, таникли адабиётшунос олим Нусратулла Жумахўжаев, Ўзбекистонда хизмат кўрсатган артист Зарифжон Азизов, ёш шоира Санобар Қулмирзаева ва бошқалар ўз фикр-мулоҳазаларини билдирилар.

* * *

Истеъдодли ёшларни излаб топиш ва юзага чиқариш Ёзувчилар уюшмасининг барча аъзолари олдидағи долзарб вазифалардан бири саналади. Халқимиз истеъдодларга бой, уларнинг биронтаси ҳам назардан четда қолмаслиги керак.

Шуни инобатга олган ҳолда Ўзбекистон Ёзувчилар уюшмаси қошида “Ёшлик” клуби ташкил этилди. Клуб ўз фаолияти доирасида бадиий ижоднинг барча жанрлари бўйича ижод қилаётган истеъдодли ёшлар учун қизғин ижодий муҳит яратиш, уларга тегишли йўл-йўриқлар кўрсатиш, устоз адаб ва шоирларнинг маҳорат сирларини ўрганиш сингари муҳим масалаларни қамраб олади.

Ишонамизки, истиқболли ёшларимиз “Ёшлик” клубида ўқиб-ўрганиб, учрашувларда иштирок этиб, тобланиб, келажақда адабиётимиз уммонига шарқироқ сойлар, тошқин дарёлар бўлиб қуйилади.

* * *

Ўзбекистон Ёзувчилар уюшмасида “Шеърият: бугун, эртага” деб номланган, мустақиллик даври шеърият муаммоларига бағишлиланган давра сұхбати бўлиб ўтди. Унда Ёзувчилар уюшмаси Шеърият кенгаши аъзолари, шоирлар, адабиётшунослар, адабиёт муҳлислари иштирок этди. Кенгаш раиси, Ўзбекистон халқ шоири Махмуд Тоир давра сұхбатини олиб борди.

Шеърият кенгаши аъзолари Муҳиддин Омон, Ҳумоюн Мирзо, Ойгул Суюндикова, адабиётшунос олимлар Нўймонжон Раҳимжонов, Нурбой Жабборов ва бошқалар мустақиллик даври шеъриятининг асосий хусусиятлари, етакчи тамойиллари ҳақида гапирдилар.

Ёзувчилар уюшмаси шунингдек, наср, драматургия, публицистика, бадиий таржима ва болалар адабиётининг бугунги аҳволи ва истиқболи муаммоларига бағишлиланган давра сұхбатлари ўтказди. Мазкур тадбирларнинг мақсади мустақиллик даври адабиётининг муҳим масалаларига яна бир бор нигоҳ ташлашдан иборат эди.

* * *

Марҳум адаб ва шоирлар рухини шод этиб, уларнинг адабий меросини ўрганиш биз учун азалий қадриятдир. Ўзбекистон Ёзувчилар уюшмаси-



да “Мустақиллик ва адабий мерос” мавзусида давра сұхбати бўлиб ўтди. Тадбирда ёзувчилар, шоирлар, адабиётшунос олимлар, ёш ижодкорлар ва мархум адибларнинг оила аъзолари иштирок этишди.

Ўзбекистон Ёзувчилар уюшмаси раиси, халқ ёзувчиси Муҳаммад Али тадбирни очар экан, ўз асарлари билан ўзбек адабиёти тарихидан муносиб жой олган мархум шоир ва ёзувчиларни ёд этиш, уларнинг таваллуд саналарини нишонлаш, қабрларини обод этиш, келгуси авлодлар учун ибрат ва маҳорат мактаби бўладиган адабий меросини, қўллэзмаларини бекаму кўст сақлаш, уларни эълон қилиш, Ёзувчилар уюшмаси ва Адабиёт музейи ўртасидаги ҳамкорлик алоқаларини фаоллаштириш масалалари ҳақида сўзлади.

Якин икки йил ичида Президентимизнинг “Ўзбекистон халқ шоири Муҳаммад Юсуф таваллудининг 60 йиллигини нишонлаш тўғрисида”ги ва “Ўзбекистон халқ шоири Зулфия таваллудининг 100 йиллигини нишонлаш тўғрисида”ги қарорларининг қабул қилиниши мамлакатимизда ўзбек адабиёти ривожига ҳисса қўшган ижодкорларнинг ижоди ва улар қолдирган адабий меросга катта эътибор қаратилаётганинг ёрқин намунасиdir. Айни пайтда ҳам уюшмада мархум ёзувчиларнинг адабий меросини ўрганиш бўйича қатор вазифалар амалга оширилмоқда. “Ўзбекистон адабиёти ва санъати” газетасининг “Тирик сатрлар”, “Шарқ юлдузи” журналининг “Унутмас мени боғим” рукнида Миллий уйғониш даври адабиёти вакилларидан тортиб Истиқлол йилларида яшаб ижод қилган, Ватанимиз озодлиги ва мустақиллигини куйланган барча шоир ва ёзувчиларнинг асарларидан намуналар чоп этилмоқда.

Давра сұхбатида Наим Каримов, Бахтиёр Назаров, Умарали Норматов, Ўқтам Мирзаёр, Миразиз Аъзам, Икром Отамурод, Тўлқин Эшбек ва бошқа ижодкорлар сўзга чиқиб, мустақиллик ва адабий мерос мавзусида ўз фикр-мулоҳазаларини баён этдилар.

Ватанимиз мустақиллиги шарофати билан қалам ахли учун яратилган сўз ва ижод эркинлиги имкониятлари бугун адабиётимиз тарихига, адабий меросга миллий ва умуминсоний қадриятлардан келиб чиқкан ҳолда муносабатда бўлишни тақозо этади. Президентимизнинг “Юксак маънавият – енгилмас куч” асарида XX аср адабиёти намояндларининг ижоди ва фаолияти, улар яшаган мураккаб ва таҳликали давр ҳақида ибратли фикрлар баён этилган. Ана шу йўл-йўриқлар ҳамда буғунги давр талабидан келиб чиқиб, адабий меросни холис ўрганишимиз зарур. Шу мақсадда Ўзбекистон Ёзувчилар уюшмаси қошида Марҳум адибларнинг адабий меросини ўрганиш бўйича комиссия ташкил этилди.

Давра сұхбатида мархум ёзувчи ва шоирлар адабий меросини изчил ўрганиш борасида қатор вазифалар белгилаб олинди.